



LIBRARY
OF THE
UNIVERSITY
OF ILLINOIS

Emblems

x170

V34i

Rare Book & Special

Collections Library

Rare Book & Special


Collections Library

Xr 50.8

Digitized by the Internet Archive
in 2010 with funding from
University of Illinois Urbana-Champaign

*Typus
PHILOSOPHIAE
MORUM.*

*Virtus et decor omnis
in uno.*



*Floram ornat, recreatq; sitim, sistitq; cruorem,
sic decus, illicium, sic panacea malo est.*

Ad Arbitrium Superiorum.

Ph 1

Lib. Bibl.

IDEA SAPIENTIS,

Id est:

Grin

4

PHILOSOPHIÆ

Wenceslai MORUM *Carshelyi*

PARTES TRES,

Mon.

Paulini

ETHICA,

THEO-POLITICA,

An.

OECONOMICA,

in 73.

Summariâ methodo comprehensa,

Problematicis Quæsitis, & Emblematis
illustrata.

AUTHORE

R. P. ANTONIO VANOSSI, è Soc. Jesu.



TYRNAVIÆ,

—
TYPIS ACADEMICIS SOCIETATIS JESU,
ANNO M. DCC. XLVI.



26152



x. 170
V342

PRÆFATIO AUTHORIS

AD LECTOREM.



Abes lector benevole sum-
mariam Philosophiæ mo-
rum Synopsis. Tracta-

vère materiam hanc plures lau-
de sua dignissimi: Raynaudus, de Ra-
conis, Vernulæus, Lipsius, Savedra,
Barclajus, & alii cum Philosopho-
rum Principe Aristotele. Quorum
alii fusissimo calamo partem unam,
vel alteram Scientiæ hujus comple-
xi; alii vel Scholasticâ, vel Politicâ
duntaxat methodo sunt prosecuti.
Mibi, quod hoc non obstante, argu-
mentum idem, hocque tractandum
pacto delegerim, illud momento erat
cumprimis, quod teste Antiquitatis,
& Sapientium ævi nostri coronâ, Sa-
piens esse possit nemo, qui hac non
præcellat Philosophiâ. Quis porro

excellat in eo, cujus ne prima quidem noverit fundamenta? Græciæ certè, & Latio veteri is erat Philosophiæ hujus decor, & gloria; ut cùm aliam ferè ignorârint, huic uni annos complures sacrare dignum operæ pretium censuerint. Hodie vel solum Philosophiæ nomen, quia multos tanquam acerbior cortex, tomorum item legendorum improbus terret labor; scholasticum seposui tractandi modum, brevique compendiô, quid Sapienti cuivis expetendum, fugiendûmve in omnem vitam sit, indicavi.

Neque est, quòd verear, alienam, ut dicimus, in messem nos falcem immittere, sive dum Politicæ, sive dum Oeconomicæ summa capita pertractamus. Neque enim aliam nos Politicam prosequi visum est, ac eam, quæ Sapientes quosvis, quales publico natos, & Moderatores esse oport-

porteat , formet; atque ideò Theo-
Politicos , quod Philosophiæ est pro-
prium. Neque arcana Statuum ,
Regnorum , aut Consiliorum eâ cau-
sâ disquirere libuit , ne vel hujus no-
tæ argueremur , vel summariæ do-
ctrinæ limites excederemus.

Ethicas , Politicásque doctrinis
Quæstiones , emblematis , & symbo-
lis mixtas inspersimus , erudito com-
plurium genio satisfacturi , utilique
è mente Horatii , dulcia permixtu-
ri. Plura in Politicis , & Oeco-
nomicis qui cupiat , rem vel belli-
cam duntaxat , vel agrariam , nau-
ticam , hortensem , &c. tractantes ,
per me licet , consulat , non Philo-
sophos. Quorum opus per Univer-
salia ducit , è quibus facilis ad par-
ticularia sit progressus. Neque e-
nim aut villicos , aut olitores , aut
vinitores nobis formare propositum ,
sed Sapientes sui , rerumque sua-
rum

rum curatores, experientia his fundamentis nixa, cætera facile te docebit. Aliam quidem me fateor viam initurum fuisse, si laboris Philosophici calamum, & mentem non vetuisset contentio.


Tu lector amice, innocua temporis furta sin utiliter, benevolè à me certè locata, æqui, bonique consule: & sin probare propositum libeat, vel oppellam; nè reproba, & votis satisfacisti. Habebis, si eruditionis sis amans, sin aliquid, quo erudiaris, vel oblecteris, id certè, quo lectorum memor reddaris. Lucianum esse si libeat, unum id in aurem dictum habe: Aut aliter facturus, aut emendaturus, si (per tempus) licuisset, eram.



PRÆLIMINARIA.

QUID ETHICA? PARTITIO?

OBJECTUM?



Quisquis es, errorum sexcenta pericula pensa;
 Sis Nestor, Juvenis, Crasus, an Irus, idem est.
 Erroris, vitæque eadem fors: te nisi ducat
 Regula, quam spectes, quàmque sequâre ducem.

Ethica, seu moralis disciplina, ipso
 vocis etymo Græcis *ἠθική*, ab *ἦθος*,
 quod *mores* significat, dicitur; ut, quæ
 mores hominis (parvi illius orbis com-
 pendii) præceptis suis instituit. Scientia
 hæc pars Philosophiæ princeps est, quam
 Aristoteles quidem l. 2. Metaph. c. 1. & Theophrastus in
 A Theo-

Theoricam ; seu *speculativam* primum, quæ in solius veritatis cognitione consistat ; deinde in *practicam* divisit, cujus finis sit *actio*. Platonici tamen, & Stoici melius in *naturalem*, *rationalem*, & *moralem* sunt partiti. Rationem more suo sapientissimè Aug. l. 8. de civit. Dei c. 4. explicat per similitudinem dicens: tria sunt in artifice necessaria, ut quidpiam efficiat, natura, doctrina, usus: quorum primum ingeniò, secundum scientiâ, tertium fructu dijudicatur. Sic triplex est Philosophia. Naturalis propter naturam. Rationalis propter doctrinam. Moralis propter usum. Nos omisâ naturali, seu Physicâ, & rationali, seu Logicâ Philosophiâ, moralem duntaxat, & quidem brevitati, & oblectamento consulturi, omisâ scholasticâ methodo, persequimur, quæ teste Tullio l. 5. Tuscul. quæst. à Socrate primum è cælo in terras deducta, privatis domuum, & Civilibus Urbium communitatibus est introducta. A Platone, deinde Aristotele, cum primis à Seneca ad omnem rationis amissum est exculta. Palatum hæc promulsis ut acuat amplius, secundas veluti mensas addimus, quæsitâ nonnulla; eruditam legentium curiositatem tantisper oblectatura.

Tamet si Aristotele l. 2. Eth. c. 2. teste *agere secundum rectam rationem commune sit* ; eò quòd recta ratio ingrat homini quasi impetus ad rectè agendum, & honestè ; *Ethica* tamen est necessaria, quia id Aristotelis dictum tantùm est verum, donec prima hominis innocentia nihil vitiorum malitiæ attrahit ; quæ nisi arte, & industriâ excolatur, & curetur, instar ægritudinis hominem corrumpit sensum.

Dividitur *Ethica* in *Monasticam*, *Oeconomicam*, & *Politica*. Homo enim considerari potest, vel sibi soli consulens, & sic *Monastica* à Græco *μοναχ* dicta eundem dirigit. Vel spectari potest ut domus, & communitatis Paterfamilias, quem erudit *Oeconomica*. Vel quod divinissimum est, prout præter dicta duo habet curam etiam salutis publicæ, legum, æquitatis, & Judiciorum, quem *Politica* instruit. De quibus Philosophorum Princeps 178. libros scripsisse fertur, exiguæ tamen supersunt reliquæ. 10. scilicet libri ad Nicomachum, 7. ad Eudemum,

demum, quorum alter filius, alter discipulus erat. Duo magnorum Moraliū, Politicorū 8. & duo Oeconomicorū.

Quare cū auditor hujus scientiæ sit solus homo recti, honesti, & Patriæ amans, & nulli malum desiderans: objectum ejusdem materiale remotum est voluntas humana. Proximum verò est actio humana prout ad rectitudinem dirigenda.

Formale est rectitudo, seu honestas operationis dependenter à conducibilitate ejusdem ad ultimum finem inducta. Finis est beatitudo per actiones rectè ordinatas obtinenda. Unde vides Ethicam esse Practicam, cū finis ejus semper sit praxis. Sic Aristoteles l. 2. Eth. c. 2. præfens tractatio non est speculationis causâ, quemadmodum aliæ (non enim fit, ut cognoscamus, quid sit virtus, sed ut boni efficiamur: alioquin nulla esset ejus utilitas) necesse est, ut de actionibus, quomodo agendæ sint, consideremus.

Neque dicas: Aristotelem l. 1. Eth. c. 3. dicere, Juvenes minùs esse idoneos Moralis scientiæ Alumnos, cò quòd plerumque æstu passionum abrepti, Ethicæ præcepta non curent. Nam intelligendus is est solùm de Politica, ut quæ ætate, & experienciâ discitur; secus Ethica, quæ cereis animi motibus frænandis plurimùm conducit. Actum enim agas, si vires sumant ineradicabiles. Unde alibi Aristoteles ait: nihil referre, *an ætate sit juvenis, an moribus? non enim est culpa in ætate, sed in eo, quod pravis affectibus servit.*




PHILOSOPHIÆ MORUM

PARS PRIMÆ. MONASTICA. QUÆSTIO I.

Generalia Moralitatis Principia.

§. I.

Quid beatitudo hominis ?



Hic scopus est, hic meta viæ, nè tardior instes;
Fac spectes oculis, æthera sæpe tuis.
Nam quot ibi stellas, totidem calcaria cernes,
Quæ stimulent tardos ad sua regna pedes.



DOCTRINA ETHICA.

Rs per Aristotelem nihil temerè, aut sinè ratio-
ne cùm faciat; per eundem verò cùm melius
sit, quod naturâ, ac sit illud, quod arte præsta-
ur; certum videtur, nihil in orbe agi, aut agere casu solo,
sed

sed ad finem omnia destinari. Finem Philosophus l. 2. Phys. c. 3. nominat, *cujus gratiâ aliquid fit*. Hic intentione præcedit actionem operantis, executione consequitur. Media è contra ad finem præcedunt executione, intentione sequuntur, cum tantum adhibeantur finis obtinendi causâ. Finis alius dicitur *qui*, seu qui ab operante intenditur; alius est *Cui*, cui scilicet intenditur. Alius est *prosecutionis*, alius *aversionis*, alius *operis*, alius *operantis*. Denum *ultimatus*, ad quem ex natura sua omnia referuntur. Alius *non ultimus*, qui est medium ad ultimum finem consequendum. Hominem ad felicitatem, seu beatitudinem conditum cum Sapientibus nemo dubitat. Felicitatis porro objectum, seu *beatitudo objectiva* est *Summum bonum*. *Beatitudo formalis*, seu felicitas est actualis rei illius fructio, & possessio. Unde cum Aristoteles 2. Phys. c. 7. felicitatem dicat esse *bonam actionem*, vides, quod hic finis non sit ultimus, quia scilicet per bonam actionem homo dirigitur ad summi boni fructiorem, tanquam ultimum terminum. Vides item, quod cum dormiens sopitis sensibus operari non possit, formaliter etiam beatus non sit. Ità idem l. 1. Eth. c. 8.

De objectiva hominis beatitudine 288. opiniones veterum fuisse refert Aug. l. 9. de Civ. DEI. Quorum alii cum Aristippo in voluptatibus corporis. Alii cum Cræso in divitiis, ac bonis fortunæ; alii in fama & honore cum Periandro. Alii cum Stoicis, in virtute sola, & rectè operando constituerunt; ità ut morbos, dolorem, pauperiem *non mala*, sed *rejeclanea* tantum dixerint; cum tamen his contraria, valetudinem, fortunas, &c. bona esse existimaverint. Ego cum Aristotele l. 1. Eth. c. 10. & Tullio sentio: beatitudinem formalem esse *secretis malis omnibus cumulatam bonorum omnium possessionem*, quæ tamen in hac vita haberi non possit. Unde Solon sapienter: *nemo, quoad vivit, felix*. *Finis est expectandus*; ille scilicet, *ut ex perfecta virtute operans, tandem secundum rationem vitam defungatur*. Quodsi verò DEI operatio (qui beatitudine præcellit omnibus) juxta Aristotelem est contemplativa, & ex humanis felicissima sit illa, quæ huic maximè est cognata; propterea, quod DEI to-

ta vita beata sit, hominibus verò eatenus solùm, quatenus similitudo quædam eiusmodi operationis ipsis inest; negari non potest, principalem beatitudinem perfectam in contemplatione DEI consistere; ità, ut *DEUS ipse sit beatitudo objectiva*; formalis verò beatitudo sit ejus cognitio intuitiva, amor, & quasi unio. De Raconis q. 2. A. 2. His accedit delectatio, certitudo de perpetuitate, immutabilitas in voluntate, &c. de quibus plura Theologi. Propter hanc felicitatem æternam mala Physica fiunt bona, & beatitudo mundi nugæ sunt, in comparatione hujus. Si porro æternitatem animæ in dubium voces. vide Politicam infra.

QUÆSTIO ETHICA.

An infelix quis esse possit, quia felix?

AFFIRMATUR.

QUANTUM nomine ipso alienus, tantum merito magis, an demerito suo proximus sortis ludibrio, quisquis felix. Vide fortunæ ludum, orbis circus est, ac theatrum. Pila dulcior, frequentior, quidni etiam facilior nulla, quàm quem secundo, ut aiunt, natum Numine Gratiæ aluere. Sejanus orbis Domina, Belizarius Orientis Imperii, Anna Bolena Angliæ quanta nomina, nè dicam Numina! quid singulis excidii, atque adeò infelicis ruinæ an causa, an magis occasio? placuisse Cæsari, triumphasse Justiniano, Henricum octavum amoribus sic laqueasse; ut sui impotens ambitus, cum terminum nactus, quod crederet, non haberet, suo eundem lapsu decrefcere deberet. Nempe grandia omnia, ut præcipitia semper sunt, sic vertigini proxima. Lux nimia, tametsi suo digna pretio, quia hebetat aciem, ingrata ferè. Cedris Libani minantur fulmina, dum contrà myrica tentis sui secura. Littora legere & commodi est, & securitatis. Altum qui petit, ô quoties undis, ventis, æquoreis piscibus fabula primùm, tum etiam esca, ut fieret, præmium tulit. Squalent favore Cœli altissima ferè culmina, intonsis rupibus cœlo æmula, dum valles pluviis fecundantur, & frugibus,

bus. Ut si unum illud magnitudinis abundans sit præmium, cætera omnia altiore posse despectare supercilio. Cave, anceps alea est. Invidia ferè, quos elidere nequit, rodere ut minùs, gaudet. Dens acerbus, si non semper destinato interitu, at lacerato certè gaudet nomine, hoc uno viperino satis litatum credens genio, si cùm virum ipsum felicem non possit, meliorem ejus partem, famam dico arrosam crudele furori suo solatium, & Trophæum statuatur. Sed & illud felicitati jure quodam est proprium, quantum super alios efferri, tantum super se ipsum; eò periculosiori fato, quò sui minùs securus alienis est odiis, qui his ipsis fortunæ Etesis se securissimum credit. Olei in morem labitur ridens alveus, at fundo tempestates coquit, & fulmina. Mentitur, ut solet, Alcyonem sireni blandiens, non ut recreet, sed ut perdat. Memento Solonis Cræso etiam inter aspera inclamantis: *Cræse, Cræse, gloria tua est infelicitas maxima.*

NEGATUR.

ITane verò, fons prosperitatis, origo sit turbinis? Quæ communio lucis ad tenebras? ortus, & occasus? gloriæ, & ignominie? Ut nomine, sic sorte distent, felicitas, & excidium, oportet. Nunquam massica vitis spinas, nunquam Hesperidum mala tribulos gignent. Sint certa venena viperis, ambrosiâ pascit, & nectare, quos melior fors risu oblectat. Turgeant Favoniis carbasa, ut provehantur; vado fixa secus hærebit liburnica, non aliâ retenta anchorâ, quàm infelicitate. Vicina fulmini jaçantur culmina. Quid laurò sublimius? immunis tamen. Quid olympò celsius? & quæ tempestas vel pulverem ejus prorubat? periculi res certa quàm maximi, alto subsistere; Cur, quos Dii anavère, & Gentes, in sublime super vulgus tulère? Furant in culmina Cæli injuriæ, solo æquant unum, dum sexcenta consistunt. Nulla proinde in orbe felicitatis seges est speranda, si omne illud spernendum sit semen, quorum vel unum fors & fortuna suppressit. Si qua preffit felices tempestas; preffit, non quia erant, sed quia visi; non eò nempè, quòd felices, sed quia felicitate

te indigni vel meritorum inopiâ, vel ignorantia forte sua utendi. Dedecet mentem pumilam gigantis clypeus; quod tutelæ futurum, ac decori, opprimit, non quia nocivum, sed quia imparem gravat. Rodit livor æmulum? nulla ætas Aristarcho libera. Æquè, an iniquè vitam exegeris, Lucianum calcaneo imminem feres. Rodat, se rodit magis; more, quo lunam allatrant catuli; splendoris aut cursûs obicem statuunt nullum, aures alienas, sua ora flagellant. Apage tam exilem & illum animum, qui, dum secundi rident Favonii, sibi duntaxat fidens, sic vela pandit, ut sorti diffidat nihil. Credulitatis illud, aut imbellis est animi vitium, non felicitatis. Quisquis fortunâ perit, quàm parum sui, tam parum veteris illius est conscius, ferreâ cautum fortunæ esse lege, ut incautis & credulis semper insolentem ludum ludere pertinax gestiat.

§. II.

Quid bonum, & malum in communi?



Quæ bona, quæ mala sint? cùm sit modò quæstio: dicam,
Scire quod exoptas, sis bonus, anne malus?
Putrida si placeant, corvus; si vipera, Arachne es;
Flores virtutum si placeant, apis es.

Do-

DOCTRINA ETHICA.

Luisse olim nonnullos refert Aristoteles l. 1. Metap. c. 4. qui duo rerum omnium principia adstruxerint. *Bonum* pro bonis, *malum* pro malis: quem errorem Manichæi Pythagoræos secuti propugnârunt, quos S. Aug. l. de Genesi doctissimè confutat. Bonum omnes æqualiter definiunt, esse videlicet *id, quod omnia appetunt, & cui nihil deest ad perfectionem propriam.* Unde vetus illud; *bonum ex integra causa, malum ex quolibet defectu.* Quæ tamen non ità intellige, quasi idem bonum omnes appetant; quia hoc solùm verum est de summo bono; vel quòd nullum sit bonum, quod non omnes desiderant; cum de ratione boni solùm sit, ut expetatur ab eo, cujus naturæ competit. Beatitas, quæ rebus ipsis inest, dicitur *objectiva*; illa verò, quæ ex parte actûs rem appetentis, dicitur *formalis*. Beatitas objectiva alia est *transcendentalis*, quæ convenit rei ideo, quia hæc res est. Alia est *naturalis*, seu *Physica*, quæ convenit rei propter naturam suam. Alia demum *moralis*, seu *honestæ*, quæ convenit naturæ rationali secundùm rectam rationem operantem. Bonum dividitur in *honestam*, quod per se decet naturam rationalem, & propter se appetitur; ut virtus, quæ etiã potest habere rationem finis. In bonum *juvandum*, quod corporis, vel animi voluptatem causat; ut: cibus, & potus melior, honor, & laus. Denique bonum *utile*, quod juvat ad aliquid obtinendum, v. g. opes ad honores acquirendos. Hæc tria bona oportet esse conjuncta, nihil enim aliàs boni nomine meretur insigniri; cùm nihil verè utile esse possit, nisi idem sit honestum; ità Cic. de officiis l. 3. Quòd tamen vulgus sæpe in bonum tantùm apparens, tanquam in verum bonum feratur, rationem dat Aristoteles l. 3. Eth. c. 4. quia scilicet id vel causat simplicitas, vel mens excæcata. Sicut sanis hominibus salubria sunt, quæ verè talia sunt, ægrotis diversa placent, & diversa conducunt.

Aliud est bonum *animi*, seu id spectet ad *intellectum*, ut scientia, sapientia, gratia illuminans, &c. seu ad vo-

luntatem, ut est gratia supernaturalis inflammans ad omne bonum, inclinatio in bonum, virtutes morales ipsæ. Aliud est bonum *corporis*, quod inest ipsi corpori, ut robur, valetudo. Huc referuntur bona extrinseca, quæ extra corpus sunt; præcipua sunt honor, qui per Aristotelem l. 1. Rhet. c. 5. est signum æstimationis de beatitudine honorati. Præsertim signa honoris publici, v. g. statuae, Colossi, sepulchra, &c. quæ sunt causa laudis, gloriæ, admirationis. 2dò. Divitiæ, & potentia, quæ sunt rerum & gratiæ copia, quibus hoc ævo tribuitur plurimum. 3tiò. Nobilitas, seu meritum familiæ, ut honoretur ob præclarè gesta. *Privata* est, quæ per originem parentum ducitur; *Publica* est nobilitas Civitatis, & gentis, quod homo sit ex tali loco, vel gente ortus, v. g. olim Cives Romani: ob quod Paulum Judæi non ausi flagellare. Hæc tamen Nobilitas sola parvè pendenda. Virtus enim, ut cum Sædæra loquar, non nascitur, sed fit; hæc sola germanæ nobilitatis mater. 4tò. Amicitia. Hinc fit, quod nemo finè amicitia esse vel velit, vel possit. *Amicus* enim maximum est bonorum externorum, ita Arist. l. 9. Eth. c. 11. & l. 10. c. 8.

Malum seu imperfectum, quid ab opposito sit, facile intelliges, scilicet *id, cui deest aliquid ad debitam perfectionem*. Quod fit vel *negativè* per puram privationem, v. g. cæcitas in oculo, vel *positivè* ponendo contrarium, v. g. calor in aqua, dolor in corpore. Lepidum id sanè, quod aliqui cum Cartesio & Stoicis censeant dolorem corporis nihil esse extra intellectum; cur æger, qui tamen sapiens est, uri, secari, & amaris pharmacis torqueri non sustinet? nonne vel mentem facile firmaret in contrarium sapientiæ suæ, si id, quod sentit, nihil esset extra intellectum? Contunde artus omnes Philosopho tali, & quære, an nihil sit extra corpus dolor ille? & facile audies clamantem cum podagrigo, nè tumidum corpus vel premas, vel tangas; quia tum rectè affligi se sentit, cum à te etiam nesciens, neque te videns, tangatur.

Malum ibidem triplex est: 1. *Naturale*, quod naturæ contrariatur, ut mors homini, & animali. 2. *Morale* seu *culpa*, quod adversatur rectæ rationi vel legi, eò quod

quòd hominem ratione præditum fædet. 3. *Penale*, seu *pœnæ*, quod propter culpam infligitur; aliàs per abusum dicitur *supplicium*, quia ob pœnam meriti supplices esse solent, ut pœnam evadant. *Reatus* pœnæ est meritum, quod ex propria culpa ponitur ad pœnam tolerandam.

Malum *naturæ* subdividitur in mala *externa*, ut paupertatem, amicorum jacturam, &c. opposita bonis externis suprâ dictis. Licet enim hæc omnia moraliter nec bona sint, nec mala; bona tamen, vel mala esse possunt causaliter pro varietate subjecti debilis, vel fortis, cui obveniunt. Malum *rationis* dividitur in *errorem*, & *ignorantiam*. Ignorantia est nescientia rerum, quarum scientia debita est statui, munerì, &c. ut enim varia est ætas, & fortuna, sic varia hominem decet scientia. Aliarum enim rerum ignorantia non est naturaliter mala. *Error* est, qui intellectus dictamen perturbans ad actiones malas inducit.

Celebris quæstio, an voluntas malum, ut malum amare possit, facile solvitur: negando id fieri posse, nisi colore boni proponatur. Neque enim quisquam tam descendit à lege naturali, & hominem exiit, ut gratis esse velit malus, ait Seneca l. 4, de beneficiis. Ubi bene notali *gratis*. Ergo verum est, quòd licet malitia ipsa odio sit, & pudori, fructus tamen ejus, seu delectabilitas, vel utilitas proposita movet ad sui amorem. Scilicet corrupta phantasia gypsum vel calcem appetit locò cibi.

Q U Æ S T I O E T H I C A.

Utrum sapienti præoptandum vita longa, an fama?

P R O V I T A.

STadium curfui, palæstra pugili orbis est. Non omnis passus Gygantæus est, ut bravium obtineas; neque vacat dedecore, rude velle donari, priusquam illustres texueris ab hoste manubias, & trophæa statueris. Obsidionales, Civicæ, murales si quem cinxerint laureæ, ut palmarum, sic stipendiorum plurium ferè heros est. Grandia, ut mole sua sunt grandia, sic tempore magnitudinem obtri-

obtinēt. Angusto operi comes semper est angustia temporis. Nunquam unius aut diei, aut anni periodo gloriae suae colossum virtus statuit. Naturæ & artis hæc regula, dum magna operatur, lustra, decades, sæcula in censum ducere. Nobilitas ut pretio sit, ævum ferat Praxi-tem, & Apellem miratur ars, quot dies parandæ gloriae requirebantur? Phœnicem ut Arabia felicior prodigium pariat, ævum numerat. Quid quid illustre, sumptu, labore, mente grandi fundatur, quidni etiam tempore? inò ut magnum nihil in orbe, cui magna non prinitus, aut subinde amovenda pericula, remora, incommoda, quis omnia hæc nisi vitæ longioris & annorum serie triumphet? fors, & industria, virtus rerum omnium Pater est, mater mora. Ephesinæ Dianæ fana, Rhodios Colossos, Memphis prodigia celebrant fasti, neque tamen subticent tempora, quibus fundata. Palma, ut regiones ditet, lustris; flumen Urbes & orbem ut fecundet, regiones plures decurrit, vectigalibus ut aquarum, sic temporum spoliis eget. Ætate quod caret, pretio ferè caret. Sibi soli servit Jerichuntis rosa, nata vespere, manè mortua. Ut brevis tempore, sic affectu. Momentum fungos parturit, momentum perdit. Avaro nimium arctatur gloriae limite, qui Adonidis tantum annos cupit, non Nestoris. Vix momento designes grandia, nedum exequaris. Ut meritò sapienti vita brevis vixdum semen, nedum meritum sit æternitatis. Albo, quod dicimus, corvo rarior in terris avis, cuius gloria meridiem obtinet linea unica.


P R O F A M A.

FAma vox exilis, res vaga, momentum grande. Non tempore, sed merito sapiens vitam metitur. Durant ingloria ferè animantia, cervi, corvi. Quæ pretiosa, non tempore, sed suo se commendant. Domesticum sit pretium, non alienum, quale & tempus est. Horatii Colclitis fortitudo, magnanimitas Scævola, candor Lucretiæ, constantia Senecæ, omnium gloria quanto stetit? momento pene dixerim mortem unā & æternitatem adferente. Parum interest, quanto ævo; dum constet, quantus degas?

gas ? ævum querceta ferunt, non gloriam; dum pauciorum temporum arbor, ut pomorum pretio, sic affectu superat vel myriadem horum. Quid interest, an procellis sæculi jactare, si vivas. An orbe toto, quia casibus ejus major, meliori tui parte vivas gloriæ, & exemplo? nisi quod dum vivis, exilium subeas; famâ è contrâ vivens libertate gaudeas, quia gaudes æternitate tum nominis, tum felicitatis. Vivit sapiens docens hic scripto, ille exemplo virtutis. Animum hæc, non tempora requirunt. Atque adeò momentum unum & semini, & merito sapientis sufficit, ut vivat semper. Virtute sola monumentum nanciscitur ære perennius, famam temporis & sæculorum, quo ut innocua magis, sic felicior vita est nulla. Quoties auditus sapiens orbis vitam fastidians? Cujus studia ambitus, fraus, furor, crepundia. Hæc lacrymas Heraclito, Democrito risum, Diogeni linguam exacuere. Quid horum sapienti in votis? Cui sola mens virtutis conscia sufficit, quæ eo duntaxat felix, quod nullis temporum arctata limitibus, infelix tum primum futura, cum temporis jugum reciperet. Felicius vivit, qui sui famâ triumphat. Nescit hæc ægritudinis, & tædiorum molestias, quibus dum vita quævis obnoxia, aut acerbitate, aut metu ipsorum malorum mors magis perennis dicenda est. Vive vel momento, dum fama & virtus tua dureret æternum, vitæ melioris, & felicitatis terminum attigisti.



Quid & quoruplex sit actio humana? Eiusdem principia, & moralitatis.



Ambitio Scopulus, sua cuique Cupido charybdis.

Vita mare est, ratio nauta, volupra notus.

Ah! quot in hoc scopulo, quot in hac petiere charybdi!
Navita dum rapidis vela dat ire notis.

DOCTRINA ETHICA.



Actio humana est medium quoddam ad finem ultimum; alia dicitur actus *humanus*, qui fit cum plena advertentia; ut scriptio, sessio, &c. alia dicitur actus *hominis*, cui abest deliberatio, v. g. casu moveo pedem, vel oculum. Actus *humanus* dicitur *elicitus*, qui immediatè procedit à voluntate. Actus *imperatus* est actus potentiarum, vel membrorum ad imperium voluntatis elicitus; v. g. ab intellectu, sensu, & membris. Aliquando voluntas actum secuturum imperat sibi ipsi. Actus *internus* dicitur, qui in animo manet. *Externus*, qui sub sensus cadere potest, seu dictis, seu factis. Omnes actus eliciti tendunt vel ad finem, vel ad media circa finem. Finem spectat ex Aristotele l. 3. Eth.

voli.

volitio ipsa (aliud enim est voluntas, seu potentia) *intentionis*, & *fruitio*. Circa media versatur *consensus*, *electio*, *usus*. Volitio est simplex repræsentatio, & appetentia finis, sinè reflexione ad media, & ideo sæpe est inefficax, seu non sortitur finem suum, & dicitur *velleitas*. Intentio præter complacentiam, & amorem finis saltèm confusè, & indeterminatè cognoscit media, & per hoc differt à *volitione*, quòd hæc intentio semper sit efficax, cum tamen inefficax volitio contrarii stare possit cum efficaci volitione finis alicujus, ut vetus fert adagium: *vult, & non vult piger*.

Intentionem finis sequitur *consultatio*, seu deliberatio de mediis, de fine enim ait Aristoteles c. 3. non consultamus, quia sanitatem v. g. volumus; sed media eligimus, quæ ad finem inducunt. Facta consultatione immediatè ponit voluntas consensum, qui est complacentia in mediis ad finem conducentibus, nullius tamen præ reliquis determinatio efficax. Quando verò voluntas determinat, seu eligit determinatum medium, tunc consensum sequitur *electio*. Hæc electio sæpe tantùm per intellectum distinguitur à consensu, si medium ad finem consequendum sit tantùm unicum, tunc enim complacentia in medio, seu consensus, non distinguitur ab ipsa electione medii, & ideo à multis confunditur electio cum consensu.

Post electionem ponitur *usus* à voluntate, id est actus, quo se voluntas ad novum actum juxta D. Th. 1. 2. q. 6. a. 21. vel alias facultates applicat ad media exequenda. Dico *usus*; quia *fruitio* plus est, quàm *usus* per Augustinum. *Fruitio* enim est rei inhærere tanquam fini ultimo. *Usus* verò est rem exequi non tanquam ultimum finem, in quo propter ipsam rei bonitatem voluntas ultimò quiescat. Actus hi voluntatis, licèt à nobis non advertantur, in singulis tamen actionibus fiunt. Bruta consultatione carent, quia carent intellectu, voluntatem, cæcam potentiam regulante; quam habent homines. Unde quamprimum sensu objectum percipiunt, in illud tendentia utuntur, & fruuntur, quod etiam cæcitas, & malitia in sceleratis sæpe facit. Unde illud: *comparatus est jumentis, & similibus factus est illis*.

Quòd

Quòd voluntas imperium in potentias exerceat, dubitat nemo. Quis verò sit actus imperans, seu imperium rationis, ex suprâ dictis actibus, dubitant plures. Cognitio certè, quæ usui præluceat, imperium rationis esse non potest, quia aliud est mediorum aptitudinem cognoscere ad finem, aliud actu eadem imperare. Ego cum Ptolomæo sentio, quòd sit *usus* ipse, seu actus voluntatis regulatus à ratione, ex quo sequuntur actus imperati. Imperium enim universaliter est applicatio subditi ad agendum cum obligatione ad finem superioris. Quod utique voluntati determinanti competit.

Imperium, ut dicam parte 2dâ Philosophiæ moralis cum Aristotele l. 1. Polit. c. 3. duplex est: *Despoticum*, seu *berile*, quod habet Dominus in mancipium, quod voluntati Domini non potest non obsequi. Et *Civile Politicum*, seu *regium*, cui ex iustitia aliquando potest non obediri. Tale habet v. g. Rex in subditos, qui licet subditi, tamen aliquam habent libertatem. Potentiis corporis voluntas imperat despoticè, quia manus debet tangere, lingua gustare, &c. si voluntas velit, nisi extrinsecum quid obstet v. g. morbus. Appetitum verò sensitivum, imaginationem, &c. civiliter gubernat, unde sæpe cogitationes noxiæ, imaginationes, sensus non statim recedunt, dum voluntas imperat. Potentias reliquas v. g. nutritivam, vegetativam indirectè tantum regit, prout videlicet illis alimentum dare vel negare potest pro arbitrio suo. Omnis actus imperans plurimorum sententiâ intrinsicam sibi habet totam moralitatem; per se enim dicitur bonus, vel malus, licet nullus sequatur actus imperatus: omnis verò actus imperatus tantum denominativè dicitur bonus, vel malus, scilicet ab actu imperante bono vel malo, & ideo v. g. colloquium, ambulatio, &c. moralitatem habet sibi tantum extrinsecam. Principium actionum est homo, per intellectum, & voluntatem operans. Ille tendit in verum; iste in bonum. Hæc duo sunt principia innata, seu homini *intrinseca*; alia sunt *extrinseca*; v. g. *directiva*, ut lex: alia *acquisita*, ut habitus virtutum. Alia *infusa*, ut gratia habitualis. Utraque potentia habet actus, & habitus. Habitus per Aristotelem est facilitas orta ex frequen-

frequentatis actibus ad similes actus eliciendos. *Speculativus* est actus, qui tantum contemplatur rei veritatem. *Practicus*, seu principium prudentiæ dicitur Aristoteli l. 6. Eth. c. 11. qui ad operationem dirigitur. *Voluntarium* dicitur actus voluntatis prælucente cognitione factus. *Involuntarius* est actus voluntatis non prælucente cognitione factus à potentia tamen capaci cognitionis, hinc bruta non faciunt actus involuntarios. *Spontaneus* est actus liber à coactione, factus etiam nullâ cognitione præcedente. *Coactus* est contrarius spontaneo, & datur etiam in brutis.

Voluntarium liberum dicitur, quod est immune à necessitate antecedente, & coactione. *Voluntarium* necessarium aliud est *antecedens*, seu absolutum, quod omnem voluntatis electionem antevertit, v. g. prædeterminatio, cui voluntas resistere nullo modo possit. *Voluntarium consequens* est, quod est à necessitate consequente, scilicet ex suppositione. Hoc voluntarium liberum *libertate indifferentiæ* (id est, quod positis omnibus ad agendum requisitis potest agere, vel non agere) sicut per Theologos ad merendum supernaturaliter est necessarium, ita certum est dari in homine ex Patrum, & Scripturæ testimonio. Sic Paulus 1. Cor. 17. *non habens necessitatem, potestatem autem habens suæ voluntatis*. Aristoteles l. 1. de interpret. c. 6. *ad quid sunt humanae consultationes, si hoc, quod facimus, necessario fit?* Liberum & voluntarium duplex est: *Immediatum*, & *mediatum*; item *formale*, & *virtuale*. Formale est, quod in se ipso intenditur, v. g. volo furari aureum. *Virtuale* est, quod intenditur in causa, v. g. scio me in hac occasione semper facere malum hoc, malum fit voluntarium, quoties occasionem sponte adeo. Aliud denique est *directè*, aliud *indirectè* volitum. An verò libertas sit voluntati penitus intrinseca, vel sit partim extrinseca, cum hæc parum juvent ad actuum moralitatem, Theologis discutendum cedo. Ut etiam illud, quæ scilicet principia tollant, vel minuant libertatem, breviter id solum nota:

Quod libertatem tollat *necessitas physica*, omne involuntarium, *inadvertentia*, & *ignorantia invincibilis*, id est, dum post diligentiam sufficientem habitam aliquis

rem scire non potuit. Secus est de ignorantia vincibili & supina, ob hanc enim punitur, si quis legem, & jus commune nesciat, quod scire facillè poterat, & debebat. *Metus* secundùm quid tollit solum, id est, infirmat voluntarium, quia actio licet ex metu facta, tamen procedit ab intrinseco, seu voluntario; ut patet in homine merces ex metu naufragii in mare projiciente. Passiones v. g. amor, odium, &c. sæpe potius augent voluntarium. Libertatem tamen aliquando concupiscentia vehemens per sanctum Thomam minuit, & consequenter minuit peccatum in ratione liberi propter cæcitatem, quam offundit intellectui, & dicitur peccatum *fragilitatis*.

Q U Æ S T I O E T H I C A.

An Philosophia parandis fortunis proficua?

N E G A T U R.

SI lingua, Divini eloquii sensu, incendium grande; vires suas nullibi acrius exserit, ac in Philosophos. Consumit cultorum suorum domestica, nedum fortunas augeat acquisitis. Lippis quid tritum amplius veteri illo: *Dat Galenus opes; dat Justinianus honores: Pauper Aristoteles cogitur ire pedes.* Et meritò; Aliud diverbio veteri est scapha, aliud squamma. Aliud sus, aliud Minerva. Quid ergo rei aut publicæ, aut privatæ conferrat studium, quod Deorum hominûmque consilio, quieti, non labori sacrum. Hinc lucos inter ac nemora sapientum quondam Stoa, Peripatus, Academia. Quasi verò aut præter, aut supra hominum sit communionem, velle sectari sapientiam hanc, & curis rei domesticæ intendere. Quem experientia rerum Magistra non erudit, næ ejus in sicco hærebit celox, & tarda domestico in fundo parsimonia dictaturam geret. Quid porro experiatur publicæ rei is, qui ne nomen quidem rerum novit? nisi plutei, librorum, aut lampadis? Nempe Philosophorum, ut scire solum voluptas, sic hæreditas ferè est tota, sed macra admodum, quia fortunarum inops, & vacua. Vis causam? verborum plaustris, distinctionum laqueis, quæstionum tor-

tormentis, quid rei familiari minùs necessarium, minùs Reipublicæ opportunum? Legibus fundatæ, auctæ, provectæque steterè Respublicæ, non noctibus ejusmodi, quas vel Attica omnis suo cum Athenæo ignoret. At Sapientum calculo iisdem ferè consistunt, augenturque principiis omnia, quibus capere. Quid Pythagoræo silentii septennio Pater familias pariat domi? quid lucubrationibus diurnis si in suppetias noctes petat Bellidux, actura arena est? Enim verò, neque terminorum, ac subtilitatum acie (penè, quod res erat, dixerim, araneorum telis) Palæstram Martis salutis Patriæ, neque sancita Codicis tutelæ urbium, neque Galeni placita incolumitati publicæ, ac tuorum expedit. Ætates cense, fastos consule, fors eadem Philosophiæ à veteri est. Phœrecides, Empedocles, Diogenes, Socrates, cæteraque somniantium nomina quid unquam? an non res angusta domi? nunquid curta supellex omnibus? Nimirum umbris, quos placet pasci, aut ventis gloriæ, mortalium studia his censum non ferunt. Non probatur illis ferè, quod orbis sententia est: jure proinde sinè ostracismi lege, talionis fato, eorum juxtà non probantur orbi studia. Quoties, qui profundissima naturæ abdita suas inter Stoas atque Peripatum rimati feliciùs, cæcutivè ad singula? Domi aquilæ, talpæ publico. Et horum aultero silentio, Catoniano supercilio, absorptis iugeniis fortuna, gratiæ, occasio faveat? quibus ferè parantur fortunæ, stant rerum publicarum perinde ac privatarum impendia. Videas proinde monstra hominum ejusmodi vili ferè lacernâ vix ossibus rodendis satis dare; nedum Politicis, bellis, aut forensibus apta studiis. Quasi verò vel eò impotes, quia dum poliendo intenti ingenio, siderati, absorpti, enthei evasere. Dum contrà sexcentorum hodie, praxim, non speculationem colentium, urbes & regna moderantur consilia; gazas omnes fortunæ, & auri rivus inaurat, feliciorum vel eò, quòd Aristotelem nè primis quidem labris degustârint.

A F F I R M A T U R.


EOne tandem abjectionis deventum? ut supra promptuaria & caminos par sideribus ipsis non sapiat animus,

dum interpret es ejusdem , lingua , quæsito huic vel locum tribuit disceptandi? ô tempora ! itâne verò? fortunis parandis proficua non sit, sinè qua ars melior quælibet , nè artis quidè sibi vendicet nomen? Andabatæ nostras ipsi tenebras amemus? nostrorum ipsi bonorum incurii , quia ignari. Toile orbi Philosophiam, Peripatos cum Julianis damna; tenebras Reipublicæ, pestem Patriæ, excidium Civibus induxisti. Hâc jacente animâ, jacebunt scientiæ omnes, umbra quidem, non tamen, quod hodie sunt orbis commodo, corpus. Parandis fortunis quid aptius observato benigniori siderum influxu, mutationibus temporum, discreto caloris aut tempestatum præfagio? neque enim pares seminum, morborumque sunt vices Lunæ crescentis primordiis, quæ sunt cadente: & hæc omnia, quo pacto noverit is, cui scientia hæc artium Magistra deficit? Medicus, si paramiâ veteri incipit, ubi Philosophus definit; sublato fundamento, quid superstruas? Legum inter sese pugnantium vis, quantis sæpe scrutanda ingeniis; reddenda momenti momenta, promenda causæ æquitas, verbô: decernendum de summa rerum, Urbium, Regnorum, vitæ, ac sanguinis jure. Et sententiam dicat, momenta penetret, argumentis convincat, qui vix verbi vim, nedum rerum substantiam penetrare doctus per Philosophiam? Æthiopem me hercle antè reddideris candidum, ac imperitum per Philosophiam ingenium id probârit. Garriat vulgus inutiles has quæstionum sentes, Mœandris asperioribus annos, ac ætatem conteri, rem domesticam his pessumdari, non augeri. Fremant cauponantia ejusmodi cerebra, quantum libuerit, coquinariam, aut nummulariam Philosophiam malint, quàm esse scientiam. An non ditior fortunis suis ille, qui omnia sua secum gestat, pectoris videlicet, ingenique bonis, quibus si fors cætera rapiat, parare possit abrepta. Hinc sua Philosophis semper gloria, Majestas, quódque comes est, Fortunæ. Aristotelem Philippus quanti? Macedonem Philosophia sapientem juxtà fecit, atque Belliducem. Quid Athenis Zeno; Dionysio Plato; Traiano Dion; Athenodorus Augusto? claves ille urbis à senatu, triumphus communio- nem alter, aurigantem sibi Plato nactus tyrannum. Quæ
feli-

felicior olim Respublica, ac ubi aut Reges Philosophi, aut Reges philosophati? Empedoclem ipsum salutem suorum dixit Græcia, dum Philosophiæ ductu, pestilenti voragine obstrui doctâ, fame patriam liberavit. At enim egentes fuere Philosophi, aut illustres togâ, sagôque sexcenti, quos Philosophia non genuit; illustriores futuri hi, si Philosophi ante, quia acutiores; egentes ferè illi, quia vel cum Crate volentes, vel Philosophastri magis, quàm philosophantes. Neque est, quòd vereâre umbris per Philosophiam obtundi, aut enthea reddi ingenia. Te tibi reddit, non eripit. Philosophia sana, tibi ac publico vivere ut possis, docens. Imò verò ampla illi sunt & patrimonia, cui non fundi, sed culti per Philosophiam ingenii opes sunt amplæ. Tributaria sibi meritò & industriâ parabit, quæ fors aut hæreditas sanguinis negavit. Hæc qui habeat, quid ultra fortunarum exposcat? Denique Det Galenus opes, det Justinianus honores; Absit Aristoteles, ibit uterque pedes.

§. IV.

Quæ actionum moralitas, & Corollaria?



Quò te cunque feras. novus, & novus implicat error.
Et trahit in tacitos hinc, simul indè dolos.
Hic nisi te duxet virtus Ariadna, peristi:
Victima lethei sis miseranda vadi.

DOCTRINA ETHICA.



Moralitas actûs dicitur per ordinem ad suam regulam. Si huic conformis sit, dicitur *bonus*, *honestus*, *laudabilis*: si non sit conformis, est *vituperabilis*, *inhonestus*, *malus*, &c. Per regulam hic non intelligitur consilium, suasio, monitum; his enim obedire etiam sinè peccato est liberum, nisi fortè contemnantur. Sed intelligitur lex directiva obligans ad agendum, vel omittendum quidpiam. Sive lex hæc sit *æterna*, & *imparticipata* cum Platone, id est DEUS ipse. Sive lex *participata*, id est, dictamen rectæ rationis docens nos, quid erga DEUM, proximum, nos ipsos nobis agendum sit; v. g. DEUM amandum, Parentes honorandos; proximum injuriâ non afficiendum. Sive potius sit *conscientia* ipsa, quæ cum S. Thoma definitur, quòd sit iudicium intellectûs dictans, quid hic, & nunc agendum, quid non agendum, quid turpe, vel honestum.

Conscientia hæc dicitur *recta*, cum rectè judicat. *Falsa*, & *erronea*, cum falsè judicat quacunque de causa, & occasione. *Dubia*, cum ob pares utrinque causas suspensus hæret animus; nè tunc malum morale, seu peccatum committas, ad unam partem te resolvere debes, judicando hanc tibi licere. *Probabilis* est, quæ rationes in utrumque habet probabiles, in hoc casu quidquid agas, prudenter agis. Nisi ob periculum damni proximi tenearis potius eligere partem tutiorem, juxta illud Judicium, & Medicorum: *in dubio pars tutior eligenda*. Illud universim de conscientia certum est, ante actum ab homine positum conscientiam esse ducem, & Magistram; in actu esse testem; & post eundem esse judicem, & tortorem. Ad has regulas reducuntur omnes reliquæ, scilicet lex *naturalis*, seu consensus Gentium, v. g. legatos non esse lædendos, pacta servanda, &c. Lex *positiva*, quæ in commune bonum à Superiore est instituta. Superior iste varius est, & ideo lex alia *Divina*, & alia *humana*. Alia *novi* testamenti. Illa etiam triplex est: prima quoad mores, scilicet in decalogo. Secunda quoad Cærimonias.

Tertia

Tertia Judicialis. Alia est Ecclesiastica seu Canonica, à legibus seu Canonibus. Alia Civilis, autoritate Principis vel Magistratûs facta. Hæc rursus alia est, *jus publicum*, plures gentes obligans v. g. imperialis. Alia est *privatum*, & *municipale*, quod regno vel Provinciæ tantum uni statutum. Harum utraque *scripta* est alia, alia *non scripta*, scilicet per traditionem solum ad posteros ex usu, & consuetudine devoluta. Harum quamvis obligare dubium non est, cum *omnis potestas à Deo* sit teste Scripturâ, & *qui potestati resistit, Dei* (id est primæ regulæ) *ordinationi resistit*. Qualis verò lex esse debeat? quando rogari possit? quid de acceptance, abrogationibus, iritationibus sentiendum? Jura, & Theologi vestigent.

Quæstio duplex, an scilicet dari possit peccatum Philosophicum? & an dari possint actus indifferentes, seu nec boni, nec mali? à Theologis fusè deducitur. Hæc ad utramque breviter habe: Peccatum Philosophicum, seu actum contra solam naturam rationalem, id est, dictamen rationis commissum ab homine DEUM invincibiliter ignorante (ex hypothesi quòd modicum ad tempus talis homo dari possit) ethicè dari posse propugnant nonnulli. Ratio illorum prima est, quia per Aristotelem ad formale peccatum nihil plus requiritur, quàm ut malum aliquod morale ex ratione naturali eligatur. Sic enim ait 5. Ethic. c. 9. de injustitia, *quando quis ex electione laedit, tunc est malitia*. Et S. Thomas q. 71. à Theologis consideratur peccatum præcipuè, secundum quod est offensa erga DEUM; à Philosopho autem morali, secundum quod contrariatur rationi. Ratio 2da: dari potest bonum formale morale Philosophicum, & hoc, quia disconvenit cum pura natura, præcindendo ab ulla lege obligante, vel etiamsi hæc non daretur. Alii verò negant. Eò quòd non possit dari peccatum, quin hoc ipso saltèm implicite, & sub conceptu convertibili agnoscat Deus. Nam si cognoscitur actus illicitus, talis est propter legem prohibentis Superioris, qui certè ipsa natura rationalis non est, utpote obligabilis, consequenter solus Deus. Quamquam etiam primæ sententiæ Patroni judicent peccatum illud dici debere potiùs puram dedecentiam

tiam rei, v. g. mendacii, quàm quòd sit obligatio stricta vitandi: præsertim cùm minùs requiratur ad malum, quàm ad bonum.

Ad secundam R. cum D. Thoma, & plerisque, non posse dari actum indifferentem, id est: qui neque sit malus, neque bonus. Ratio 1^a est: quia omnis actus hominis fieri debet propter finem, seu rationem aliquam per Aristotelem 1. 3. Eth. c. 4. cùm autem actus specificetur ab objecto & fine, juxta illud: *quidquid agant homines, intentio judicat omnes*: & finis nullus sit moraliter neuter, quia vel convenit rationi? & tunc est bonus; vel non convenit? & tunc est malus; consequenter nulla actio erit indifferens 2. Eth. c. 3. Ratio 2^a est: quia vel actus v. g. lusus fit ex nullo fine? vel propter finem ultimum Deum? vel ob delectationem solam, utilitatem, &c. Si primum, tunc est otiosus, consequenter malus ex illo Matth. 12. *rationem reddituros de omni verbo otioso*. Nam otiosum per S. Thomam est, *quod intentione debita reëlitulinis, aut ratione justa necessitatis, aut piæ utilitatis caret*. Si fit ob ultimum finem, est actus bonus. Si ob delectationem solam, est moraliter malus, quia medium ponitur loco finis, ut habet Augustinus: *omnis malitia utifruendis, & frui utendis*.

Nota bene tamen per accidens posse dari actum indifferentem, vel defectu advertentiæ, vel quòd bona fide putetur actus esse indifferens, vel ob ignorantiam invincibilem operandi propter finem naturalem Deo subordinatum, vel propter Deum. Quamvis autem ad hoc, ut actus moraliter malus sit, non requiratur, ut operer propter ipsam malitiam, sed satis est, ut advertatur malitia legi contraria; *malum enim ex quolibet defectu*: bonus tamen formaliter actus, & meritorius non est, nisi fiat ob finem honestum, saltèm virtualiter intentum. Aristoteles 2. Eth. c. 4. Non enim meretur laudari, qui ex sola naturæ inclinatione mansuetus v. g. est, hoc enim habet etiam irrationale, v. g. turtur, ovis, &c.

Aristoteles dicens, *non omnia esse prava, aut studiosa* (id est honesta) *sed esse aliquid eorum medium*; intelligit ex objecti specie abstracta à fine, sic enim nec est bona, nec mala species. Sicut lignum ex se nec est magnum,

gnum, vel parvum, durum vel molle, & tamen in individuo omne est durum, aut molle, parvum aut magnum.

QUÆSTIO ETHICA.

Uter aptior fortunæ ludus, Nobilis, an Ignobilis?

PRO NOBILI.


ADversis ferendis nec vires, nec moles corporis in-
condita tantum, quantum rebus humanis major a-
nima confert. Hæc nobilem obtinet. Palladium
magnarum mentium nobilis ferè est anima. Ut vulnus
altius, majorisque periculi, quod mentem, non itè corporis
ferit; sic certior semper laurea est menti, cui dos na-
talis, sub jugum mittere spiritus, & affectus. Minora
sunt, quæ vulgus pavet, ac, ut Nobilem feriant. Ma-
gno natus sanguine, non nisi magnis æmulus. Trahitur
cum sanguine virtus, vestigalis locò cos est procella.
Cælum sedibus, terra suis convulsa cardinibus palæstram
statuat; fors, livor, orci furia unum in caput paciscantur
fœdera: Nobile sit, impavidum ferient ruinæ. Quin pul-
chrum Samsonis exemplo censebit omnibus congregi, hoc
uno nomine triumpho dignior, quia tot ac tantis æmu-
lus, imò Suppar. Novit Nautarum dexteritas, contortis
rudentibus adversis quoque Typhonibus medias inter pro-
cellas provehere carbasa, ut obsequium fiat arte, quod
natura ponit obstaculum. Artem an compenset, an su-
peret natura in nobili, anceps esto. Pharus illi luctantes
inter tempestates ac fulmina vox una: *Nobilis es*. Pavere
nescit, quem nascendi conditio super vulgus constituit.
Quasi verò adversis major sit anima, quòd humiles super
myricas lauro æmula caput nubibus inferat. Tributaria
nobili sunt magnanimitati stipendia, mortes, faces, disci-
mina. Fulmina faces illi sunt gloriæ, quibus orbi clare-
scat nomen. Ut quondam Cæsari Ponti furia, cum nautæ
trementi animos adderet; *Quid times? Cæsarem vebis*.
Adèd vigor excelsus & indoles stirpem ferè consequitur.
Tremant ad minas turbinis, ad procellarum umbras im-
belles, fors alia nobilis, Fortes namque creantur forti-
bus.

bus. Aciores nunquam scintillas vomit adamas, ac dum incudem patitur; gloriosior nunquam fax, ac dum nube Cœlum inducitur. Pudet Majorum gloriæ labem inure: quin acrior stimulus est, facinorum gloriâ & superare. At quando tam gloriosi arena triumphî, ac gloriæ? nisi cum fortis, æmulantûm, lividorum satellitium nobilem stipat. Quo quia cingitur rosa, ut nube sol, flores inter ac sidera obtinent Magistratum.

PRO IGNOBILI.

A Page Nobilitatem, dum seposito gratiarum lenocinio ignes Bellona loquitur, & fors procellas. Non bene conveniunt, nec in uno corde morantur lacte charitum pasci, & fulmina ferre. Jovis alite vecti Ganimedes, sinu ejusdem enutriti, quid in asperis audeant? Actum egeris, ut quis heroem induat, cui inter stivam, ac clypeos cunarum locò primûm recipi, & educari non constitutum est cœlitus. Prima virtutem cunabula, ut leonem unguis & format, & indicat. Non trosculis, sed Herculeis laceratis gaudium est cum fortuna luctari. Hæc cœs virtutis masculæ minoris ferè fortis nobilitat genios. Quasi verò nobili sanguis suffecerit, aliis hac forti magnanimitate animus sit roborandus. Amplior communi hominum sorti audendi copia, quia amplior est, & ferendi. Næ tu mihi palæstritam Herculem dederis, qui deliciis ad nauseam ab ovo, ut loquimur, farciatur. Stadium præbe, quo desiderentur commoda, & genio indulgendi facultas. Hæc forti domestica est minori, quam nobilis habeat nullus; qui porrò & quærat, rarus est. Quamquam nec id sanguinis, aut prosapiæ privilegium est cœlitus, tutum esse à fulmine fortis, vel eò duntaxat, quòd quisque eorum homo gignatur. Sit quantumvis supra sortem vulgi. extra aleam & tela fortunæ est nemo. Ferire, aut nocere soli quamquam nequeant catuli, allatrare tamen conceditur. Quò altior quisque, eò casui, ut turbinibus propior. Summa petit livor, perflant altissima venti, Vaticum firmat effatum. Onera comitantur honorem ut plurimûm, neque fastidia aut potiora numero, aut graviora ponde-

pondere, ac in fastigiis; quasi verò non jam tiaris ac sceptris; sed & mortalium cuique Fenellæ pomum in patrimonium cedere oportuerit. Sint aduersa nobilitati juxtà atque mirificis communia, non communis tamen omnibus animus. Certiori longè telo impetitur ignobilis, ut certior in victimam destinatur. Anne tamen vel eò certior ejusdem casus? Imò verò fortior cum Antæo confurgit, quia Matri vicinior. Magnas trahunt ruinas ingentia pondera: quod humi natum, casum non metuit; & vel eò fortius, quod debita conditioni suæ censeat vulnera, quibus fors bacchatur, insultat, triumphat. Rudior est concha unione, quem sinu concludit, aceto ipso rigidior, quia tempestatibus adolevit. Sic, ut ignobilis sit nascendi conditio, nobilitatem mens superat, quia duris innutrita; eo sibi plaudens, è mente Romani pugilis: Serpens, fitis, ardor, arenæ, dulcia virtuti: gaudet patientia duris. Quæ nobiles vires proterunt pondera, delectant Milonem, quia gloria est Crotoniatæ, non nisi arduis adoleuisse. Venenum ipsum in alimenta naturæ transivit Mithridati, & aliis, quia primo cum lacte assuetis. Quid igitur insolenti fortunæ ludo titubet? qui, quid ejusdem sint blanditiæ, felici sortis infelicitate ignorat. Intercluditur respirium nimis alta petentibus, aëri nempe spissiori natura assuevit. Dum piscis recentioribus innutritus fontibus, perit in stagni uligine. Sic deliciis assueta mens nobilis acerbitati sortis succumbit, cui tanquam sibi temperato aëri alacris adhæret ignobilis, imò etiam deliciatur.




Q U Æ S T I O II.

De Virtutibus.

§. I.

Quid Virtus in genere ?



Certa mori potiùs, quàm labem ferre, Magistra
 Sit mustela animi, quisquis es, usque tui.
 Dum nive frons candet, niteat nive mens quoque: nè, qui
 Albicat exterius, nigricet interius.

D O C T R I N A E T H I C A.

Etsi communiter dicamus actum bonum, sicut *virtutum* dicimus actum malum. Utrumque tamen meliùs per Aristotelem pro habitu sumitur. Habitus virtutis autem ex Philosopho est 1. Rhet. c. 4. *per quem homo redditur bonus, ut efficiat actum bonum.* Habitus triplex est, *naturalis*, vel habilitas recta utendi suis membris, sanitas, &c. *Acquisitus*, qui per actus acquiritur, sic fabricando faber fiet. *Infusus* à Deo, ut fides, spes, charitas animæ infusa. Licet natura in malum prona per virtutem vinci possit, vel per astutiam simu-

simulari, extirpari tamen vix potest. Universim tamen boni, & mali habitus intenduntur actibus similibus, contrariis actibus minuuntur.

Quamvis virtus in genere sit duplex; altera, quæ intellectum perficit, & *intellectualis* dicitur, altera, quæ voluntatem ornat, & *moralis* dicitur; homo tamen is solum dicitur sapiens, virtutis cultor, qui utramque complectitur. Virtus intellectualis est quintuplex. *Intelligentia*, cognoscit principia lumine naturæ nota, v. g. *totum est majus sua parte*. 2da *scientia* cognoscit res evidenter. Opinio enim formidat. Fides est obscura. 3ta *Sapientia* contemplatur altissima, v. g. Divina. 4ta *Ars* est habitus mentis cum recta ratione effectivus. Ità Arist. 6. Eth. c. 4. 5ta *Prudentia*, regula actionum bonarum, & malarum, ut homo agat, in quantum homo est, hæc tamen virtus est potius moralis.

Dividitur ab Aristotele l. 7. Eth. c. 1. Virtus in *semi-virtutem*, seu *continentiam*, quæ est, dum malum cognosco, ex vehementia tamen passionis illud communiter committo, & hoc habent incipientes; *video*, aiunt, *meliora, probòque, deteriora sequor*. 2dò in *virtutem*, quæ licet aliquando tentetur, vincit tamen appetitum; & hæc est proficientium in bono. 3tiò in *heroicam*, seu *Divinam*, quæ quia hominem appetitu suo ità superiorem facit, ut quasi major homine liber sit à tentatione, perfectorum tantum est, & dicitur *Divina*. Semi-virtuti opponitur *continentia*: virtuti *vitium*: heroicæ adversatur *feritas*: quæ hominem feris similem facit, cùm agat omnia secundum brutalem appetitum naturæ solius.

Virtutes *Cardinales* sunt cardo honestatis. Theologicæ versantes circa Deum, tres; *Fides*, *Spes*, *Charitas*. Credunt enim, sperant, amant Deum propter Deum. Cardinales sunt: *Justitia*, *Prudentia*, *Temperantia*, *Fortitudo*. Ad has reducentur omnes aliæ virtutes. Harum omnium præstantia consistit in mediocritate per Arist. 6. Eth. c. 3. Quæ in eo sita est, ut habita ratione statûs, ætatis, &c. omniumque circumstantiarum neque per excessum, neque per defectum pecces, id est, neque agas nimium, neque nimis parum. Non tamen intellige medium

dium hoc esse medium *rei*, seu arithmeticum, sed sufficit medium *rationis*, seu geometricum, & convenientiæ. Excipio virtutes intellectuales, in quibus nunquam possumus peccare per excessum, aliàs excellens Dei amator, vel artifex ideo esset vitiosus, quia est excellens.

Q U Æ S T I O E T H I C A.

Utrum major virtus, cedere invidia, an palàm cum eadem luctari?

P R O L U C T A.

PAcem elementis antè, quàm virtuti, & invidiæ dederis. Virtutis semper comes invidia. Quasi verò inevitabile sit pendendum pro foribus theatri virtutis & honoris tributum, censura linguarum. Nullus quondam honoris ad Sacra aditus, nisi per culmen virtutis; par animi fors virtutem colentis, & livoris. Ignavum agat Mytecum, aut Codri sibi scruta deponat, ingloria sago & togâ cucurbita jaceat, qui Theonem cupit evadere. Otiosæ duntaxat calamitatis, & socordiæ privilegium est carere viperino æmulantium sale. Pascitur namque in vis vis livor, ut aranea flore. Sublata oculis virtute jacet enervis sinè sanguine tumens, eo solo felix, quòd se depastus: dum debita virtutem sequitur gloria, & verus illud, quod jacenti Colosso Rhodio datum: *visus, cum staret, minor*. Quodsi verò tanta sit vitio temeritas ad iniquè audendum, cur virtuti non sit ad triumphandum pro debito juxtà ac merito? Cedit insultans protervia, cum virum sentit. Debile est vitium, alieno tantum potens timore; scintillæ in morem, quæ si spernatur, adolescit in flammam. Fortunatas si cupias Insulas, vela pande, adversa licet sint ventorum murmura. Timor, dum animum tuum coquit, gloriæ apicem sin eripiat, tardabit ad minus. Solem æmulare, aperta fronte nubes rumpentem, & noctes. Fatuus ignis invidia est, quantum cesseris, crescit; quantum contempseris, & contranixus fueris, ringitur, & suffocatur. Scopulus esto, irrudentem suo, non tuo damno rumpas. Hæc, sapiente teste, lex una est justitiæ,

stitiæ, ut nulli quis noceat, nisi injuriâ laceffitus. Cos
ferro durius saxum attere, cum ab eodem impeteris. Nè
tibi ipsi injurius puriorem pectore flammam comprimens,
& orbem exemplo destituas, & dissimulatione multa con-
tortos spiritus in phlegma detorqueas. Cautela nimia in
terrorem, atque adeo virtus sæpe in vitium degenerat.
Sed & jocus est æmulis elinguis virtus; dum nemo non
tentat rodere, à quo vicem dentis non metuit. Virtutis
metu suum metitur robur livor, & insolefcit victoriâ, non
jam occultè, sed luce palàm audens proterere sub vulne-
re trepidantem.

C E D E N D U M.

Periculi plena res, invidiæ palàm congregi. Cede, fa-
ciliùs, imò & feliciùs viceris. Acrior cietur tempe-
stas, dum nubila dissipantur, quia aggeratis viribus regre-
diuntur. In te liventes armas, & quibus hastenus fortu-
næ favor ignotus fuerat, in te concitas, ut crabrones ho-
sti fœdera pacifcantur. Quæ temeritas, oro, ruere in a-
pertum hostem, ciere tibi ipsi exitium? sic apes se per-
dere volunt, cum tentant laceffere. Regula princeps Bel-
liducum: nè quid nimis audacter. Animus non desit, vir-
tus stratagemate vincat sapius; consiliò fortior, quàm vi.
Tranquilla ferè germana est virtus, gaudet victoriâ, quam
natale extorquet meritum, non cruentus gladius Castrioti.
Pax virtutem, vis furorem stipat satelles. Jovis aquila
rela torquet in æmulos, struthio eadem concequit. Gran-
dia fortem decent. Absit, urticam æmulari velit, quis-
quis fortis nomen sibi deposcit, dum tangitur, lædere, &
ferire gaudens. Stratagema plenum ingenii habe: cede
tantisper, etiam impari; laurum referes, dum herbam por-
rexisse crederis. Quod sol Cælo, virtus mortalibus est;
sensim rumpit nebulam, dum plenum spargat meridiem.
Signat in horologio horas & tempora, non officit um-
bra; signat virtutem invidia, & ut horologium, sic vir-
tus regit exemplò. Nunquam qui jacet, æmulum patitur.
Certior magnitudinis nulla est tessera, quàm trophæum li-
voris. Ut certior nulla imbecillis est oculi, quàm, si quem
solis assurgentis feriat radius. Tortor ipse sui est livor.
Ut

Ut Ætna æstus vomens seipsam depascit. Portatilem in se ipso super tauros Phalaridis, & vulturem Titii orcum circumfert. Ignis ille solus tormento est liventi, qui alios Solis instar reddit illustres, vespertilionis aciem ferit. Ferendi sunt canes, ait Romanus Sapiens, non pro feritate, sed pro consuetudine allatrantes. Faciunt, non quòd furrant, aut noceant, sed quia solent. Sperne; virtutis gloria est lanceo cum Diis ulcisci pede.

§. II.

Quid Prudentia?

Si videas sociam scopulis hæsisse carinam
Tum Palinure tuæ carbasa flecte ratis.
Verte citò proram, cave saxa latentia: damnis
Qui sapit alterius, non perit ille suis.

DOCTRINA ETHICA.

Prudencia Augustino rerum fugiendarum, & expetendarum scientia, sine constituto media quarit, quidque agendum, vel omittendum decernit, Philosophus 6. Eth. c. 5. Ad prudentiæ integritatem per Ethicos cum D. Thoma, communi sensu requi-

requiritur *intellectus*, seu vis intelligendi prius principia per se nota. 2dò *ratio*, seu rationis præstantia in æstimandis rebus juxta pretium illarum ad finem ultimum. 3tò *memoria*, quæ est notitia experimentorum & exemplorum. Hæc cum requirant tempus, juvenes prudentes ex Aristotele 6. Eth. c. 8. esse non possunt. Suppleri tamen potest memoriâ præteritotum, & exemplorum notiâ, lectione historicâ. 4tò *solertia*, est promptitudo expediendi res, maximè in repentinis casibus, & acumen ex levissimis indiciis rei connexionem advertendi; qui hoc acumen habent, dicuntur habere *Critirion* naturale bonum, seu *synesim*. 5tò *Docilitas*, est sollicita applicatio mentis ad hoc, ut doceri velit: optimum enim, & tutissimum alienis malis discere. 6tò *Cautela*, seu cura removendi incommoda, & impedimenta. 7mò *Circumspectio*, seu cura admovendi media, & quidem meliora ad finem; hanc qui habent, *sensati* dicuntur. 8vò *Providentia*, quasi futurorum prævisio, prospicit casus, qui evenire possent, quod difficillimum est, ob voluntatis, & circumstantiarum omnium mutabilitatem.

Prudentia ab Arist. 1. 6. Eth. c. 3. triplex dicitur: *Personalis*, seu privata cujusvis. *Oeconomica*, seu familiæ. *Politica*, seu publica, ad quam refertur militaris. Id universim bene nota, nullam esse virtutem moralem, quæ non reguletur à prudentia, id est à judicio practico prudenti, & vero, quod nobis dicet hunc actum esse tutò faciendum, seu esse honestum. Dixi *practico judicio*, quia cum Ptolomæo & Moralisticis Diff. 2. c. 1. aliud est judicium *speculativè practicum*, quod suadet rem faciendam sine respectu ad omnes circumstantias. Aliud est *practicè practicum*, quod cum respectu ad omnes circumstantias dicat actum hunc securè faciendum. Et hoc est judicium prudentiæ proprium, ut quæ per Philosophum c. 2. est *circa particularia*, & per eam singula debent cognosci.

Calliditas, ut Arist. c. 12. si propositum seu finis honestus sit, est laudabilis; si pravus, est versutia culpabilis. Prudentiæ dupliciter opponuntur vitia: per excessum alia, ut 1. *Prudentia carnis*, quæ secundum solum appetitum,

non verò secundum rationem ducitur. 2. *Astutia*, quia invenit simulata media ad finem. 3. *Dolus* repræsentat seu dictis, factis inventa astutiæ. 4. *Fraus* ad sola facta se extendit in executione. 5. *Sollicitudo* nimia, seu anxietas de rebus non admodum necessariis.

Per defectum opponuntur 1. *Torpor*, seu *negligentia*, per quam omittitur res, quam constitui. 2. *Præcipitantia*, quæ rem finè prævia consideratione exequitur. 3. *Inconsideratio*, quæ circumstantias non sufficienter attendit. 4. *Inconstantia*, quæ iustar arundinis vento agitatæ facillimè à proposito deflectit.

Q U Æ S T I O E T H I C A.

Utrum majus documentum Prudentiæ, verba, an facta?

P R O V E R B I S.

UT Gallicanus Hercules, sic sapiens ac providus tripode digna loquitur semper. Verborum vicem oracula subeunt Delphica. Mentis index sapienti lingua est. Mensurâ hâc rectissimè animum dimetiêre. *Loquere Juvénis, ut te noscam*, jactabat Græcia. Providentiæ ancile princeps est: loqui congrua, dum, & quando. Philosophos mansuros plures crederet vulgus, si tacuisse nossent. Intempestiva vox heu quot Catastrophen fons? Quis fortior ad Granicum amnem Clito? quis eodem sibi nocentior? ruinam vox una fundavit. Leonem unguis, providam, & sapientem, & manum, & animam lingua signat. Procul Dodonæa æra, aut crepitacula Archytæ, quæ quia sonant plurimum, parum aut nihil docent. Animi idæam cupis? linguam consule. Quod hic loquitur, sacrario tenetur. Limam ter subeant sensa, linguam vix dum semel. Cauti providentiæ gressus si sint, rarescunt: sic verba non præpropera sint, non abundant. Quidquid redundat, ipsâ sui copiâ improvidum. Ferè enim vix pretiosum est, quod abundat, vel eò, quòd obvium cuique. Samfone gloriosior nemo, dum Philistæos elideret, leonem protereret, fundamenta convelleret. Quanta hæc decora!

cora! at eodem infelicior nemo, pretio linguæ malè consultæ. En sacra. Constantino inter vetera, Alphonso Aragonum inter extera, Ferdinando, & Leopoldo Salomonibus Germaniæ inter domestica quid illustrius? Magna nomina, dum exercitus ducerent, fundarent acies, fœdera cuderent: at majora longè, cum Diis æmuli è folio jam in æmulos fulmina terrori, jam oracula funderent Majestati. Quid plura? nulli Eccho *Providi* nomen replicabit, cui non verba magis, quàm facta calculum adjecerint.


PRO FACTIS.

Mira res, aucupari verba, dum facta vocis pondere non carent. Sileat lingua, loquantur facta, *Providi* nomen comparabunt. Si Platoni fides sit, providentia agendi est cynosura, vivendi regula. Fundum Argo-navium obtinent Navarchi silentes, Geographica metiuntur stadia, & silentio suo providentissimè cursum suum dirigunt. Taceat quamvis lingua, resonant in orbe præconia, dum quoties factum nobile est, Eccho reddit: *ipse fecit*. Sub rosa latere gaudent optima quæque, tam diu tractabilia, dum latent cum corallio in undis: dum è contra flumina, quia exili se fundunt alveo, garrulitate se produnt, & spectantes de littore saxum, aut scyllam, terrent. Dignius longè citra verborum sementem agere grandia, quibus cùm æmulorum provocatur invidia, silentio agente prodigia, historiæ meritum fundatur. Lateat quantumvis auditu, omnium tamen oculi in ejus gesta figuntur, quantum ignotus publico, tantum ab eodem factis cantantibus adoratus. Sed & illud sapientibus tritum: actum agi vel illiade verborum, ubi facta momentum rei non addunt. Lacones sermone voluit Sparta, Heroës agendo grandia. Agunt hæc, qui secum plurima, cum aliis minimùm. Neque errori aut simulationi sic obnoxia sunt opera, ac ferè sint verba. Pretium suum sit provido, etsi taceat, oportet. Ut jure Pythagoras Philosophos (quorum providentia dos est præcipua) formaturus, septennium silentii præceperit, meditationem videlicet agendorum. Rectè meâ quidem sententiâ. Providentia enim non tantum linguæ,

quantum actuum est Magistra. Cymbala sonantia, quia à sonitu pretium mutantur omne, si taceant, carere pretio jure dixeris. Quare? quia quod de Luscinia ille: *vox sunt, prætereaque nihil*. Aliter actorum pretium, quod etsi taceat lingua, ipsis supereminet astris. Verba, ut momento auras feriunt, sic facili cuivis stare videntur. Facta & antequam fiant, difficultatis; & dum fiant, æmulo- rum; & postquam facta sunt, censuræ plurimum pati necesse est. Calculum si omnium tulerint, hic vir enimverò dicendus. Mempe fumus quidam sunt verba, icon facta. Signat ille flammam, sed vanescit: refert hæc proto- typon, sed æternitati. Quanto majus satisfacere ævo, quam tempori: tantò sanè prudentius.

§. III.

*Quid Justitia universim? quò refertur Pietas in DEUM,
& Parentes?*



Spèque, meidque procul; meritis, fac, munera pensa:
Si tibi Justitiæ est: si pietatis amor;
Grata puer nuper fueras qui Sarcina Patri,
Post tibi sit vetulus sarcina grata parens.

DOCTRINA ETHICA.

Iustitia à variis variè, ab Aristotele nomine iustitiæ universalis pro omnibus virtutibus, quæ sunt *ad alium*, sumpta: hîc cum eodem Aristotele sumitur pro virtute, quæ aliquem perficit ad alterum, ut illi jus, seu debitum ipsius ad æqualitatem tribuat, ità, ut sit *pars Iustitiæ universalis*, seu iustitiæ rigorosè talis. Nam eùm, Platone teste, *Meum*, & *ruum* in Republica esse debeat; quivis habet jus in rem; de qua cum veritate potestatis à DEO sibi concessæ dicere potest: *hoc est meum*. Et hoc jus est objectum immediatum iustitiæ, violatio autem juris hujus dicitur *injuria*.

Jus & *æquum* licèt Aristoteles hîc idem esse dicat, dei de tamen aliquomodo distinguit sic: quòd æquitas sit iustar regulæ lesbiæ se ad omnem lapidis figuram aptantis, seu quòd leges mitiùs interpretetur. Cùm lex omnes circumstantias, & casus possibiles prævidere non possit, consequenter exceptiones debitas nequeat facere. *Jus* verò pergit strictè secundùm legem, & ideo æquitas fundata in regula naturali legem ipsam quasi dirigit, & mōderatur.

Æqualitas alia est *proportionis Arithmeticæ*, dum v. g. reddo centum, pro centum florenis; quæ etiam est *æqualitas quantitatum*. *Æqualitas proportionis Geometricæ* est, dum habeo respectum circumstantiæ, personæ, meriti, &c. v. g. Cæsar largitur virtuti & fidei militis 10: ergo debet fidei, & virtuti Ducis 1000. Et ideo dicitur simpliciter *æqualitas proportionum*, v. g. sicut se habent 4. ad 8. ità se habent 2. ad 4. scilicet, quòd utrumque sit alterius dimidium.

Particularis iustitia alia est *Commutativa*, quæ est inter privatos invicem consideratos: & fit emptione, contractibus, dum alteri ad æqualitatem Arithmeticam datur res tantum valens, quanti valoris rem ille dedit; & ideo ut res diversi valoris ad æqualitatem reduci possint, censet Aristoteles inventum pecuniæ usum Eth. 5. c. 8. Alia est *distributiva*, quæ est in distributione bonorum Reipublicæ, & Communitatis, v. g. dignitatum, pecuniæ, &c. pro
C 3 diver-

diversitate meritorum, personarum, &c. & hæc fit tantum cum æqualitate geometricæ proportionis. Tertia est *Legalis*, quam habent privati erga superiores.

Distributiva subdividitur in *remunerativam*, & *vindicativam*; illa præmiat merentes; hæc reos plectit. Nemo enim privatus privatum aut præmiat, aut punit. Neque sufficit juxta Pythagoram tantum pœna talionis, id est, par pari reddere, v. g. si alapa viro nobili à rustico alapâ vicissim vindicaretur illata. Plus enim est hîc ad debitam æqualitatem necessarium. Plures sunt actus justitiæ: 1mò: *Restitutio*, quæ rem ablatam restituit, & damnum compensat, sicut satisfactio reddit honorem per injuriam læsum. 2dò *Contractus*, qui per Juris peritos dicitur liberalis, & voluntaria ultrò, citròque obligatio, re, scripto, vel verbò expressa. Consensus tamen necessarius est semper, ut quis obligetur in conscientia. De multiplicitate contractuum vide Juris peritos. 3tîò *Judicium intellectus*, quod dicitur Aristoteli 6. Eth. c. 3. annuus, vel abusus ab objecto.

Judicium juridicum est sententia Judicis, quæ decernit aliquid juxta allata argumenta, & testimonia. An Judex damnare possit, quem privatâ scientiâ scit innocentem, palàm tamen probatur reus? quæstio celebris est. Probabilior sententia negat damnari posse. Sed potius, si aliter fieri nequeat, officium à Judice deponi debere. Eò quòd justitia, quæ reperta est civium tutelæ, eisdem *per se* nocere nunquam debeat. Si dirigantur tormenta in obsidionibus ad partes urbis, ubi multi probabiliter sunt innocentes, per accidens sequitur eorum occisio.

Justitiæ adversatur injustitia, quæ, sicut jus multiplex est, ità multiplici injuria committitur adversus bona corporis, fortunæ, honoris. Nisi, ut ait Aristoteles c. 9. quis juri suo cedat, & libertatem det alteri (ex suppositione, quòd juridicè, id est, per leges alteri cedere possit) aliàs enim non valet illud principium: *scienti, & volenti non fit injuria*. Ut porrò injuria committatur ab aliquo, necessarium est, ut sciens is, & volens faciat actum injuriosum alteri nolenti. Si enim coactus, nescius, vel non satis advertens faciat, per accidens tantum erit injustitia, cum

cùm ob talem actum non plenè, vel prorsus non liberum nemo jure possit culpari. 2dò dicitur *alteri nolenti*; scus enim poterit quis facere rem injustam in se, sed non erit alteri injuria. Hinc etiam sibi nemo potest facere injuriam. Quia si sibi faciat rem injustam, vel facit sciens, vel non sciens? si sciens, non facit nolenti. Si nesciens, itidem non est injuria, cùm hæc debeat esse à sciente.

Justitia suum jus primùm tribuit DEO per religionem, quâ DEO summo rerum Domino, & principio cultus debitus tribuitur, idque non immediatè propter ipsum Deum formaliter (quia hoc solæ faciunt Theologicæ virtutes) sed propter honestatem ipsius actûs. Actus religionis sunt varii: Interni sunt *devotio*, & *oratio*. Externi sunt *adoratio*, *Sacrificium*, *juramentum*, *votum*, &c. Hæc religio in omnibus. sapientiâ comite, sic credit, ut quamvis altissima quæque mysteria intueatur, intellectum captivando in obsequium fidei, nihil tamen credat rectæ rationi dissonum; quod tamen omnes sectæ, & hæreses habent, quæ, ut habet Augustinus hom. 147. de temp. *quod solent videre, credunt; quod non vident, non credunt*. Illud universim certum, quod Plato l. 1. de legibus: *Omnis humana necessitatis (pacis intellige) fundamentum convelli, quæ religionem tollit*. Vide ergo, ut hæreses à contrario causa bellorum sint.

Religioni adversatur *superstitio*, dum cultus DEO debitus idolis tribuitur, vel DEUS modò non debitò colitur. Hujus rationis sunt divinationes, observationes vanæ, incantationes, &c. pacta omnia dæmonis, expressa, vel occulta. 2dò. Adversatur *irreligiositas*, quæ committitur sacrilegiò, perjuriò, &c. DEUM, vel sacram rem inhonorando.

DEUM sequuntur Parentes, post illum vitæ nostræ authores; his tribuit justitia *pietatem*, uti & Patriæ, civitatis loco. Parentes DEO æquat Aristoteles 8. Eth. c. 14. dicens: sicut DEO immortalis nunquam satîs piî & grati esse possumus, ita nunquam gratiam sufficientem nos reddere posse parentibus. Huic adversatur proditio Patriæ, & Parentum, contemptus, &c.

Parentibus, uti & Majoribus in nos potestatem habentibus jubet Justitia præstari *obedientiam*, exequendo eorum mandata. Viris genere, doctrinâ, probitate, vel ætate illustribus *observantiam*, seu vivis, seu mortuis inter sanctos degentibus; si enim vivos colere oportuit, cur nefas sit mortuos? Benefactoribus imperat reddi *gratitudinem*, obstinatione, & memoriâ beneficii, laude benefactoris, cum oportet, mutui operis exhibitione, idque eò amplius, quò communius ferè hominibus esse consuevit, mala nobis irrogata marmori, bona contrâ exhibita aquis inscribere: id est, illorum meminisse implicabiliter, horum è contrâ oblivisci quàm primum. Et licèt benefactores non sint mercatores censendi, ut qui beneficia sua vendere velint, pro mutuis obsequiis; nèque juxta Senecæ mentem: *actio in ingratum dari possit*, nihil tamen indignius homine, & feris ipsis deterius est *ingratitude*, præsertim cum meminisse officii nullò constet impendiò.

Omnibus denique vult Justitia tribui *fidem integram*, servandam in pactis implendis, etiamsi cum hostibus inita sint; erga quos licèt calliditas bellica sit licita, promissa tamen servanda sunt, v. g. induciarum ad certum tempus prorogatio, indemnitas personarum certarum, &c. donec illa conscientiæ, aut juri communi adversentur. Ad hanc reducitur *veracitas*, seu concordia vocis & mentis. Cui, viro omni indignum, imò ut cum Aristotele 4. Eth. c. 7. dicam: summè perniciosum, & vituperatione dignum *mendacium* opponitur. Hujus species Aristoteles numerat *Factantiam*, seu *arrogantiam*, dum quis se ipsum extollit: *simulationem*, & *hypocrisim*, dum quis se deprimit nimium, cum Socrate affirmante *se nihil scire*, & in hac simulatione ut plurimum tacita latet arrogantia, vel ideo maximè nociva, quia latens.

2dò debetur omnibus *affabilitas*, seu *comitas* colloquii citra adulationis & morositatis subreptionem. 3tiò *Urbanitas* apta, seu *Eutrapelia*, dextra in salibus, & jocis tempori & loco accommodis. Per quam eruditus à stolido, ingenuus à servili maximè differt. Sic tamen joci amandi, ut scurrilitas, seu loquendi audacia; cavillatio, seu convitia, atque rusticitas fugiantur.

Q U Æ S T I O E T H I C A .

An gratia vultûs, & morum, muniis digniorem reddat ?

A F F I R M A T U R .

SI quæ orbis commodo suo vidit, aut periclitatus compendia, hæc Physiognomorum fuere. Amœna corpora (horum cum Lucretio erat regula;) mens amœna inhabitat. Laboribus quondam, favoribus hodie, si non Dii, venalia certè habet omnia mundus. Rapiunt hos sibi Placentini. Rarus publico prodest dotibus, nisi sublevet favor. Desint merita, adsit forma, & comes gratia, virtus in terris creatrix, quæ ex nihilo potest omnia, aderunt omnia. Virtus ipsa finè forma & favore ingrata est, scelus contrà ipsum jam placet, cùm persona placet. Orationem aptissimam censet Eloquentia, quæ tametsi careat nervo, lenocinio gloriatur; quasi verò vel invitas in obsequium cogat voluntates, atque ad eò omne tulerit punctum. Bravio dignior nemo, quàm pro quo liberalior donis suis perorat natura. Tanta est virtutem inter, atque ad eò meritum inter, & formam communio. Quo enim pacto injuria sit, aut esse possit gratia ei, cui natura pretium longè maximum contulit, non alio sanè munere, quàm ut rapiat, dum delectat. Munera, & munia gratiæ sunt, aut Principum, aut Senatûs; melior porro arctiôrque nulla communio, ac Gratiarum; rectè igitur gratias gratiis vultûs & morum, vectigal pendisti, non præmium contulisti. Provida rerum parens natura, ut prodiga est minimè, nil finè fine operans, ita quos ditat, ditari ampliùs cupit. Hamum præbet, quo nectat, dum operæ pretium ferat. Aurum nisi fulgeat, argentum nisi niteat, metallis cæteris non eminebit. Forma moralem utrique contulit dignitatem. Sol chorum siderum ducit, Luna nocti imperat, carebit uterque imperio, si ille fulgore, hæc candore, auro, & argento æmula esse desierint. Nempe est formæ suadendi maxima vis, & persuadendi. Rumpuntur obstacula, conatus improbi è senten-


tia mellei fiunt , cedunt è vestigio consilia omnia , dum blandum amorum fascinum pondus addit petenti.

NEGATUR.

Quid ità? purpurissus sit aut meritum , aut gradus ad fasces & purpuram? Falleris , si à candore vultûs candidatum statuas dignitatum. Sexcentos natura bellissimos , imbelles tamen animo , nullos judicio unà constituit. Rara formæ dos virtutum communio ! quod Vates olim de una : *rara est concordia formæ , atque puditiæ* , quidnî facilè de omnibus dixerit ? Ut liberalis , non prodiga tamen ferè est natura , tantum virtutis animo quarendum finit , quantum decoris tribuit corpori non quæsitum. Quid flore elegantius , aut picturis ? quis tamen illi fructus , his in senatu vox ? oblectant , nec famem tamen , nec pericula amoliantur. Prælagium flos equidem est , sed heu , quàm incertum ! Erras , mihi crede , erras , si à flore fructum continuò certissimum concludas ; pruinæ , ventos , insecta consule , & quovis vere dictam leges veritatem firmatam. Par vitri & floris fors , fragilitas nativa. Pentapolis poma nitore suo heu quam saniem tegunt ! non oculis fallacibus , sed animo crede de meritis judicanti. Quàm sæpe amænior forma , Minervam pinguem , consiliis , officiis , bellis ineptam tegit ! Durus sæpe cortex , quàm dulcem tegit nucleum ? Si concham videas scabritie , calcabis ; & tamen , quantum gerit utero pretium ? Squallentes rupes gazas tenent visceribus. Ut lacerna vilis , aut dolium , grandem Philosophum , sic Theritis forma ingentes sæpe tegit animos. Formæ damna virtutum dote cælum compensat. Virtus non fortis , sed animi est præmium. Cur ergo quod virtutis est præmium , forti , id est colori cedat in prædam ? Væ Reipublicæ , cui sic consultum ! quàm sæpe solem mentitur color , qui lunam omnem inconstantia superat ? Majestatem , & providentiam mentis petunt munera , non gratiam.

§. IV.

Quid Temperantia?



Mars; labor, & morbi: pestes damnantur, & ignes,
 Quòd pereant tantis plurima turba malis,
 Parcite; deliciae plures, atque otia perdunt,
 Quos Bellona nequit, vina, epulæque necant.

DOCTRINA ETHICA.

Temperantiæ virtus corporeas voluptates moderatur, ac potissimum eas, quæ gustu & tactu perficiuntur. Ità Aristoteles l. 3. Eth. c. 10. Virtus homine cumprimis digna; velut quæ privatum excolit hominem, cum reliquæ virtutes sint ad alterum. Quanquam in Juvenibus, & divitibus laudanda sit maximè, ut qui majorem intemperantiæ nacti sunt occasionem per ætatem, & circumstantias, omnem tamen sui amatorem juxta Clem. Alex. l. 2. Strom. c. 11. Deo simillimum reddit. Præsertim cum propter ingenitam homini delectabilium concupiscentiam, & aversionem tristium, habitum illius difficile sit comparare. *Verecundia*, & *honestas* temperantiæ partes sunt integrantes; ima fugit res illicitas. 2da prosequitur res, statum, ætatem, & circumstan-

cumstantias decentes. Potentiales sunt 4. *Continentia*, seu firmitas animi, quæ frænâ appetitum concupiscibilem contra appetibilia tactûs, vel gustûs. 7. Eth. c. 4. etsi vix differat à temperantia, Aristoteles tamen ait *intemperantem* ex electione operari, *incontinentem* verò solâ perturbatione agi. 2da est *mansuetudo*, frænâ appetitûs irascibilis, & dos Principum propria. In hac moderatur *clementia* pœnas infligendas. *Misericordia* egenis compatitur, & subleuat, ad quod ipsa natura inclinât, nè fortè cum Stoicis lenitatem hanc animi infirmitatem esse putes, quasi verò prudentem, dum natura ipsa nos compati jubet, dedecet misereri. *Atrocitas* seu *crudelitas* est excessus in pœnis; *indulgentia* est remissio nimia culparum, vitium utraque. 3tia est *Modestia*, virtus componens omnia ad decorem statui convenientem, nè per *fastum* excedat, & per *abjectionem* deficiat in cultu, & ornatu corporis, familiæ, &c. 4ta est *studiositas*, quæ frænâ innatum homini sciendi desiderium; quo abrepti complures in curiositatis noxiæ scopulos abducti, inutilia sibi, imò & noxia, è librorum non dicam fontibus, sed lacunis hauserunt. Ut sunt illa fallendi temporis *abortiva*, & *rationis* (ut ajunt) *statûs* principia è Machiavello, quæ omnia ut religioni, conscientiæ, puritati adversantur, ita igni & aquâ prohibenda. Cùm hoc uno fallendi temporis studio, dispendium fiat temporis, & æternitatis. Sed plures, Raynaudo l. ultimo de virtutibus, & experienciâ teste repereris, qui in omni eruditionis ævi nostri penè dixerim luxu doctrinæ, ad cætera omnia alacres, in solis artibus literarum torpescunt.

Subjektivæ partes sunt *castitas*, & *sobrietas*; ima vel penitus abstinet à delectabilibus tactûs, vel certè juxta rationis, & Dei leges utitur. Conservatur ea plurimum eonstanti honestâ occupatione. Fugâ occasionum, & sobrietate. Sinè Cerere enim, & Baccho frigere Venerem vetus est adagium. *Sobrietas* potum, & cibum moderatur; *temperans enim cupit, quæ oportet; quando, & prout ratio præscribit*. Cùm è contrâ intemperans statui hominis incongrua appetat, sicut Phylloxenus gruis guttur optabat, ut delectatione cibi & potûs diutius frueretur.

Qui

Qui non multa, sed singularia in cibo & potu appetit, non *intemperans* est Aristoteli, sed *delicatus*. Culpandus meritò, si ultra statum suum hæc appetat.

Temperantia adversatur *intemperantia*; vitium propriè *ferinum*, tum, quòd humanam rationem dedecet; tum quòd, nisi frænetur, ipso sui augmento hominem demùm reddat amentem. Unde bene Aristoteles: *est igitur voluntatum appetitio insatiabilis, & operatio cupiditatis similis amenti*. Verbò: ignis est, qui nunquam dicit, sufficit. addò: adversatur ei *insensibilitas*, Stoicis *Apathia*, seu *stupiditas* dicta, eò quòd stolido suo naturali stupore, nec in illis circumstantiis loci & temporis frui velit rebus jucundis, & utilibus, quibus secundùm rationem oporteret, & expediret. Et quæ nullo casu movetur velut statua, ubi meritò commoveri deberet. Hinc bene dicitur à S. Thoma *stupor naturalis*. Sed tales albo corvo similes sunt.

Temperantiæ regulas has habe ex Philosopho. 1. Turpi nunquam delectare. 2. Jucundo utere ad decen-
tiam, non velut sine ultimo, sed naturæ indulgendo. 3. Noli tristari, si tibi jucunda, licèt illa honesta fuerint, de-
sint. 4. Sanitatis & vitæ tuendæ necessaria media, si de-
lectabilia sint, præ reliquis appete. 5. Rationi concupiscen-
tia pareat, ut puer Ludi-Magistro. c. 12.

Q U Æ S T I O E T H I C A.

An bellò, an intemperantiâ plures necati?

P R O B E L L O.

AD Grajas olim Kalendas damnatus, qui primus ma-
re audaci tentârît findere sulco. Quantò penè di-
xerim dignior inauspicatis his votis, qui Martis, &
Bellonæ studia primus orbi invexit. Quid est, quod cru-
delia hujus non sentit fulmina? nemo tamen homine am-
pliùs. Unius in excidium laborant, quæ unius sunt offi-
ciò & obsequiò condita. *Enses, tela, faces, juratâque*
tartara Ditis pleno ruunt agmine, in quem scopum? ho-
mo, ut pereat. Quid interest inter Martis & mortis thea-
tra?

tra? litera unica. Quantum colludunt nomine, tantum tibi ô homo alterius in nomine signatur omen alterius. Stagnârunt mortibus campi Pharsalici, Romani sanguinis inebriavit flos. Decolores sanguine & fluctus & maria, tinxêre exercitus. Cannarum, Thrasimeni, & Trebiæ prælia, Martelli unius Agaunensem triumphum si recolas, Superi! quot orco myriades in suppetias lectæ. Adeò solatium Marte dignius nullum, quàm quod crudelitas in hominem suis mortibus statuit. Moderatur omnia humanus animus. Conditus ille ut regat, ut subsint cætera, & regantur. Unum proinde in triumphum duci Mars gaudet, ut unius hominis triumpho orbis totus in triumphum ducatur. Pestis nulla, contagia nulla, bellis atrociora. Sæviunt illa, aut lento, aut raro igne, hæc perenni ferè, decumano, & sui impote furore. Hora hîc Catastrophen instruit, quam annorum curriculi cæteris malis non reddunt. Dignum eni nverò furore barbaro crudelitatis trophæum! Pompejos, & Antonios, duo recole capita, horum gloriæ quot Urbis Dominæ civibus est litatum? myriadem excessit victima. Darii Persarum Principis vis quanta contra Macedonem? Siccandis fluminibus, & tegendo penè Hellesponto par erat potentia, impar tamen satiando rictui Bellonæ. Crudelis vorago, quæ dum funere pascitur, pastu ipso famis sentit augmentum. Vide crudelitatis ingenium, an ingenii crudelitatem? Catapultis, arietibus, & fundis veterum, æs reboans & ferum Mars substituit; quò ampliùs juxtà ac certius eum feriat, cujus conditum est securitati. Tuta quondam erant Cælo æmula culmina, fami soli cervices suas stratura. Hodie Olympus ipse tremere, imò & per auras volare doctus est, dum Bellona ignibus loquitur, quibus animet in volatum montes & petras. Sed quo fructu? Tantæ molis erat Romanam condere gentem. Ità quondam. Hodie: Bellonæ jocus est mortalem perdere gentem.

PRO INTELLIGENTIA.

Augix stabulum, aut Caci spelæum intemperantiæ habet Prototypon. Tanta est voraginis utriusque communio.

nio. Nemo adita illa nefasta subiit, quin ceciderit victima. Pari fato huic litatur Numini. Abdomen, vah quantum, quàmque, ut dulce, sic grande, grandium ferè Numen! Grandium, inquam, ut qui facultatibus utuntur, ut mori citiùs, nè dicam crudeliùs velint. Paucis natura contentos jubet. Frui vult, non oppleri. Pasci, non oblectari. Servari, non opprimi. Felices, quibus parcam se fortunis fors exhibet, dum negat impendia, vitiis subtrahens alimenta: tantum addit vitæ, quantum demit fortunæ, ipsâ penè dixerim iniquitate pia. Dum contrà, quibus amplior est fortunarum seges, quod necessitati datum, consecrant voluptati; quòque vita paranda, aut servanda, eandem vel cruciant, vel pessumdant. Fabulata Græcia, & Deos symposiis capi, Baccho diffluere. Quid mirum forte pari myriades hominum rapi in præceps? In præceps inquam. Quia quibus ætas, sidera, Mars, pestes nîl nocuère, domestica nocuit vipera: Lyæi, aut multo stagnantes sumine pateræ. Torrentem exiguo tempore ingentia infamant damna. Mars, pestis, cæteraque nomina morborum torrentis sunt ectypa. Intemperantiam id unum acriùs commendat, quòd torrens sit, sed perpetuo bacchatus furore. Ingentia bellis cadere Regnorum & Provinciarum spolia, non diffiteor; non minore censu holocausta Diti consecrat aër veneno gravis; utroque tamen atrocior, quia sævior tyrannus ingluvies. Raptantur illi, perire ut debeant: centuriant ultro sese huic Numini mortales, felices sæpe rati, sic perire si possint. Felix Roma morbis libera, Medicorum ignara, dum rus, & fontes naturam pavère. Delicias nempe Atticas, coquorum greges, peregrinas Phasidis, Phænicopterorum cupedias ignorabat plebs, & senatus. O felix ignorantia! quia vitæ & valetudinis parens. Hæc dum didicit, virtutem masculam, valetudinem dedidit. O quot censeret Orbis Nestores! hæc si nesciret commoda. Vivere nos cupit natura, non luxuriare. Parcendum mero, parcendum gustui. Ampliùs te oblectabis utroque, quòd minùs; quia longiùs. Vide sapienti iudicio omnia, & cum Seneca *innumerabiles esse morbos non miraberis*. Causa sit unica: *coquos numerata*. Hi crede mihi, Centuriatores sunt pestium, quibus orbis

orbis scribatur orco devotus. Orbis dico. Gentes nãmque sunt aut regna, quæ Bellonæ furiis perstrepunt, atque id quidem tempore. Orbis omnis est, qui virus hoc sentit, perire eo velle, quo servari oporteret. Quódque crudeliùs, tempus nullum hâc peste immune, ætas nulla, sexus nullus. Frui rebus in vitæ commodum natura jubet. Vivere se non arbitratur humana ingluvies, nisi deliciis diffluat. Quasi verò id unum humanâ mente dignum sit commodum, quo valetudo, vires, vita perduntur. O Cæcitatem! dicam veriùs, amentiam!

§. V.

Quid Fortitudo?



Igne micet polus, & fulmen ruat aethere: laurus
 Usque stat, & vires hinc trahit usque novas.
 Exemplum tibi, nè timeas ferre ardua: si vis
 Laurigeros inter nomen habere viros

DOCTRINA ETHICA.



Pauis de fortitudine Philosophus l. 3. c. 6. quòd sit mediocritas inter timorem, & audaciam seu præfidentiam. Materia illius sunt pericula, adversa, labores, mors ipsa pro Patria, vel religione, vel Deo sic disponente illata. Bello, & mari probatur

batur eadem. Neque tamen vel à nautis, vel à fideiariis exercetur fortitudo, qui pericula adeunt: cum illi ignari, hi verò ex infamia, & audacia adeant. Oportet enim verè fortem æquitatis causâ se ad pericula resolvere. *Ferina* enim est Aristoteli fortitudo, *quæ aut inconsulta, aut non sine honesto dirigitur*. Duobus exercetur fortitudo, tolerantia durorum, & difficultum aggressionem. Non tamen propterea (sentio cum Seneca) est fortitudo *inconsulta temeritas, neque periculorum amor, neque formidabilem appetitio*. Imò neque repugnat per Philosophum c. 7. fortitudini timor moderatus, licet excludat timorem muliebrem ex levitate animi natum. Unde Seneca ait: *diligentissima in tutela sui fortitudo est*.

Partes quodammodo sunt *magnanimitas, & constantia*. 1ma 4. Eth. c. 3. hominem super vulgus extollit, ad actus heroicos exaltandos. Vulgus enim non magnis delectatur, sed communibus actibus. Unde magnanimus veram in omnibus *virtutem, & felicitatem solam* sectatur his potissimum quinque capitibus. 1. Casibus non turbatur vicissitudinis humanæ, neque miratur admodum; tanquam præconcepta sint magnæ menti omnia. 2. Honoribus non admodum capitur. 3. Infimos quosque sublevat. 4. Injurias aspernatur, ut se minores. 5. Beneficia compensat majoribus. Neque tamen ex eo magnanimos censeas aut eos, qui omnia contemnant; hi enim Aristoteli vel *arrogantes, vel tumidi sunt, vanâ gloriâ, & præsumptione elati*. vel audaces ex ambitu, jactantia incitati; aut illos, qui sibi mortem cum Catone adsciscunt, utpote qui Aristotele teste, intolerantia, & tædio rerum præsentium ad id inducti, suam in hoc ignaviam probant. Utraque enim magnanimitati opponitur; & *audacia*, quæ omnia viribus suis minora existimat; & *pusillanimitas*, seu *ignavia*, quæ omnia viribus majora judicat, & se omni honore indignam.

Constantia virtutum laureola, seu *perseverantia* hominem ad perdurandum usque ad finem roborat; non obstante temporis, & circumstantiarum vel diuturnitate, vel arduitate. Opponitur huic ex Aristotele 7. Eth. c. 9. *perstinacia*, quâ quis in omnibus bene, malèque susceptis

ultra debitum perdurat. Itèm *mollities*, seu *inconstantia*, quâ quis illicò à cæptis desistit.

QUÆSTIO ETHICA.

An heroi possit fuga ex prælio esse gloriæ?

AFFIRMATUR.

HEros est, qui igne ardentes bellorum flammæ cruore suo restinguit; at major, qui rivo parcit, ut torrentem profundat. Stratagema sæpe illustrius generosam tegit ebrietatem, dum sui impos ænulus tum primùm virtute peti se sentiat, cùm tempestatî succumbit. Sic Parthi vicere. Non semper Venusino cum Vate pulchrum est pro Patria mori; tum nempe, cùm dilatâ morte indies sic commoreris Patriæ fatiscenti, ut vita tua sexcentis mortem intentet. Sæpius amor ingeniosâ fugâ Patriam servavit, dum commune illud naturæ vectigal *mors* curarum unâ, & discriminum, sed & unâ felicitatis promovendæ terminum statuit. Somnus Salustio, quies Tullio, antidotum Euripidi mors est: absit ab amante in Patriam cæcum mortis studium; amoris eos certa adversa sunt, hâc, ut proberis, subduc te cladi tantisper, ut asperam magis pro Patria, quia diuturnionem sufferas mortem. Germana hæc dos magnarum est mentium, furore non agi. Caput discrimini subducunt non nunquam, non quia volunt, sed quia amoris ingenio jubente debent. Cedunt fortunæ bacchanti tantisper, nè cadentibus ipsis cadant omnia. Major sanè, & gloriosior amoris victima dum cedit, quia superstes, quàm si cadat. Sæpe se magis, quàm Patriam diligunt, qui, quia sciri cupiunt, cadere volunt antè, quàm cedere; cùm tamen, quem hodie fatum perdidit, si mutâset consilium, triumphos eadem, & Patriæ destinâset. Quæ salus Reipublicæ à morte unius, cujus vita sæpe omnia restituisset? Quoties salus Urbium, & exercituum unius in capite? laudatur ingeniosus amor Demosthenis, cur è bello fugeret, cùm quæreretur, dicentis, *ut me Patriæ servarem*. Fœneratur Patriæ, non furatur, qui sic fugiens id omne superaddit aucta-

auctarii, quod interea tulerit, vel patrârit. Ars est, non metus fuga ejusmodi, quâ dum se curis, ac ærumnis Patriæ servat, commoda ejusdem promovet, moriturus postliminiò toties, quoties pro eadem luctandum. Moriâre, si tuo in vertice felicitas non vivat publica, si dolor, & ignominia cladis aboleatur æternum, si Patria hoc casu triumphet. At dum semineci te anchoram subtrahis, quid si hostis juratus sis, agas ampliùs? robore Patriam, privato funere publicam cumulas calamitatem. Stupor, aut pertinacia, non magnanimitas est, nè hostem videaris metuisse, secururæ fortis metu fugere sexcenta mala moriendo potiùs, quàm fugiendo.

NEGATUR.

Nescit generosa mens aliâ sinistris casibus obviare dexterâ, atque unâ hâc adamante dignâ regulâ: *cædi potius, quàm vel unguem cedere.* Ut Spartana quondam Mater heroi filio clypeum præbuit cum dicto: *aut cum hoc, aut in hoc.* Non alio vultu dignatura filium, quàm si triumphator cum clypeo, aut in eodem pro Patria victima redierit. Stat nempe mori malle, quàm herbam cedere. Victoriâ, atque adedò gloriâ nescit, quisquis fugit. Hæc fortitudinis indoles est, adversis, ut aquilam fulmine, nil terri. Neque vulnera sentire oportet heroem, cui plus mentis semper, quàm sensûs natura concessit. Irritatur in æmulum leo, dum virtutem sentit, cedit ignavus, atque adedò inglorius animantium grex. Tempestatem omnem arena coquat, mortibus ludens, constare pugilem oportet suo, dum se, ac sanguinem circumfert. Recessu æmuli insolecit hostis, acerbior in damna, quàm antè fuerit præceps in vulnera. Passus omnis è stadio, alienæ gradus victoriæ est, & triumphî. Colum, & fœmineos decet animos fuga, non bellatores. Audentes fortuna juvat. Tentandum, quod insuperabile credebatur initio, cessit sæpe super vota quæque feliciùs. Se ipsâ sæpe numero major est virtus. Potest, dum audeat. Opinione majora in se claudit animus decora. Pelion, & Ossam superarent sexcenti, si umbras non vererentur.

Sæpe animi soli animos eripuerunt hostibus. Languet, dum ardentem spectat, vel certè hebetatur impetus. Lux gloriæ & honoris clarior nullibi, quàm dum umbræ sinistri metûs calcantur. Æternitas gloriæ, & nominis si cordi sit, terrorem profliga. A grandibus cæptis quòd multi desciverint, hæc pestis effecit. Designabant mente heroum prodigia, vix pumilo subinde pares. Aurea per fortunatam Colchidem vellera nunquam vidisset Jason, si aurâ quâvis abstractus cessisset. Nunquam quies commendat pugilem. Dum secura loco stat alea, etiam Mytecus ignes ructat, & prælia. Inter pericula, aut constantia jacit anchoram, aut major omnibus cadit heros. Incudem fatigat adamas, arundo & stipula cedit auræ. Audere, ferè est vincere. Superat ut minùs animo hostem, quisquis Patriæ cadit; jacet; quisquis fugit. Virorum hæc gloria; aut sta, aut cade.



Q U Æ S T I O III.

Virtutes humanæ.

§. I.

Quid Amicitia?



Rarus homo est hodie, cui non sit amicus; at ille
 Rarior est, aliquis cui sit amicus homo.
 Causam nôsse cupis? dicam: pars plurima námque
 Nomen amicitia, rem prope nullus habet.

D O C T R I N A E T H I C A.

Humanas virtutes nomino, quia homine cumpri-
 mis dignæ. Amicitia præsertim, quæ virtus
 est ad alterum. De qua & Philosophus fusè
 admodum l. 8. & 9. Eth. cùm finè hac feli-
 cem esse neminem judicet. Miser enim consolatore, bea-
 tus socio eget. De hac pugillum fume.

Est hæc ex C. 2. & 5. *mutua plurium benevolentia*,
non latens, ipsorum gratiâ, fundata in communione bono-
rum: seu utilium, seu jucundorum, seu honestorum. Dici-
 tur *benevolentia mutua*, amicorum enim idem velle & nol-
 le ex Salustio est, & vinculum ad mutua officia; quæ, qui

negligit, amicus non est; non tamen est habendus ut inimicus per Aristotelem, maxime si non pravo animo id neglexerit. Dicitur 2dò: *non latens*: Ut enim ignis latere nequit, sic amicitia; ut minus, si operibus probatur. Nisi enim amet uterque, amicus neuter est Platoni in Lyfide. Sic gaudent convivere, arcana pandere, obsequia ultrò non rogati præstare, & his certare. Epistolis ut minus se invisere, ut æterna sit amicitia; neque enim fidentum ulli amplius, ac amico veterano, vetustate ipsâ pretium deposcente. Hæc tamen omnia eò usque præstanda duntaxat, dum nihil conscientia, aut legi dissonum ab eo petitur; unde vetus illud: *amicus usque ad aras*; id est, citra injuriam conscientia. Hostis enim, non amicus, qui mali quidpiam à nobis cupit, vel authoribus, vel adjutoribus.

Dicitur 3tiò: *ipsorum gratiâ*, quia si amici se non ament propter honestatem ipsam, sed ob commodum, timorem. spem, &c. ex Aristotele c, 3. *non sibi tunc homines mutuò sunt amici, sed utilitati*. Quam utilitatem cum semper spectent pravi, neque ipsi inter se, neque cum bonis amici diu esse possunt. Unde quamvis amicitia sæpe oriatur ex solo complacente conspectu hominis nunquam visi, DEO videlicet authore; alià itè ex instinctu naturæ, & rationis, ut est inter Parentes, & liberos; communiter tamen per Aristotelem amicitia tantum est proborum, ex similitudine morum, indolis, &c. orta; ut qui non sua quæunt, sed se mutuò: sicut cicada cicadam amat. Dicitur 4tò. *Fundata esse in communione bonorum triplicium*, & ideo pro varietate horum triplex etiam est amicitia. Quamquam sola illa amicitia dici mereatur, quæ est ob honestatem. Et ideo senes ferè parum apti sunt amicitia, quia utilitati suæ ferè intenti sunt. Juvenes itè, quia naturâ inconstantes, aut certè voluptatis solius causâ amicitias quæunt. Quæ, quia eadem die sæpe mutatur, eadem pariter die fundata amicitia perit. Denique morosi, mordaces, litigiosi, &c.

Ex his faciliè conjicies, quàm rara sit amicitia vera; cum Cic. l. de amicitia: ex omnibus sæculis vix tria aut quatuor amicorum numeret paria: eò, quòd rarissimi sint, qui

qui amicum solâ illius causâ & quidem honestâ ament. Tu ergo five secundâ, five adversâ utaris fortunâ, cum Arist. l. 9. Eth. c. 10. civiliter omnes cole. Sed cum Thianæo paucis te crede. Neque ulli horum, nisi cum quo multos salis modios sumpseris, id est, longo tempore probaveris. Omnia enim cum amico deliberanda, sed de ipso primùm. Invitus autem nemo in amicum assumendus est unquam.

QUÆSTIO ETHICA.

Utra amicitia melior, paucorum, an multorum?

PAUCORUM.

Sociale animal Philosophis homo est. Feris, quàm humano genio dignior lex Pythagorica septennalis silentii. Amicos natura ipsa deposcit. Id tamen Hesiodi arbitrio sapientissimum habet: nec multis, sed nec nulli dicaris amicus. Medio, ut semper, tutissimus ibis. Levitate non caret, qui fidens omnibus; quantum fudit, tantum decipitur. Sed & Catoniana procul esto severitas, quæ quia rigida omnibus, amæna nulli, invisâ orbi. Uterque errat. Tu sic amicitiae cole fœdera, ut gratiis reddens gratias paucis præstes, quod cupiant multi. Vix paucis candor tuus satisdabit. Tempus omne, conatus, & studia si amicis consecres, tantum egisti, quod plurima amori agenda reliqueris. Facta amorem probant; quis, si multis se partiatur, satis omnibus unus? Multorum amicus diceris? eò ipso debitor es. Nulla tibi hora tuta, quia tu tibi ferre es nullus, omnibus nempe dandus, quanto curarum dispendio? cura, nè, qui necessitudine abundas, hoc ipso premaris necessitate. Alieni favores redimuntur obsequiis. Sæpe inter multos non tu, sed tua quæruntur officia. Rarus, qui careat furo, cui inhiet latens. Tutius ergo id hospitalitatis observa: hospite nè careas, hospes nè pluribus esto. Abundantia ipsa vilitatem, ut rerum, sic amorum sæpe causavit. Nauseantur joci, gaudia, dam cepiosa, quidnî & amores divisi? ut rivus, sic amor divisus minore currit alveo, atque adeò jucunditate. Condimen-

tum Aristoteli sunt amicitia; discretio gustuum, copia nau-
 scam parit. Veteri illo: *nimium, vitium*. Tam vitio da-
 ta Scythis amicitia plurium, quàm mulieri uni virorum
 plarium consuetudo. Nempe Vate teste: *nullus amicus,*
ubi multi numerantur amici. Limites habet humana po-
 tentia quælibet, amor ipse divisus frigescit. Unus Eurialo
 Nisus, Orestis Pilades, imò si Ciceroni fides, vix sæculis
 natum par nobile amantùm: quid ergo multos censeat?
 Solem unum heliotropium, acus nautica Polum, amans
 terminum teneat unicum. Multitudo erroris sæpe, dolo-
 ris materia comuniùs. Unum proba, dives in ævum es,
 si deligas, quem diligas. Cave, dextram cuivis injeceris.
 Melopepo amicus est, probandi plures, donec unus; non
 colore, neque cortice approbandus. Profunda flumina ten-
 tanda sunt bolide, priusquam iis te credas. Congaudere,
 condolere, amantium, non cuiusvis est regula. Flamma,
 & amor divisus aut robore, aut diuturnitate caret. Ami-
 citia frequentior, formicarum est cumulus, aut hirundinum
 tempus; abeunt, & redeunt illæ suo duntaxat aut commo-
 do, aut incommodo. Advolant & revolant hæc suo solius
 commodo. Denique: Tempore felici multos numerabis
 amicos, tempora, si fuerint nubila, nullus erit. Aspicias,
 ut veniant ad candida tecta columbæ, accipiat nullas sor-
 dida turris aves? Horrea formicæ tendunt ad inania nun-
 quam, nullus ad amissas ibit amicus opes. Terrent incon-
 stantes genios fortis procellæ. Nunquam, qui his succum-
 bit, par est germano amicitia auro. Puriùs hoc nunquam
 fulget, ac dum flammis vehementioribus coquitur; quia
 rara hæc dos est glebæ, tanti fit aurum; quia rarior præ-
 rogativa hæc est amantis, tanti unus tibi fit amicus.

PRO MULTIS.


QUis locuples adeò, quin indigus sit amicorum? hic u-
 nus in orbe thesaurus maximus. Infirma coronatorum
 sunt robora, nisi alienis fulta officiis, auxiliis, præfidiis.
 Ære faciliùs, vulgi sensus est, quàm amico sinè vitam exi-
 gi posse. Vel eò tamen, ut auri, sic ferè amicorum co-
 piæ crescit amor. Crescit amor nummi, quantum ipsa
 pecu-

pecunia crescit, en typus amoris. Nulla inter homines conditio non sexcentis obnoxia procellis; eò acerbius sævit fors, quò mitiori turbine premit carbasa. Et coronati vertex egent officiis. Alternis blandiri, & sævire gaudet fortuna; nemo ex omni parte beatus, donec inter mortales, censendus. Nulla tantam in rabiem firmiora repagula, ac fæderata manus amantùm. Absit Pylades, aderit Orestes, consolans voce, levans obsequio. Castorem Polux, Pirithous Theseum ex ordine excipiet, dum junctis quot capitum, tot amantùm studiis sit longa, tenaxque fides in finem exitii. Paucorum in pretio sunt fædera, quantò magis plurium? crescit pretium copiâ, si pretiosum sit, quod amatur. Athenus si unus, & alter sit murus, quantus erit exercitus? His ventis provehere, fortunatas nunquam non leges Insulas. Nîl pertimescent auras carbasa, hi si Favonii aspirent. Hoc semine gratiæ, gloriæ, honorum germinantur impendia. Ab his Planetis, quò copiosior, felicior tibi influxus; lûxque uberior, quò plura tibi sidera luceant. Unus sapienti vetustati Deus, amici plures in votis; exequuntur hi ferè, quod ille designat. Ubi amici, ibi opes Scytharum sensu; ditissimus, qui amicus plurimis.. Pluribus nititur fortuna, si periclitetur. Sociatus labor majoribus quoque par est muneribus. Plures oculi in amicorum commoda plura prævident, pluribus provident, atque adeò præsentibus consulunt, futuris prospiciunt. Unde Xenophen: non sceptro, sed pluralitate amicorum regna stare tutissima. Nîl civitate melius. Typus hujus amicitia per Aristotelem est. Et quæ Civitas sinè civium numero? amari gestimus, & studemus omnes. Certè unius duntaxat amicus, aut avari nimis affectûs, aut asperioris, ac ut Rempublicam moderetur, est indolis. Abundantia amicorum, cum Platone loquor, virtutis, & prudentiæ signa sunt multò certissima, dum contrà majus vitii signum nullum, quàm amicorum, & fidorum defectus. Felix esse cupis? felicitatis argumentum sume, satellitium amicorum: sic rosæ instar, tuo dives, alieno securus præsidio. Felix & infelix est rosa. Quia cincta, atque adeò tuta, felix: decore suo quia omnes allicit, infelix. Ingeniosa prospexit natura, tantùm arcens,

quantum attrahens. Præstet tibi gratia idem. Comitate, morum cultu, candore omnes devinci. Solatium iidem, si premaris: decus, si glorieris: præsidium, si infesteris, futuri. Felicitatem multis cinctus tibi solam despondes, infelicitatis vel ipsum nomen te latebit.

§. II.

Leges, & adversantia amicitiae?



Qui puer hic levis est, unâ venit, & fugit horâ:
 Quî maturus amor, tardus; at usque manet.
 Tu cole maturum, puerum fuge: nâmque virilis
 Ut prior est, sic est hic puerilis amor.

DOCTRINA ETHICA.

P*Rima* esto: non rogatus opportuno tempore sub-
 veni amico. *Secunda*: Suspicionibus, aut ca-
 lumniis adversus bene probatum nullum da lo-
 cum. *Tertia*: Cum moderatione, vel adula-
 tionis, vel rusticitatis, officii aliquando commonefac ami-
 cum, si quid ei nocivum. *Quarta*: Amicorum omnia
 communia, citra tamen privatorum juriû incommo-
 dum; sæpe enim fieri potest, esse aliquem amicum personæ, ini-
 micum

micum causæ. *Quinta*: Si amicus depravetur, si spes fructus sit, emendetur; sin minùs, amicitia tollatur. *Sexta*: Eos maximè detestare, qui se amare fingunt virtutis solius, & honestatis causâ, & amant solius utilitatis spe.

Et si amicitia paræmiâ veteri (*amor aut similes invenit, aut pares facit*) sit ferè inter æquales, latè tamen amicitia est inter omnes se mutuò amantes. Varia tamen pro varietate excellentiæ, & inæqualitatis personarum. Sic inter Deum, & hominem, Principes, & his minores est amicitia *dignationis*, eò quòd DEUS creaturam, Princeps minorem se dignetur amore, solius amati causâ; vulgus amicitias utilitate, juvenus delectatione probat.

Sodalitius amor est inter fratres, vel sodales. *Con-sanguineus* inter sanguine junctos. *Conjugalis* inter conjuges. Inter Principem, & subditos amor, propriè & strictè loquendo, non datur, quia in his est timor Principum; nemo autem, quem metuit, diligit 2. Rhet. c. 5. Amandi tamen sunt ità à subditis omnibus superiores, ut major sit amor subditorum in majores, quàm illorum vicissim. Sic enim lato modo per Aristotelem, æqualitas quædam fit inter eosdem ad amicitiam requisita. Quamquam Christianus amor etiam ad inimicos extendi debeat, & hic ab ipsis Ethnicis exemplis subinde demonstratus, & commendatus cùm sit, virtutem verè heroicam, & animum probat quasi Divinum.

Amicitiaæ adversatur *inimicitia*. Originem ducit ex ira, contumeliis, odio. *Adulatio* item, ex amore proprio oriri solita. Adulatoris signa dat Philosophus c. 4. 1. Omnia probare, vel improbare, quæ alter probat, vel improbat. 2. Nimium laudare alterum, unde laudati gignatur invidia. 3. Si quis se in amicitiam violentè insinuet. 4. Si promptus nimis ad omnia. Denique ex 4. Eth. c. 6. id maximè vide, quo fine tibi amicus sit; si enim suæ utilitatis causâ tibi addictus sit: Juret, perjureret, certus tibi palpo manebit. Vel si tantùm secundùm tuam fortem amet, de qua Poëta: Zoile vis causam, cur te non noscat amicus? Spes raptas, non te nuper amabat amans.

Q U Æ S T I O E T H I C A.

*Utrum amicitiae fomentum firmitus, praesentia,
an absentia?*

P R A E S E N T I A.

SI fides Philosophis, exercitio actuum facilitas oritur. Praesentia amici, amoris est juxta exercitium. Oculorum felicitas dux esse cogitur ad amorem. Sævius irato turbine fortuna, blandiatur rursus mitiore Favonio, sibi securam jecit anchoram, cui comes lateri est amicus. Protei in morem turbinem intrepidus cum patiente; malaciam contra constanti excipit animo, utroque laturus amico remedium, dum fortis utriusque se si non metam, partem facit amore. Nihil vitae huic amabilius, ac alterum censere in vivis *Ego*, cui non secus, ac tibi pateant abdita, congaudenti, condolenti, hortatori. Efficacius haec omnia more suo praestat amicus, si coram sortem tuam non tam videat ut alienam, quam experietur ut suam. Haec est humanae virtutis an conditio, an limes; quò remotè magis, eò minore ut agat potentia. Calere cupis amplius? flammæ vicinior sis. Sic, quoties! ex oculis raptus, raptus es ex animo, verum illud divitium. Nam verè, ut observat Propertius l. 3. quantum oculis, animo tam procul ibit amor. Faveat risu suo sol praesens, vigeant, rideant, succrescant orbe omnia: absit tantisper, vita concidet, vigor flaccescet. En symbolum amanti. Aristotele ipso Eth. 9. c. 11. suffragante, dum amicorum praesentiam tam in prosperis, quam adversis jucundissimam censet, vel eò, quòd & *aspectu* consolationem praestet amicus, & *oratione*. Dum contra longinquitas ipsa remissionem sensim animo inducit, dum oblivio mentem occupat, & quo finè vitam agere vix posse visi nuperrimè, hodie vix recordemur. Sic Memnonis artefactum mentitur animus, obrigescente in lapidem affectu, suo dum sole privatur. Quid mirum? vultus, & vocis gratia fomentum sunt animi, candor actionum oleum flammæ perenne, similitudo denique morum conciliatrix amo-

amorum. Quæ omnia, quòd in absentem non cadant, verum id Athenæi: *non sunt amici, qui procul degunt.* Nihil virtutes moror, quæ mirificum sunt amantis incitamentum, nil officia mutua observari illas vetat absentia: hæc rescindit locorum distantia. Ingeniosus amorum lutor malo suo edoctus: Sæpe perisse amor est, per longa silentia visus. Animæ pars altera amicus. Quis, absentia mortem, ut præsentia vitam tribui, miretur? hoc vota illa absentium comprobant amicorum; uniri cupiunt, vel ideo, ut animentur quodammodo, aut certè tranquillitatem magnetica sumat acus Polum suum contingens. Languet amor distans, flamma remota perit. Prima namque amantium dos: coram habere, quod cupis. Naturæ illud sive arcanum, sive prodigium est, non ferri ultra litem. Virtus causæ, si Philosophorum sensu loquimur, uniformiter difformiter agit. Quasi verò natura ipsa agere aut nolit, aut nesciat vi majori, nisi in ea, quæ viciniora. Aliud est pretium rei, aliud affectus. Primum fama sæpe conciliat, imò ferè etiam auget. Alterum sola facit possessio. Amicitia, si perfecta sit, utrumque habeat. Et voluptatis enim & mentis est complementum amicus. Pretium sinè affectu multa merentur & sibi vendicant, quæ non visa. Affectum sinè pretio eripiunt multa, quæ statum dedecent. Utrumque, quia rarus est, meretur, & explet amicus præsens. Sic enim pretium sui auget, quia in dies probatus: affectum, quia amor redens amorem.

ABSENTIA.


Quid satietati causandæ aptius, atque adeo fastidio, ac perennis communio? Nauseatur & voluptas, & opes, quæ coram semper. Rarum, charum ferè: & abundantia dapum obtundit palati gaudium. Suavius est, quod multum appetitur; appetitur, quod absentia ipsa desiderabile reddit. Invide, dicebant Thisbe cum Pyramo, paries, quid amantibus obstat? Congruit nempe absentia ipsi amoris motivo. Amatur ardentius, quod grande. Grandescit & gloriâ, & nomine, quod eminens sæpe spectatur, dum è contra frequenti inter homines vitio minuit sæpe præsentia tamam, atque adeo amantis gra-

gratiam. Sic Luna, quo à sole remotior, ampliùs sumit incrementum luminis; tantò ampliorem formans orbem, quantùm sumit distantia. Jacet humi, quod obvium cuique. Ut meliorum odor florum, sic nomen distantis fragrat amceniùs. Vitium id temporum, an naturæ sit, dubites. Verum est per Diogenem, amicitia non jungit corpora, sed animos, quos locus non arctat; verum tamen unà id Nasonis, remittendos non nunquam ardores, ut vehementiùs ardeant. Certè si anima ibi degit, ubi amat, magis quàm ubi animat, quid refert abesse oculis, dum cordi præsens, eadem & majora præstat amans, quàm si adforet? fascinat oculos, cor pascit, intellectum mentito alloquio sibi ipsi furto dulci subducit. Quàm misera foret conditio felicitatis, si id duntaxat oblectet, quod cernitur, quod sentitur. Bruta sensu solo; majoribus pascitur anima, delicias sublimiores ferè exambiens. Quoties familiaritatem jugis fecit præsentia? familiaritas contemptum? Reverens sit amor, si amicus: quis porro reverendum credat, quem coram semper lateri habet. Inò, quod abest, nomen auget, & gloriam ferè: communi sensu, quo magnificum creditur, quod longinquum. Livor præsentia fascinat, & decus elidit. Pascitur in vivis livor, post fata quiescit. Absente authore celebrantur gesta ampliùs, & qui invidissent præsentem, admiratores sunt, & laudatores. Sic reverentiam populi Majestati suæ raritate conciliant Gentes multæ. Ut sanitatis, sic amicitia præmium tum priùs advenit, & amatur ardentius, cùm tantisper eripitur. Pictores nobis Idea sint. Separant sua ad tempus opera, tum ex intervallo rectius judicaturi. Assiduitas causa est, quò minùs bene judicent. Sic rectius judicatur amicus, qui ex intervallo revisitur. De nobis ipsis, quoniam adsumus assidui, minùs rectè judicamus. Quid, quòd vel fortuitò verbum, factumve unicum Gordium amicitia vinculum solvat? *Dic modò chare nego, tollitur alter Ego* frequentiùs. Absentes tum malumus, quorum errorem palliasset distantia. Amari nil habet distantia, nisi quòd desiderium causet, an hic ipse blandus animi tyrannus ipsa dulcescit amaritudine. Dum, quia animus absentem absens auditque, videtque
 affe.

affectu, non oculo; amore non aure: vincula hæc blanda, quæ separant loco corpora, arctius longè stringunt affectus, & voluntates. Ingenium id est amoris, quod ignis. Cuniculis conclusus, quia sepiri non patitur, agit, quæ potest, plurimum. Sic amor jacturam præsentis, virtute majori vel in distantem supplere contendit. Nunquam tam vehementer urit ignis, quàm dum fabrorum dextera nonnihil aquæ affundit. Auget nempe resistentia ipsa virtutem. Quasi verò gaudeat natura ipsa obicem triumphare. Par est amoris germani dos. Resistat nonnihil absentia, idem illud, quod obicem statuere velle videtur, in focum flammæ colligit, ut urat acrius. Tormentum nonnullis, quamquam blandum, audit amor. Cominus si agat, sauciat, sed quantum lædit, tantum reficit. Eminus dum agit, languere facit animum sui impotem virtute suâ primùm: tum absentiam ipsâ. Titii nempe jecur est cor amici absentis, quod quantum patitur, tantum dulci sub vulnere crescit.

§. III.

Quid Magnificencia, & Liberalitas?



Non bene subtrahis stat honos, & gloria fulcris,
Qualibet aura loco, qualibet umbra movet.
At si hinc Majestas, sapientia fulciat inde,
Tum bene consurget, tum bene stabit honos.

DO.

DOCTRINA ETHICA.



Magnificencia propria Principum, & Magnatum dos, cùm nemo egenorum sumptus facere possit; virtus est in magnis tantùm rebus se occupans: cùm liberalitas magnis perinde, ac parvis intendatur. Omnis enim Magnificus est liberalis, non tamen vicissim. Ædificia publica, & privata, convivia, ludos, sacrificia, dona spectat eo tantùm solius honestatis fine, quòd statui & bono publico condecenter perferendo magis operari studeat, quàm ut sumptui parcat.

Nemo in hac sortem excedat suam: præterquam enim, quòd in vitium luxûs absonâ hâc affectatione splendoris, & ostentatione incurrat: Aristotelis insuper placito N. 13. quisquis supra dignitatem suam aliud aggreditur, stultus insuper esse dicitur.

Sed neque *sordidus*, qui in omnibus deficit, sit, sive assiduo studio, quomodo sumptibus parcat; & si quos honestatis causâ aliquando fors facere cogatur, quomodo eosdem subinde ubivis in privato refarciat; sive tarditate, & tristitiâ solvendi: sive denique stolidâ de se opinione, imò querelâ, quòd majora semper, & ubique faciat, quàm oporteat, quod stupidissimum est in hujusmodi peponibus.

Rhodes cum D. Thoma *liberalitatem* ad fortitudinem reducens ex Arist. l. 4. Eth. c. 1. N. 14. sic definit: *esse medietatem circa pecunias dandas, & accipiendas*. Virtus societati humanæ maximè congrua, nisi in duos incurrat scopulos *prodigalitat*is, vel *avarit*ia. Ima ferè juvenum est, & paupertatis mater, orta vel ex eo, quòd nesciant, quanto sudore facultates parentur, futura non præcogitent, adulatorum amantes sint, & ferè prodigi etiam sint intemperantes, neque de suo, sed prorsus alieno largientes: cùm paupertas turpia cogat.

2da senum est vitium, quos omnia vitia præter avaritiam deserunt, & hæc ferè incurabilis est. Idque fœdissimum, quòd, dum prodigus aliis est utilis, avarus nè sibi quidem, juxta Philosophum N. 21. utilis sit, & omnibus detestandus. Causas Aristoteles allegat duas 2. Rhet. c. 13. Imò: quia senes vitæ cupidi sunt, ad quam sustentan-

stentandam facultates necessariae sunt. 2dò: Quia aestimare sciunt divitias, eò quòd arduè comparentur, facilè amittantur. Quod patet in millenis haredum, quos avari scribunt, exemplis, quomodo veteri verbo: *Der Sparer findet einen Zehrer*. Quæ parâsti, cujus erunt?

In hos, nè impingas, has sume, & accipiendi, & dandi regulas. 1. Nunquam aliena pete. 2. Tua duntaxat largire. 3. Rerum tuarum satage, ut largiri ampliùs possis. In dando porro, imò: Da citò, & hilariter. Citò; nam, qui citò dat, bis dat, nîl dat, qui munera tardat. Hilariter largire; leve enim munus pretium sumit ab affectu. 2. Cantè cum respectu temporis, personæ, æquitatis, & decentiæ respectu tuarum facultatum. 3. Durius tibi sit non dedisse aliquando, cùm oportuit; quàm si non acceperis, ubi debuisti.

Q U Æ S T I O E T H I C A.

Uter gloriosior Princeps, literarum, an magnificentiæ amator?

PRO MAGNIFICENTIA.


QUod Cælo sol, orbi Princeps & regno est. Illum decus ornat auro illustrius, quo omnibus felicitatem partitur, & cominoda; non minora ornant Principem. Quid magnis mentibus cum exiguo cortice? tametsi caperent, dedecent fines modici animum orbi ut natum, ità parem. Ut à sole desumpto lumine fulgent, ornântque firmamentum sidera, sic aulæ, hortorum, ædificiorum pompa Principis nomen famæ orbis transcribant. Si ingrata virtutem taceat vetustas, rodat livor merita, lapides loquantur, timoris expertes. Miracula Memphis, Babilonis theatra pensila, Bellaquei fontis delicias nisi coleret posteritas, quis in iisdem grandia Semiramidis, Ludovici, Ninique suspiceret nomina? Non omnibus sola in pretio est virtus, caligant ad eam hebetes multi, ut ad solem noctua; lux minor si faveat, hanc imbecillitati suæ supparem celebrant, quia capiunt. Sic magnificentia Principis neminem non capit, cui, etsi ratio infirma sit, sensus

sus valent; & hujus gloriam, & laudem omnem sibi Princeps vendicabit magnificus. Magnificentia metitur animum, & dotes vulgus. Meminere fasti, non sine gloria, Romani illius portenti Neronis, non quidem eò, quòd sentinam vitiorum Biberium populus compellârit, sed quòd magnificentiae cultor dignum Majestate suâ Palatium struxerit, auream Neronis domum. Ut meritò eidem Philosophus ep. 39. *Reperit tandem tuæ amplitudo fortunæ, quo tota æstimetur. Par tibi jam aliquid novit orbis terrarum.* Sapienter. Magnos quid nisi magna decent? indigna res, animum, cui famulatur orbis, limite modico cingi. Quos super Diogenis dolium angusta nascendi conditio sublimavit ad purpuram, absit, angustos sentiant fines. Diis debentur omnia, Deorum eetypon Princeps est. Nisi magnificum vidisset Principem adulatio, nunquam eidem aula foret accinere: Par Urbi domus hæc, Urbs orbi, neutra triumphis & belli, & pacis, par Ludovice tuis.

PRO LITERIS.

ARs artium, Divinitatis consilium moderari Rempublicam. Quis hoc ausit sine literarum præsidio? non sine causa Jovis cerebro nata Pallas fingebatur. Literas, & literatos diligat, qui fortis, & providus audire cupit. Nunquam Princeps felix sibi, Populis, exteris audiet, nisi providus instar Argi prospiciat Reipublicæ. Quid ad hæc magnificentia conferet aulæ? Providentior ille, qui, quot sapientiæ lumina, tot agendorum oracula domi suæ alit, præsentium arbitros, auspices futurorum. Alet, si sapientiam colat, magnificus literariâ domo, munificus sapientum cultu, & amore. Muros magnificentia tollit, & excolit, animos literæ. Monumentum illud vetustati subjacet, hoc ære perennius æternitati est suppar. Palladio tutum stetit quondam Ilium, regia Priami domus non ahenus erat, sed ruinæ illicium. Thebis excisis Alexandri imperio, paritum domui Pindari. Major hoc factò Princeps, quàm squalentibus bustis, victoriis, aut magnificentia Palatii. Bubo feralis signabat Athenas pro foribus, satelles idem est Palladis. Deam hanc tanta decet digni-

dignitas, quanta est animi immorantis, qui typus est divinitatis. Alexandrina Philadelphi, Alphonfi Neapolis Regum librorum emporia cedro sacrata sunt. Literis, & literatis, bibliothecis amplius, quam regiae profuderunt ærarii. Rerum omnium jactura optabilior iisdem, quam doctrinæ vel minima. Æde unâ Constantinus centum, & viginti librorum millia texit, amanuenses sexcentos Mathias Corvinus constanti aluit industriâ, ut Caroli hodie sexti Augusti nostri (magnificentiae prototypi, & artium Patris) laudatissima in Bibliothecas gesta orbi erudito comperta non referam. Par si Principibus quibusvis stetit animo cura, prædicaret nomen æternitas. Fridericus secundus Viennæ, Carolus Pragæ, Leopoldus primus Vratislaviæ, magna Europæ nomina, dum Sapientum domos fundârunt, Sapientes se testati vivunt post funera, dum triumphant sacraria. Exedit palatia dies, firmat contra Palladia, & cum his nomen fundantis. Quidquid in sapientes confertur, æternitati litatur. Neque enim par cæteris sapientem terminus claudit.



QUÆSTIO IV.

De passionibus, & affectibus humanis.



Phœnicem miratur Arabs, quòd nescia fati,
 Victima utut Phœbo sacra, perennet avis.
 Hòcne typo, & fato minor est Deitatis imago,
 Mens? perit ista? Cedrus, nec tamen umbra perit?

DOCTRINA ETHICA.



Crum est de virtutibus, quæ omnes solis affectibus coërcendis viam suam exserunt. Quorum fontes sunt *dolor*, & *voluptas*. Propter illum enim ait Aristoteles 2. Eth. c. 3. fit, ut ab *honestis abstinamus*; propter hanc verò contingit, ut *mala agamus*. Idcirco et si per eundem Philosophum 2. Eth. c. 9. à *voluptate magis semper cavendum sit*, utrique frænando virtus moralis intenta est. Nos de affectibus breviter, ut ad rationis imperium directi hominem sui statûs non inmemorem deceant, agemus: tametsi eosdem affectata nimium, & vel ideo censuram non evadente industriâ Cartesius tractatu suo persequatur. Oratores porro de iisdem tractent ad motum animorum directione

atione conciliandum. *Medici*, ut valetudini consulatur congruo eorundem temperamento. *Physici* denique ortum & vim eorum dogmaticè referant.

§. I.

Pauca de Anima.

Anima tribus constat potentiis: *memoriâ*, *intellectu*, & *voluntate*; pulcherrima Divinæ Trinitatis forma & creatura. Hæc anima, quamvis de se in omnibus hominibus æqualis sit perfectiouis, inæqualis tamen perfectionis actus in variis hominibus producit, v.g. unus meliùs, citiùs intelligit, &c. ex hac causa, quòd anima agat juxta dispositionem organorum, sanguinis, cerebri, &c. hæ autem sunt inæquales in variis. Spissior in aliis, in aliis tenuior; hinc etiam unus habet ingenium melius, velocius, &c. memoriam tenacem; alter habet ingenium instar pìtilli, memoriam instar cribri. *Memoria* meminimus præteritorum, & in futurum veluti penu recondimus placita. *Intellectu* scrutamur, & penetramus, quæ volumus; & nisi impediti simus, v. g. somnò, necessariò semper aliquid cogitamus. *Voluntas* operatur liberè in actionibus suis. Et licèt *absoluta*, *naturalis* seu *Physica* necessitas tollat illi libertatem, non tamen eidem tollit necessitas *moralis*; cùm scilicet tantùm cum summa difficultate quis potest resistere. quia licèt sit admodum difficile, tamen manet absolutè liberum; & consequenter laude vel vituperio dignum, quod agimus.

Voluntas aliter dicitur *appetitus rationalis*, quia operatur propter rationem. Præter hunc datur etiam in homine *appetitus sensitivus*, quem habent etiam bruta; & qui operatur sinè ratione. Hic appetitus cum *sensu interno materiali* (qui præter intellectum spirituales in homine datur) causat legem repugnantem rectæ rationi, quam Paulus vocat legem membrorum Rom. 7. *Video autem aliam legem in membris meis repugnantem legi mentis meæ, & captivantem me in lege peccati, quæ est in membris meis.* Quod & Aristoteles l. 1. Eth. c. 13. confirmat: in anima quoque ipsa est aliquid præter rationem, quod ei

adversatur, & resistit. Anima hæc, etsi una in homine sit, varias tamen functiones pro varietate potentiarum, membrorum, &c. habet. Intelligit per intellectum, meminit per memoriam, vult per voluntatem. Videt in oculo, audit in aure, &c. Principes functiones sunt: *crescere*; & hinc dicitur *anima vegetativa*, quam habet homo communem cum plantis, & brutis. *Sentire*; hinc dicitur *sensitiva*, communis etiam brutis. *Rationari*; hinc dicitur *rationalis*, communis cum Angelis. De hujus animæ variis sensationibus, organis, &c. Metaphysicæ summi cedo campum. Unum illud in ordine ad præsens insitutum noto:

Intellectus per suum proprium actum, qui dicitur *intellectio*, triplici modo intelligit. 1. *unus est apprehensio*, quâ nihil judicat de objecto, sed simpliciter illud sibi repræsentat, v. g. leo, animal, &c. 2. *usus Judicium*, quo velut iudex decernit, sensum suum de hoc objecto assentiendo, vel dissentiendo, v. g. *leo est fortis*. 3. *usus Discursus*, qui ex magis noto, alterum, quod jam minus notum est, deducit per conclusionem, v. g. ignem ex fumo.

Voluntas pariter tripliciter tendit in objectum: 1. *per simplicem complacentiam*, quæ, sicut apprehensio in intellectu, non vult objectum propriè, sed afficitur illi velut salutando, & delibando. Quò referuntur volitiones sub conditione: *vellem, si*, &c. *nollem, si*, &c. 2. *tendit per consensum absolutum* verbi, *volo*; vel *dissensum*, verbi *nolo*; hæc tendentia est similis iudicio intellectûs. 3. *tendit per volitionem unius ex alio*, v. g. amo proximum propter DEUM; hinc voluntas quasi discurrit.

QUÆSTIO ETHICA.

An consultius orbi, unâ omnes Gentes uti linguâ? ut corpus animâ.

AFFIRMATUR.

CReato in delicias orbe, in dominatum homine, unitas linguæ fundata est, in pœnam statuta diversitas. Animal sociabile innocuas in unitate sensit delicias; Babi-

Babilonis partus confudit. Illa germen clysum, pacis filia; hæc belli seu germen, seu parens. Nectuntur unitate linguæ corda, dum cuilibet, ut querendi, sic sua pandendi sensa coram est occasio: cò quidem charior singulis, quò difficilior ferè Pythagoræa est lex, non tam imperio, quàm rubore ignorantia. Quàm dulcis amicorum communio, quos molesta hodie interpretum cura sollicitat, ardori moras sæpe injiciens, sæpe etiam seu arcanorum, seu amorum participem non patiens! Major consulentum felicitas, dum, quæ alieno sæpe aut oculo, aut sensui credi oportet, iudex ipse confestim ediscit. Firmiora amicorum fœdera, quæ hodie aut tardat oratio dispar, aut certè nimium quantum infirmat. Odio ferè alienus est sanguis, & sermo; & asperior vix homini vita, ac alienos inter animos, alienâ quoque linguâ utentes. Exilium credas tedium, quod peregrino in solo incititia linguæ imponit: rubore proprio, risu non rariùs alieno. Ars equidem non rara hoc ævo, malo huic succurrere, & capaci memoria cum Mithridate plurimarum etiam gentium linguas mandare. Ampliùs colitur Princeps, suorum ipse subditorum sensa intelligens; & patriam ubivis reperiatur, quem domesticum facit linguæ conditio. Non tum vitandæ interpretationis periculum, procul adstantium sibilus, procul cura animi semper quàm maxima, atque adèd procul vetus calamitas. Ah! quis tantâ memoriæ gloriâ, qui non dicam Mithridatem, triginta gentium Dominum, totidem linguarum gnarum æmulari aut possit; aut si velit, sufficiat tot linguarum centuriis? Quæ anabò ætas, quis sensus par oneri? Uni huic labori totam si ætatem consecres, vix à limine balbus discipulus audias. Meliore fœnore grande illud æternitatis depositum, tempus, locandum. Non conterendum, nè dicam, pessumdandum, eo fructu duntaxat, ut, dum in singulis proficit mens, ipsâ rerum copiâ sibi molestiam causante, aut cuncta vel nolenter confundat; vel certè decumano labore thesaurum hunc partum conservet.

NEGATUR.

Nemo inter homines adeò expertus, aut mentis, aut luminis, quin noverit nîl inter mortalia charius varietate, nîl orbi eâdem illustrius. Lucullana, aut Tiburtina consule theatra; amores conciliant, quia fontium, florum, & nemorum jucunda æquè, ac innocua in iis ludit varietas. Fastidio est perennis rei ejusdem in cibis, cultu, & sermone communio; varietas, quòd paræmia veteri, ferè comitem habeat venustatem; innocentes parit delicias. Naturam rerum Magistram suspicimus, docet illa, se ipsam fatiscere, si perenni sibi cæli cursus constet aut pluvîâ, aut ardore. Si ubivis placeat varietas, cur sola in linguarum multiplicitate displiceat? Aliud varietas est, aliud confusio. Esto; principia linguarum errori, & culpæ sint danda; pretium tulêre multa cum tempore, quæ culpata initio. Urbes hodie, Provinciarum præsidia, capêre à latrociniiis. Ut harmonia vocibus diversis, sic suavitas mentium linguarum oritur variarum consensu. Sæpe etiam ipsa ignotæ vocis peregrina placita sui acuunt desiderium; ut peregrina placent ferè, rapiuntque. Humanæ menti exercendæ, ac summis quibusque aptandæ nîl congruum magis, linguarum plurimum studio; quo solo, ut finè æmulo virtus, flaccescat memoria oportet. Dum contra, quos vili cum sanguine fors ad inapale damnâisset, vel interpretes in aulas Principum delegit linguæ notitia, vel consiliorum fecit arbitros, sæderum belli, pacisque Judices, atque adeo salutis publicæ vindices insignivit. Felices, quia tot viris, quot linguarum pollent notitiâ, Reipublicæ commodo suppare, cælitum æmuli, finè arcani periculo sua ei soli pandere sensa possunt, cui dignitas Reipublicæ poscit, fides suadet: non secus, ac si arcanis notis literas palam crederent, admirationi magis futuras, quàm usui. Natura parens non eâdem nobis voce aves jubet occinere: futuras tormento, si ubivis vox una perstreperet. Par sæpius est fatum animorum, quos, dum varietas necit, terrarum sæpius, ac Regionum studio alienos à Patriis cultus, ac mores averfaretur.

Nonnulla de varietate complexionis humanae, seu indolis.



Vox animi pictura tui est; hanc consule, si vis
 Nôsse, habitétne tuos agna, lupusve sinus.
 Fallere nulla diu potuit; si prima fefellit,
 Proditur extremo, quæ sit, & unde, sono.

DOCTRINA ETHICA.

Ndolem hanc, quæ ex temperamento, ut Medici loquuntur, ortum suum ducit, cum ad passiones ipsas mirum quantum conducat, sic paucis expedio, quod sit: *nativa propensio, seu inclinatio ad talem potentiarum usum, seu appetitus talium morum.* Contingit enim aliquos facillimos esse ad omne bonum, & hos dicimus *animam bonam* esse sortitos. Alios videmus ad iram, & omne malum proclives. Hæc indoles non est à sola anima rationali, ut eruditè notat cum Aristotele Fabri hic p. 2. n. 3. eò quod anima ad omnes hos motus de se sit indifferens, sed ortum sumit ab organorum dispositione, & fibrarum facilitate, dependenter à quibus anima operatur. Sic ad hilaritatem, & voluptatem inclinant, qui de se facillè amant voluptatem, ob fibras ad hæc dispositas.

Dispositio verò hæc habetur à temperamento in quovis homine, puero, vel adolescente, viro, vel sene. Temperamentum recentiores passim explicant per *commixtionem*, seu *complexionem*, Quæ fit remotè quidem ex 4. qualitatibus miscibilibus, *flava*, & *atra bile*, *pituita*, & *sanguine*, ità quidem, ut quæcunque harum qualitatuum in homine superet, illa deinde det denominationem v.g. sanguinei, melancholici, cholericæ, phlegmatici. Sanguinei sunt calidi, & humidi. Biliosi, calidi, & sicci. Melancholici sicci, & frigidi. Phlegmatici frigidi, & humidi. Temperamentum optimum est, si frigidum à calido, & siccum ab humido modicè superetur.

Præter hoc indolem causant etiam *Parentes*, quorum sanguis in liberis est. 2dò *Natrices*, bibita enim cum lacte venenum. *Mella puer sugit, sugit cum lacte venena: ista ferum reddunt moribus, illa probum.* 3rò *Educatio*, quæ dicitur altera natura. Ad quam refertur clima loci, in quo degimus *Cibus*, quem sumimus. *Tempus*, quo vivimus. 4tò *Adversitates*, & *morbi*, quæ morosos faciunt homines. 5. *Sexus ipse*. Cæterum, naturam seu indolem lapsu temporis mutari mutato temperamento, experientiâ constat in pluribus, ut v.g. qui hilarioris sunt genii, in morosissima entia cum tempore mutantur. Præsertim verò coningit illud per habitus acquisitos, de quibus dicitur: *consuetudo est altera natura*, cum aliquis videlicet sæpe speciei alicujus actus exercet; quia videlicet, cum per actus tales disponantur organa ad facilitatem similium actuum plurium, oritur habitus; & sic contingit aliquos fieri, v.g. iracundos per frequentationem iræ. Iste habitus iræ acquisitus naturalem inclinationem sæpe mutat in melius, illum frænando; nè juxta beneplacitum erumpat; sæpe autem depravat.

Curiositati ut serviatur, quamquam cum Socrate, & aliis Sapientibus censeam, ex physiognomia, seu vultû aspectu sæpissimè fallente non posse cognosci hominis complexionem, si scilicet hæc rationis fræno compescantur: Inclination tamen ex his frequenter conjici potest non modicè. Si quem videas pro ætate sua corporis validi, carnosî, faciei rotundæ, & rubicundæ, capillo nonnihil crispò,

spo, subflavo, & molli, staturæ item majoris, vocis firmæ, velocioris motûs, & linguæ, *Sanguineum* ut plurimum esse pronuntia. *Cholericus* è contrà mediocris ferè staturæ, vel parvus, & macilentus. Capillos ferè crispas, & retortos, vocem resonantem, & elatam, faciem vel subrubram, vel citrinam, vel sæpe biliosi morbi periculis subjectam.

Phlegmaticus vasti communiter est corporis, & pinguis. Rarioris capilli, & mollioris. Faciei modestæ, & ut plurimum quietæ, nè tædio motus sibi crura confringat. Venas habet angustiores, pulsus tardum, quem multo sumine præpeditum vix advertas. Sudoris est multi.

Melancholicos natura fingit staturæ ferè majoris, vel certè macilentos insigniter. Crine densiori, & nigro. Facie & cute squallidos. Incessu restudineo, vultu, & capite instar umbræ terram spectante. Pulsus eis subdurus; invidiâ, & tristitiâ laborant.

Fronte, oculis, vultu mendacia sæpe leguntur, bene canit Poëta. Certiora sunt complexionis indicia inclinationes ipsæ: sic inordinatè Sanguineus cibos, & convivia amat. 2dò si copiosius bibat, secreti servandi est impotens, instar bullientis aquæ suæ, & aliena pandit arcana. 3rò ad choreas pronissimus, ut videat ut minùs, si exercitium negetur. 4tò curis molestis se minimè fatigat, genio ubique indulget, in arduis promptus, sed ut primùm difficultatem advertit, desistit ab illa. 5tò moribus levis, & inconstans. Multa proponit, pauca præstat. 6tò Sceria in jocum vertit, sibi placens, se non sinè adinixtis mendaciis laudat, utque aliis placeat, sollicitè curans. 7mò Melancholicos non sinè sale traducit; unde si rerum potia-
tur, morionibus carere nec potest, nec vult. Vexari tamen non faciliè sustinet, ut verum sit illud: tange montes, & sumabunt. 8vò Pronus in amores; amare, & amari blanda illi est Musica; vestitu ornato gaudet, comit se stndiosè instar fæminæ toto habitu. 9nò Purè sanguinei non magnam boni nominis curam præferunt. 10mò verrecundi sunt, & ideo cogitata, & sensa non pandunt libenter. Rariùs etiam iis, quibus deceret, plenè sinceri.

1 *imò* exiguae sunt prudentiae in se ipsis regendis, affectibus abripiuntur, praesentibus fruuntur, de futuris nil solliciti; maxime si haec illis molestiam aliquam adferant. 12 *mò* nisi bilem mixtam habeant, scientiarum non multum capaces sunt; unde communiter pinguescunt, & cum crassioribus cerebri humoribus abundant, pinguioris Minervae sunt trosculi. En tibi synopsin:

*Largus, amans, hilaris, ridens, rubecque coloris,
Cantans, carnosus, satis audax, atque benignus.*

Cholericus, praedominante in ipso calore cum siccitate, ad haec ferè proclivior est: 1. ad graviores iram, saepe & rabiem, quae, si in alios saevendi copia desit, sibi ipsi non parcat, mordens stultè brachia, capillos evellens, caput parieti illidens. 2. Vindictae clam, aut palam cupidus, ita, ut si cum offenderis, aegrè admodum in gratiam redeas cum eodem. 3. Audax, & ferox est, praecipuus in concludendo, & exequendo, quorum subinde poenitet, postquam acta sunt. Plus impetu, quam mediorum delectu agitur in suas intentiones. 4. Gloriam non leviter studet. Unde aliorum fortunae, gloriae invidet; imò conatur eandem vel impedire, vel certè minuere. 5. Amicus constans esse nescit, facilis transfuga ab amico, praesertim, si gloriae, honoris, aut fortunarum inde speret augmentum. 9. Subdolanus est. Discordias, & rixas somniat. Suspicionibus agitur, & si conjiciat de aliquo aliquid etiam falsum, meram se censet habere scientiam aeternae veritatis. 7. Mendax est facile in iis, quae sibi gloriae ducit. 8. Multum garrulus, & plurimum verborum ob ingenii, & memoriae vivacitatem, & tantam abundat loquendi copiam in conversatione, ut solus loqui volens, vix alios loqui sinat; stentor magis, quam locutor. 9. Prodigaliter, ebrietatem, compotationes diligit, vinoque ob bilis copiam facile succumbit. Unde ferè rixosus. 10. In conjugio ferè imbellis, regitur, & gubernatur à femina. 11. Indomitus, & non raro impostor. 12. Sibi soli sapiens. Verbò: *Cholericus*.

*Fallax, irascens, hirsutus, prodigus, audax:
Astutus. gracilis, siccus, croceique coloris.*

Melancholicos fœcitas, & frigus prædominans his reddit obnoxios. 1. Solitudinis, more ferarum, & buborum amantes ut sint. 2. Scrupulis, & tentationibus admodum anguntur, unde proverbium vetus est: *recreatio dæmonis est melancholicus*. 3. Illicitas magias faciliè cōmplectuntur. Unde vultus plerumque teter, & horridus est. 4. Vehementi laborant phantasiâ, unde non rarò delirant; & se, vel DEUM Patrem, vel Angelos, vel mortuos, vel aliud quidvis stultissimè, & pertinacissimè credunt. 5. Facillimi sunt ad desperationes, & laqueum sibi injiciendum. 6. Suspicionibus pleni, credentes se ab aliis despici, timentes, nè decipiantur, Zelotypiæ plurimum dediti. 7. Duri capitis, & intractabilis, judicii tenacis, ingenti gloriæ calcari laborant: his proprium est: *qui volet ingenio cedere, nullus erit*. 8. Invidi, & tristes de aliorum successu, carpunt omnia. 9. Parci, avari, Eucliones, ad minutissima rei domesticæ advertentes, etiam quisquilias, & scruta. 10. Per cuniculos supplantant alios, si in propriam cedat gloriam. 11. Rigidi in alios. 12. Aulicarum cærimoniarum osores acerrimi, quia ineptissimi. Quid multa? *melancholicus ferè:*

Invidus, & tristis, cupidus; dextræque tenacis;

Non expers fraudis, timidus, livensque colore.

In Phlegmatico, ubi frigus, & humor prævalet, hæc reperies: 1. Somnolentiam, & laboris fugam. 2. Sedulam ventris opiparè habendi curam. 3. Animum resolutionis nullius, inconstantiam in propositis. 4. Timorem, & pusillanimitatem, ità ut terrore in omnia inducatur. 5. Ineptitudinem ad artes, & studia. Ad Ethicam ineptitudinem summam, maximè ad Politicam partem: bonus civis, consul pessimus. 6. In conversatione tacet, aut vix loquitur, nisi ventre bene pasto. Denique.

Hic somnolentus, piger, & sputamine multo,

Est hebes butè sensus, color albus, buccæque pinguis.

Illud tamen hîc observa: non esse necesse omnia hæc signa, seu inclinationes in unum convenire, ad hoc, ut hujus, vel illius naturæ quempiam esse judices; sed satis est, si plura quis habeat; præsertim si cæteris hæc majora sint, & potiora.

Q U Æ S T I O E T H I C A .

*An ex forma sapiens de virtute animi feratur
judicium?*

A F F I R M A T U R .

Res mira semper virtus est. Nihil igni similis, splendore, gloriâ, ductu exempli. Celari, dum maxime petitur, potest mininum; adeo repaguli, adeo fuci ipsius impatiens. Gaudet publico, ut publici causâ à benigno Numine conceditur. Excubat in medio tibi pulchra modestia vultu, Prothesim ponit Vates. Apodosim continuò addit: Virtutem Dominam quis neget esse domi? En, quàm legitimâ conclusione arguit, quasi certissimum mentis pondus sit vultûs, morum, formæque indicium. Si quem aliàs inter homines, temerarium dedecet esse sapientem. Ut cujus verba oracula, gesta omnia viva sint regula. Quid porro temerarium magis, & insolens, quàm eo ipso, quod natura certissimum vult esse speculum, formâ, inquam, & habitu non metiri aut virtutes, aut vitia? Aut simplicem enimverò genium sibi creditum habeat, qui non è colore, & ductu pretium iconis; aut obtusi sit cerebri ingenium, qui non, ut vidit, noverit & de corde sentire. Rarus profectò, qui sic astutam gestat sub pectore vulpem, ut non aliquo sui indicio, aut vultu se prodât, aut moribus. Julianum, illam Orthodoxæ fidei pestem, & propudium, Apostatam fore quondam sapienti Gregorio quid, nisi vultus acerbior, superbâ calce terram proterens gressus, elatior humerus, vox insolentior notavit? Nec finè Numine, quia non finè mali eventu. Atque errâset utinam! Felici complurium errorum, & damnorum impendio error unus redimeretur. At contrâ, ut taceam sexcenta: Ottomannicæ Portæ legatum quid coram Leopoldo I. quondam parvulo sic attonitum reddidit, ut né verbulum quidem proloqui, utut cuperet, posset barbarus, unius in ætate exili Principis vultum intentum? Virtus, ajebat, & Majestas vultu ipso signata; quâ quantus olim Orientis mastyx futurus sit, certis indi-

cūis præfagiebat. Felicem Austriam! felices nos! quia vel ab hoste aruspice veritatem nostris commodis edocti sumus.


NEGATUR.

Indigna res sapiente architecto, fundamento vili molem; indignior sapiente, fallenti vestigio pondus grave committere. Parem igni virtutem dotibus esse compluribus, nemo dubitat. At, ô quoties fatuis ignibus lusa est oculorum credulitas. Lucent hi exiguo tempore, incerto limite, ut fallant nempe, non ut ducant. Stellio non unus inter homines est, aut genius, aut ingenium. Sæpe, quod leo nequit, vulpina tentat cauda. Virtuti astus obdenditur. Non unam hoc in theatro lusit fabulam dolus. Proteum unum censuit antiquitas, legiones hodie deflet priscus candor, quos nè Momus, aut Argus ipse sat judicet perspicaciter. Adeo dextro fidere Mercurium sæpe stipes, ut acerbissimum vinum hedera quàm amænissima mentitur. Minoëm orbi redde, & si vultus, si morum, si vocum tornata spectet vestigia, non uno nomine operam ludet. Adeo vulgaris, unà & religiosus hodie est habitus mentiendi. Vulgaris frequentia, religiosus arte dissimulandi. Libet passim præferre, non quod licet, sed quod libet. Libet autem pro consuetudine, quod expedit pro opportunitate. Ut Jupiter quondam jam Aquilam, jam bovem doctus est simulare. Mendacium vivens cupis? vultus aspice, & formas hodierni ævi. Id unum passim consentire fateberis, discordiam vultus, & morum. Gaudet videri, & dici ut minùs, quod esse nequit frans. Pretiumque id operæ satis habet, credulis imposuisse. Et hic tamen colori sapiens suam det fidem? temerarius nunquam sit, at neque præceps. Errori obnoxium non faciliùs ullum numeres, quàm id hominum genus, cui color, vox, gestus dum suadet, jam persuadet. Ut amicus nemo, nisi modio salis; sic virtutis calculum nemo à te referat, nisi quem præter cultum, testes meriti sequuntur opera. Animus, non color; gesta, non verba germanæ sunt sententiæ bases. Si corticem spectes, aut pallium, illo nuculeum, hoc Philosophum vilem censebis. Medulla pretium

tium habet. Hanc rimare. Sæpe, cui gratiæ in ore minimùm, plurimùm deberi edices. Videri non gestit virtus, sed esse. Sui conscientia beata. Hæc correctus quoties, quem vultus vitiosum notat, si dotes animi spectes, super Ganimedem omnem extolles. Affine virtuti vitium esse non potest merito sui, colore conatur. Serpentem in herba latentem nonnisi cautus reperias: imò nunquam, nisi caudam, quam studiosè celat, sentias. Postrema hæc est corporis ordine, prima nocendi intentione. O errorem! data homini ratio, negata brutis. Celat ille se, pandunt hæc. Credas datam illi, ut se & alios perdat; negatam his, ut se & alios servent.

§. III.

*Quid passio in communi? Numerus passionum, & finis.
An bonæ, vel malæ?*



Dicat Erythræas, dum concitat, Æolus undas,
Quassa Noto melius stat quoque quercus humo,
Passio sic animum sapientis firmat, & auget;
Eja age! militiæ da documenta tuæ.

DOCTRINA ETHICA.



Um inclinatio ad certas passiones multum ex temperamento seu complexionem oriri possit, ad particularia devolvitur series. Nota ergo, aliud esse *passionem*, aliud *affectum*. Affectus enim est in parte *rationali*; passio est in parte *animali*; licet passio & affectus ideo sumantur pro eodem, quod, dum passio in parte animali oritur, ferè etiam in rationali parte oriatur affectus.

Passio ergo hìc significat non dolorem alicujus sensus, vel receptionem alicujus formæ, vel proprietatem rei amata; sed est *motus*, seu *actio immanens appetitui sensitivo*, ex apprehensione boni, vel mali sensibilis cum aliqua alteratione, & immutatione non naturali. Ità communis cum Arist. 2. Rhet. c. 1. S. Damasc. apud Esparrz. a. 6. Dicitur *actio*, quia per passionem, licet patiatur appetitus, tamen etiam agit se movendo in bonum vel malum. Dicitur *appetitus sensitivi* ex apprehensione, cum, ut dictum est, passio sit in parte animali, & ideo datur etiam in brutis. 2. Eth. c. 5. & quia dum phantasia proponit objectum bonum, vel malum, sequitur naturaliter appetitus; seu deinde bonum illud sit *moraliter* bonum, seu non. Et hinc, si pugnet bonum cum lege rationis boni, oritur pugna inter partem interiorem sensitivam, quæ rem sensui gratam esse putat, adeoque prosequendam: & inter superiorem, seu rationalem, quæ rem lege DEI vitæ, noxiam animæ esse videt, & ideo suadet vitandam. Quanquam etiam intellectus & voluntas ad continuandas vel procurandas passiones faciat, dum scilicet fovet apprehensiones phantasticas, & hoc dicitur *motus liberatus*.

Dicitur demum cum *alteratione non naturali*, quia passio, cum sit passio corporis, & actio appetitus: passio corporis est per hoc, quod debita cordis constructio, & dilatatio non servetur, dum oritur passio; sic in lætitia dilatatur cor; in tristitia constringitur. Licet juxta Raynaud. disting. 3. Qu. 1. magis noceat constructio, quam dilatatio cordis, & ideo dicitur tristitia esse magis passio, quam gaudium. Fieri etiam teste Fabri l. 3. de hom. p. 42. potest,

test, ut vehementia passionum ad insaniam hominem moveat; quia scilicet etiam cerebrum, quod habet naturalem cum corde connexionem, vehementer movetur per passionem, præsertim propter phantasiam, quæ præluceat appetitui.

Propter varietatem objectorum varium diversi numerum statuunt passionum. Cum communiori 11. esse judico. *Amorem, Desiderium, gaudium, odium, abominationem, dolorem*; & hæ sunt in appetitu concupiscibili. Cæteræ sunt in irascibili, videlicet: *spes, desperatio, audacia, timor, ira*. Aliæ inter has juvant movendo in objectum; aliæ remonent impedimenta. Amor præcedit omnes, quasi antesignanus omnia ad finem disponens. *Tristitia, & delectatio* alternativè ferè terminant passiones, ita Philosophus l. 2. Eth. c. 5. Esparza cum Piccol. his addit duodecimam: *lenitatem positivam*. Illud certum est, plures ex his passionibus in eodem sæpe homine reperiri, & ideo difficulter unam discerni ab altera. Ex his aliæ sunt *finitæ*, quæ habent mensuram, quâ saturantur; v. g. appetitus bibendi. Aliæ *infinite*, quæ non habent terminum; v. g. ambitio. In primis minùs peccant bruta, quàm homines: quia illa naturam paucis contentam sequuntur; neque enim equus ultra appetitum edit, aut bibit; hominis (quod factum est) malitia terminum nescit ingluviei. Aliæ demum passiones sunt sibi contrariæ, v. g. amor odio, &c.

Finis passionum proximus est *adeptio boni sensibilis, vel mali absentia*. Remotus est *Conservatio animalis*. Naturaliter passiones sunt potiùs bonæ, quàm malæ, nisi quis violentiâ suâ lædat temperamentum. Moraliter verò sunt ad bonum, & malum indifferentes. Unde Arist. 2. Eth. c. 9. ait: affectus, neque virtutes, neque vitia sunt, quia ex affectibus neque mali, neque boni dicimur, sed ex virtutibus, vel vitiis, prout scilicet recta ratio affectibus utitur. Præsertim verò intelligendum illud est de indeliberatis motibus concupiscentiæ, de quibus ait Scriptura 2. Cor. 12. *virtus in infirmitate perficitur*. Bernardus verò super idem: *non nocet sensus, ubi non est consensus*. Unde non mirum, quòd etiam in Sapientes, & sanctissimi

mos passiones cadant. Quis Christo sapientior, & sanctior? & tamen Marth. 26. *tristis*, ait, est *anima mea usque ad mortem*. Quin imò scientiam, & sanctitatem vel idipsum auget, ac testatur, quòd involuntarios hos motus naturæ ratione compescant. Quod quivis præstare potest, quantumvis vehementissimam naturæ nactus sit indolem, modò violentiam sibi inferat, quâ dominatum animi, tum etiam finem suum ultimum consequatur. Ad quem assequendum licèt aptiores sint, qui passionibus minùs vehementibus sunt obnoxii, quàm ii, qui majoribus; ùt cum Aristotele censet Ptolemaeus. Dissert. Eth. 14. N. 19. Datur tamen virtutum heroicarum his campus quàm optimus, qui asperiores nacti sunt passiones, & via asperior ad finem eundem, quem suapte naturâ facilè assequuntur, qui, quæ honesta audiverint, illico complectuntur.

Q U Æ S T I O E T H I C A.

Unde major Spes, à præcoci, an à tardo ingenio?

PRO PRÆCOCI.

Aquila princeps volucrum sin aliò dominatum teneat meretur pernicitate. Desiderio contabescit animus, dum dilata coquit consilia; quæ si, ùt ratio jasserat, tentasset, consolatione diffunderet. Mittenda in segetem falx, nè solà spe cibi lactatus, fame pereas miser. Si votis duntaxat te pascas, manum operi non admoveas, sterilitas tibi supererit, doloris compendium, & vecordiæ testimonium. Celeritatis præmium feræ gloria est: quæ non secus, ac fortuna tardantes si non fugit, certè fallit. Invisa felicitati vox est *mora*, vel *crastinum*. Idem enim feræ est nolle, aut serò velle. Ut Divino teste calamo: vult, & non vult piger. Meritò Lucanus quondam: Tolle moras, semper nocuit differre paratis. Si càm petis: aura dum favet, dum aspirant venti, dum longè tempestas est, emetienda sunt maria: nè pœnitentia sera occasionem fronte capillatam, sed elabi permissam excipiat. Quidquid laude dignum, donec ad apicem perdu-

Etiam, sistendum est nunquam, aut differendum: nè fors infelix moram excipiat, atque adeo fama tui cantet ludibrium: imperfectum esse opus, quia dilatum. Romam specta, crevit opere, non consiliis segnibus. Si qua Regum dos propria, fastigio eorum digna gloria, est executio facilis, & alacritas; tarditas, quia lento nititur gradu, servos decet, & testatur. Repat testudo humi, emetietur leucas siderum Princeps. Sol Regno Princeps est. Illius lumine orbis, hujus consilio regitur, servatur, beatur. Da soli tarditatem, da eandem Principi: quæ tum orbis fata? languore torpescent omnia. Amplissima, ut sunt regnorum curæ, ipso rerum pondere, & affluxu novorum, quid nisi negliguntur dilata? eo fanore, vix restaurari sæculis sæpe integris posse, quod hora neglexit. Tu ergo, si gloriam, si Rempublicam diligis, matura delige. Quæ lenta cudentur, tametsi grandia sint, aut executionis difficultates patiuntur, obicem statuente vel hoste, vel invidiâ; aut certè successus si habeant, æstimatione & amore carent aliquo, quia expectationem non prævertunt. Inexpectata duntaxat admirationem cient; & quod consequens, si utilia sint, etiam amorem.

PRO TARDO.

PRæcoces fructus ferè aut diuturni minimè, aut nocivi. Afficiunt novitate sensum, non foveant, aut roborant vires soliditate. Ut ætas, quæ præcipit, rarè sapit tum, cum max.mè oporteret. Hebetatur nempe præcoci partu vis ingenii, ac spiritûs, aut extinguatur penitus. Vero illo Poëtæ: hunc tantum terris ostendent fata, nec ultra esse sinent. Lando proinde alacrem, præcoccem nunquam. Celeritas illum commendat, hunc temeritas reddit culpabilem. Celer esto semper, nunquam præceps. Alas magistra rerum natura negavit homini, tametsi Princeps sit orbis, pedes dedit; ut doceâre, nec volandum esse homini, nec rependum. Sagi ta esto terminum petens, in quem priùs consultò librata, neque tamen solis alis instructa, quibus auram permeet, sed & ferro armata, quo velocitati pondus adsit moderatio. Faveant quàm

quàm maximè venti, insulentur carbasa è sententia, nunquam urgentibus velis spoliū datur navis, sæpe cursui moram lavarchus injicit, nè præcox favor in præcipitium torqueat. Commendatur Bucephali pernicias, frano ducen-
e opus erat, ut virtutis teneret apicem hoc uno, quan-
tū velocior cæteris, tantū sui à ruina securus, quia
luce non carens. Securius à periculis ingenium tardius,
tia non tot æstibus; quot præcox, obnoxium, neque
dè est procellosum. Audet illud, sed quia temerè, fe-
è infelicius; aut si felix, eventu magis, quàm consilio.
Audet & hoc, sed quantò seriùs, tantò tutiùs, suo, &
Reipublicæ commodo. Summa ferè ingenia, ut Seneca
este, inixturâ ferè non carent stultitiæ; sic modum ne-
ciunt. Ipso ferè apice, quo prodesse deberent, Reipu-
licæ damnis obnoxia. Ut alta ventis pervia, sic ferè in-
quieta, & factionibus ut minùs, sin excidio nata. Quid
interest, an ingenti cerebro momento des consilia Princi-
i, quæ tardum ingenium studio, & constanti curâ ma-
is excocerit; aut certè sin eadem exequi detur, execu-
tioni magis conformia suadeat, quàm præcoci
imaginationi?



Q U Æ S T I O V.

De passionibus in particulari.

§. I.

Quid Amor?

Dic, quid amor? Vis nōsse? Amor est. Responsio, & idem est
 Quæstio: sic duo sunt, & simul unus amor.

Hoc anigma capit, qui, quid sit amare, probavit.

Nāmq̃ ubi verus amor, solus ibi esse nequit.

D O C T R I N A E T H I C A.

AMor, blandum illud, ut nominat Petrarcha, & commune omnibus venenum (si de illo agamus, tam ut affectus, quàm ut passio est) alius est *naturalis*, quo amatur res, in quam naturaliter inclinatur appetitus, v. g. lapis in centrum. Alius est *animalis*, ut brutum amat pabulum præviâ apprehensione sensitivâ. Hic amor si sit vehementissimus, ut fieri solet in amore carnali, dicitur *furor*. Unde amantes sæpe faciliè amentes. Alius est *spiritualis* præviâ cognitione naturali, & hic est voluntatis amor. Hic amor si concipiatur ex instituto & fine Divinæ fidei, dicitur *superna*
tura-

zuralis. Rursus amor alius est *amicitiæ*, qui bonum vult alteri, quia ipsi amanti bonum est, v. g. pauper divitias optat liberali homini, ut stipem acquirat.

In communi ex D. Thoma est amor *quædam coaptatio potentia appetitiva ad bonum alicui conveniens*: ita quidem, ut ex Aristotele 2. Rhet. l. 4. *conectur amati bonum efficere, quantum potest.* Tamen si dulcis hæc mors in toto resideat corpore, cordis tamen penetrabile præ reliquis occupat, unde per fibras diffusus amor, partes omnes occupat, & quodam calore accendit. Hinc illud vetus sinè metaphora: *si bonus, ardet amor.* Causa amoris princeps est *solum bonum cognitum.* Bonum quidem, quia id solum est velut convenienter appetibile. *Cognitum* verò, quia nihil volitum, nisi præcognitum. Et licet cognitio hæc ad amorem se tantum habeat per modum cognitionis, ita ut solum bonum ex se amorem moveat, cognitio tamen est conditio, sinè qua non moveret hoc objectum ad sui amorem.

Ad hanc cognitionem excitandam, quia pulchritudo oculos alliciens, & delectans plurimum conducit, ideo Platoni amor dictus est *appetentia pulchri*; sic tamen, ut bene distinguit Esp. q. 8. a. 1. ad 3. quod pulchrum neque intendat amans, neque possidere cupiat de se, bonum verò ratione sui intendat, & amet illud. Nihilominus D. Thomæ 1. 2. q. 27. verum est dictum: quod *pulchrum* addat supra bonum hoc, videlicet, quod dicat ordinem ad vim cognoscitivam. Dum scilicet per oculos, qui sunt amoris fenestræ, visâ pulchritudine excitatur cognitio, & inde amor oritur. Unde illud Peëtæ: *ut vidi, ut perii.*

Si quæras: quid sit pulchritudo? Sentio cum Aristotele 7. Phys. c. 12. quod sit *relatio quædam ad illud, quod amat*; prout videlicet ille dispositus est, & rem amatam cognoscit. Hinc fit stultè amari multa, quæ aliis meritò invisa sunt, quia sibi scilicet lepidè res aliquas nonnulli proponunt: & tamen, quisquis amat ranam, ranam putat esse Dianam. Hinc orta paræmia: *de gustibus non est disputandum.* Pulchritudo Corporalis respectu oculi per Philosophum 13. Metaph. c. 3. est *ordo, mensura, & definita moles partium in toto* per colorem & figuram, v. g.

facies decora. Respectu *aurium* est harmonia soni acuti, & gravioris. *Moralis* est actionum compositio, & modestia. *Supernaturalis* est rerum Divinarum. Philosophus si Platonem dicentem audiat: pulchrum *Creatum*, esse *fulgorem summi boni*; optimè fecerit, si amet *summum pulchrum* (Deum) quod est undique bonum sinè admixtione ullius mali.

QUÆSTIO ETHICA.

An suavius, & optabilius amare, an amari?

AMARI.

QUàm communis amor, tam frequens lamentum est: diligor heû modico, qui totis diligo flammis. Utrum verò hæc inter optabilius, amare, an amari? mira quaestio. Nemo inter homines summa non petit; & vel ideo arrogantia menti congenita alienum excutit frangulum. Latere nescit cum flammis animus, cui charior semper potestas regendi, intolerabilis contra est necessitas serviendi. Miserabilius nullum est alieni arbitrii mancipium amante. Infelix, quod tantò sædius, quò abjectius sui ideæ tortor & carnifex. Lanienâ eò magis miserandâ, quòd vincula consultò injecta quantum gravant, tantum amantur. Cesset ratio, ubi hæc tyrannis animum tenet, quam nulla sæpe frangat barbaries. Suam ipse vitam nescit, qui, quantum vivit, tantum soli vivit amato. Quid interest, auro vinciâre, an ferro, si compes libertatem præpediat? Ut quondam risus à Diogene Aristippus, quòd aureis aulae compedibus alligare ur, nè avolare posset. Et quamnam hæc oro dementia, nedum suavitas, aut desiderium, suas utut aureas (cum Romano loquor Philosopho) amare compedes? Dedecent grandem animum idola modica, quibus adorandis se iners substernat, cui orbis impar est. Ferè enim verum id: quisquis amat, servit; dominatur, quisquis amatur: quisquis amat, patitur; quisquis a natur, agit. Ulysses aurem obturans exemplum esto felicitatis. Quantus mansisset Alcides in fabulis, Samson

in

in facris, Henricus VIII. Angliæ Rex, nostratibus in literis, nisi amantes? & vel ideo amentiar viciniores, quia amantes. In promptu causa est: amor nullum novit habere modum: addo ego, nisi eum, qui finè modo. Pyramus, & Thisbe ficcam ostentantes testantur. Sic nempe amor agens nunquam inoderatus, seu suópte ingenio, seu suasu. Meritò igitur suavius, & optabilius amari. Excellentia idem, & peculiaris quidem est pignus. Cùm ferè pretiosa tantùm in pretio sint. Amore ipso ut felicior, sic ditior redditur, qui amatur; dum amorem testantur amantis munera, quibus fons ipse se exhaurit, inops sibi, quia dives amato. Audi Philosophum l. 2. c. 12. videntur præcellere homines, dum amantur, voluptate, copiâ, vel virtute. En quanto merito optabilius, jucundius, beatius nihil, quàm amari.

AMARE.

Quantùm mors aut amabilior, aut suavior vitâ, tantùm amari præ amare. Mortua est amans voluptas, nisi redamet, in amato. Ejus blandâ tyrannide fasciatus amans, quantùm exhauritur, tantùm satiatur. Hinc Arist. 2. Moral. c. 12. *amare melius est, quàm amari*; quòd illud voluptatis actio perinde, ac bonum sit; ab eo contra, qui amatur, actio est nulla. Pari sorte quis cognoscere optabilius esse neget, ac suavius, quàm cognosci? amari, & cognosci possunt & illa, quæ vitâ carent, suo proinde ortu vilissima quæque. Nullus è contrà amat, qui non unâ vivit. Scilicet illi duntaxat amor communis est, cui communis est cum Superis vita. Hoc illud est adamantium vinculum, quòd, quantùm nectit fædere, tantùm afficit dulcedine, ut radii solem. Quis amantium Davidis aut Jonathæ commendare pericula? quis Euriali, & Nisi heroica in Patriam curaret studia, nisi amor pondus addat bilanci. Hic ille est aries, cui vel aheneus cedat murus oportet. Hæc illa est flamma, quæ arduitatem omnem ignorat; nihil enim amanti difficile. Artifex mirus, potest omnia, quia audet omnia. Tolle amorem, seu concordiam elementis, natura chaos erit, non

ordo pulcherrimus. At servit amans. Servit fateor, sed, ut grandes solent, libertate aureâ, & benefactis, non ut mancipia necessitate ferreâ, aut invitus. Quis Deo famuletur amplius, hanc si amoris vim spectes? Anne tamen idcirco est universi mancipium? nempe felicius semper est, dando felices reddere, quàm reddi felicem accipiendo. At si quæ felicitas est amari, nunquid ejus compos est amans? Veteri sapientum regulâ: qui vult amari, amet. Tyrannus amor communi suffragio audit, at crudelior vipera lancinat animum ejus, amorem qui patitur, vel eò duntaxat, amantis ut servet Charites, deincreatur gratias, jacturam vel nutu nè faciat.

§. II.

Causæ amoris, effectus, remedia.



Vasfer amor Mimo dum sibilat ore, renasci
 Glutine fatales instruit usque dolos.
 Heû mihi quot miseræ fraude hâc pericere volucres!
 Ah cave, nè laqueo tu capiâre pari.

DOCTRINA ETHICA.



Ausæ amoris principes sunt: 1. *similitudo*, de qua vetus illud: *similitudo morum, mater amorum. Graculus graculo assidet, cicada cicadam amat.* Alios similis natura arctiùs connectit: sic oderunt *bilares tristem, tristisque jocosos.* Sanguineus cholicum præ aliis, cholericus vicissim sanguineum amat, melancholicum rarò, phlegmaticum vix unquam. Melancholicus rarò amat (hinc apathos dicitur) si tamen amet, nescit modum. Cholericò præ cæteris jungitur; sic tamen, ut jurgiis frequentibus amor iste non careat, ut si unquam, hic verum sit: *non est, si non sit, litigiosus amor.*

Alios similitudo vitæ, doctrinæ, &c. connectit, sic se dilexere Polystratus, & Hypocrates, qui simul nati, sub eodem climate, constellatione, die: similis complexionis, ingenii, fortunæ, simul infirmati, simul mortui. Videntes alter sinè altero esse non poterant. Et licèt figulus figulum, etsi similem sibi oderit; id non fit similitudinis causâ, sed quia alter alteri lucrum utile impedit. Dissimilitudo etiam potest esse causâ amoris; sic egens divitem, quia beneficium; Rex subditum, quia tributarium; æger medicum, quia salutem suam diligit.

2da causa est *amor*. Vis alterum cogere in tui amorem? En licitum ex Seneca philtrum Ep. 3. *Ut redameris, ama.* Dixi *licitum*, habetur enim apud non multos philtrum, seu incantatio, carmen, medicina, vel quodcunque aliud, quoad amorem, vel odium erga aliquem in persona aliqua excitandum utuntur magi, & incantatores. Quæ infelicitas neo-Conjugum non rara est. Censet quidem celebris, ut eum Raynaudus nominat, sagarum Patronus Wierns, nihil has incantationes posse; sed doctissimè eundem confutat Delrius magicarum quæstionum qu. 3. Amor hic magicæ artis, ut observat Plutarchus, turbidus est, & injucundus, scilicet pisces medicamento capti sunt inspidi: sic tamen amantes carnaliter peccant, quia philtrum voluntatem liberam non potest coge-

cogere ad amorem, licet hominis temperamentum inclinet.

3tia causa est conjunctio naturalis Parentum cum prolibus, & vicissim, ut docet Arist. 8. Eth. c. 12. ubi infert, majorem esse amorem parentum in proles, quam prolium in parentes; eò quod parentes, maxime mater, majorem habeant certitudinem, quod hæc proles sit sua, quam habeant proles, quod hi sint parentes. Hic amor parentum cæteris paribus in primo-genitos est major. Unde leges Italiæ, Galliæ, & passim Germaniæ primo-genitos in hæreditate præponunt cæteris. Reliquas causas amoris v.g. conversationem præsertim occultam, beneficia, raritatem rei, &c. non moror, quia huc non referuntur.

Passio hæc effectus habet quàm plurimos: primus est *unio affectiva*, unde illud: *anima magis est, ubi amat, quàm ubi animat*. Hinc amatum semper præsentem mente constituit, si non possit præsentiam physicâ. Somnus ipse ob frequentes fibrarum motus vel impeditur, vel somniis de re amata turbatur. Vigilantis situs & gestus mutatur idem idem. 2dus est *Extasis*, quasi à se ipso alienatio, ita videlicet, ut mens tota sit in amato, vel per cogitationes, vel per affectum, ob tantam intensiorem amantis in amatum, ut faciliè oblivio sui ipsius succedat, & neglectus rerum omnium. Extasis hæc, ut bene D. Thomas observat, est solius amoris amicitiae, & quidem tantum in amore spirituali; carnalis enim, ut supra dixi, si intensus sit, amentiam, & furorem gignit, ut patet in Rudolphi L. B. de Warth, homicidæ Alberti primi Cæsaris uxore, quæ anno 1308. dum conjux ob scelus admissum confractis manibus, & pedibus rotæ impositus triduo ibidem viveret, infra rotam sine cibo & potu triduo perstitit, donec ipsa quoque amaritudine cordis virâ fungeretur. Et quamquam non semper ea sit amoris vehementia, ut hominem statu mentis dimoveat, melancholicum certè facit eum etiam, qui naturali complexione hilaris est, & hoc quidem ob continentem sanguinis, & spirituum resolutionem, ita ut sanguis ater, & crassus tantum cor occupet, qui centrum replens tristibus deliriis mentem confundit, & ad morbos, vel violentas sibi met ipsi manus inferendas hominem impellit. Ter-

Tertius effectus est *Zelus*, omnia vincens impedimenta obstantia ad rei amatæ possessionem. Unde vetus: Liberior Spartâ est, ingeniosus amor. Testis Leander, qui obstantes fluctus natando emetiens, ut amato frueretur consortio, inclamabat: *parcite, dum propero, mergite, dum redeo*. Testis ætate nostrâ Comitissæ de Nithisdale conjux in Angliâ, quæ conjugem carceri mancipatum liberatura, carcerem subiit in speciem ejusdem visendi causâ; mutatisque cum eo vestibus ipsa virili in habitu permansit in carcere, dum conjux astu hoc custodiam feliciter prætergressus, fugâ sibi consularet. Sed & conjugii amoris ingenium profuit, libertatem tulit dilectio sententiâ Judicum, communi Angliæ, & orbis commendatione.

Quartus est *naturalis quædam infirmitas* ex eo nata, quod cum amans sit totus rei amatæ intentus, non curet vel alimenta viribus necessaria sumere; unde pallor, languor, & cætera morborum ilias.

Quintus demum est *amoris exuberantia* dolore mixta, quo timet amans, nè ab amato minùs ametur, vulgò *Zelotypia*.

Potentissimi animorum hostis hujus pauca sume remedia. 1. mutatio loci ægris, & amantibus opportuna; hæc enim tollit occasionem agendi cum amato. Mutationem hanc, cave, nè differas. Principiis obsta, serò medicina paratur, dum mala per longas invaluere moras.

2. Diligens fuga conversationis, tum occupatio frequens in rebus seriis; alioquin enim, cum amor Diogeni sit *otiosum negotiosum*, solitudo amorem fovet potius per cogitationes. 3. Sincera de rebus cape judicium. Certissimum enim illud: omnis amor cæcus, non est rerum arbiter æquus, nam deforme pecus, judicat esse decus.

Vide an dignum sit momenti illicio emere pœnitudinem æternam; rei vilissimæ posthabere pretium, & omnem animi felicitatem. Unde *generositas mentis* consurgit his è nugis, & blanditiis major animus, quas non modò *sequitur ultor à tergo Deus* testante Diluvio Genes. 6. & Sodomâ, sed testante exitio tantorum quoque, regnorum, ut Assyrii Imperii in Sardanapalo per Arbacem, Romani regni in Tarquinio superbo ob vitiatam Lucretiam

Trop.

Trojani ob Helenam raptam, Anglici ob Bolenam, & alias ab Henrico VIII. assumptas. Verbo, cogita: iter nunquam ingreditur honoris, lascivæ addictus quisquis erit Veneri. Quamquam hic amor non *amoris*, sed *perditionis*, & *concupiscentiæ* nomine dignus, quoties ad noxia animo derivatur, ut observat Raynaudus.

In amorem priores sunt per Philosophum 8. Eth. c. 3. sanguine puro abundantes, quales sunt Juvenes ætate, præsertim complexionis sanguinæ. Hi quia simplices, & creduli; ad hæc, non sæpe decepti, faciliè amant, & redamant. Difficilior est in senibus amor ob siccam complexionem, itèm ob suspiciones ex longa experientia in his admodum faciles. 2dò. Nobiles, & potentes, qui quidem. uti & ii, qui liberalem vultum, & indolem sunt sortiti, amari potiùs volunt, eò, quòd in amore hoc, quo ipsos prosequuntur alii, suam præstantiam collocent. 3tò. Qui calidioribus regionibus sunt editi.

Id universim nota, amoris ordinem esse primum à se ipso, etiam per Arist. 9. Eth. c. 8. Unde si Latio sit venia: *charitas incipit ab ego*. Recta tamen ratio amorem hunc moderetur, oportet; secùs *Philautia* sibi tantùm studens charitas erit, nihil pensi habens suo pro commodo vel universi incommoda. Quamvis *dilectio*, *charitas*, pro eodem sumantur cum *amore*, tamen ex 8. Eth. differunt sic, quòd *dilectio* sit initium amicitiae, & requirat selectionem rei amatæ. *Charitas* oritur ex magna rei amatæ appreciatione. *Benevolentia* itèm, concordia, & *beneficentia* differunt.

QUÆSTIO ETHICA.

An dari possit philtrum universale in natura conciliando omnium amor?

AFFIRMATUR.

A Mor, blanda illa animorum vipera, aded nulli non domestica, ut cui scintilla humanæ est mentis, huic victima esse velit. Stoico Catones da supercilio, vel sinè gratiis Aristarchos, tametsi expertes sensûs videntur,

antur, amari qui nolit, comperies neminem. Et quântò id multis vitæ, fortunarum, bonorum omnium stetit impendio? felices se credentibus, si modò amoris tesserâ donati; quasi verò hæc una dispendium omne in fortunæ compendium, virus in mella transformet. Quanto leviori pretium hoc venire pretio liceat? Si vis amari, ama. Dictamen naturæ philtis omnibus certius habe. Hoc igne vel ferrea incudem ferent pectora, eò tractabilia magis, quò flammæ ipsa suas diligunt. Victimæ sui pariter, & sacrificuli. Charum esse vox Cara admodum sexcentis. Ama, quid facilius? quid tamen unâ felicius, ac certius est ad redamandum? Rudera æmuletur cor amans, flammæ testetur *clamore*, reddet Ecchò, amati pectus, vocem optatam, ardeo *amore*. Affabilitas vultus, comitas morum, sensuum candor, inhospitales etiam Caucasos eliquant in affectum, facilius, ac Hannibal in obsequium Alpes. Semen amoris mutui amor est; crede largâ manu sementem tuam, vicem reddet par cordis officium. Dexterâ è contrâ tenaci si sparseris, parca itidem falx metet sementem. Arbitrio tuo stat fructus amoris, quantum tuus in alterum, tantum ferè alienus in te crescet affectus, redivivo in te Herculis Gallicani exemplo, amoris fascino quorum, & quantum libuerit corda neſtentis. Quod aperta vis belli non potest, cavernis abditi domant cuniculi; comitas, affabilitas stratagema efficacius, quia blandè; serpendo sibi ipsi cor eripit, & in obsequium cogit amantis. Hospes tum primùm advertitur, cum expugnatos animos in triumphum ducit. Da Principem hâc dote insignem, & felicem sibi, Regno, orbi dedisti dominatum. Liberi, non subditi sunt Principi, qui diligunt, quia dilecti. Pater his cum Germanico magis audit, quàm Dominus; & dum delicias generis humani eum cum Tito populus salutabit, in omnes nutus obsequentem facilè nanciscetur, in quem amor plenum obtinet dominatum. Quid multa? quisquis es, amari malis, quàm timeri: nè iniquis quidem acerbis. Verùm tuo id documento reperies: si vis amari, ama. Rarior nulla triumphandi dos, quàm dum præsidia & gentes sponte cadunt non tam in gladium, quàm sinum victoris. Qui sic vincat,

eat, rarus est. Certius tamen vincit nemo, quàm qui sic vincit. Et quid vetat triumphi hujus gloriâ coronari quemlibet? Amorem cuius cum natura dedit nascendi fors. Quid igitur torpeat otio, qui ignaviam nescit, affectus? Caloris virtus est maxima, si Philosophis credimus. Cur non eadem sit amoris? Data hæc vis est omnibus, tu ad omnes, ut ratio suadet, extende; tibi hoc pacto teipsum multiplicas, quia amantes vel procuras, vel firmas. Obsidionales, civicas, murales sanxit vetus Roma coronas. Mirum est, quod sapienti ejus Politicæ non occurrerit, etiam *Amicam* fundare. Illæ sub jugum missas gentes, Urbes, cives servatos notârunt. Hæc clientum officia, & cum his sæpe salutem Patriæ vel fundatam, vel promotam tributaria facit. Pudet ferè amantem non prosequi, æquè penè, ac pudeat non esse hominem. Nemo enim; aut hebes est adeò, qui amoris argumenta non capiat, aut saxeus adeò, qui amoris argumentis non capiatur. Alter proinde alterius illicium est pariter, ut amet; & ut ametur, fomentum. Repeto: Si, & quantum vis amari, tantum ama.

NEGATUR.

Non tanta regionum, cultuum, imò & vultuum per orbem disparitas, quanta est animorum. Quæ igitur par fascinandis omnibus sit regula? amor amorem provocat, haud negaverim. At quot reperias pectora, quæ si pumices cernas, aut filices, undas antè elicies, ac scintillam amoris. Cur? Misantropos cum Tarquinio illo generis humani hoste, Apathósque reperies, ut belluam antè cicures, ac horum vel feritatem, vel duritiem mollias. Nempe adamante durius si quid natura genuit, fibræ multorum sunt. Arte nullâ Riphæum horum frigus dissolvas. Da verba, gemina comitatis officia, suspicaces illa, hæc contemptores efficient. Ut de gustibus, sic de geniis quæstio esse non debet. Hos amor, illos supercilium manet. Adeò tamen malignantis nonnulli sunt indolis, ut placeat nemo. Neque mirum, non eadem sonipedes regendi est regula, nec eadem est animos edomandi. Nemo

mo Deo in amandum pronior, aut liberalior. Fecit, quod omnipotens potuit, & quod non nisi summè misericordem decuit. Ut essent, jussit omnia, ut servirent, ut delectarent. Addidit in pignus sanguinem, se, Divinitatem ipsam vadem, & pignus amoris. Excessit amantium non regulam modò, sed vel cogitatum. Seipsum jugi epulo tradit. Merita ibi, & spes amati, hic vel vota superat. Fecit, quòd non nisi impudens, aut imprudens optare quis potuit; Fecit, quo majus Deus ipse non potuit; quia quod adderet ultra, non habuit. En quanta argumenta amoris. Et quàm avara tamen redamantium pectora. Argenti ad flammam; vix agnoscunt, quas in momenta gratias sentiunt. Perire malentes Andabatæ, quàm sic amantem amare; Conditori, Salvatori, Patri vivere, & beari. Ingeniosus, si aliàs, Numinis amor, quod tantis adderet, non viderat, & tamen commune omnes devinciendi meritum amorem suum heu quàm modico cernit pensari. Nempe actum agit flamma innocua, cùm feris ipsis crudelior pectus obsidet hydra. Et quot ejusmodi pestes alit Respublica? & has sibi amore devinciat quispiam? Princeps cumprimis? sanè privatus cùm fueris, aut bonorum, aut malorum censum augeas oportet. Cygnis si faveas, corvis displiciturum te noveris. Horum contrà si placeant studia, & affectus, illorum amores perdas, est necessè. Ipsum placere multis displicet, & alienà videri gratià frui, invisum reddit. Carpitur nempe vita, non tam annis, quàm censuris absoluta. Nunquam in theatro fabula finè Momo. Persequitur, prosequitur, quia finis cuique bonum suum. An ergo tu omnium corda tibi demere merito, & candore, quæ Naturæ Author non possit, etiam cùm benefacit? Si Reipublicæ habenas dirigas, cœlera ut cancranam resecas, nè corpus perdas malo feriente; pia hæc crudelitas est, insipiens odium trahit. Paulos feri, ut omnibus parcas. Terrore omnes, paucos fulmine affice, felicitas sic consistat publica. Ament boni, oderint mali. Satis est. Dum paucorum excidio. Salutoris hic & providus amor amorem conciliet sapientium. Actum est cæterum: amari qui vult omnibus, aut Deo major sit, necesse est, aut ametur à nemine. Acer enim

humor citò invenit, quod arrodât. Justa nempe hæc vindictæ pœna est, ut, cùm pauci nobis placeant, paucis pariter placeamus.

§. III.

Odium. Cupiditas. Desiderium. Fuga.



Milvius innocuas cupido rapit ungue columbas.

Et fugit à rapidi dentibus agna lupi.

Hoc suadet natura feris: rationis at usus

Te, bene quid fugias, quidve sequâre, docet.

DOCTRINA ETHICA.



Odium, amoris contrarium, est *volitio alicujus mali alicui*, vel est *aversio appetitus sensitivi* ab eo, quod est, vel apparet malum, & sic potest etiam veritas odium parere, apprehensa sub ratione mali. Odium aliud est *inimicitia*, quod opponitur amoris amicitia; hoc odit personam, & ideo vult ejus malum. Aliud odium est *abominationis*, oppositum amoris concupiscentia; & hoc odit malum, quod est malum alicujus personæ.

Causas odii ex contrario amoris intelliges. 1. Omne turpe excitat odium, seu turpe corporale, seu morale, ut est

est superbia, & ex hac ortus contemptus, avaritia, crudelitas. 2. Morum dissimilitudo. 3. Maleficium, seu vis magica. 4. Naturalis antipathia, dum sibi contrarii sunt aliqui etiam primo aspectu, nec scientes odii causam dare, neque vim occultam advertentes. Sic Poëta: *Non amo te Sabidi, nec possum dicere, quare: hoc tantum possum dicere, non amo te.* Negat quidem Fabri vim talem occultam l. 6. pr. 5. n. 3. Sed experientia probat primo intuitu sæpe nos aliquem odisse.

Varii sunt odii effectus, *tristitia, & invidia, superbia, rancor, vindicta.* Unde animus immisericors, contractum cor, respiratio lenta, ob fibras raris motibus flexas. Externè taciturnitas, vel mendacitas, asperitas frontis, fuga conversationis cum eo, quem odimus, & similia. Illud in odio pessimum, quòd, sicut levitatis notam non tam facilè incurrit osor, sic absentia odio habiti non restinguit odium, adeò, ut nonnulli Pseudo-Ethici delirent: causam odii semel concepti semper recogitandam, atque adeò odium semper suadendum. 2. Quòd eorum, qui se mutuò amârunt, v.g. sanguine junctorum odia pro mensura amoris prioris vehementiora sint, & diuturniora, eò quòd odium non illabatur animis furtivè, sicut amor; sed illapsum semel vehementissimum sui sensum animæ imprimat; & ideo ità constantius perseveret, ut etiam post mortem sæpe odia vivant.

Proniores ad odia sunt. 1. Amantes, respectu rerum amatæ rei bono, vel consecutioni obstantium. 2. Suspicionibus obnoxii. 3. Arrogantes, & gloriæ cupidi, si quid iisdem obstat. 4. Bile laborantes. Qui atrâ laborant, occulta, & maximè diuturna habent odia; qui flavæ bili subjecti sunt, apertè, sæpe tamen admodum crudeliter, & diu oderunt. 5. Timidi, & quoquo modo imbecilles. Unde nemo infantibus, stultis, & fœminis ad iram pronior.

Remedia tria sunt. 1. Perpende indignitatem causæ moventis, tum etiam fæditatem vitii. 2. Juxta Senecam l. 3. de ira c. 4. cupiditatem, & amorem corde tuo exclude, & fomenta odii evitabis. 3. Vide damna per odium orta, valetudinis, & virium, bonique nominis im-

minuti, & generoso Spiritu superabis. Certum enim est: *Spiritus tristis* (qui est in odio semper) *exsiccat ossa*, testante Sacra paginâ. Si ergo iusto odio quid prosequendum sit, semper sic oderis, tanquam certò propediem amaturus.

Amor ferè est magister cupiditatis. Est autem cupiditas *appetitus boni ut absentis, seu nondum obtenti*. Hæc appetitio si sit in parte animali, seu sensitiva, dicitur ab aliquibus *concupiscentia*; si sit in parte rationali, dicitur *desiderium*. Quidquid sit, illud certum est, quòd ab amore differat etiam ex objecto; quia, ut observat Raynaudus, cupiditas habet pro objecto præter bonum, etiam affectionem illius; amor vel purè tendit in bonum præscindendo à præsentia ejusdem, vel absentia. Causa fundamentalis desiderii est: agnitio propriæ egestatis, & potentia hanc explendi in re apprehensa. Hæc passio frequentissima est homini, & periculo non vacans, nè boni imagine deceptus malum concupiscat. Quod malo suo præsertim experiuntur Juvenes, qui, sicut ob sanguinis abundantiam, & defectum experientiæ difficultatum faciliè bonum apprehensum concupiscunt, ut habet Arist. 2. Rhet. c. 12. Ità umbris se lugent deceptos, dum malo remedium vix finit circumstantia. Cupiditas (quæ hominis fragilitas est) alia est *indeliberata*, & hæc caret vitio; alia *deliberata*, & hæc laude, vel vituperio digna est. Juvenes citò concupiscentes ob sanguinis mobilitatem faciliè desistunt. Sanguis hic, & bilis in nonnullis potentiam rationalem si imbuat, præpostera, & noxia sæpe causat desideria. Utì exemplo sunt fæminæ, præsertim gravidæ; nam ex atra bile pingua appetuntur, & stomacho his humoribus viriato præbentur.

Cupiditatis effectus est tremor non rarò membrorum, perturbatio, & rubedo à spiritibus ad exteriora diffusis. 2. Acerbitas, tristitia, & dolor, si re cupitâ serò, vel penitus non potiri cupidus possit: hæc comitantur insomnia, & curæ. 3. Est augmentum perenne instar ignis; unde cupiditas *infinita* aliis, aliis *inexplebilis* dicitur per id: quòd *plus sunt potæ, plus sitiuntur aquæ*. Hinc quia ut plurimum error humanam cupiditatem comitatur, vel in re ipsa,

ipsa, vel modo, nota illud Platonis: *nisi ratio cupiditatem frenet, vita turbetur, necesse est.* Fæmina, pecunia, gloria cupiditatis terminum statuit nullum, nisi qui finè termino fuerit.

Cupiditas Philosopho duplex est: alia *naturalis*, quæ scilicet inest naturaliter homini cuivis ad individui, vel speciei conservationem spectantes res v. g. ad cibum, potum, &c. alia *rationalis*, ad quam causandam homini necessaria est apprehensio rei, ut bonæ; cum homo finè hac per se non feratur ad rem illam cupiendam. Cupiditatem animi leges humanæ nec præmiant, nec vindicant. Utrumque pro meritis fieri à Deo Sacræ testantur literæ. Naturalis cibi, & potûs necessarii cupiditas vitio caret, altera enim *fames*, hæc dicitur *sitis*. Nascitur fames, seu cibi appetentia ex ventriculi vellicatione, quæ sit ex naturali calore, & acore interno. Cum calor hic, & acida, fibras, & nervos afficiant, si alimento, quod consumere possint, careant. Acorem hic utraque bilis causat, præfertim atra. Sitim falsedo, vel exsuccæ fauces. Inediâ, vel siti longâ laborans, repente non te oppleas; plus enim gravas, quàm satias.

Fuga opponitur desiderio, & est *aversio animi à malo absolutè sumpto*. Differt à timore, qui est circa malum arduum. Ab odio, quod est fuga mali absentis, seu sit absens futurum, seu præteritum. Fuga data est homini, ut per hanc noxia evitet. Per hanc reducuntur spiritus caloris ad cor, frigore externa membra occupante, demum etiam imperatur motus de loco potentiæ loco-motivæ, si aliter malo obviari non possit. Atque utinam; quemadmodum instituta est passio à natura, hæc adhiberetur; in fugiendis videlicet illis cumprimis, quæ animam vitiant, etsi sensui blandiantur, de quibus rectè ille: *heu fuge crades terras, fuge litus iniquum.*

QUÆSTIO ETHICO-POLITICA.

*Utrum melius , amico inconstanti , an inimico
constanti benefacere ?*

AMICO INCONSTANTI.

VAtiniana odia quid commune cum beneficiis habeant? Invisæ sunt gratiæ, dum, si odium absit, suspicio vitiat omnia; ut fieri amat, si vitiatis oculis objecta spectentur. Da florem araneo, hyblæas etiam dapes in venena convertet. Tameñ lenissimâ manu vulnus contrectes, acriori semper dolore memoria obductam refricat cicatricem. Ut verum sit vetus: *manet altâ mente repositum Judicium Paridis, spretaque injuria formæ.* Quid communius querelâ veteri: in undis scribi beneficia, injurias æri incidi, ac marmorì: quod illas ingratitudo nullo negotio elabi patiatur animo, has nunquam. Age, immortales cum Livio coliatas à te gratias esse cupis? ei confer, qui una tecum duplici in corpore est anima, depositum tam datum accipit, quàm servat cum fœnore. Hic tibi officiis auctus subsidium, tutela, solatium; dum contrâ æmulus tuis ditior gratis arma sumit, quibus te feriat. Anguem lacte pasce, & sinu recrea, mortem in præmium referas. Urticam sollicitâ curâ irriga, urere eam senties. Da faventia tribulis sidera, in vulnera adolescent non minùs. Dum contrâ Gazophilacium tuum amantis est animus, nunquam ampliùs redditurus impendium, ac dum amando obviâris. Hunc liquore dulci scaturientem fontem corona, & beneficium tibi experiere. Dum contrâ basiliscus, vel victimis cultus pestem dabit. Et quid mirum? naturæ id vitium est, an ingenium: omnia in mel apìs omnia in fel, & virus concoquit vipera. Inconstantia si terreat, tempus cogita, quo frui liceat amantis consortio, ope, consilio. Momentum grande, incerta quamvis securitas sit. Quot discrimina summo emunt mortales! prodigunt sæpe omnia, ut certiùs pereant. Amicus ut ut inconstans sit, quo durat, prodest; quia & fovet, & favet. Sæpe ipsa inconstantia beneficiorum pondere robo-

roboratur, ut Mercurius fixus sit. Et tum quantum credis beneficio huic tribuendum, quod mobile illud fixerit? Omne vitium, quia in homine est, finem ac terminum patitur. Inconstantia quoque, dum ratione omni non careat, qui amicus est, elidi poterit. Et tantò feliciore eventu, quantò acrior est beneficiorum vis; tantò unà dulciore conatûs fructu, quò amplius delectat conantem, incerta quæ optavit, præ certis sibi decerpisse, & stabilivisse. Sexcentæ in inimicos me arbitro si conferas; amico, quantumvis inconstanti, unicum collatum palmam eripiet.

INIMICO CONSTANTI.

RE nullâ certius luditur mundus, quàm quòd semper deludi se sentiat, & ipse gaudeat. Quasi verò placeret fabulam fieri. Amicorum gratiis sinum onerant, tanquam si ancile Deorum ibidem conclusum, vel adamantinâ lege sancita forent amicitiae fœdera. Nunquam minùs eratur, quàm dum, nè fraudi sit locus, nos ipsos fallimus fide nostrâ. Arundinem experimur, quam rupem credidimus, vix amicitiae filo tuti, qui catenato robore nobis blanditi sumus. Adeò vitrea est fors amantiùm, alex in morem se affectus contorquent. Luditur his semper, ut illusioni nunquam non locus sit, seu credulitatis, seu fortunæ munere. Cave malaciam, Typhones latent. Nunquam minùs securus procedit navita, quàm dum tranquillo mari Alcyon deliciatur. Tu cum institore divite te ut redimas, tua furenti crede munera. Quidquid dederis, fœnus est, non detrimentum; conciliatus æmulus & amores augebit, & gratitudinis munera. Inimicus est? si constanti furat fremitu, hebetabitur munere. Placant ferè, & Deos iratos, quia placent officia, obsequia, dona; sin asperitatem augeat, facilior tibi certum hostem vitandi alea, quàm incertum. Crescunt ignes fomentis, decrescit gratiis furor. Patronus momento fit, & defensor, qui nuper erat Vatinius; aut munere, aut officio exequentem, quod ratio, vel ipse Græciam fulminans Pericles eloquentiâ non effecisset. Pudet ingratos esse, & quos furor antè constrictos domuit, si triumphet amor, amplius

trophæum gloriæ statuit. Pudet beneficiis cumulari, & quos antè beneficos exulceravimus, ingratâ prosequi morte. Præplacet furore posito vicem reddere, & ut tibia superato vulnere integratur fortiùs, sic sanctius est sædus æmuli, quàm primùm amantis. Vetus id quidem: reconciliato nè fide. At si benefactis certandum sit, certum prælige inimicum, quia acerbius nullum animo ejus vulnus inflixeris, ac tui memoriam beneficii; saucius te sequetur, etsi seriùs tempore, ardentius tamen. Vitam antè suam positurus, quàm tui amorem. Causam cupis? Sapiens in Proverbiis eandem indicat: beneficium collatum æmulo prunas non jam in caput, sed in sinum contorquet. Urit mentem memoria constans beneficii, donec odio posito flammam concipiat, & vel invitam cogit in officium gratitudinem. Nempe barbaries nulla talem genuit Salamandram, quæ in beneficiorum ignibus duret semper, & dureretur ampliùs. Dum è contrà Vertumni alicujus amici in sinum congesta pietas auræ spargitur, quia nativâ inconstantia mobili. Inimicum cole, amicum centuplo constantiorem fundas, quàm, ut, quem natura vel fraus debium tibi fecit, certum reddas Achatem. Rara namque ars lapis ille Philosophicus, volatile ejusmodi ens in aurum purissimum & figendi, & fingendi. Dum contrà, ut intra montium viscera ignes terram in aurum excoquunt, sic beneficiorum ignes vel averfos, vel adversos animos congenitâ virtute in amantes conservant.



QUÆSTIO VI.

De reliquis passionibus.

§. I.

Quid gaudium, tristitia?



Quem læsit rabido furibunda tarantula morfu,
Saltat, & in medio vulnere sæpe perit.
Quot Juvenes simili perimunt mala gaudia fato!
Quos læsit rabido lena volupta joco.

DOCTRINA ETHICA.

Gaudium, delectatio, voluptas communiter pro eodem sumuntur, licet aliquomodo distingui possint. Videlicet quod gaudium, seu lætitia propriè tantum sit ad ea, quæ sunt appetitûs rationalis. Delectatio verò sit ad ea, quæ reperiuntur in sensitivo appetitu. Voluptas denique respectu utriusque sit veluti genus. Bene ergo definitur omnia hæc complectendo cum D. Thoma 1. 2. q. 31. a. 1. quod sit *actus perfectus, & terminus ultimus appetitûs vitaliter in ea quiescentis*. Dicitur *actus*, non enim est pura passio, ut

volunt nonnulli, licet voluntas fruitivè in objecto possessio, velut centro quiescat; quia hæc ipsa objecti possessio, per rationem, seu actum vitalem apprehenditur, quod non solet fieri in rebus inanimis v. g. lapide in centro quiescente. Voluptas ergo, seu gaudium, semper est de bono vel realiter, vel per cogitationem repræsentato ut præsentem; sicut desiderium est de re absente. Ut plurimum voluptas præcedit, & comitatur desiderium; desiderium tamen non oritur à voluptate, sed ab amore, qui fertur in bonum propositum, præscindendo à circumstantiis.

Voluptas per Philosophum l. 10. Eth. in rebus bonis, & malis potest haberi, diciturque ab eodem necessaria hominibus, eò quod brutis æquè, ac hominibus semper communis sit. Quatuor ad eandem, si perfecta sit, concurrunt. *Objectum*, quod movet. *Potentia*, quæ movetur. *Operatio*, quæ est ipsa motio. *Delectatio* est terminus. Tria tamen sic necessaria sunt, ut quocunque ablato delectatio perfecta non sit. 1. Præsentia, & possessio boni. 2. Possessionis illius cognitio, seu phantasia. 3. Amor ejusdem. Non enim delectat, quod non amatur. Ità cum de Rhodes. Rayn. communis. Omnia hæc, cum experienciâ constet, homini sæpe sine desiderio rei illius, quæ nos delectat, adesse; vides, non semper cum delectatione desiderium esse conjunctum.

Illud cuicque volupe est, quod cuicque conveniens. Conveniens porro, & delitiosum est aliquid omnibus aliquando hominibus, aliud tantum certæ ætati, & conditioni; v. g. cibus esurienti, libertas vineto, &c. res omnis delitiosa est dependenter ab apprehensione objectum homini proponente; hinc fit objecta aliàs in se jucunda nonnullos affigere, alia in se dolorosa delectare. Tam felix erat olim Thrasillus, credens se regem esse, quàm miser Dionysius, capiti suo pendentem è filo gladium semper imminere existimans. Hinc fit, ut sapientes cum Aristotele 10. Eth. c. 3. *illas tantum veras delectationes censeant, quæ viro probò videntur.* Et hæ dicuntur delectationes *intellectuales*, & *spirituales*, quia rationi, & intellectui convenientes. Ejusmodi est voluptas ex laude, honore, gloria, &c. progenita. Itèm ex virtutum actibus, & scientis.

entiis. Sic Pythagoras Geometricas Demonstrationes inveniens, non secus, ac si ingentes thesauros reperisset, 100. aureos Jovi in gratitudinem obtulit. Imò etiam in actibus pietatis sentitur motio non nunquam dulcior in fine. Quæ tamen licet sapientem, & probum deceat, tamen ab eodem non intenditur ex innata sapientiæ, & virtuti generositate.

Voluptates cæteræ sunt *animales*, quia appetitui convenientes. Harum aliæ sunt necessariæ ad individui conservationem, vel speciei, & tunc etiam licitæ: non nullæ istarum sunt in appetitu concupiscibili, aliæ in irascibili. Aliæ sunt homini magis propriæ, curiosæ, & delicatæ, v. g. voluptates in exquisito cultu vestium. Aliæ sunt purè animales, & sordidæ, & ferè vitiosæ, quod ostendit naturalis de illis erubescencia; cùm, sicut tenebris æternis dignæ sunt, ita etiam ferè inter tenebras homines quærant. Hæ ultimæ, ut observat Aristoteles 6. Eth. c. 5. voluptates (præsertim tactiles) sapientiam, & prudentiam vehementiâ suâ evertunt, cùm ad se totum animum rapiendo ab aliis potentissimè avocent. Unde rarò videas ingluviei, & cæno deditum excellere in aliquo peculiariter, nunquam certè inter homines æstimari.

Voluptas omnis pectus, & cor dilatat, & recreat mentem. Unde cùm sanguis versùs cor solito ampliùs tunc veluti bulliat, spiritus subtiles per cor diffunduntur; qui deinde lætas tantùm apprehensiones causant, unde oblivio doloris omnis, & sæpe subsultatio corporis nascitur. Conducit valetudini sæpe, sæpe etiam præsertim Melancholicis necessaria est, licet nunquam satiet appetitum: eò quòd si magna sit, deliquia frequentia, & ipsam mortem causet; si parva minor est arbitrio.

Effectus voluptatis colliges ex dictis: Remedia maximè contra vitiosam hæc adhibe: 1. Memento, quàm fugacia sint gaudia humana: ac proinde, nisi cæcus sis, videre potes, quòd voluptas transitura finè prudentia desideretur, vel cùm transierit, cum pænitentia cogitetur. 2. Memento damnum ex ea gigni solitorum, ut suprà de amore dixi.

Dolorem, & *tristitiam* confundunt hodie plerique; eum tamen *dolor externus*, qui est in sensu, causatus, v. g. per

v. g. per compressionem, vel sectionem tantum fit *sensio*, non verò fit *passio*. Dolor autem *internus* seu *tristitia*, si propriè sit *passio*, est *actus displicentiæ appetitus circa malum aliquod præsens apprehensum*. In animo dicitur *tristitia*, seu *ægritudo*, in appetitu dicitur *dolor*. Dicitur *actus*, quia non est *passio* tantum ab actu odii producta, ut vult Scotus, sed est motus appetitus: aliter dicitur *excratio*, *perturbatio*, *inquietudo*, videlicet ob rem amatam, amissam, vel non acquisitam. Mensura amoris in re possessa est mensura doloris in amissa. Unde illud: *non dimittitur sine dolore, quod possidetur cum amore*.

Causæ variæ sunt. Generaliter est malum præsens, cui obviari non possit, v. g. charâ re perditâ, vel non acquisitâ, vel serò impetratâ. Intentionibus non datis executioni ob remoram inaufertibilem à se. 2. Calamitates propriæ, vel dilectorum. 3. Casus fortuiti, qui si præter opinionem obveniant, potentiores causant dolorem, ut habet Aristoteles 2. Rhet.

Species tristitiæ sunt 7. 1. Ma Misericordia de malo alieno, quâ maximè tanguntur, qui malum illud experti sunt. 2. Invidia de bono alieno, quasi mihi præjudicante. 3. Nemesis de bono alieno, quasi alter eo indignus. 4. Zelus de bono alieno, prout illud mihi deest. 5. Anxietas, ubi nullum effugium apparet. 6. Pænitudo de malo præterito, quod animam affligit. 7. Acedia, quæ hominem etiam membris destituit.

Effectus tristitiæ sunt in perniciem corporis, & animæ. Contractio cordis adeò, ut aliquibus per vitam vehementer tristibus, cor post mortem etiam non latius membranâ repertum sit. Contractio item spirituum, & sanguinis, unde macies ossium, fatigium, exsiccatio membrorum; eò quòd spiritus ad cor reducuntur, quod, cum iisdem gravetur, erumpunt suspiria, quibus cor levetur; sequuntur etiam à contracto cerebro lacrymæ, velut dolor & evaporatio; harum frequentia hebetantur oculi, somnus inquietatur, & breviatur. Unde succedit torpor, & exitium totius corporis, & ineptitudo ad omnia, juxta illud: *perturbatus animus non est aptus ad exequendum*

indutus suum. Fugit humanam conversationem, qui dolet, respuit solatia, soli suo tormento inhæret, dum pereat.

Aptissimi malo huic sunt Melancholici, utpote umbrarum, & solitudinis ob atram bilem aliunde amantes. Ægritudine, aut senio laborantes. Sanguinei aliquando ob debilitatem virium, quâ vincere non possunt obstacula. Cholera, quia se æstimat, & ideo multis se dignum existimat, sæpius invidet, & æmulatur. Universim tamen id certum est, Melancholiam, si temperetur, rebus eximie gerendis ob moderatam tristitiam esse admodum aptam; eò quòd vel hâc causâ magnam rerum suarum curam, & sollicitudinem gerat. Cholera pariter rebus summis agendis aptissima, si vincatur.

Tristitiæ remedia duo sunt. 1. Ex Seneca ep. 86. videlicet: depone opinionem mali te contristantis. Non enim ipsæ res, sed eæ, quas de rebus habemus, opiniones nos affligunt. 2. Dat D. Thomas 1. 2. q. 38. honestam quære delectationem, ut sunt amicorum colloquia, somnus, aucupia, venatio, musica, medicina bilem tollens. Et juxta Aristotelem 4. Eth. c. 11. Contemplatio veritatis. Dixi *honestam*; insanum enim est tristitiam voluptate tali velle depellere, quæ ipsâ sui pœnitudine, & remorsu mille causat dolores, & caruificinas.

QUÆSTIO ETHICO-POLITICA.

An hilaris, an subtristis genii Officiis aptiores?

PRO HILARI.

Hilarius fidus nullum sole, nullum idcirco utilius. Re-creat, vivificat, fovet omnia. Favores ipsi, & gratiæ non ad eò grati sunt, si supercilium nubes eogat. Cui domesticus mœror animum nunquam non involvit, umbras ferè non rejicit, quibus, quia culicem excolat, nil viro publico magis invisum esse oportet. Somniant hæc hominum spectra, leonem in via subtristes ejusmodi genii fingunt, & aspera, quæ nullibi, præterquam suo occurrant in cerebro; terrentur larvis, quas suo phantasmate comminiscuntur. Dum hilaritas quantum ab umbris,

bris, tantum abest à terculamentis. Audet multa, & ut audere ipsum sæpe vicisse est, conficit plurima. Calor inter elementa omnia agendi virtute princeps est, stringit frigus, & enervat. Typus illud hilarioris, hoc tristioris est animi. Sanguis ipse, & spiritus quantum addit alacritatis, tantum addit vigoris, atque adeo aptitudinis ad agendum. Laudatissima quæque cum agenda supersunt, aut acta fuerint, nisi vivacitate polleant, laudis meritum, sui pretium perdunt. Nempe sine spiritu, & vita truncum jacet corpus, neque grande quid ager anima, donec languet. Hinc illa in aggrediendo pernicitas, in agendo dexteritas, in multiplicibus curis vivacitas. Dum aut uni duntaxat operi, ceu Polypus petrae adhæret subtristis, aut terretur principio, aut fatiscit opere. Grande regnorum commodum sunt naves, & flumina, quod citò provehant, dissitasque terris teras, populos populis fistant, quod terra non potuit, nisi serò. Sic maturantur hilaritate consilia, quæ terreo, atque adeo subtristi genio vix, ac nè vix quidem tenduntur. Res gerendæ ut sunt mole plurimæ, summam etiam enervant alacritatem. Quid spei supersit Reipublicæ, cum in nutantem inciderit, aut ipso naturæ, & sanguinis vitio languentem? Gaudet alter torrentis affluxu, & cum nubila ciet sortis asperitas, aut amœnioris in Phœbi morem dissipat, aut si vehementia splendoris tantisper statuatur obicem, superstat omnibus, quia mentis vigore sibi constat. Languet iste, & quia languet, oneris omnis penè jam tædet, sensu Reipublicæ difficillimo. Non omnia possumus omnes, naturæ lex vetus est. At minùs moderari Rempublicam, quisquis languet. Tolle succum arbori, medullam ossibus, radicem plantæ; rideberis, si fructum, robur, aut decorem expectes. Languet ad proram navita, ad lupatos auriga, spoliū ille ventis furentibus, hic contumaci ludibrium sejugi se suosque dabit, quos vexerint. Enerves spiritus sibi vix suppare, quid muneri, aut providentiæ, aut vigoris necessarii tribuent? Nemo dat, quod non habet, Philosophorum è sensu. Nunquam Solonem, aut Periclem Græcia adorasset, nisi utriusque mentis vigor linguam in stupenda sæculis consilia animasset. Tacet lingua, cum ja-

et animus tristi peplo obductus. Et quæ hoc à fonte consilia Patriæ, si consulendum? Quæ commoda, si aut ratione sit pugnandum, aut animo? quis amor subditorum, ubi comitas exulat? Aut laqueandi sæpe in officium animi, aut fovendi sunt cuivis Patriæ amanti. Nunquam, mihi crede, sibi corda devincit, cui turbida sæpe animo & vultu procella est. Amæna omnia fingit auceps & blanda, Cælum ipsum ventis liberum deligit, ut prædam ferat. Foventur populi studia favoribus moderantùm. Geminatur favor, cùm benigni animi tessera serena & comi fronte confertur. Favores contrà ipsi dissipant, cùm quantum operis benignitas confert, tantum quasi adimit conferentis languidus animus. Vilescit nempe beneficium, cùm non toto corde tribuitur. Non sic porrò tribuitur, cùm à subtristi mente confertur. Quæ verò dissipabit frequentia populo nubila, qui non nisi noctes & nubes coquit ipse? Verbo: ingloria jacebunt munera, & cum muneribus Patria, si subtristes genii ad clavum Rempubli- cam moderentur.

PRO SUBTRISTI.

Feliciores nunquam Respublica, quàm cùm Ministrorum amor animos populi vinxerit, non fragilis, sed fundatus. Corticem ille comitatus, hic nucleum respicit. Felices esse se sentient subditi non hilari aut vultu, aut verbo, sed moderato consilio, ut ament. Ut facilis in omnes, sic credula ferè naturâ suâ est hilarium indoles. Quisquis credulus, ut multos audit, in errorem est pronus. Audit, & subtristis, non obaudit; non tamen nubium mentis, aut naturæ vitio, sed providentiæ ductu, quæ, quem muneri destinat, cautum format, & moderatum. Tutò, & sapienter Reipublicæ ut consulat, amari suos mavult operum fructus, quàm aut vultus, aut verborum suavia. Quamvis non præproperâ pernicitate subtristis in omnia irruat, festinat tamen, sed ut sapientes decet, lentè. Properante, qui fertur gressu, leviter insistit basi. Festiva, ut festinata ferè sunt, ætatem rariùs vident, ruina non sæpe. Starent, si alacritas, quâ condita sunt, iisdem à
constans

constans anima infunderetur. Et canis Nilum bibens, quia cursum potat, sitim non tam sedat, quàm irritat. Interitu celeri, quæ citò nata, cadunt, hilarium laus est satyrica. Difficilior partus est, si quid ævo gignitur; ut non momento sudat adamantem natura. Virtutum auriga providentia audit. Frænum hæc moderationi gerit, non flagellum impulsui. Effusè nimium, ac liberè currens, aut fatigatur citiùs, aut cespitat facilè; dum durat, & securiore passu cursores prævolat, quisquis lentior. Nil grandibus consiliis, atque adeò muneribus adversum magis, quàm pernicitas; ut enim literis, sic eventu non admodum diffidet perniciēs, ac pernicitas. Aliud est properè, aliud prosperè rem aut agere, aut conficere. Audet sæpe hilaris, sed primo duntaxat impetu. Nucem dum sentit asperam, obstupefcit dens, & cadit. Dum contrà gradario motu aggreditur cunctator, sed germano pectore, si fractus etiam illabatur orbis, sibi constat, impavidus vorans ruinas. Rarè præcípites à præcípitiō distant. Rariùs felicior exitus tumultuariū comitatur principium. At multis suppar censetur hilaris: viribus admetienda sunt opera, non levitati. Insana est mater, quæ plures lactat proles, ac natura sufficiat lactis; delirat, qui negotiorum plus recipit, ac virtus sit corporis, & ingenii. Plura simul videre objecta nefas est homini, quamvis duplex sit oculus: sic vitio non caret, qui in omnia proruit. In centrum unicum omnia ducat circulus, si valere velit. Gentilitas ipsa singulos rebus singulis DEOS commenta, doctrina posteros, raram esse avem, quæ suppar sit pluribus. Quin intolerabilis passim Reipublicæ, atque subditis minister est, qui negotiosus nimium, quasi ab uno pendeant singula; ut contrà inutilis est otiosus. Ferè qui tentat, & audet omnia, agit nihil. Ut navis portum nullum, vertagus prædam nullam assequitur, si pluribus unâ stellis, aut feris insistat. Successivè citiùs, ac simul sua conficit, qui genio est tristiore. Agendo pauca, plura perficit, quòd domestica illi vox semper resonet, age quod agis. Virtus ei unita fortior, ut radii solis urunt acriùs, dum focum faciunt. Sed & accuratiùs è sententia conficit singula; Ut clavis portæ una, se unum dat negotio.

Omnia

Omnia curare posse, impossibilitatem jure existimat; vel-
le dementiam. Tacet diu, ut statuat semel. Meditatur,
ut tantò Reipublicæ utiliùs consulat, & hilaria curet,
quantò ipse marere visus, dum Patriæ commodis semper
intentus. Non opus est semper vultu ipso & genio men-
tiri Charites. Multi gratias in omni Republica ridentis
instar Phæbi sparserunt, & cum his, quia mentis inopes,
tempestates Patriæ conciverunt. Fulmina magis, quàm
soles Patriæ. Sentire petit Respublica faventem genium,
non videre. Sentiet, ubi consiliorum fructus, industriæ
commoda legerit. Opera amorem moderantis probant,
non vultus, aut verba. Haberi hæc possunt omnia, quin
& habentur affatim, ubi tamen si genius sæpe subtristior,
eò tamen Patriæ lætior, quò magis ejus unius intentus est
commodo: dum hilaris in alia omnia dissipatur.

§. II.

Spes, & Desperatio.



Quid non Spes generosa potest! maria omnia vincit,
Pandit inaccessos tartara ad usque specus.
Invia nulla via est, quæ spem remoretur; ad ipsa,
Si sperare voles, sidera pandet iter.

DOCTRINA ETHICA.



Spes est *actus appetitus irascibilis, in bonum absens, arduum, possibile, cum quadam firmitate animi difficultatem oppositam superante.* Huic cum sit proprium gignere audaciam, vix ab eadem non nulli cum Fabri pr. 45. distinguunt. Dicitur *actus*, quia est efficax, non tantum nudum desiderium. *In bonum absens*, quod enim possideo, non spero. *Arduum*, quia spes dat animo firmitatem ad difficultates vincendas. *Possibile*, despero enim de eo, quod impossibile judico.

Spes & expectatio per S. Thomam 1. 2. q. 40. a. 8. non differunt. Si spes timore careat, *fiducia* dicitur, si supra vires meritum quis expectet, dicitur *presumptio*; si in mala certo vitanda feratur, dicitur *securitas*.

Causæ, & effectus Spei conveniunt ferè cum causis desiderii, & amoris. Præcipuæ sunt, subsidia rei opportune curare; facilitatem adipiscendi proponere, & sinistra de rebus judicia superare. Hinc quia Juvenes spe vitæ longioris & virium suarum ferè aluntur per Philosophum 2. Rhet. c. 12. proniores sunt ad spem; uti etiam eò, quod inexperti sint subsidia sæpe deficere. Ebrii, quia difficultates vel non penetrant, vel contemnunt. Demum, qui potentes nati sunt amicos. E contra senes, quia viribus suis diffidunt, metuunt faciliè, & suspicantur; difficultates etiam melius prospiciunt, & penetrant, non ita apti sunt ad sperandum. Hujus providentiæ defectu contingit multos esse *temerarios*, dum sinè necessitate, & modo pericula quis subit, *credulos* itè, & *audaces*, dum nihil sibi impossibile arbitrantur in rebus quibuscunque obviis; *iudignabundos* ex mora rei speratæ.

Illud Biantis verissimum est: *nihil esse spe dulcius.* Hæc enim quemadmodum vel in adversis gravissimis solatium est, ita laborem omnem, & asperitatem mollit; alacritatem ad operandum incredibiliter acuit; & quia supponit amorem objecti cum desiderio, cor dilatat, jucunditatem vultus, & animi constantiam causat, & promovet.

Desperatio est actus appetitûs refugiens bonum difficile, aestimatum, ut impossibile sibi, quod consequatur. Unde præter iudicium intellectûs de impossibilitate objecti consequendi inanet in homine ad summum inefficax desiderium rei, quod ipsum tormentum est animi. Tum sædissimum est vitium, quando sibi ipsi homo infestus vitam adimit, quod juxta Aristotelem non fortitudinis, sed timoris potius est; cùm ob metum minoris mali, majus eligatur, videlicet mors.

Aptissimi ad desperationem sunt, qui naturalium umbrarum, & metûs causâ facilè impossibilia censent objecta, & idcirco sæpe à fune quærunt remedium atrobilares, & melancholici, mulieres, ac denique nimîâ ambitione, vel habendi cupidine inflati, si votorum termino destitui, & falli contingat.

Malæ matris filia pessimæ sunt; temeraria in omne scelus protervia, & audacia effrænis, quæ tamen nunquam ipsis adfert salutem, utpote vires extremas impendentibus. Unde vetus illud: hostem, quem contempseris, ipso contemptu valentior efficies. Videlicet, cùm desperatione accedente vires omnes exferat, & vel incautos, vel arrogantes æmulos superet, imò etiam strenuè dimicantes impetûs vehementiâ proterat.

Q U Æ S T I O E T H I C A.

Utrum phænomena, & nomina sint felicitatis, aut adversæ sortis præsagium?

A F F I R M A T U R.

Quidquid mortales inter vices geritur, fato geri vetus erat commentum. Christianæ est Philosophiæ oraculum, si conscio Numine geri edixeris. Quid mirum proinde, si & nomina & Cæli phænomena cælestis diphteræ dicas auspicia? utraque necessitatem virtutis imposuere compluribus, utraque præsagium aut magnitudinis, & gloriæ, aut ignominia, & dedecoris. Non Cæris Majorum ampliùs gloriata antiquitas, quàm nominibus. Hæreditatis maximæ pignus se vindicare censuit, cui Cu-

rios inter, ac Fabios licuit numerari. Neque mirum; suis terra, suis cælum loquitur linguis. Illa dum nomine ipso virtutum stimulos, & semina laudum dat gerenti; hoc porro dum ferali etiam in noctis sipario iras suas flammis præfagit. Pudet enimverò domitorem orbis voce referre, cujus cum nè umbram virtutis referat, ignaviâ se ipsum prostituat. Natum Orbi Macedonem sensit Persis, Europa Attilam, ferali uterque fidere præfagiebatur. Astyages contrâ vitis in morem inumbrare Assyriam, Servius Tullus flammâ cælo deciduâ puer ambiri visus, utrique signa imperium detulerunt, antequam fascibus designarentur. I modò, & Vaticum illud exsibila: *Speclatus nunquam terris impunè cometes*. Belli priore sæculo ultimi incendia recole; quanto est parentatum cruore! ut vicenis amplius annis terrenti orbem caudato fidere restinguendo satisfaretur. Nox suprema feralis visa Julio, visa & uxori Calphurniæ, & heu parricidale Bruti ferrum eventum dedit, cum occidit, per quem regnatrices orbi Aquilæ ortæ sunt. Nempe tela sunt Jovi, & quæ luceant, & quæ feriant. Lux ipsa tametsi non feriat, terrorem addit, & monitum, ut caveantur discrimina ab iis, qui flammam vident, sonum non audiunt. Vis gloriæ, vis decoris argumentum? grande nomen gere. Aut nomen ponendum, aut virtus sumenda, æterno monito juxtâ ac vulnere sibi inclamat animus. Ut mirum sit minimè, quòd nemo hætenus Romanâ dignum se ratus purpurâ sit, qui Cæsaris sibi cum folio non adsciverit nomen. Bellorum flammis aut restinguendis, aut acuendis aptissimum pabulum nomen est. Ferè enim, ut opinio vulgi, sic meritum comprobatur, quòd *convenient rebus nomina sæpe suis*. Quemadmodum enim nominis, sic virtutis, aut vitii magnâ parte est hæreditas eadem. Ut Seneca, nisi sapiens; Mytecus, ac Therſites, nisi ignavus; Cato, nisi gravis hætenus nemo. Et cur, amabò, tremuit cum Illo Græcia, cum Quiritibus populi, cum ferali illi Hectoris, horum Urbi pro foribus imminentis Hannibalis quot nomina, fulmina totidem personarent? nisi, quia à solo etiam nomine ruinæ præfagium imminebat. Neque minor hodierno etiam ævo togâ perinde ac sago nominis tueri.

tuendi cura. Profapia non aliud illustrius sibi decus vendicat, quàm si par sæculis nomen ducat. Diceret censum gloriæ majorem tribui non posse, quàm dum fœnus sæculorum, avitum & grande nomen cum vita quis participat. Multa phænomenis olim dedit antiquitas. Superstitione ferè magis peccans, quàm religione. Amplior tamen data nomini fides. Belli pacisque decora hoc quasi prodromo certa suis commodis legens.

NEGATUR.

VÆ laudatissimæ hominum forti, & successibus optimis, si aut nomen, aut phænomenum statuatur præfagium. Arbitrii illud, hoc naturæ ludentis est tessera. Barbariei damnabitur Mithridates Regum cultissimus; inurbanitatis tot congiuriorum largitor munificus M. Crassus; ad fabulas, & scenas legabitur virorum gravissimus Quintus Lepidus; si è nominis etymo censura ferenda sit. Ut virtus non nascitur, sed fit; propterea, quòd non sanguinis, sed animi decus sit; sic nomen, quia sanguine trahitur, fortis ludibrium magis, quàm aut animi, aut eventus est habendum indicium. Nulla minor, ut & facilior hæreditas nomine puro. Parvo stat leganti, magno ei, qui hæres est. Oneri namque, aut dedecori est majori, quàm gloriæ, si aut æmulari non possis, dum velis; aut nolis, cum possis. Quoties Mutios, & Curtios torpedo nomine circumtulit? quàm pulchrum leonis decora, aut muri, aut lepori assui? Ut nil alienum magis, sic fœdius nihil, quàm discordia nominis, ac gestorum. Quot coluit Roma Cæsares nomine & dignitate? & luxuriâ, aut crudelitate quot monstra in iis magis, quàm homines, nedum Patriæ Patres. Biberios, Merones, Caligulas, Domitianos vident, & personatas cernes in solio belluas. Severi, aut Servilii dictum par Cæsarum; nihil tamen servile hîc, asperum ille, præter nomen, gessit. Dum præposterâ sorte sexcentis infontium cladibus magis improbus nemo, ac Probus Cæsar. Nempe res facilis nomen, sed ludicra. Meritum res grandis, honôrque est. At phænomenis majorem tu fidem. Apage somnia. Fatui terris, sunt iidem Cœlis

ignes, non ut designent futura, aut manu ducant, sed ut credulos ludant, incautos inducant. Ut non quævis crystallus stillans est adamas, sic iris, quæ pacis olim, cur belli aliàs præfagium esse non possit? fortuito naturæ cursu, causarum motu faces cælum accendit, & dipteram hæc continuò facient animo his majori? At pestis Europæ, & Perfidis cum aliis Cometæ indicio præsignati. Itanè verò? cur non eodem fidere felicia id temporis eventa magis notata? Natus orbi Pacis Princeps, Magis orientis adoratus, & nunquid stellâ duce indicatus? Quid, quòd sidus idem myriades per orbem tulerit, nec tamen virtutes, aut vitia singulis, nec mors una obtigerit. Romulus, & Remus testes sint, pari nati fidere, fundator alter Romani, alter ejusdem sanguinis parricida. Defecit luna, fulsit columna, fax ignea, aut sanguinea per campum visa: anne idcirco cum Nitia Athenarum Duce bellica suspendenda sit actio? Ideòne exitium cum Coclite, aut cum aruspibus pulvinaria Deorum visenda? Apage lunaticos, qui ignes hos paveant, & umbras, quas natura genuit, natura cursu suo conficiet. Nunquam sentes uvas germinant, nunquam fortuitus naturæ seu ludentis, seu peccantis cursus signare potest eventuum seriem. Dominatur libertas; non servit. Quis ancillam non dicat, si quòd micans Cælo sidus, deplus Cælo sanguis, imber saxeus fatum orbi denunciat, inevitabili necessitate sequatur? Næ tu mihi nomini aut signis pius, libertati & Numini
 fias sacrilegus.



§. III.

Audacia, & Timor.



Cede timor: grandes metit una audacia lauros,
 Immensúmque parit magna per ausa decus.
 Ergo age; qui magnus cupis esse; aude ardua: námque
 Ardua qui metuit, magnus is esse nequit.

DOCTRINA ETHICA.

Audacia est actus appetitús, quo ille fertur in
 opus difficile, periculis vallatum, quatenus e-
 xistimatur medium utile ad finem consequen-
 dum. Differt à spe in hoc, quòd spes imme-
 diatè circa finem versetur, audacia verò circa executio-
 nem mediorum difficilium. Spes ordinariè gignit auda-
 ciam, & veluti famulatur spei audacia, potest tamen esse
 spes sinè audacia: licèt multi utramque confundant. Ab
 ira differt, quòd ira titulo odii, vel vindictæ terminum
 petat, audacia titulum arduitatis, & gloriæ respicit.

Spes, amor, audacia invium iter nescit, imò cum igne
 majorem arduitatem suam existimat esse pabulum. Gran-
 dibus ausis exequendis & necessaria, & oportuna; non
 tamen aggrediendis, his enim providentia necessaria est.

Unde Lipsius, Savedra, cæterique Politicorum Principes exercitum ipsum audacem capiunt, non cervorum videlicet corda; at Principem belli, & pacis oculo, & consilio præstare malunt. Audacia nimia in voce, mente, actibus temeritas evadit, & ferè authori noxia. Nam principio, ut stupa grandem flammam ciet, successu temporis metu collabitur, quæ Pelion antehac Ossa moliebatur imponere. Econtrà sapiens audacia vires sibi sumit tempore, quæ initio fortuitorum maximè eventuum, etiam timore non levi perculsa fuit. Fulgurat oculis, fulminat manibus, sanguine toto in venis bulliente felicioris eventus veluti certitudinem pollicetur. Si exemplum petas: Pasquinus Romæ virtutem Germanam sapientis, Gallicam contrà temerariaræ audaciæ esse dixit; utpote cum hujus assultus ferè sint intolerandi, maximè primi; Germanæ audaciæ vis ipsis adversis duratur, & incrementa sumit.

Tria sunt audaciæ aptissima tempora. 1. Experientia, & victoria periculorum. 2. Spei præsidia vel Divina, ut sunt, qui cælo sunt famulati, & cælum quoque famulum habent; vel humanæ, ut amicitia, clientela, opes. 3. Quæ cor habent angustum, ad quod calor, & vitalis vigor magis concentratur, potentior idcirco est & calor hic ad actum, quàm ubi diffunditur. Omnia hæc è mente Aristotelis, libris Eth. Rhet. & part. animalium.

Timor est *actus appetitus aversivus mali proximè imminentis, & ægrè evitabilis*. Dico; *proximè imminentis*, quia per Arist. 1. 2. Rhet. c. 5. *non timentur mala longè absentia*. Exemplum est mors certò singulis obventura, quæ tamen non nisi morbo gravi præsentē metuitur. Differt à tristitia, quòd timor feratur in malum ægrè evitabile, tristitia est de malo prorsus inevitabili. Differt ab odio, quia timor aversatur malum futurum, quod perphantasiam, & signa sensibilia cum brutis etiam possit apparere, solent etiam timere futura. *Iustus* timor dicitur ex iusta; *panicus* ex causa stultè apparente.

Dividitur timor in *segnitiem*, *pudorem*, *verecundiam*, *admiratiqnem*, *stuporem*, & *angorem*. *Segnities* est timor laboris, qui vires excedit. *Pudor* est timor lapsus, & infamiæ inde orituræ. *Verecundia* est timor infamiæ propter

propter turpitudinem admissam, quæ in Juvenibus ex Diogene calor virtutis est, si tamen nimia sit, signum est stupiditatis. *Admiratio* est timor mali tanti, cujus remedium haberi nequeat. Hæc admiratio oritur vel ex magnitudine nimia objecti. Unde, quia sapientibus rara sunt mira, stupidi verò magnitudinem non capiunt, neutri faciliè quidpiam admirantur. *Stupor* est timor novi, & inexper-ti mali. *Angor* est timor mali, quod prævidere non licuit, & ideo neque illi prospicere. Theologis Christianis timor *Servilis* dicitur, qui metu gubernat, ut servos; *filialis*, qui amore regit, ut filios; *Reverentialis*, qui in-tuo affectu movetur, ut amicorum.

Causæ timoris sunt amor. Unde Poëta: *res est solli-citi plena timoris amor*. Cum amans dilecto displicere timet, vel jacturam metuit amatae rei. 2. *Defectus pote-statis in alios* potentiores nobis, vel conscios malorum nostrorum, nè prodamur. Aut quibus malum intulimus, nè vindicetur. Universim cum Philosopho cave magis inimicos subdolos, & versutos, quàm patentes. Nam ut rectè Theagnes: *fallere difficile est inimicum, at amicus amicum fallere non magno Cyrene labore potes*. 3. *Mala conscientia*, cujus vis est (Tullio, & experientiâ teste) ut neque timeant, qui nihil commiserunt; & pœnam sem-per ante oculos versari putent, qui peccaverunt. 4. Est *cognitio periculi*, sic Lunatici subito excitati turbantur, & sæpe pereunt, dum in periculosis locis gradiuntur.

Proniores in timorem sunt, qui frigidius sanguinis ha-bent temperamentum, cujusmodi sunt Phlegmatici. 2. Judicio, experientiâ, ætate imbelles; ut simplices, fæmi-næ, pueri. Timent etiam sapientes prævisis periculis; sed ut plurimum salubriter, dum prævident, ut provideant.

Effectus timoris pessimi sunt. 1. Spirituum, & ca-loris recursus ad partes interiores, unde pallor in vultu, tremor in membris, maximè autem in metu tremit labrum inferius, eò quòd faciliùs frigefiat. Perturbatio, vertigo, quâ faciliè è loco timidus decedit, unde non decideret, si non timeret. 2. Capillorum horror, quia dum calor in interioribus partibus colligitur, poros occupat frigus, per quos crines erumpunt, hinc dein rigent. 3. Vox tre-

mula, ob instrumenta vocis frigore correpta. Debilitantur gœna, suffunduntur oculi, & sudore gelido corpus horret. Si agonia potentissima sit cum tristitia, uti Christo, etiam sanguis per poros elicitur per vehementiam intensiōis; qui potenti terrore correptis incisioe vênæ emitti solet, nè intrinsicus corrumpatur, & putrescat. 4. Canities repentina, etiam unâ nocte causata, uti plura ex pluribus exempla habet Raynaudus. 5. Mors ipsa. Exemplum est in eo, quem joco puro velati decollandum statuere non nulli, dum oculis velatis gladio ipso ictum vibrantes, truncum corpus solo allidi animadverterunt, non sinè liberaliori risu. Et en! cùm morionem suum humo attollere meditantur, metûs solius causâ exanimem concidisse serò nimis luxerunt.

Denique suspiciones animo, credulitatem, impatentiam, versutiam, mentiendi facilitatem, & ad omnia vilissima etiam promptitudinem ingenerat. Vates falsissimus, qui facta priûs multa existimat, quàm fiant. Illud nota: quod timor subditorum sæpe etiam in desperationem degeneret, ex qua seditiones frequentes, quæ nisi principio sopiantur, vires sumunt cum tempore, & Magistratum sæpe cum Republica evertunt. Nunquam enim seditio initio pressa crevit; nunquam è contrâ seditio initio contempta remedio facili est curata. Documentis non eget veritas. Hodierna, quam vivimus, ætas sæculi præsentis abundè testatur.

Remedia timoris sunt. 1. Minue amorem, & cupiditates; qui enim nihil habet, quod cupiat, metuit nihil. 2. Media tollendæ tristitiæ, media sunt timoris præpediendi. Quis enim futura metuat, ob quæ non dolet, si adsint. 3. Minue opiniones mali præsentis. Sæpius enim opinione, quàm re laboramus. 4. Cogita inutilitatem timoris, facientis sæpe miserum, antequam sit; & qui malo non eventuro miser non esset, nisi vanè timeret. 5. Timor DEI, & periculorum exacta meditatio, ut aboleri possint.

QUÆSTIO ETHICO-POLITICA.

*An nimis audax, an nimis cautus dux
præferendus?*

PRO AUDACI.

ERrat, qui limitem virtuti Ducis constituit. Labores Herculis metas nacti sunt; ut vitia, sic ardor Ducum terminum nescit. Et meritò; exigui sunt in Rempublicam fructus, qui audent parum. Sidus Patriæ est belli Imperator: sed majus. Præest, ut sol choro astrorum. Hic nisi moveatur cursu, & recursum perenni, mundus pereat; si lentè, ut ceteri planetæ, vitium pariter trahat, oportet. Rapi debet, ut proficiat; non moveri. Non illum elementorum furor, nubium sædus retardat. Quia audet, vincit suo decore, orbis commodo. Qui cuneum nunquam petit, nunquam dissipat. Quin tempore, vel metu ipso vires augeat nocendi. Crescit ars, & industria æmuli cautelam nimiam, ut vires planta sumit ætate. Differre, metuisse videtur hosti. Neque turpius cadit hostis furori, quam qui antè per contemptum jam cecidit. Curæ grandes honorem, pericula Ducis consilium sepiunt. Decet, ut, quemadmodum alta petunt venti, turbinis mutui potestas alta belliducis expers sit nunquam. Animent obstantia, non terreant heroum pectus, quia rectè agendi geminant occasionem, Patriam vindicando, virtutem suam cotis instar probando. Impellere debet impetus, non retardare. Sæpe namque facilius superantur pericula, quam fugiuntur. Quod temeritati datum principio est, favente, ut sit, captis, & causæ Numine, gloriæ datur, & providæ felicitati. Fata viam tentanti sterunt. Qui audet, invenit. Ariadna illi virtus magnanima est, quæ pericula evolvit, & dissipat tempestates. Dux est, qui, ut communi singulorum Marte depugnat, sic unus triumpho dignus, vel satyrâ. Redimitur lauro cassis, tamen si membra capitis hujus pugnârint, quia capiti virtutem suam debent. Quam porro meticulosus leon; cervus virtutem dabit? Theopompum malim, qui fræno, quam

quàm Ephorum Ducem, qui calcari egeat. Qui nàmque casses ubique veretur, pericula ubique somniat. Dubius semper hæret, & anxius, nullibi arenæ copiam facit, nisi ubi stipulatâ forte laurus arridet. Quid verò hoc pacto? sæpe dum scyllam vitat, in charybdim ruit. At, inquis: multa tempus emendat, quæ desperata sunt credita. Et cautus nimium bellidux, sui, suorumque securus cives dum servat, ut non profit, non nocet certè, quod audax facit. Verùm, quid, amabò, interest, exercitu ducto Patriæ non prodesse, an nocere? nunquid nocere est ipsum non augere; Tam enim aufertur Patriæ, quod, cum licet, non additur; quàm dum tollitur, quod jam habetur. Vim vi duntaxat repellere, non castris hostem exuere, non præfidiis exigere, ignominia sunt cauti nimis Belliducis. Da servum, difficultatis metu fugientem omnium; quid interest inter fugientem, & negligentem? Nónne præfidentem malis, quàm metu vano torpentem? Quid, quòd moderari facilius sit impetum, quàm excitari. Ætas illud, & experientia facit; & ignes, si non enervat, hebetat. Cautus nimium his omnibus ampliùs vitiatur. Torpet, nec prodest, qui non audet. Audendum, quia ut crescunt sub incude animi, sic Fortuna ipsa volubilis aliàs Dea, audenti iniqua esse vix potest. Sponsa audaces ferè sequitur Procos. Facile carpitur laurea, dum antè fidenti animo non tam destinatur in prædam, quàm prægustatur in delictum. Exercitus omnis ad palmas magis provolat, quàm arenam; dum generosos ignes indicant ausus Ducis. Dejicitur contrà animis vel leonum cohors, ubi cautela nimia nil nisi metûs præbet indicium; & sin animo metus lateat, damna timoris certissima post se trahit. Acrior nàmque in æmulum insurgit hostis, dum metuentem vidit. Gradus ad triumphum est primus, timorem hosti incussisse.

PRO CAUTO.

Neminem magis, quàm Ducem, per tubos, & geminatis ferme vitris aspicit miles, & populus. Uno; quo auget vitia; altero, quo virtutes minuit. Solem Dux supe-

superat, qui fuerit sine naves. In hoc audacia, in illo cautela nimia carpitur. Si deligenda tamen alterutra, istam malim in Duce non secus, ac Principe. Frigori cautela assymbola est. Utilior Reipublicæ vel eò, quod stringat, & uniat: dum audacia, fulminis ritu dissipat, & rumpit omnia, crepitu grandi, damno pari, & diuturno. Moderatus calor, Medicorum placito, vehiculum est vitalium spirituum, immoderatus morborum. Vide cælestes ignes, supercælestis eos aqua circumdat, ut temperet, & cohibeat. Verum est, insistendum esse fortiter ei, quod statutum sapienter. At mutantur tempora, & consiliorum momenta. Sapiens consilium levi casu temerarium evadit. Expectanda, quæ possumus: ferenda, quæ acciderint. Cedendum non nunquam malo, furori locus tantisper dandus; cum angustia, quas ultrò accersis, in ampliore hosti stragem erumpant. Providentiæ primum, fortitudinis alterum, utrumque decus est ducis. Indignior habenis bellicis nemo, ac, qui frænum sibi ipsi non posuerit. Procul sit impetus ab arena, in qua bis errare non licet. Quantum bonum est Reipublicæ periclitanti Hercules certans, tantum malum est idem, si ruat audaciâ. Turbo hæc est, rapit, non disponit. Absit militem unius jactu alex Ducis fieri victimam, qui Patriæ, non Duci se hostiam devovit. Decus hujus, parque DEO est servare suos. Perdere hostem, ferri, & flammæ est potentia. Præstat civis unus servatus vel decadi hostium cæx; ut sanguis proprius alieno perduto. Sapienter Titus: unius civis exitio, nè exercitûs quidem hostilis stragem sibi redimendam censeret. Laudabilior namque parsimonia nulla, ac, quæ sanguinis est etiam vilissimi. Facit id cautela, dum tametsi non vincat periculum, militem tamen, qui vincere possit, servat integrum. Palmam imitans, quæ centum annis sterilis dicitur, ut semel fructum germinet dulcem. Dum æstuat audax, canis furibundi in morem, calcari gloriæ, aut vindictæ ebrius, in cædes non tam fertur, quam rapitur. Vincere, & vinci incurius, dum audeat. Temeritas hæc est, non virtus generosa. Flamma, cujus finis vastitas, cinis, pœnitudo. Pericula Ducis, Exercitûs, Patriæ, rei Divinæ juxta, ac
humana-

humanæ lugentur tum primùm, cùm inter busta, & exilium sentiuntur. Teli unius ictus sic sæpe lædit vitalia, ut nè quidem in herba spes ulla supersit. Nunc seges est, ubi Troja fuit; fecit audacia Paridis. Crispus Constantini temeritati non cecidisset; regna starent complura, si Ducibus ardor cautus magis, quàm audax fuisset. Quàm superbum, tam infame excidiis elementum est ignis. Æquata solo Pergama, congestam in struem sceptrâ, crudelis gloriæ ostentat trophæa, & è communi suggestu funerum metu imperat. Sic parentatur inconsulto belli impetui Regnorum exitio, neque antè quies illucet, quàm cùm busta inter, ac rudera Majestas vidua confidet. Ipsa adèò audacis victoria, quia temeraria, ducis non est, sed tyranni; quòd nisi vicisset, turbine uno se, unâ & Patriam perdidisset.

§. IV.

De ira, & passionibus generatim.



Cernis, ut adversum furor æmulus opprimit hostem;
 Unguibus utque rapit, dentibus utque furit?
 Hoc leo; nec tantum leo: par insania multos
 Sæpe homines rabidas efficit esse feras,

DOCTRINA ETHICA.

IRa juxta Philosophum l. 2. Rhet. c. 2. est appetitus vindictæ propter contemptum; mihi videlicet, vel meis sinè merito illatum. Passio hæc (quâ, testante Senecâ l. 1. c. 2. de ira: *nulla humano generi pestis pluris stetit*, eò, quòd sollicitudines causârit; urbes, regna, Imperia aut exhauserit, aut deleverit) affectus est prosecutivus ultionis possibilis; si enim ultio sit impossibilis, oritur tristitia; hinc vindictæ appetitus nascitur, primò ex contemptu erga nos; qui deinde causat dolorem, & uterque iram. Vindicta respectu irascentis habet rationem boni; & patet in iratis, quòd si malum, quod inferre moliti sunt, exequantur; vel certè si murmure, clamoribus, querelis fermentationi bilis aliquantùm satisfecerint, voluptatem quandam sentiant, & ob hanc vindictam dicta est Ethnicis Philosophis: *ira melle dulcior*. Ira differt ab odio inimicitia; quia odium vult alteri malum, sed non tanquam vindictam, & compensationem mali accepti, quod convenit iræ. Item ut Arist. 5. Polit. c. 10. odium universaliter fertur in personas, v. g. fures, latrones, homicidas, &c. etiam ignotas. *A simplici desiderio*. Quia non supponit necessariò dolorem, quem tamen supponit ira. Omnis ira est desiderium, non tamen omne desiderium vindictæ est ira, nisi veniat ex dolore. Differt ab *iracundia*, quia hæc est tantùm proclivitas ad actum; ira autem est actus ipse; sic *iracundus* dicitur, qui facilis est ad iram: *iratus* verò, qui actu irascitur.

Iræ species vulgo tres sunt: *Excandescencia*, *simultas*, & *inimicitia*. 1. dicitur etiam *fel*, *bilis*, *ira*, & est iræ impetus repente erumpens, sed parum durans. *Simultas* est diuturna, & permanens, aliquando dicitur *mania*. *Inimicitia* est ira, non priùs quiescens, quàm sumpta sit vindicta. Illos, qui primâ specie iræ concitantur, nominat Aristoteles 4. Eth. c. 5. *acutos*; illos, qui secundâ tanguntur, *amaros*; quos demum tertia incescit, *difficiles*. In primis prævalet biliosus humor, qui citò accenditur. In postremis biliosus simul, & melancholicus, qui seriùs extinguitur.

Suprà

Suprà habes causam iræ, remotam videlicet esse injuriam per contemptum illatam. Proximam verò esse dolorem conceptum ob talem despicientiam. Effectus autem plurimi sunt, & perniciosi. *1mus* est *fervor* cordis cum quadam amaritudine. Unde plures iram definiunt, quòd sit sanguinis effervescencia circa cor. *2dus* est: incompositus totius corporis status. Incenditur enim cor, & palpitat, tremit corpus, præpeditur lingua, variat pulsus, & color jam pallens, jam rubens; sanguine jam affluente, jam refluyente; asperantur oculi, ingens labiorum siccitas.

Pallor iratis causatur plurimùm, si vindicta diu differri debeat, & causa palloris tum est accedens iræ tristitia. Hæc pallida ira sicut crudelior, ita magis est metuenda. Nam ferè amborum causa est, videlicet si bilis se diffundat, vitiat sanguinem, & icterum, vulgò *morbum regium* causat: si intestina, vel ventriculum occupet, vomitum sollicitat. *3tius* effectus est perturbatio rationis, quia, cum propter Sympathiam corporis cum anima, motibus spirituum respondeant motus animorum; fit, ut bile accensâ, accendantur etiam spiritus corporis; unde ratio, quæ tranquillitatem spirituum amat, confunditur, & idcirco rationem quidem videtur audire iratus, sed non percipere monentem; & in primo impetu non aliter, quàm in phrenesi, vel delirio morbidus solet, operatur iratus, nullâ consilii, lacrymarum, moniti, imò & amicitie habitâ ratione. Contemptus iram excitantis species tres sunt: *Despicientia*, *detractio*, *contumelia*: reliquis tamen acrius pungit despicientia in rebus illis, in quibus se aliquis cæteris majorem esse existimat, v. g. si vir eruditus damnetur ignorantie.

Ad iram pronissimi sunt. 1. Qui impediuntur in iis, quæ maximè cupiunt; hinc ægroti, pauperes, amantes faciliè incenduntur in eos vel maximè, qui ipsos contemnunt. 2. Qui contemptibiliores sunt, cum sæpius contemnuntur, proniores sunt ad iram. 3. Qui animo sunt angusto, & infirmo, ut pueri, & fæminæ. Fatigati item, sive laboris, sive orationis, seu scientie contentione, vel qui ab his repente surgunt, vel actu iisdem intendunt, ut & melancholici. Quia spiritus lætitiæ aptos fregit contentio,

tentio, vel actu intendit. Denique opibus, autoritate, & literaturâ pollentes. Communiter tamen horum ira, ut facilis instar scintillæ est, ita velut scintilla ab iisdem citò rejicitur. Quod si verò succumbant iræ majori, ex re gravi progenitæ, facilè in odium, & rancores diuturnos degenerant.

Iræ mansuetudo seu lenitas opponitur. Hæc juxta Aristotelem 4. Eth. c. 5. est: *succensere alicui, prout oportet*. Ait enim, *mansuctus ille est*, (intellige, secundum naturam loquendo) *qui, prout oportet, succenset*. Est altera *mansuetudo*, & *lenitas excessiva*, quæ ex 2. Rhet. c. 3. neque ulli studet vindictæ, neque ullum amovet malum ex languore quodam positivo. Etiam hæc pugnat cum ira, & vitiosa est. Unde meritò Aristoteles 4. Eth. c. 5. eos, *qui, ob quæ oportet, quibus, sicut, quando, & prout oportet, non irascuntur*, stolidos nominat.

Ira inter omnes passiones est sola, quæ habet motus repentinos. Quorum alii sunt *primò primi*, qui cum omnem omnino advertentiam, & deliberationem antecedant, & appetitum raptant (sicut ferè ea, quæ in somno non datâ causâ contingunt) *indeliberati* dicuntur, & vitiosi non sunt. Alii sunt *semi-deliberati*, qui cum modica, sed tamen nimis exigua deliberatione, videlicet tantum lumine orto ex motu *primò primo* commissi sunt, & ideo venialem tantum culpam incurrunt. Alii actus sunt *deliberati*, qui cum habeant plenum rationis usum, & moram, vituperio, vel laude digni censentur.

Iram propriam lenies. 1. Si negligas nôsse mala obvia. *Plerasque enim injurias, qui nescit, non accipit*; ait Seneca. Hinc cave multum quærere, quid de te sentiat. Ut enim multa interrogans, multa responsa acquirit; ita pro varietate hominum partim proborum, partim improborum, quidquid agas, diversè sentientium, & te judicantium sensa necessariò intelliges. 2. Fæditatem irati, & damna iræ perpende. Fæditatem hanc à se consideratam sibi plurimum profuisse testatur Seneca scribens: se, cum hominem clavi portam subito referare non valentem, videret calcibus ipsis in portam, dentibus in clavum furere, hæc bellæ similitudine adeò motum fuisse, ut

nunquam facilè surgentis iræ impetus audire vellet. 3. Excusa mala illata, vel certè intentionem. 4. Tempus tibi sine, præsertim nè in iræ impetu statuas quidpiam, ad minùs dum 24. literas cum Theodosio recites. 5. Colloquia cum amicis, vel cum affabilibus, iræ tempestatem sedant.

Ira aliena placatur deprecatione, & modestâ conversatione, irato cedendo, neque obsistendo, imò aliquando timorem ostendendo. Hoc ultimo tamen moderatè utendum; nam imbecilles, & sui impotentes hoc timore viso ampliùs effervescent, & accenduntur. Unde Ovid. *Corpora magnanimo satis est prostrâsse leoni, pugna suum finem, cùm jacet (etiam simulatè) hostis, habet. At lupus, & turpes instant morientibus ursi, & quæcunque minor nobilitate fera est.*

Ira, quamvis vitiosa sit sæpe, semper tamen iusta videtur homini, & iustitiæ titulo se palliat. Culpanda certè non semper; utpote, quæ, si moderata sit, dum homines ad magna audenda reddit intrepidus, & in exequendo constantes, *virtutis calcar* dici meritò potest. Imò vitio non carerent Judices, Principes, domuum Patres, hoc si felle aliquando non uterentur. Nam & Philosophus 2. Eth. c. 8. n. 6. Irasci, quomodo, ob quæ, erga quos, cujus causâ, prout oportet, medium virtutis esse existimat. Et lex Divina Ps. 4. id æquum docet: *irascimini, & nolite peccare.* Fiet hoc, si modus fervetur, & vindicta non titulo ultionis ex rancore quærat, sed ut reum admissi mali pœniteat, id retractet, & posthac evitet.

In consiliis dandis, aut executione captorum grandium pestis maxima est ira: quia comites plerumque habet discordiam, & pervicaciam, suo sæpe, & regnorum exitio. Obsedit Carolus V. Tunetum, strenuus hâc obsidione miles Comes Sarnotanus hostes acriùs laceffens acriores pariter æmulos est expertus. Numero Turcis impares Itali, vehementiùs tamen pressi, ope Hispanorum egebant. Cunctabatur Hispanus laboranti Comiti ferre suppetias, eò, quòd Italici frons aciei, apex gloriæ obtigisset. Cæsi ergo primùm ab hoste Itali: postero die Hispanorum castra

stra petita à Turcis, grandi eorundem, & orthodoxi exercitûs discrimine. Caroli VI Galliarum Regis tempora consule: Nicopolim obsidebat christianus exercitus. Rex Ungariæ, & Comestabilis (ut vocant) Franciæ, æmulatione dissidebat; eò quòd ipse primus ab Hungariæ Rege sententiam dicere non sit iussus, universum exercitum ira duorum perdidit. Meritò proinde Alphonsus Arragoniæ Rex aiebat: si se florentis Reipublicæ Romanæ temporibus vivere contigisset, authorem se futurum fuisse statuendi Jovi Positorio templi è regione Curia, in quo, antequam senatum Patres conscripti subirent, iram *Choragum* affectum ponerent. Morem illum Romanorum Rex sapiens indicabat, quo Joveni nominibus multis insigniebant: Feretrium, Gamelium, Genethlion, Xenion, &c. In Summa de passionibus sedandis id nota. 1. Principem passionem primùm impugna. Validissimo nervo strato, auxiliares cedere copias est necesse. 2. Initiis obsta. *Principio tenuem spernas, qui fortè scaturit rivus; si cedas tempora, flumen erit.* 3. Certis judiciis actiones tuas regere conare. 4. Sensus & custodi, & fræna. 5. Exempla aliena intueri, quæ laude digna; vim enim magnetis obtinent. Mala sint scarabæis. 6. Consortia meliorum expete, aliena fuge. Plerumque enim: noscitur ex socio, qui non cognoscitur ex se. 7. Objecta te seducentia vita. Amat, qui non vitat. Qui verò amat periculum, peribit in illo. 8. In nonnullis veluti tristioris complexionis, juverit mutatio climatis, Cœli, somni, victûs; recreatio, venatio, conversatio; imò non nunquam medicina.

Q U Æ S T I O E T H I C A.

Utrum magis nocivum, suppressio iræ, an eruptio?

S U P P R E S S I O.

Violenta nunquam durant. Vis major naturæ fit nulla, ac dum stringitur, quod suo pte ingenio exitum quærit. Torrentem, qui stragem molitur, si terminis ambire cupias, rarò conatus cedit felicior; aut enim rumpit, aut rumpitur. Sic natura iræ motibus æstuans,


quantum illi franguntur, tantum patitur; quantum patitur, perit. Hinc vetus gnomo sapientis: ira, quæ tegitur, nocet. Ut calor natus pabulo carens, vitalia concremat, sic ira pabulo suo, libertate nempe carens, animum faciat, vigorem tollit, vires hebetat. Vesevi, aut Heclæ viscera scrutare, nunquam acrius grassatur flamma, ac dum latet; procella mitior est, dum palam furit. Quidquid coquitur, in acerbiorum orbi stragem cuditur. Serpentina in venis toxica, quia pressa sunt, ut vipera materno etiam lactata gremio, non parcut utero, quo nutriuntur. Sic ægritudo diuturnitate crudelior, quæ acerbitate latentior. Non una tempestas primo furore represso, resumptis viribus acriores campis, & mœnibus pestes vomit. Fove anguem, & beneficii præmium, affectus merces mors erit. Nempe acerbius, atque adeo periculosius semper æstuat, quod vi stringitur. Violentiæ omnis, ut ignis, hæc est indoles, aut erumpere, aut rumpere omnia. Quid prodest sopire flammam, & domum perdere? affectum stringere, & vel tibi mentis, vel corporis, sin utriusque exitium accersere? Hebetatur acies oculi luce nimia; caligat, quæ vim passa est palpebra; franguntur spiritus, & vigor mentis obtunditur, si ad ima deprimitur, qui summis inhiat, ad quæ natus. At esto, constet sibi anima, toxicum sinu conclusum, ut serpens ossa exedit, dum perimat. Talionis pœnam luit, qui flammam sinu continet. Se victimam faciat, cui alter destinabatur. Nihil auctori acerbius, quam ira mente concepta, sed suppressa. Nisi morem geras, id unum moræ est pretium, quod perenni vulnere, cum æmulum nequeat, se ipsum furens conficiat. Vultur ipse, & Titius; sui tortor, & obiectum. Quodque acerbius cæteris est, non alieno, sed suo confici vulnere; tanto minus ferendo, quanto magis invito, & diuturno. Procellosum mare furentis est animus, quantum stringitur, tantum suos exulcerat alveos. Erythræi maris tempestas uniones parit lectissimos; sagittas, virus, & pestes gignit fluctus furentis. Illud interest cæteros inter affectus, & iram, si modum nesciant, mitius furant. Incredibilis vis est amoris, spem tamen exacuit, ipsaque bonorum dilatio quantum angit, tantum lætat.

Ira, fulminis grassatur in morem. Hora quævis dilata, ablata est. Una hæc, quidquid distulerit, dum erumpat, in virus convertit omnia; exitio alieno cùm nequeat, triumphans suo.

ERUPTIO.

VÆ orbi, si limitem furor nesciat. Ubi eruperit, crudelior flamma est. Sedari impatiens, non antè quiescit, ac dum se, suæque damnis eripi cernit; quæunque corripit, corrumpat. Mons omnis turbine hoc, nè olympo quidem excepto, æquabitur solo. Torrentis more, qui saxeas moles unà ac sylvas in spoliū rapit. Rapit inquam; impellunt enim vitia reliqua, præcipitat ira. Moderatum nihil scit ira. Furor, & cædes ferè sibi sunt comites. Unaque est quies furentis, secum omnia sepelire, & fato involvere. Chymæram, & Ætnam montes ignivomos prodigium dedit natura, eosdem tamen esse jussit documentum. Viciniam latè omnem pessumdant, dum crudeli sæviunt flammarum rictu; flammæ sinu suo si concoquant, sæcundis rigent nivibus. Rigere crinibus, scintillare oculis, torquere colla, arenam calce, clamore, & fletu aërem proturbare belluarum est, cùm sanguinem sitiunt. Et hæc rationem, vires, animum foveant? Scintillam comprime; quam digito enervas, sibi relicta, Ætnæo grassari incendio obstupescas; sic ira in furorem degenerat. Hinc non rationis modò, sed sanitatis causâ vitandam monuit Sapiens Ep. 18. Ventorum conclude agmina, aurea spirabit tranquillitas, dominabuntur mari Alcýones. Repagula solve, & cælo misceri aquarum montes videbis. Non omne, quod fræni videtur impatiens, frænatum languet. Indomitus sessorem non patitur sonipes; quantum calcar urget, tantum torquent in officium habenæ. Vis ipsa dum alios petit, in se pariter furit. Rapit torrens littora, se iisdem turbat, & gravat. Nunquam libertati suæ fera dimittitur, nè noceat; spectanda datur, sed è cavea duntaxat. Clementiæ, & amoris fructus quantum profunt, tantum nocent iræ laxatæ fulmina auctori, & Reipublicæ. Illi boni publici sunt fundamenta, hæc evertendæ momenta. Inter vitæ civilis fluctus seu

in prora sedeas, seu temonem regas, seu remum ducas, felicior nunquam es, ac si hos fluctus compresseris. Quia nocent, doceant. Latrantes sopi, tum sapies. Nocent consilio; inimica est consiliis cæcitas. Mater cæcitatis est impetus: Impetûs iræ profusio. Nocent honori; pedissequa vindictæ infamia est. Alieno vel damno, vel sanguine suam orbi describit ferocitatem. Pertinacia iræ non sopitæ individua comes est. Pudet præcipitata reluere, aut à malè captis desistere. Novo igitur furore furor defenditur, & graviora periculis suggeruntur remedia. Quemadmodum nullus hodie tam fædus furoris est æstus, quem speciosus justitiæ, aut boni publici color non palliet. Non hæc, crede mihi, nobilis libertas est animi, sed libera vitii servitus. Non felicitatis dictamen privatæ, vel publicæ; sed ad boni cùm privati, tum publici everfionem molimen. Quietè res stat utraque & servatur; nil quieti, & moderatis consiliis irâ magis adversum. Pacis faciæles, Belli Principes, senatum Patres da iræ impatientes: Curias, exercitus, Imperia convulsisti. Da moram vulneri, quisquis læsum te credis. In pus, & ulcera degenerant vulnera corporis, si differantur, non animi. Mora ipsa languori medelam attulit frequentius. Refrigescit impetus diuturnitate, tûmque primùm delectat, non errâsse præcipitem; cùm, si factum foret, nil nisi aut pudor, aut pœnitentia fera superforet.



PROBLEMATUM

E T

DOCTRINÆ ETHICÆ

PARTIS PRIMÆ

I N D E X.

Præliminaria. <i>Quid Ethica? Partitio? Objectum?</i>	Pag. 1
Quæstio I. <i>Generalia moralitatis principia.</i>	
§. I. Quid beatitudo hominis?	4
§. II. Quid bonum, & malum in communi?	8
§. III. Quid, & quotuplex sit actio humana?	14
<i>Ejusdem principia, & moralitatis</i>	
§. IV. Quæ actionum moralitas, & corollaria?	21
Quæstio II. <i>De virtutibus.</i>	
§. I. Quid virtus in genere?	28
§. II. Quid Prudentia?	32
§. III. Quid Justitia universim? quò refertur pietas	
<i>in Deum, & Parentes?</i>	36
§. IV. Quid Temperantia?	41
§. V. Quid Fortitudo?	48
Quæstio III. <i>Virtutes humanæ.</i>	
§. I. Quid Amicitia?	53
§. II. Leges, & adversantia amicitia.	58
§. III. Quid magnificentia, & liberalitas?	63
Quæstio IV. <i>De Passionibus, & affectibus humanis.</i>	68
§. I. Pauca de anima.	69
§. II. Nonnulla de varietate complexionis humanæ,	
<i>seu indolis.</i>	73
§. III. Quid Passio in communi? numerus passionum,	
<i>& finis. An bonæ, vel malæ?</i>	80
Quæstio V. <i>De Passionibus in particulari.</i>	
§. I. Quid Amor?	86
§. II. Causæ amoris; effectus, remedia.	90
§. III. Odium. Cupiditas, Desiderium. Fuga.	98
Qu-	

Quæstio VI. *De reliquis passionibus.*

§. I. Quid Gaudium, Tristitia?	Pag. 105
§. II. Spes, & Desperatio.	113
§. III. Audacia, & Timor.	119
§. IV. De Ira: & Passionibus generatim.	126

INDEX

Quæstionum Problematicarum PARTIS PRIMÆ.

I. An Infelix quis esse possit, quia felix?	Pag. 6
II. Utrum sapienti præoptandum: vita longa; an fama?	11
III. An Philosophia parandis fortunis proficua?	18
IV. Uter aptior fortunæ ludus: nobilis; an ignobilis?	25
V. Utrum major virtus cedere invidiæ; an palam cum eadem luctari?	30
VI. Utrum majus documentum prudentiæ: verba; an facta?	34
VII. An gratia vultus & morum, muniis digniorem reddat?	41
VIII. An bellô, an intemperantiâ plures necati?	45
IX. An heroi possit fuga ex prælio esse gloriæ?	50
X. Utra amicitia melior: paucorum; an multorum?	55
XI. Utrum amicitia fomentum firmitus: præsentia; an absentia?	60
XII. Uter gloriosior Princeps: literarum. an magnificentia amator?	65
XIII. An consultius orbi, unâ omnes gentes uti linguâ? ut corpus animâ?	70
XIV. An ex forma sapiens de virtute animi feratur judicium?	78
XV. Unde major spes? à præcoci; an à tardo ingenio?	83
XVI. An suavius, & optabilius amare, an amari?	88
XVII. An dari possit philtrum universale in natura conciliando omnium amor?	94
XVIII. Utrum melius, amico inconstanti, an inimico constanti benefacere?	102
XXI. An hilaris, an subtristis genii officiis aptiores?	109
XX. Utrum phænomena, & nomina sint felicitatis, aut adversæ fortis præsagium?	115
XXI. An nimis audax: an nimis cautus Dux præferendus?	123
XXII. Utrum magis nocivum: suppressio iræ; an eruptio?	131



IDEA SAPIENTIS
THEO-POLITICI,

I D E S T:

Tripartitæ Morum Philosophiæ

PARS SECUNDA

THEO - POLITICA.



P R O O E M I U M.

Politicam sapere hodie volunt omnes, ii etiam, qui despiunt maximè. Politicus enim lepidis ejusmodi peponibus is ferè tantum audit, qui nullo legis, religionis, æquitatis discrimine, sua pro libidine, commodo tantum suo omnia ordinat, aliorum deceptorum fraude; juris, & honesti, præsertim candoris jacturâ. Vel certè, qui præpotentis Domini addictus obsequiis, sic se in ejus format annutus, sic limina conterit, ut Barclajo teste servitus non alia durior, atque hæc; eò magis miseranda, quò minus videtur miserabilis. Politicum alii cum Machiavello censent, qui sic administrat Rempublicam, ut voluntas sola sit pro ratione omni; & præ omni, etiam Divina lege stet commodum proprium. Quos omnium optimè confutat Adamus Contzen cum pluribus aliis; Lipsio præsertim, Belgicæ literaturæ, & Politicæ Phænice. Qui licet Machiavelli ingenium acré, subtile, & igneum judicet, ait tamen Principem ab eo non duci ad templum virtutis, & honoris. Quod damno suo experti Discipuli ejus, Cæsar Borgias, Dux Urbinas, & Sfortia Ludovicus, Politicam pessimam pari fato terminantes.

Sapienti igitur perinde, ac probo sic tradenda est Ethica, ut cum instituto Religionis, & fidei constet; neque enim, ut delirant nonnulli, repugnat esse Christianum, & Politicum bonum. Imò veri Ethici nomen perinde est sanctum, ac virtus ipsa per Aristotelem l. 3. Polit. c. 6. Horum sensu ii, qui suam in omnibus sectantur utilitatem, *versipelles*, & *Pseudo-Ethici* dicendi sunt, de quibus ille: *hic niger est, hunc tu Romane caveto*. 2dò. Principem, ut idola qui venerantur, *Pseudo-Politici* nominandi sunt; quia adulatores, & vultus mancipia. 3tò. Denique, quibus stat sola pro ratione voluntas, *Tyranni* magis, quàm Politici dici merentur. De vera igitur, & germana id est

Theo-Politica nobis tantum sermo est.

PHILOSOPHIÆ


MORUM

PARS SECUNDA.

POLITICA.

QUÆSTIO I.

Quid Politica, quæ differentia, & objectum?



Est mare naufragiis tumidum Politia: ratésque
 Mille inter, portum vix tenet una suum.
 Quot tamen incautos rapiunt ista æquora nautas!
 Dum favet exitio gens malefana suo.

DOCTRINA POLITICA.

Politica, alio nomine *Statistica*, & *ratio statûs* Bettino dicta, eò quòd in illa sistat felicitas publica, est pars *Philosophiæ moralis*, quæ docet *Rempublicam rectè instituere*, & *vitam civilem ad bonum commune hominum*. Unde Politica etiam sumitur

mitur pro *Republica*, & communiter pro *Civilitate*. *Politicus* verò, seu *Statista* verus est *homo civilis*, *publico bono serviens munere suo*, vel *consiliis*, vel *gladio*, vel *litteris*, aliòve quovis modo. Unde vides, quàm huic sit necessaria Rerum publicarum cognitio, quæ illius pericula, comoda, emolumenta, honores, &c. discernat. Quæ tamen ex Aristotele l. 19. Eth. c. 9. non sit cujuslibet, sed scientis, Philosophi tamen moralis est. Ut cui licet experientia, rerum aliàs Magistra tutissima, desit, studium tamen, & intellectio adsunt, quæ plùs civili conducunt scientiæ, quàm experientia; quamvis experientia mirum quantum intellectiorem solidet, & illustret: nam & experientiæ regula est studium, & intellectio. Differt Politica à *Jurisprudentia*, quòd hæc præcisè tendat in objectum sub ratione justitiæ; Politica verò tendit in objectum sub ratione boni communis principaliter intenta. A prudentia, quòd hæc dirigat hominem, quid sit agendum, in quacunque civili, Ethica, Oeconomica actione. Politica verò tantùm in civili. Scientia hæc solam spectat praxim, scilicet in objectum suum materiale, quod est Civitas ordinabilis, ut inducat objectum formale, videlicet ordinem debitum, & per hanc felicitatem ipsam, seu bonum commune. Unde vides finem proximum Politicæ esse actiones civium rectè ordinatas, remotum verò esse felicitatem, & beatitudinem naturalem.

Per ordinem verò hunc non intelligitur solùm v. g. domuum multitudo, quam etiam latrones cum Tartaris habent; sed intelligitur ordo justitiæ, legum, & virtutum aliarum; sinè quo, ait Aug. maxima regna, quid aliud sunt, quàm magna latrocinia? Scripserunt de hac cum Aristotele plures. Principes sunt Plato, & Philosophus: qui 1. Polit. exponit, quid domus, pagus, civitas, &c. sit? 2. Examinat varias institutas Respublicas. 3. Constituit Rempublicam pro suo arbitrio. 4. De speciebus Rerum publicarum, & de aliquibus non optimis. 5. De mutationibus Rerum publicarum, & seditionibus. 6. De institutione Democratiæ, & Oligarchiæ. 7. & 8. liber imperfectus est de optima Republica instituenda. Sequuntur hos D. Thomas. Bodinus, &c. Alii solum Principem

pein instituunt, vel tantùm ex sacris literis, ut Menochius, & Nieremb: vel etiam ex profanis, ut Savedra, Chokier, Lipsius, & Caufinus.

QUÆSTIO POLITICA.

Utra major, & perniciosior orbis Politica, verborum simulatio, an operum?

PRO VERBIS.

QUàm familiare, tam enorme est mundo malum os fallens: quod non nisi Gracæ aut Cretensum staterâ sua ponderat verba, placendi studio veritati diem in momenta dicit, unam pro commodo aut vindicta anchoram mendacium statuit. Nomen usque adeò fædum pertimescunt omnes, rem diligunt plurimi. Spondere verbis maxima, designare mente nec minima; aureis montibus ridiculum substituere murem; verbis solem referre, animo tempestates, & nubila coquere, res adeò passim domestica, ut penè vim legis consuetudo obtinuerit. Duplicitas oris dicitur ingenium, eloquentiæ pallio adulatio circuit, veritas mutato nomine simplicitas audit. Quasi verò vel eò Politici nomine indignus sit quispiam, quòd verax sit verbo. Hæc ars artium, ut multis tibi nominibus obliges plurimos, lenociniis multis verba oblinere, spem in momenta lactare, obtentionem non suâ frustrari, sed virium culpâ; fide Punicâ id unum efficere, ut dum fidem omnium verbis studes obstringere, agas omnia, ut credatur nihil, quia fidit nemo. Et meritò: Microscopia reperêre Optici, Politica hodie eloquentes creat, qui ex musca elephantem momento ut metiuntur. mentiantur. Fecêre id olim vitra auctoria, faciunt hodie linguæ, hinc vitrea horum passim fides. Dissilit nempe lapsu temporis instar vitri mendacium, quod fatui instar ignis Politico in Cælo splenduit parum, veritas contrâ adamantis instar amatur. Stat hæc sui secura, vel inter fulmina; dum vel inter prospera tremit cor mendax, eò vel maximè cruciatum, quod, quæ cæpit lingua, dum pertexit versutia, patet factum tempore auditori fermè noceat credulo, magis
tamen

tamen auctori; dum fortunam deceptus perdit, deceptor fidem & famam. Quæ enim fama hominis, cui fides nulla? quis porro fidem tribuat ei, cujus pro circumstantia venalis est lingua? Cui calumniis æmulum premere, convitiis innocentem laceßere stratagema est artis, non dedecus mentis. Talione proinde æquissimâ id obvenit, quòd, cùm deinde & vera narranti fides sit nulla, id lucri in vicem reportet, impunè mentiri quòd audeat. Nemo tali in orbe fidus, nemini ille. Susplicax nempe, nè fraudibus verborum fallatur ipse, quibus alios fefellit. Jacet idcirco, quia cum, & inter umbras luctatur semper. Præsertim cùm mendacia etsi successu nunquam pessimo non caruerint, diuturnitate careant semper, quia tempore detecta. Ingenium porro, & frequentiam Politicæ hujus, à frequentia verborum metire. Perniciem ab eventu. Nil quippe magis debetur publico, quàm veritas. Quâ sublata, quæ hominum est hodie, ferarum erit communio. Corda non patent, verba si fallant, commercium periit. Certus enim Scripturâ teste mali hujus est fructus; *os, quod mentitur, occidit animam*, id est, fidem mutuam, & fiduciam, quæ Reipublicæ anima est. Apage hos Pseudo politicos. Politicum cupis? habe virum bonis publicis, honoribus, & gratiæ natum. Talis ut sit, apage mendacem. Verbum unum fidei majoris sit tessera, quàm alienorum plaustra juramentorum. Virtus, scientia, concordia mentis, ac pectoris provehant conantem, non mendacia. Amor, & gratia Principum, orbis honor, tributaria sint ei, *qui loquitur veritatem, & non egit dolum in lingua sua.*

PRO FACTIS.

Miseranda res: Stupidus hodie audit Politicus, cujus ars non sit mendacium factorum magis, quàm linguæ. Ineptus Reipublicæ tractandæ creditur, fallendi artificiis quisquis caret. Stratagema promovendæ gloriæ est, nil agere sinè fucò. Sic tractare omnia, ut & nullam, & omnem sumas personam. Quasi verò feliciore nemo sorte cuncta conficiat, quàm quem Circæa commodi proprii pocula totum in vulpem mutârint. Vultus, oculi, calamus suam


habent linguam, quâ tegatur non rarò mente latens vipera, tantò crudelior, quantò tectior. Silentio mentiri versutus magis studet Politicus, quàm verbò. Tutiùs sibi, periculosiùs alteri, quia tectiùs; ut magis feriunt jacula, quæ minùs prævisa: & altissimæ voragines sinè susurro instar olei undas devehunt. Præplacet silentii mendacium; quasi verò minùs aut infamiæ, aut perniciiei authori juxtà ac publicæ rei pariat, famam publicam opere, quàm paucorum vel aures, vel animos ore seu elingui, seu bilingui ludere. Vah injuriam temporum! certissima quondam erat oculorum fides, ut testis est Physica. Hodie, heu, quæ fides Politicæ! vix jam fides constat iis secura, quæ oculis usurpamus. Ferè mendacia verbi factis superamus, dum passim publico nil capimus magis, quanquam carpamus, quàm aliud mente, facto aliud testari: in dolore serenum meridiem, inter gaudia doloris nubem, viperina ridentibus gratiis odia, vitia ipsa virtutis superficie venundare: nec promittendi antea modum, nec pudorem deinde ullum frangendi servare. Tantò magis, sed & perniciosiùs nostro, & Reipublicæ damno per omnium ora eloquentes postea, quantò majoris sunt constantiæ facta, quàm verba. Mentiuntur, qui fallunt verbo; pejerant, qui opere. Peccant illi in fidem suam, in publicam isti: quòd illi audientes duntaxat, qui sæpe pauci; hi orbem, quæm famâ facti replent, deludant. Facto nocentes, exemplo pessimo etiam alios docentes. Quòdque pejus est; agunt, qui loqui etiam vel non audent, vel non possunt. Hoc Divinæ erat Providentiæ arcanum, negare multis multa, ut mutuis stet orbis subsidiis, amicitia, fide. Nulla enim Cicerone l. 3. de offic. teste, res vehementiùs Rempublicam continet, quàm fides. Et quæ oro aut amicitia, aut fides stet, ubi nil nisi factis fallere est regularum compendium, & agendorum cynosura unum est commodum proprium. Circumvenire pollicitis, deferre obsequia, & eventu fallere, procul à privata, ampliùs à publica abest re. Sinè fide fora, & curiæ, non pacis, & concordiæ, sed dissidiorum erunt fomenta. Regna ipsa grandia totidem latrociniorum seminaria. Spes namque promissis lactata, vel timor, in graviores ipsi etiam imperio metuendam subla-

sublatâ causâ erumpit procellam. Fraus fraudi passim redditur, dum vindicta ab invalido in eum, quem fidei læsæ causâ contemnit, non aufertur, sed differtur. Exosa est infida familiaritas æqualibus, nè fallantur; majoribus, nè probare videantur. Stetit Romæ gloria, donec fides. Cecidit, ubi illa elanguit. Ingenium, cautelam, & prudentiam petunt opera, natura docet fraudes verborum. Unde frequentior verborum simulatio, quàm operum. Politici igitur germani est, fide diffidentiam, ingenuitate solâ fraudes vincere; Fidem tibi omnium ut obliges, servare singulis. Nam bona ipsa publici statûs culpanda sunt, si malâ parta sint fide. Hæc illa latens est pestis, quæ dum medullam depascitur, succo stirpem & vitâ spoliât. Dum pari facilitate, quâ parta sunt bona, unâ & infelicitate perduntur. Idque unum seu doloris proprii, seu alienæ miserationis sænus superest, quodd & vulnere tuo medelam ferre, cum velis, non possis ipse; & mendaciis tuis exasperati plerique, dum alieni ferè misereantur exitii, triumphent tuo.



§. II.

Imago, & principia Pseudo-politici.



Vertitur in varios semper finè fine colores
 Stellio, nunc rutilat, jam viret, inde rubet;
 Indole tu simili Vertumne Politice plaudis.
 Quælibet aura alium, quælibet hora videt.

DOCTRINA POLITICA.



SI Savedræ Symb. 66. credam, tota ratio statûs jam ferè nîl aliud est, quàm ars quædam alios fallendi, aut nè Princeps fallatur ab aliis. Nam ut canit ille: *Fugâre pudor, verûmque, fidès-que; in quorum subiêre locum, fraudèsque, dolique,* quibus vix Lynx cavendis par sit. En tibi imaginem Pseudopolitici in compendio: & vide, an vel Camæleon tot colorum, quot hic fraudium architectus.

Diffimula semper, simula, cave credito nulli;

Omnia laudato, quæ tua semper age.

Simulandum semper; quamquam damnosior nulla, quàm religionis, amicitiae, pietatis sit simulatio. Neque vel Principi in subditorum etiam commodum dolus concessus est; ut ejus purpura maculam omnem respuit. Nolim tamen
 per

per *dolum* intelligas, vel *diffidentiam*, vel *disimulationem*, vel *conciliationem*; sed *deceptionem*, *perfidiam*, & *injuri-*
stiziam, quarum primam Lipsius suadet, neque fraudem
esse propugnat Contzen; reliquas verò spectato Conscien-
tiæ arbitrio omnes rejicit, & condemnat.

2dò: *Disimula*. Regula bona, si suo tempore; quæ
Principi tum maximè necessaria est, cum fraudulentis agere
dum cogitur. Sic tamen responsis veritas dissimulanda, ut
citra mendacium celetur alios veritas, & sic injuria vitetur
DEI, nec tamen animi sensa pandantur. Verissimum il-
lud est: *qui nescit dissimulare, nescit regnare*.

3tò: *Credito nulli*. O stultitiam! cum Seneca enim
sentio ep. 3. utrumque in vitio esse; & omnibus credere,
& nulli.

4tò: *Omnia laudato*. Cùm tamen mortalium acta sint
reprehensione digna non nunquam, certè laude sæpe in-
digna sint.

5tò: *Quæ tua, semper age*. Non quæ conscientia, &
Principis, vel publici boni, vel virtutis; sed quæ priva-
ti commodi, opum, famæ, curat. Et hoc quidem bo-
nis an malis, per fas, an nefas, nîl pensi habet.

Machiavellus, cum cæteris ejusdem furfuris, his ferè
suum discipulum adstringit legibus, ampliori paululum,
sed paris nequitia sensu. Cave, nè ulli, quantumvis in
speciem amico credas quidpiam, arrideat licèt, complexetur,
polliceatur, dejeret. Hinc neminem tibi ex animo
amicum cense, sed nec ipse cuiquam ex animo amicus es-
to; adeò tamen comis in omnes, ac si neminem non a-
mes. Liberalissimus in iis officiis esto, quibus nihil inest
impendii, ut sunt laudum plaustra: salutationes blandissi-
mæ, apertio capitis, cessio viæ, complexus, pollicitatio-
nes, honorum, & titulorum repetitiones.

Omniem in fabulam Proteus, sinè veri affectûs indicio,
ut te aptes, vultum domi finge eâ arte, ut vultus, & ge-
stus corporis fucatis verbis aptissimè consentiat. Domi
meditare dicenda, & agenda, & quidem sinè fronte, sinè
metu, omisâ sinceritate personam, velut in scena dunta-
xat, agito.

Factiones aulæ vestiga sagacissimè, nulli tamen te faciliè addicito. Quemcunque favore Principis videris polere, in tuam partem inclinare intende. Nec pensi habere vel morioni blandiri, si Principi placere videas: si Principi assistas, alacritatem simplicitate temperatam exhibe, gaudio gestientem, quòd adesse liceat. Sic tamen adesto, ut neque perpetuus sis, tædii, & satietatis vitandæ causâ; neque rarus nimium, nè oblivioni deris.

Quæ placere Principi nôsti, age, & dic. Cave omnia maximè, quæ displiceant. Dicenti arride; si respondere non liceat, cum admiratione dictorum ejusdem applaude. Si loquendum, petax esto, & querulus semper; in iis tamen, quæ finè sumptu suo largiri faciliè potest: Si capax ipse gratiæ non sis, alios suborna petitores, quos eapropter obstrictos habeas. Aut alieno nomine, tuo tamen commodo gratiam obtine. Denique Principem pleno ore coram aliis celebra, certus fore aliquem, qui Principi referat.

Aliorum gratiam elegantia munerum, magis tamen aptâ, quàm pretiosâ stude inire. Et nè vel animus, vel divitiæ pateant, verbis condias levitatem muneris, tenuitatem fortunæ causare. Aureos tamen montes hâc favente pollicere, sed pollicere tantum: si piscis aureus tibi obviet, nemini vel in cælo, vel in terra eum cedito. Te omnibus charitate præpone. Dum de *meo*, & *tuo* agitur, vel parentes ipsos aureis verbis fascina.

Procellis, & variantibus aulæ ventis cautè credito. Nullius tibi tanta sit sacramenti religio, quâ charior non sit aurei hami piscatio. Et ideo: *semper tibi pendeat hamus, quo minimè reris gurgite, piscis erit.* Tuum in omnibus commodum idolum sit. Unde si Principem infensum parti videris alteri, & divisa tamen factio vincat, sic te felicioribus junge, ut æmulam partem graviter non offendas, nè Principum affectu variato patiaris. Excipitur tamen grande, & speciale tuum commodum.

Neminem apertè lædito. Conviva esto potiùs, quàm convivor. Quid in alios expenderis, supputare noli; nisi exacto tempore, fructus dum colligis. Proceres cole, & mensis te socia, nec tamen apud eundem crebriùs.

Ubi

Ubi nemini molestus, lepidus omnibus esse stude. Petulantius in te dicta joco elude, dum vindices commodè. Verbo: omnes ut hostes cave.

Parum tibi amicos officiis omnibus demerere ut plurimum, neque id te advertere artificio summo dissimula, amicum te optimum simulando. Lauda coram iis, à quibus scis referendum iisdem. Causam lædendi præcave, imò etiam occasionem, nè scilicet ulli sic te concedas, ut lædere possit. Interim in omnibus aulicorum ludis nihil detrecta; sic tamen, ut stabiliendis, & augendis tuis sis vigil semper, quorum causâ religio, anima, sacra omnia venalia sunt.

Heu, proterviam hominis temeritatem, nè dicam seductoris amentiam! Itane verò his Pseudo-Policæ regulis versipellis Polyhistor magis, quàm aut Princeps, aut vir civilis formandus? Enim verò, væ communioni mortalium, si hæc linguæ, & cordis discordia dominatum orbis obtineat: hæc pedicæ aditus omnes præcludant.

QUÆSTIO POLITICA.

An major Politicæ regula: simulatio, an dissimulatio?

PRO SIMULATIONE PSEUDO-POLITICA.

Vertumnus totum hodie sæculum est. Quis igitur gravior Proteo? Nempe similitudo morum, mater amorum. Qui similes sin reperiant, faciunt. Felix, cui nata domi simulatio, spem, consilia, vitam omnem moderatur. Hæc ductus regulâ fingit simulans ea esse, quæ non sunt. Colores cum Iride mentiens. Dissimulans contrà flammam tegit cum nitro, mentiens non esse, quæ sunt. Regula hodierni ævi genio necessaria utraque, illa tamen amplius. Ecquod enim bonum est, quod larva simulanti non adferat, cum tamen auferat dissimulanti? Nempe quia genium, mores, vultus, speculi more pro arbitrio cujuscunque refert, nubilum mærentibus, serenum hilaribus, Cælum opere mentitur in terris, & Cælum sibi fundat, omni vento ad suam navigans felicitatem. Simpliciter

plicitas est, linguam cordis esse propolam. Absit sententia in officina oris pandi, quâ cor sit venale. Tibi uni notus sic dege, ut tamen notus omnibus videaris tantum; hæc prudentiæ amissis est. Sapientum cætui comes, etsi primo vixdum tibi labra madeant rore, silentio attento tege, qui es; aut parcâ voce, fabam, & sale m adferens, simula, quod non es. Mentem stoicam inter Pythagoricos; inter Academicos Gratias morum cultu exsupera. Inter eos, quibus cordi Religio, pietas ipsa credaris. Frigus, & metum ut ut geras pectore, Martem vultu, fulmen ore intona; & pulchriore nunquam vinces adoreâ, quàm cum alienum fastum sui securum, atque adeo negligentem periculi suimet ruinâ tumulaveris. Et quæ amabò, sit cautes Marpesia, quam Hercules ejusmodi Gallicanus non vinciat? qui, dum pro arbitrio rosas, & sentes loquitur, omnibus se aptans, ens fit omnigenum. Rarus profectò, qui tali non cupiat esse Theseus; ut qui ipsum adeo hostem nullâ armorum vi domandum, lacrymis suis, quanquam fictis emolliat. Adeo multum potest Cygni candor atræ oblitus cuti. Sæculi id vitium (si tamen vitium sit) magis credendum, quàm hominum. Gratius huic mendacium nullum est assentatione. Quisquis benevolus, palmam gratiæ tulit; puro tamen, an ficto corde benignus sit, parum interest. Cum Struthio - Camelo quamvis ferrum sæpe concoquat, si favum loquitur, præsentia afficiet. Felix esse cupis? omnem indue hominem, sic vives in omnibus; factis quod nequis, verbis, & fuce consequeris. Quisquis cuique patet, felicem se fore nunquam credat. Fatua, quia oculo caret, & cerebro, est ingenuitas cuique obvio se revelans. Ut corporis, sic animi nuditas non caret vitio. Infanum se David simulat, secus casurus victima Regi Achab. Jacob primogenita nactus, simulato Esau hædino sub vellere. Et Jun. Brutus Tarquinii furori se devovisset, nisi simulata eundem insania vindicasset. Et quid mirum sic sentire providos? Naturâ nihil innocentius ullibi; eadem tamen simulat quoties? nigras ut argentum, sic stannum ducit lineas, externus candor pretium superat. Ignis speciem arbunculus, & adamas refert; flammam tamen sinu non gestat. En exemplum: sequere documentum.

Pro .

PRO DISSIMULATIONE.

VAh injuriam temporum! ætatem agimus, quâ simulatio ars esse desiit, quia in naturam transiit. Bacchanalia constanter agimus, larvam enim frons, & vultus penè omnis secumfert. Incerta sunt omnia, certissimum id unum, nihil non esse tectum. Sinceritas & candor, quid nisi otiosa sinè omine sunt nomina? significant, sed ad placitum duntaxat, donec profunt. Ex quo enim nec sanguis sanguini sic cognatus, ut suum cuique bonum: hæc Politicam invasit hæresis, ut jam nesciat, quid, vel cui credere debeat? substantiâ hâc solâ salvâ: *suum cuique bonum*. Quidquid acerbius est, exulet licet, & cælum teneat veritas: Pseudo-Politica dum fasces tenet, dolum dici non sustinet, ingenium vult nominari. Ingeniosior ille, qui, quia simulatus, mendacior. Gravior, qui gravior; talis est, qui tropo sæculi ironiâ utitur semper. Eheu, & germanam hætenus fidem omnis penè Creta obtinuit! Omnia novit simulatio, momento unico ex Cygno corvum, è remoto proximum, è Gigante pumilum format. Et hæc tamen simulatio vultûs, ac morum, inest, falsitas orbi probetur potius, quàm dissimulatio? ô Judicium! tegit hæc tantisper, quod periculi plenam, quia immaturam non patitur lucem; ut ferè, quæ tenuis sunt retinæ, lumen, vel aërem spissum non ferunt. Dum contrà dissimulatio ea etiam, quæ non sunt, fingit, & imponit. Si ruinam ædificat, qui arenæ superstruit: aranearum certè telis nititur, qui simulato capitur vultu, & cultu. Et tamen toleret mediocrem in Principe dolum seductor magis, quàm institutor Principis Machiavellus? Cave, maculam omnem pretiosa respuit supellex, at magis purpura. Docet, quisquis simulando fallit, præterquam, quòd deceptis noceat. Sed & frequentius alienos cum petit, suos laqueat propriis cassibus gressus. Vis causam? laneo quamvis feratur simulatio gressu, Argos vestigia non fallunt. Dies pandunt, etsi momento non pateant. Non adeò facilè dissimulatio patet. Quam unam, si Ludovico XII. fides sit, quisquis habet, sceptro dignus, & purpurâ. Ut
 contrà,

contrà, qui nescit dissimulare, nescit regnare. Cogat fors publicæ infestas felicitati procellas, hoc transtrum elidet impetus. Vicit sæpe numero gladius, at dissimulatio sapius. Cedit hæc pro temporis diuturnitate tantisper, ut Antæo fortior feriat acrius, sumens à casu robur. Furat cælum nube, fragore, fulmine. Vires nectat ambitio, livor, fraus. Vim vi si tentes refringere, nec Herculem duobus supparem esse senties. Dissimula, aut cadent jactata in solem tela, Parthorum more in authores suos, aut tempore ipso redibit serenus Jupiter. Sæpe subducimus vela ventorum turbini, non ut pereamus rebus jam conclamaris, sed ut contractis rudentibus cursus ipsis adeo provehatur adversis. Hoc pacto tranquillitas, & moderatur, & vincit facilius, & amplius, quàm violenta potestas. Id ergo ratum habe, fixumque: sic te non nunquam gere, ut, esse quid possit, nemo dispiciat satis æmulus. Felicior nunquam, si non simulando, sed solâ id egeris ratione. Non semper patens, non semper latens, charybdiū inter, & scyllam, simplicitatem, inquam, & fallaciam inter provehere medius. Prudens, nunquam subdolos. Sincerus, non imprudens; verbo: dissimulans, non simulans.



§. III.

Imago veri Politici.



Consilium malo , geminis Sapientia transis
 Dum sedet , & certam dat Cynosura viam.
 Ibit inoffenso per summa pericula cursu
 Nauta, nec in mediis monstra timebit aquis.

DOCTRINA POLITICA.

Heo-politicus Sapientum è mente, Senecæ præsertim, Ciceronis, & Epicteti, Religionis caput censet præcipuum, rectè de DEO sentire, quòd scilicet sit, & bene, justèque omnia administret. Mortis præ reliquis, tum cæterorum, quæ mala censentur, meminit indies. Bonum non in speciem, sed in solidum quærit : nihil opinionis, vel simulationis, sed conscientiæ causâ formando. Hinc opus aliquod aggrediens, cogitat, cujusmodi id opus sit. Actorem se fabulæ illius existimat, quæ universi Domino videtur, seu longa ea sit, aut nobilis, seu brevis, aut abjecta. Edendi, bibendique finem siti & fame sedandâ constituit.

Voluptatem si æquam senserit, animo moderatur, nè ea dominatum obtineat. Quin utriusque temporis memi-

nit, ejus, quo voluptate fruitur; tum ejus, quo illâ perceptâ dolere cogetur, & suimet agere accusatorem. Quantum amicis jucundus est, tantum inimicis est initis, ac facilis. Deum ubique omnium arbitrum supra se, factorum porro, ac dictorum censores cum conscientia circa se esse credit. Verbo:

Quadam dissimulat; simulat nil; credit ut Argus:

Pro meritis laudat, quæ bona, semper agit.

Hâc basi Theo-politicus nititur. *Dissimulatio* etenim tempore, & modo suo adhibita, prudentiæ momentum est maximum, & utilitatis, ac fructûs sæpe pondus fortissimum. *Simulatio* veritati semper contraria, quæ animum, ut ait Ennius, in fronte legi cupit. Apage adulteram illam Neronis vocem: qui nescit simulare, nescit regnare. *Credit*; ut enim de amicitia dixi; fudit, sed cui videt, quod cautæ mentis est. *Laus* merita comitatur juxta sinceritatis leges. Denique prospicit, quid se agere oporteat? & curat, ut rectè omnia exigit.

QUÆSTIO POLITICA.

An in Principe ut minus verborum duplicitas admittenda?

AFFIRMAT PSEUDO-POLITICA.

Nolim Principem Homerî Autolicum: qui, ut homines, sic Deos ludat; aut cui cum Lyfandro Græciæ, Tyberio Romæ, par sit mendacio veritas, fides tanta, quanta utili proprio expedit. Piaculum esto dona Numinis, germani candorem pectoris, in dolos ac fraudes converti, si plebem spectes; at fucum non nunquam allinere oculis, artificio vocum circumvenire æmulos, quis Principi indultum esse negaverit? Angulus in orbe nullus, quò colonias gentes non duxerint, cum gentibus mores. Idque lugendum, quòd, ut imperium olim, sic fides hodie Græca passim obtineat; quòque cultior literis, aut artibus populus, tantò ferè ampliùs huic sacrificet fidei; quasi verò *præ cæteris excoli*, & *astutam vapidam gestare in pectore vulpem* sint Politicæ synonyma. Hi-
blam

blam verba, mephitim sensus redolet ; vultu Charites ,
corde viperæ dominantur. Commune id fatum orbis, mi-
serandum in Principe: ut cui adulantûm satellitio cingi,
ut rosam spinis, natalis est dos. Rarus sinè squamma piscis,
aut spina, rarior sinè fuce cliens. Pari tramite, quo gen-
tes; fraus, & dolus commigrant. Ars & natura his nul-
lum ampliùs imperium statuit. Dædalo major audit, qui
liber his syrtribus; quantò ergo Principi id non licitum
modò, sed ut necessarium, sic consultum juxtà; ut quò
Herculis nequit clava, vulpinus rem omnem pilus conficiat.
Fumum patimur, ut flammam sopiamus. Sapientiozem
Principe neminem dignitas ipsa deposcit. At quæ major
sapientia, ac tempori, scenæ, genio, circumstantiis se
ipsum, non hæc omnia sibi aptare. Hora quævis suum
nanciscatur Principem, suum pariter homo. Quid cum
vulpe agendum æquius, nisi vulpinarier? Aut Polypus, aut
torpedo esto cum subdolo, dum piscatorem nisi fallas,
falleris ipse. Si futuri juxta, ac præteriti providus ætate
omni Janus audit Princeps, cur non utrique & serviat?
apage precarium id solum, cui pondus non aliud, ac
quod dicto veritas, consiliis fides constituit. Erroze pereni-
ni, & labyrintho septus est, hâc qui regulâ ducitur: non
una tentanda est semita, ut reperias exitum. Rarò lauros
messuisset gladius, & adorea purpuræ, nisi illum in fal-
cem fraus acuisset. Quoties fraudi alienæ Princeps, Pro-
vincia, senatûs consulta sunt victima, nisi ambiguitas cur-
sum provehat? horum si postulet salus, quid vetat larvatam
sub diademate simiam ludere, non ut perdas, sed ut ser-
ves. Fraudem dicat hæc plebs, Prudentiam in Principe
mores temporum faciunt, ut cui dominatio ipsa æquitatis
titulum addit. Nunquam caret justitiâ, quod fructum ad-
fert folio. Quem recto cursu tramitem scylla præcludit,
obliqua pandunt vela. Non dolus hic est, sed Navarchi
peritia. Pueros, & ægros nominat Plato vulgi studia,
refert hos suâ sæpe decipi magis, quàm Medici causâ.
Falernum manet falernum, etsi modicam misceas frigidam;
sic prudentia fraudi modicæ. Ignavia contrâ, & torpor
est verborum simplicitas.

NEGAT THEO - POLITICA.


BIvium orbis pandit Politicus; fidem Græcam, & simplicitatem, seu candorem Bæoticum. Periculi illa, hæc pudoris plena. Dissimulatio rarior, diffidentia sapiens, circumspectio cauta dignæ virtutes Principe. At quo pacto vulpem induat, quem leonem sibi delegit Respublica? candorem tenebris jungat, æquus perinde ac inimicus, Pater Verbo, tyrannus opere? Utilitate, & auro suam paciscatur institor fidem, Princeps generoso candore, & pretio. Mercurius sit instructus Caduceo, serpens illi prudentiæ, non fraudis; alæ celeritatis, non versatilis sint sortis indicium. Estò lateant Simoëntis fraudes, palliet verba fucus, serpentem cauda prodet; ut sepiam quamvis obtegit fluctus, color undæ designat. Dona nulla constantia, quæ fucis illita; sic quia mendacium simulationem docuit, fructum non fert. Falsitas, imò falsitatis opinio, existimationem proterit. Miseranda dignitas, quæ felix non sit, nisi mendacio. Servile vitium est dolo aut triumphare, aut gloriari. Lumen veritas, mendaciorum tenebræ nominis pariunt obscuritatem. Ridetur, si leonis tectus exuviis Arcas prodeat; par fors est Principis. Virtus falli nescia solium commendat, & firmat; invisum, & infirmum reddit verborum duplicitas. Cælum, & astra orbem fovant maximè, si candore faveant. Astrum Princeps est, ut moveri possit in circulum, angulis careat. Fiditur ei publicum, ejus stat fide. Hanc ut fallat, vel orbis commodo caveat. Nec Principi Princeps, nec Domino subditi, nec ipse sibi fidem dabit, si fallat; dum metuunt omnes, quem esse crediderant, dolum latere. Fallitur, qui fefellit. Par pari redditur passim. Contradictoria conciliante vicissim Politicâ. Præterquam, quòd nemo linguis calumniantum magis expositus, ac si horologii index, lingua Principis non respondeat animo. Sapientem audi: *non decet Regem labium mentiens.* Ut in quo fraus eò fædior, quò dignitas altior: & quia altior, dum pluribus perspicua, patentior. Verba Principis, oracula censet populus. Mendacium jurisjurandi sit violatio

in plebe, sacrilegium in Principe, veteri Alphonfi trutinâ. Causam habet: fœdior ferè est macula, quæ purpuram vitiat. Labes nulla est modica, quæ adamanti inuritur. Os Principis ara sit veritatis. Et meritò: quid enim iustum non erit mendaci? si fraus decere possit Principem, ut Rempublicam servet, ut amicos conciliet. Nunquid spolia ipsa æquitas ei audient, libido castimoniam induet? Tolle fidem verbis Principis; religio, pax, fœdera, commercium generis humani convellis. Quæ enim aut autoritas, aut robur mendaci? Cessat autoritas, cum non amat, qui imperat, sed decipit. Quod porro robur, cui nullæ à subiectis fidei vices? Regnum nullum sinè fœdere tutum: quis porro paciscatur fœdera fallenti fidem? Documentum utriusque Tiberium Roma dederat, hac in fallendi Palæstra Magistrum. Non antè dedoctum aut discere, aut docere, quàm cum fato suo in Gemoniis scalis orbem docuit, sanguine demum expiari proprio fraudem, quæ nemini suorum fide stetit. Nunquam orbi major Franciscus Rex Galliæ primus, quàm cum Carolo quinto, cui per Gallias transeundi potestatem sponndit, adulatoribus non obaudiens, libertatis pacto stetit. Fidei ruptæ maculam nomini Gallico vel tanti æmuli comprehensione nunquam volens mercari. Sapienter Lacedæmonum è sententia: ut, quibus nihil utile visum, nisi quod honestum, virtutisque comes. Helvetiorum namque effato veteri: virtute, & fide, non fraude contendere Principem decet. Ridicula orbi foret mutatio, si Numen esse Numen desineret, quod ut falli, sic fallere nescium se hâc dote spoliaret eo-ipso, quod orbem mendacio luderet. Deum sacra pagina Principem dicit. Et hujus verba fraudem subeant? Sanè Princeps, quod est, esse desinit, cum fallit. Simiam in solio ludens personatam. Exitio dignus jure est, qui coronato imponit vertici; duplici ruinâ dignior, qui quam deberi sibi fidem existimat, simulare aliis nil pensi habet. Commune id orbis vitium, an iudicium est: Nemo negare metuit, quod dari sibi factò non cernit. Echo passim sunt linguæ & pectora cum Principe agentium. Insonet candor, reddetur idem, seu verecundiâ discrepandi, seu metu displicendi. Clamet duplicitas, eadem reclamabit;

& cujus ampliùs, quàm audientis Principis, atque adeò Reipublicæ fin exitio, certè discrimine, vel detrimento. Verbo: Omnis, ut Deum, sic Principem virtus ornet; Sapiëntia tamen cumprimis mentem falli, linguam
: fides fallere nescia.

§. IV.

Quid idolum Politicum, Fatum, Fortuna? Item anima?



Compagem hanc omnem, terram, mare, sidera, mundum
Respice: dic tantum quis dedit author opus?
Parce, precor, fatum, sortémve Politiceingas:
Cuncta, DEI, clamant, condidit una manus.

DOCTRINA POLITICA.

ATheos ævo nostro, scripturâ teste, dari posse vix credo, ut quæ insipientem dicit audentem dicere in corde suo: *non est DEUS*. Ad quem nisi ducat Philosophia, ludibrium, vanitas, delirium est sapientissimo Lipsio in præscript: ad Constant. Ducit certè, cum cæli pandit arcana, in quo supervacaneum est ostendere non sinè aliquo custode tantum opus stare; neque hunc siderum certum discursum fortuiti impetibus esse. Sen. l. 1. de Provid. c. 1. Ducit, cum orbem
uni per-

universum, & in eo vicissitudinem temporum, rerum, eventuum, & regnorum ostendit. Quis enim cum Anaxagora credat, orbem hunc solo atomorum concursu constare? Sapienter certè Tullius l. 2. de natura Deorum: quòd si mundum efficere potest concursus atomorum; cur porticum, cur templum, cur domum, cur Urbem efficere non potest? quæ sunt minùs operosa, & multò quidem facilia. Ut proinde *fatum, belli alea, fortuna*, sinè DEI, omnia moderantis, arbitrio è sapientissimorum suffragio vanitas pura sint, & delirium.

Ducit denique Philosophia in cognitionem Dei, si se ipsum, seu animum contempletur. Luminè enim naturalissimum est, eam rem, quæ novit aliquid perfectius, à se non esse; ergo ad eas à se deveniendum: ità recentiorum semi-Deus Cartesius. p. 1. princip. Phil. N. 20. Nam quamvis verè sui cognitione habità, Deus rerum omnium author cognoscatur esse infinitus, homo contrà finitus; animam tamen humanam sapientiæ, & potentiæ Divinæ prodigium, immortalem esse talis necessariò cognoscit. Hæc enim stulto metempsychosis commento à Pythagoricis de corpore in corpus hospes migrare fingeatur; deinde verò naturæ ipsius iudicio, & gentium omnium sensu est immortalis credita. Hinc Cic. l. 1. Tuscul. ut Deos esse naturâ opinamur, sic permanere animos consensu nationum omnium. Et Plato in Epinomide: Barbaros, & Græcos omnes hoc agnovisse testatur. Anne ergo sapiens naturæ ipsius lumini repugnet, vel Barbaris ipsis sit deterior?

Felices sanè impii, si cum morte, & termino impietatis, malorum vindicias vereri non oporteret. Impia contrà foret æquitas omnipotentis, nisi anima maneret æternum: cum Deus justissimas ut plurimum animas infelicissimas esse sinat, dum hoc in orbe vivunt; impios contrà felicitate summâ pollere, per illud: *via impiorum prosperabitur*. Si proinde neque in orbe, neque in æternitate hos supplicia, illos munera manerent; nunquid æquitas ipsa omnibus foret iniquior?

Hæc DEI, & immortalitatis animæ fide menti impressa, Religionis cura princeps sit Politico, oportet. Ecce enim

enim Politicæ pugnet religio, id est, sincerus Numinis cultus, & reverentia? cùm Arist. l. 5. Polit. teste, constantissimum sit Monarchiæ Imperium, si populus religiosum videat Principem, tum quòd nihil à timente Superos iniustitiæ metuat; tum quòd in eundem vereatur consurgere, cui Cælum novit fæderatum. Ad hæc Machiavellus ipse, fundamentum felicitatis Reipublicæ verum Religionis cultum existimat: utpote, cùm & cives morem Principi gerere, & Princeps ipse DEUM potestatis suæ arbitrum, *in cuius manu sunt potestates, & regnorum jura*, metueret per eandem discat.

Quid porro hac è privata, & communi virtute, nisi felicitas privata, & publica? ac proinde *rationis status* commodum? Cujus per Polybium l. 4. ille status optabilis, ac firmus, in quo & privatim sanctè, innoxieque vivitur, & publicè justitia viget. Apage proinde Pseudo-Policum illud: *Superos primus in speciem cole*. Aut, quod deterius: *religionem solius populi in obsequio facilius continendi causâ repertam, aut stabiliendam*. Nam si Menochio l. 2. c. 1. testante, gens nulla tam barbara est, quæ non vel ipso naturæ lumine aliquod humanis rebus Numen inesse sentiat; non nisi impiorum hanc esse vocem cum Savedra Synb. 24. dicere cogor.

Credebant Veteres multa Fortunæ imperio fieri, quam etiam cæcam, & instabilem, globo uno tantùm pede insistentem somniabant. Et quia bona, & mala hominibus dispensat, sacrificiis, & templis venerabantur. Contra quos S. Aug. l. 4. de Civ. DEI. c. 18. acutè sic arguit: *vel fortuna favet suis cultoribus, vel non? si non, cur ergo colitur? si ita, ergo cæca non est, quia suos cultores no-*scit; ergo fortuna non est, minùs Dea.

Alii autem hanc Deam negantes, judicârunt omnia fieri à *Fato*. Per Fatum autem intellexerunt vim impressam sideribus, à quibus ista vis sublunaribus rebus immitatur, ita ut omnia in mundo inevitabiliter fiant. Inò dicebant, etiam ipsos Deos huic Fato subjacere. Sed tale Fatum cùm evertat omnem libertatem humanam, consequenter tollat omnia merita, & demerita; consequenter etiam Cælum, & infernum; solus Atheus potest admittere.

Aliud

Aliud autem Fatum etiam Christiani concedunt, de quo Boëtius c. 4. de consolatione: *Fatum est in rebus naturâ suâ mobilibus, per quam Divina Providentia suis quæque necesse ordinibus.* Id est: est quidam ordo, quo omnes causæ subordinantur dispositioni Divinæ, ut jam necessariò, jam profus liberè ad certum finem, & scopum efficaciter omnia dirigantur. Unde non est *fatum*, quasi à *fando*, eò, quò ideo, quia DEUS fatus est, id est, quia præscientia Dei de omni re ab æterno est vera, res necessariò sequatur; sed potiùs à contrario, ideo res à Deo scita, seu fata est vera, quia res est futura.

Simulationem porro religionis vel Ethnica te Sinarum Politicæ doceat, in qua Mandarinorum, seu Patriæ Patrum plures Martino de Martinis scribente, vitam ex ordine antè p̄uere, quàm iniqua Principis facta, libello (more gentis) supplici non redarguerent. Quod ipsum fato suo magnus Angliæ lumen Thomas Morus Henrico probavit. Quid Tebæa cum Mauritio legio, cum pluribus aliis? Alexandriæ, Antiochiæ, & Romæ, civium millia sanguinem regionis ergò fundentia? quid sexcenti cum Boëtio, illo humano generis miraculo (ut eum Caramuel nominat) iter impios piissimo Religionis cultore aliud meritis, geis, sanguine contestantur, ac falsitatem simulationis Politicæ rationi statûs minimè necessariæ? Neque continuo bonum militem, Atheum mente: consiliorum arbitrum, regionis aut frigida, aut nullius; potentem opum, & honorem, genio, tempori, dicam veriùs vesana sua superbiæ arbitrio degere oportere. Caput denique universi religionum esse, huic debere cedere rationem statûs; utpote quæ summum bonum esse nequeat, nisi ad normam Nummis, Religionis, ac fidei dirigatur.

QUESTIO ETHICO-POLITICA.

Uter sturior, unum negans, an plures credens Deos?

PRO UNUM NEGANTE.

Politica, si vera sit, pictura est, Lucis & umbræ Magister Politicus. Nunquam hoc nomine dignior, quàm dum

& antemuralia impetit. Acriùs semper sævit , & jugulo imminet , qui succum ipsum tollit ac sanguinem. Agit primum , qui literis cives : agit secundum , qui Rempublicam civibus spoliat. Hostis uterque , & Reipublicæ æmulus , sed mansuetior ille , quia remotior : acerbior iste , quia dum intimus : & crudelitate & diuturnitate mali immitior. Vulnus quodlibet eò ferè acerbius , quò diuturnius. Quid porro sentiri possit acriùs , ac quod non nisi annorum impendio , imò & sæculorum fluxu compenses. Rapiunt calybs horâ unâ myriades , non tamen horâ pariter unâ cives , ut fungos parit natura. At acerbum sit quamvis uno carere munimine , acerbius longè est nominis una ac gloriæ post fata etiam vindice spoliari. Quàm decumanum Patriæ luxit vulnus Latium omne , cum à Vejentibus die uno Fabios tulit fama peremptos. His enim verum illud Horatii semper : *O & præsidium , & dulce decus meum. Præsidium* inquam , ut sinè hoc procellæ cuius pile sit postliminio Patria. *Decus* porro , quo viduata , sit furori cuius ludibrio. Nefas erat quondam amictu vel crine spoliare , quantò magis cive ? Quo enim pacto floreat artes , potentia , opes ? nisi civium affluxu. Sinè his quis fundum excolat , sementem sulcis credat , artes quaslibet provehat ? At esto , jaceant incultæ artes , vivat modò Civis Patriæ , sibi constans , exteris suppar degit , & cristas tollit. Nocet , qui literas adiungit ; sed decus duntaxat tollit , non vitam. Vita bonorum compendium est , & corona , hæc Civis solus est.

PRO EO , QUI LITERIS CIVES.

Vita bonorum compendium & corona est , fateor , si vita sit. At illudne vita dicendum , quod esse solum dicit Philosophus ? Non hæc profecto digna homine vita est , nisi fuerit , quod eundem discernat à brutis. Ratio sola , & exultus literarum studio usus est , quod altiorē brutis constituit. Ut meritò Mytilenæi maris potiti imperio , non aliâ perfidos sub jugum missos pænâ dignos censuerint , atque hæc , ut literarum rudes manerent. Quasi vero pænâ morte ipsâ crudelior sit ignorantia. Sapienter judicatum. Sic Cumanos enervavit quondam Aristot.

stodemus. Quis enim non vincat Patriam facile, quæ consiliis, cultu, virtute, nervo opum caruerit? caret his omnibus, si caruerit literis. Consilia cupis? Solones, Pericles, Xenophontes, Themistocles, quanta nomina! quanta robora! Non aliter tamen, quàm literis. Mors illis per has sperni docta, quasi mortales non forent. Da sinè literis pacem, ruditate & incultis artibus rigentem; confusionem gignis, qui multitudinem otii amantem, non tam expertem consilii, quàm impotentem imperii. Da contrà infestam belli aleam, temeritas duci perinde, ac militi erit domestica, quia sinè providentia; unde certior ruina. Nervum demum cupis? fundatur iste commerciis. Sic Ubi; sapienter neminem suorum commerciis sivère addici, qui latii sermonis, quo orbem emetiri posset, gnarus apprimè non fuerit. Et quid eorundem sic provexit fortunas, atque hoc ipsum sapiens de sapientia consilium? Imò verò quis non vincat Rempublicam, quæ vivens vitâ jam caret? Non vivit Civis, qui, quid hodiernum, aut crastinum, vixdum novit; tam futuri incurius, quàm ignarus præteriti; utrumque solo literarum defectu. Ut meritò Romanus sapiens mortem, & vivi hominis sepulturam, vitam sine literis dixerit. Imò verò Aristoteles docti ab indocto differentiam non aliam statuerit, ac vivi a mortuo. Novi quidem, melius nonnullorum sententiâ esse Reipublicæ, tametsi literis non exultæ, quàm civium destitutæ præsidio prorsus non esse. Præsertim quod speciosa quædam videri possit socordia literarum quies. At Arcade hanc vocem digniorem censuit Alphonsus quondam, quàm homine. Nam qui cum Licinio & Domitiano literarum cultum spernit præ civium numero, eò Reipubl. nocivus est magis, quod Ladislai Ungariæ Regis è mente belluarum malit Rempublicam, quàm hominum, etsi paucorum; ut cùm ignorare literas debeat nemo, nisi homine minor. Paucis gaudeat Respublica Civibus, his tamen literarum studio cultis, exulabit in discrimine pusillanimitas, fortitudo propulsabit adversa, constantia retundet assultus. Membra tollit, qui Cives, fateor: at radicem & animam petit, qui literas adimit, ut à quibus vigor pace, ac bello. Divinum lege oraculum:

mancipia, quia minora? Sol unus orbi, radix arbori, fons mari, centrum lineis, microcosmo anima & cor fatisdatur? uni tamen homini serviant tot Numina? ô cerebra Atheis deteriora! Uno illi, tot isti deliriis insaniant, quot cerebri sui statuunt abortiva. Jovem, Martem, & cæteras Deorum colunt quisquillas, non ad reverentiam Numinis, sed pignus nominis, quo ad scelera abutantur. Titubat ebrius, sic quos natura, res civilis, aut scelera ebriant, nullo firmantur gressu, dum prouant; sibi, & aliis delirium juxtâ, ac ludus. Indigni Cælo, terrâ, humano genere, quod Numen ipsum in examen vocent. Procul à Deo Arithmetica omnis. Principium numeri est, non numerus: & cujus dos una, nescire secundum. Unus nisi sit, non erit id, quod est. An enim rivali suo, aut compari jura daturus est? cui dederit, Deitate careat, necesse est. Divinitati id proprium, imperia dare, non accipere. Dominari, non parere. Sin contrâ, Deus esse desinit, cui par est. Sic unam vitando scyllam in multiplicem charybdim ruunt fanatici. Helleboro ejusmodi mentes corona. Anticyras relega Politicum, qui cùm Numen sol sit, & lamine, & unitate, ipse porro sublunaribus luna; erraticum esse sidus mavult, quàm à Deo uno luminis fonte lumen desumere. Satiùs inter utrosque medius egerit, qui fatum omne, atque fortunam in ejus providentia collocat, qui neque casus casu finit contingere, neque finè ratione evenire, quod illum tangit, cujus causâ, cùm fecerit omnia, & hoc consultò destinat futurum, vel præmio tolerantis, vel supplicio indignantis. Huic Providentiæ fata, casus, fortuna; non fato Providentia subditur. Ab hac regnorum exordia, augmenta, ruinæ. Hujus Fortunæ calculo steterè, stant, stabunt, cadentve omnia. Ab hoc fonte causa omnis esse, posse, velle, perficere sumpsit. Ad hoc Primum & Ultimum Politicus se referat, ut in illo se oculo firmet, qui finem providit lætis perinde, ac tristibus. Ut modestiam discat in prosperis ab ea mente, cujus ars artium est fastum plectere repentino exitio. Illo contrâ se oculo firmet, cujus acies furoris metas uti prævidit, sic frænabit. Secus, quidquid finè hoc egerit, ventis sparget. Subesse cùm nolit, subesse

esse cogetur tamen. Cūque credere aut nolit, aut magis nolle se mentiatur, plures somniando : unum tamen arbitrum, sed & vindicem sentiet. Acerba fors, & duplici miseraunda supplicio. Et dare pœnas auctori, quem prævaricatio esse nollet; & sentire vulnera mentis, quibus opriendis, vel potius exulcerandis mens sibi ipsa imponit. Si res omnes jam incessisset divinitas, quas hoc fūco mendax coloravit credulitas, nihil orbis haberet, quod Deus non esset. Cū tamen id unum certum sit non credulitate, sed fide, omnia ab uno condita & servari, unum in omnibus adorandum. Exercitus integros Deorum numes, si sæculorum, gentium, fastorum memoriam recolās. Nunquid ipsa hæc tot Deorum phalanx pura sinè ullo Numine docet esse nomina? Atque adeò vesaniæ majoris redarguit eum, qui plures sibi comminisci Deos tentat, ac qui omnem negat. Non negaverim, religione tamen teneri aliquā eum, qui plures mavult; dum nullā stringi cupit, qui vel uni cœlum invidet. At, quid refert solem cum Persis, Xacam & Amidam cum Japone, selem aut animal primum obvium cum Indis si colas? Tam injurius es Numini, quàm exfors rationis. — Pari calculo mortalium syllabo proseribendus.



QUÆSTIO II.

De principiis, & partibus Civitatis.

§. I.

Origo vitæ Civilis. Quid vicus, pagus, Civitas?



*Qui modò pauper aquæ, sine nomine rivulus ibat,
Clara auctus sociis nomina jactat aquis.*

*Hæc quoq; sors hominum est; nunquam Respublica, nunquam,
Quam pudet è modicis crescere, grandis erit.*

DOCTRINA POLITICA.

Perperam censent, qui cum Epicuro originem vitæ civilis casui; vel cum Ovidio l. i. Met. ar-
cendis Cæli injuriis; vel cum Vitruvio prodigio cuidam ad ignem se soventium hominum;
vel cum Horatio l. de arte Poëtica, Musicæ instinctui; vel
cum Herodoto, metui & defensionis causæ; vel demum
cum Bettino Religionis causæ, vel vi alicui attribuunt.
Optimè enim eam Vernulæus Instit. Polit. l. i. tit. i. ex
Aristotele à naturæ ipsius ductu deducit, cui externa cau-
sa impellens accessit, scilicet vitæ commodum, & felici-
tas.

tas. Homo enim per Aristotelem *animal præ omnibus sociale, & civile est*. Cum etiam natura ei præ omnibus dederit aliquod ad vitam socialem ornamentum, scilicet loquelam, quam alia animalia non habent; licet habeant signum aliquod *molesti vel jucundi* solum. Unde qui contra naturalem hunc appetitum remotus à societate vivit, vel non coactus (v.g. exilio; metu hostis; & inter Christianos studio perfectionis, & virtutis) sed ex se vitat communionem hominum, ut melancholici, & latrones, vel est homo nequam fugiens lucem, sicut volucres, quæ non gregales sunt, sunt rapaces: vel certè mentis non nihil adustæ; vel si perfectionis studio faciat, per Aristotelem est homine maior.

Ex prima inter maritum, & uxorem societate, coalluit deinde domestica; ex hac *gentilitia*, id est, plures sanguine junctorum; deinde *adscitæ*, seu extraneæ, etiam aliorum, qui in diversis domibus habitarent: unde vici, & pagi orti; tum oppida, & urbes: Provinciæ demum, & regna, quibus Reges imperare capere, primum in Nemrodo Assyriorum Rege seu Belo; qui Babylone regnum condidit ad An. mundi 1932.

Vicus Aristoteli 1. Polit. c. 1. est Societas ex pluribus domibus in ordine ad usum, & consuetudinem non quotidianam. Dicitur *non quotidianam*, quia domus est ad quotidianam consuetudinem instituta ex viro, muliere, servis, possessionibus. Vicus, & pagus à plerisque confunditur, re ipsâ tamen vicus pro parte sumi solet, constante scilicet pluribus domibus, pagus verò pro toto, quod constar pluribus vicis. Varro l. 4. de lingu. lat. *vicum* à *via* derivat, quod scilicet utramque viæ partem domus ambiant; unde etiam *vicinus*, & *vicinia* derivata.

Pagus à Græco *πηγή*, id est *fons*, ad quem communis necessitatis causâ plures habitare ceperunt, dictus; est communiter locus, in quo plures ædes per plures plateas locatæ sunt; sicut vicus unam communiter plateam habet. Sunt pagi gaudentes etiam aliquo Magistratu, nundinis, &c. & hi potius dicendi sunt oppida. Licet Julius Cæsar districtum integrum leucarum aliquot *pagum* nomi-

nominet, cum ejus tempore Helvetia tota in pagos divisa fuerit, quorum singuli vicos complures complexi sunt. Hodie *Cantones* nominamus, suntque 13. universim: Bernensis, Friburgensis, Solodornensis, Basileensis, Schaffhusiensis, Tigurinus, Abbatis Cellensis, Claronensis, Uraniensis, Svitiensis, Sylvaniensis, Tugiensis, & Lucernensis.

Civitas est Societas ex pluribus pagis perfecta, per se sufficiens ad vivendum, & bene vivendum. Arist. 1. Polit. c. 2. Sumitur hic civitas pro collectione civium secundum se spectata, instar materiae indigestae. Nam cum eadem civitas vario ordine gubernari possit, varia ejusdem potest esse forma, seu Respublica, quam hoc sensu *Civitatis animam* nominat Isocrates. Sicut Romanorum Civitas nunc per Reges, nunc per Consules, nunc per Caesares; Judæorum jam per Judices, jam per Reges, est gubernata. Et hoc sensu civitas à Republica differt. *Civitas & Urbs* pariter hodie pro eodem passim sumitur; licet in rigore differant. *Urbs* enim strictè ab *Urbo*, seu *urvo*, quod est aratri curvaturâ definire circumferentiam, & magnitudinem urbis muro cingendæ, ut olim Cælio Rhodig. l. 14. c. 1. teste, mos erat, dicta est; Civitas verò, ut habet Pompejus apud Dionem, non pro parietibus, & muris hic sumitur, sed pro civium collectione, quæ vel finè muris esse, vel certè ex Urbe exire potest, ita ut muri deinde Civium virtus, & fortitudo sint. Certè, qui dicunt mœnia non debere adesse civitati, prisce nimis loquuntur, ait Arist. 7. Polit. c. 11. Quia si urbs sit mœnibus cincta, licet civibus non minùs esse fortibus, ac si mœnia non adessent, & tamen securitatis majoris causâ iisdem uti. Hæc omnia autem de civitate dicta, intellige de illa, sumpta non quoad administrationem prudentiæ, sed solam constitutionem naturæ.

Civitatis finis ex Arist. 7. Polit. c. 2. est abundantia virginitatis, & sufficientia fortunarum tum in commune, tum cuique propter se. Sicut in corpore organico varia licet sint membra, & functiones, quia tamen se mutuo juvant, idem est commune & privatum cujusvis membri bonum. In Musica item ex vocum inæqualium concordia redundat suavitas cantûs. Ad civitatem requirit Contzen l. 1. c. 4.

ut illa sit omni externo dominatu (nisi fortè supremi Monarchæ) libera, & perfectò imperio utatur ad judicandum, & statuendum de rebus suis.

Civitas sumpta secundùm administrationem prudentiæ non mutatur, etiamsi mutantur per mortem, vel casum alium homines; sicut fluvius manet idem, licèt prior aqua defluat. Nam totum dicitur mutari tantùm mutatâ internâ formâ. Si ergo hæc forma Civitatis, quæ est *ordo gubernandi*, manet, licèt mutantur cives ipsi, tamen manebit civitas. Sic si Austriaci in Asiam pulsi Austriacâ utantur Republicâ, dici posset in Asia esse Austriam. Ut canit Poëta de Camillo Vejis degente cum suis: *habitante Camillo illic Roma fuit*. Simile aliud dat Aristoteles, chorum tragicum à Comico differre propter formam, licèt in utroque actores sint homines; sic solus ordo diversus Monarchicus, vel Aristocraticus diversam constituit Civitatem.

Situm Urbis meritò commendat Philosophus, qui salubris est. Unde aquæ, venti, terra spectanda. Item, qui est ad opes augendas, qualis est, si mari, vel fluvio sit adfita civitas. 7. Pol. c. 11. Experta id Roma, ut habet Causinus D. 47. quæ dum classe caruit, suis contenta finibus; ubi mare tentavit Duillio, & Cornelio Ducibus, orbi cæperat dominari. Testis Hollandia omnium inops, & tamen abundans omnium. Gallia tantum in florem evecta.

Salubritas aëris his ferè definitur, - quòd Urbs versus orientem sita saluberrima censeatur, tum quod benigna cœli sit influentia, quæ habetur à primis solis radiis, & siderum oriente die affluentia. Amœnitatem horum præter Cosmographos, & Astrologos illud ex Sacra Scriptura testatur quòd Paradisum, & terram promissionis, lacte, & melle manantem ad Orientem Dominus fundârit. Tum quòd aër ibidem purissimus, & venti salubriores, cum aquis: utpote cùm hæ solis cursum sequentes, puriores sint. Aquæ salubris nota sit: quæ motu velocissima, limpidissima aspectu, pondere levissima, concoctu facillima, ab ortu in occasum concitata. Nam talis aqua minimum uliginis, & crassiorum terræ particularum vehit. Ex quibus, separato ab iis humo-

re, frequens calculus, & arena, vel obstructions. Post hunc situm urbium optimus est, qui Septentrionem spectat, unde Boreas spirat, qui aërem depurat, & ad interiores partes pulso calore faciliat concoctionem. Hinc quia Meridies, vel Occasus contrarios in homine gignit effectus, hoc situ salubrior est orientalis vel septentrionalis.

QUÆSTIO ETHICO-POLITICA.

*An multæ leges signum sint bene constitutæ
Reipublicæ?*

AFFIRMATUR.

Felicius regnum nullum, ac illud, quod bilancem justitiæ eripit, nè queri possit virtus publica, nullum Aстреæ delubrum finibus suis locatum, in quo Asylum quærat innocentia pressa; in quo pro meritis lanx altera levetur in præmium, altera prematur in supplicium. Domus Reipublica quævis est, non paucis nitatur basibus, & firmamentis, oportet, ut ævum ferat. Columna hæc, imò basis ipsa sunt leges. Inclinat moles, dum paucitate laborat; inclinare est cadere, & sui ruinâ ruinam civium ducere. Sapientia ipsa habitaculum sibi structura, non paucis eam firmavit columnis, ut eventibus ipsis præcautum sit. Culpâ, & contemptu dignus foret sol, si, quam omnibus debet, paucis lucem suam dispeceretur. Universale Reipublicæ Fanum est Justitia; ut quævis necessitas vota adferre, sic auxilia debet posse sperare, omnes omnia ut sortiantur. Exilis est aut providentiæ, aut pectoris, in pauca qui se partitur, paucis qui molem totam confidit. Circulum optimum Mathesis censet, cuius centrum dexteram, & sinistram noscit. Hic lex est, à qua sine discrimine radius in omnes directionis, remunerationis, aut vindictæ manat. Quid felicitatis sperandum Reipublicæ, quæ, quia paucis nititur legibus, paucis aut providet, aut præcavet casibus? ideo paucis resistit, virtute debiliore, quia minùs cantâ. Fluvius terram duntaxat unam irrorat, quam nempe alluit; pereant agri, oportet, si aut rivis, aut cæli careant providentiâ; hujus fecunditatis æmula lex esse debet, non fluminis; at si omni-
bus

bus consulere debeat, multiplicari eandem debere, ut guttas stillantis cœli concludes. Magnes ferro uni sympathicus est: Lex horologii iconem referat, uno indice, compluribus tamen horis, quadrantibus, & minutis distinctam. ille, cum se omnibus commodet, nulli magis inhæret; sic legum arbiter inter legum copiam jura dicter. Imò verò quid si constricto legum numero, lex ipsa, quæ saluti esse debebat, sit exitio? Injuriū redditur, quod omnibus debetur, si in pauca stringatur. Absit non rogari legem, ubi æquitas postulat: ut pharmacum ubi languet valetudo. Quàm malè prospectum homini, si exiguo calculo Medicorum jura arctaveris. Quàm malè consultum Reipublicæ, si sexcentis, quos sors, indoles, tempora gignunt, casibus non sit prospectum. Ut antidotum malis omnibus commune naturâ, sic legem omnium medelam vulnerum Respublica nescit. Felicior Urbs, quæ omni cingitur ambitu; eoque securior, quò pluribus septa, non in communia modò, sed & possibilia mala. Versipellis industria, ætatis iniquitas, geniorum malignitas, quæ non comminiscitur? Lex una Argum superet, si par omnibus esse velit, quod nec ipsa, si vivat, possit Justitia efficere. Tempori, ingenio, ac genio applicanda lex, quanta igitur in diversitate errorum, studiorum, & eventuum diversitas habenda? Anima igitur corpori, malus navi, basis moli, multitudo, & varietas legum publicæ est securitati. Esto, nubi caput inserat, sinè basi hac corruet; Cæsaris fortunam vehat, sinè malo mergetur. Sinè legum copia in latrocinium degenerabit imperium quodlibet.

NEGATUR.

S Alutem Urbis, & orbis ignorat: cui legum autoritas non est comperta. Hac sinè anima non domus ulla, nedum Respublica ordine suo gubernata constitit. Rapi- tur officii immemor dissolutus in licentiam populus, ut sinè pondere horologium, sinè Cynosura navis. Ut meritò Divinus ille Græcorum Salomon: ubi plurimæ leges, ibi & lites, morésque improbi. En geminum argumenti pon- dus, lites, & improbitas morum. Aureos censebat mo-

res, ac sæcula ætas felicior, cùm legislatores nescierat, fascium, licetorum, & securium ignara, æqui, bonique tenacior, quia volens, non metu adaëta. At ubi ferrei cum ætate mores in orbe pro palma decertant, heu mali mores, quantam bonarum legum iliadem procudère ! Execrandæ Matres filias optimas. Et harum tamen copiâ sit felix Respublica? imò verò, ut pallor, macies, languor, nausea, sunt corpori indicia exitii, sic statutorum, sanëtionum, Canonumque multitudo à cunabulis vitium Reipublicæ aspergit. Nisi errores fuissent, nunquam Justitiæ Echo lex tam multiplex respondisset. Mensura improbitatis numerum condidit legum, ut morbi pharmacorum. Esto, dives sit remediorum natura in medelam vulnerum, morborum, & mortis; quantò tamen felicior, quia vegetior ætas prima? cùm horum omnium aut ignara, aut incuria, quia minimè indiga. Pharmacorum copia, ut morborum, sic imbecillitatis, atque adeò pejùs constitutæ valetudinis humanæ locuples est argumentum. Mali corvi, ovum malum. Quid quòd non rarò Criticus morum censor leges legibus dum aggerat, novis viam pandat erroribus. Oblivionem copia, illa novæ violationi semitam pandit. Multas à multis violari consequitur. Naturæ vitio, an ingenio, nescio, per quod nitimur in vetitum semper. Quo fit, omnes servari impossibile esse. Omnes si plexeris, cum Jove, si quoties peccant homines, sua fulmina mittat, exiguo tempore inermis eris. Sin contra neminem; auctoritatem, vim, legum pondus ademisti; eo eventu, quòd consultius futurum sit Reipublicæ, non condere copiam, quàm conditam non servare. Copiosum omne vel superfluum, vel quia obvium, ferè spretum; par fatum legis est multiplicatæ. Medicamentum legem aptè edixeris. Si parcum, salubre est. At verum & illud: reddat quamquam medicina salutem; quia unà tollit vigoris non nihil, si copiosa, non adjuvat, sed obruit, & enervat. Ruinæ proxima censetur, multis nixa fulcris; vacillat, ac pene perit Respublica legum sub pondere iteratò firmanda. Paucitas observata, non copia nobilitat Rempublicam. Casus prævideri oportere si dicas, fuco gloriaris. Quàm lepidum, id audere, quod impossibile est homini, hoc præsertim cumulata legis remedio.

Quàm

Quàm rara enim lex , quæ omni vel nube nativa careat, vel
 maculâ , quam ei (quamvis videatur clarissima) nequitia
 non possit offundere. Nodum antè , quod dicimus , in
 scirpo , quàm claram ejusdem interpretationem reperiâs ;
 eo demum eventu , quòd certum maneat , nihil adeò &
 cautum legibus , & clarum , quod colore aliquo vitari non
 possit. Apices semper scrutatur in legibus , quibus trium-
 phet impietas. Sin triumphet , lites è lite , tempus è tem-
 pore , & sumptus trahat ex sumptibus. Felix memoria
 Reipublicæ , quâ sedebat nobilis in portis Urbis Senatus ,
 ne advenis vel Curiam accedendi , vel legum sibi sæpe con-
 tradicentium copiam vestigandi foret necessitas. Nihil
 Reipublicæ pace melius. Tolle legum copiam , discordia-
 rum fontem , litium forensium semina , injustitiæ fomi-
 tem , novorum scelerum ansam sustulisti. Hæc Romæ olim
 sententia , legum suarum authorem hoc ornantis elogio :
 Manes tui per me licet quiescant ; sed rosæ aut lilia sepul-
 chrum tuum non ornent , qui tot tricas nobis fundâsti.
 Nec Romæ solius , par sensus sexcentorum omni ævo que-
 rentium. Plus semper laborari temporis , æris , & pacis
 dispendio copiâ , quàm inopiâ legum. Glaciato in salo
 graditur , qui in legum copia cautè nimum.

Cordatus gressus firmat.



§. II.

Quid Civis ?

Formicæ, Civis si vis bonus esse, laborem
 Tu quoque consilio, fac imitère pari.
 Et quas natura emeritis dat vermibus alas,
 Has tibi, ut alta petas, cura, labórque dabit.

DOCTRINA POLITICA.

Civis Aristoteli 3. Polit. c. 1. est, qui habet habilitatem (NB. proximam) ad hoc, ut accipiat potestatem judicandi, & decernendi de iis, quæ spectant ad Civitatem; cujus privilegiis cum gaudeat, Civis dicitur. Definitio hæc intelligenda est de Aristocratia, vel Monarchia. Quia in Democratia actu jam habet quivis civis potestatem dominandi, & judicandi in concione populi de rebus civitatis; omnes enim cives in hoc regimine sunt æquales. In reliquis autem assumi ad Magistratum possunt, sicut apud Lacedæmonios Ephori de contractibus, Senatus de eæde, alii judicabant de aliis.

Civem non facit sola habitatio, vel fori quævis communicatio; nam aliàs etiam servi in civitate nati, hospites, & advenæ; vel alienigenæ mercatores cives essent, etiam si non

si non donentur civitate ; Senes , & pueri civium , analogice & remotè sunt cives , illi propter nimiam ætatem , hi ob defectum non proximè habiles ad judicandum de civitate. Etsi plato l. 6. de leg. annum 70. excedentes tanquam ingenio debiles Magistratu arcendos putet , experientia tamen probat , viros hac ætate , Reipublicæ & lumina , & cardines sæpe esse. Non ergo universum viri magni sententiam probandam existimo

Civium numerum definitum habere , neque decori civitatis , neque securitati congruum videtur , imò superstitionis nonnihil ob sexcentas rerum humanarum vicissitudines. Gloria , & robur civitatis est augmentum ejusdem ; sed & illud aliquos limites habeat , oportet : nè videlicet , si multitudo civium multitudinem facultatum excedat , bello , fame , aut peste laboret , ac pereat. Ut ferè magnitudine suâ Romam olim laborâsse scribunt Historici.

Partiebatur Roma cives suos in *plebejos* , *Equites* , & *Senatores* ; ità Liv. l. 1. *Ægyptii* juxta Herod. l. 2. & *Judæi* juxta Strabonem l. 15. in septem partes. Aristoteles demum 7. Pol cap. 8. in sex classes ; in *Agrícolas* , qui victum sufficiant ; *Artifices* , qui corpori necessaria parent ; *Pugnatores* , qui Patriam propugnent ; *Locupletes* , qui pecuniis Rempublicam juvent ; *Sacerdotes* , qui cultum DEI promoveant ; *Judices* , qui de civilibus decernant. Et quamquam hos omnes Civium numero recipi non debere meritò videri possit , eò quòd horum nonnulli , ut v. g. viles opifices , & agricolæ à servis penè nil differant , consequenter etiam ingenio plurimùm hebeti , & inepto ad munus aliquod gerendum , sic tamen communitalis pars adjuvans , & necessaria dici possunt , ut per eundem Arist. c. 9. in ornata Republica non eorum civium numero habeantur , qui subinde Magistratum gerere possint.

Peregrinos civitate donari æquum est , si suam probent virtutem. Non tamen *Nothos* , & *Spurios*. Ut nec mendicos , & extrema egestate laborantes : nam *paupertas* ferè turpia cogit ; videlicet fraudes , & furta , si vagabunda , & dissoluta vita accedat. Quos cum Platone l. 8. c. 11. de leg. hodièque multi urbibus excludunt. Nec denique *servi* , cum civitas sit pro liberis , & saltèm uno Parente cive

ortis. 3. Pol. c. 4. Intelligo tamen *servos* strictè tales, qui videlicet non tantùm voluntariè serviunt, ut pedissequi; sed qui vel per *jus gentium*, bello ab hostibus captus, fit *servus* victorum, hodie *captivus* dicitur; vel qui per *naturam*, seu *nascendi conditionem*, quâ videlicet à *servo* genitus est, *servus* proinde dicitur, vel *mancipium*, ità, ut totus sit in potestate Domini, nihilque suum possideat, præter vitam: in quam etsi Turcarum Princeps dominatum teneat, *tyrannis* hæc tamen est potiùs; cùm DEUS solus sit Dominus vitæ, & necis.

QUÆSTIO ETHICO-POLITICA.

An multa Nobilitas decora Principi, Reipublicæ utilis?

A F F I R M A T U R.

QUOD dudum controvertit Philosophus, Principum virtus docuit: quidlibet elevari posse ad quodlibet. Limitem virtutis sceptrâ nesciunt, præter arbitrium suum. Vox unica coronatorum æquat culminibus, quidquid humile natura progeniit. Memento, quod sub modium nascendi abiecit conditio, super candelabrum, in Cedrum rubus, myrica in laurum tollitur, & commutatur. A sole vita, & calor omnibus per naturam; à Principe merities nominis per gratiam obscuræ nocti subrogatur. *Fiat* uno creata olim sunt omnia; pari fato nobilitatem induit, quidquid abjectum. Felix virtus, quæ, ut paribus meritis pares possit destinare laureas, pares potest creare. Felix Respublica, lætat spe præmii suos, ut merita censeat, suo ipsius emolumento, ac decore. Augusta est omnis Majestas, quæ, ut satellites Jupiter, sol astra lumine participato fulgentia numerat, sic nobilitate ambiri se spectat, quæ sin lumine augeat, reflexione certè ipsâ intendat. Alieno magnus in lumine, suo major sit, oportet. Nunquam tantus, imò & tanti foret orbi oceanus, nisi scaturientes ab eo rivi, fontes, flumina nos docerent. Nunquam tanta Principis dignitas, authoritas, gloria, nisi alienæ mensura gloriæ mensuram adderet Majestati. Semiramidis laquearia

ria , marmor patium , Phrygum opes ornant conclavia , fateor ; at viventes creatorum à Principe nobilium ceras adjice : aulam , solium , Principem non orbe , sed æternitate dignum fecisti. Illustrior patuit orbi Deitas , cùm è piscatoribus Gentium fecit Doctores , ac dum Magos sibi stitit in stabulo supplices. Congenitum id nempe super adamantem omnem habet sibi nobilitas , quo si careant diademata Principum , soli gloriam ademisti , imò nubila induxisti. Hoc Principis à nobilitate sanguinis decus , par Reipublicæ commodum. Interest hujus longè plurimum , stipari Curias sirmate nobili , horumque numero plebem , velut totidem stellis illustribus siderum minorum choros distingui. Celebris hodiedum perennat orbi Camillorum , Fabiorum , Patriæque Patrum sanguis Romulus. Dum sanguinis gloriæ pedissequa orbem replet Reipublicæ fama.. Eoque certiùs , quòd ardore congenito ad majora pro Patria audenda fervet Nobilitas , civis exemplo propellitur , quibus unà stet , crescat , floreat cælo æmula Patria. Sensere id Respublicæ calculi melioris ; quarum cura usque adeò peculiaris in nobilitate colenda est , ut splendorem propagiæ veteris , novis adnexis , velut novæ lucis auctario illustrarent. Censoriâ dignus est virgulâ stolidus Tarquinii ambitus , altiora papaverum colla succidens , quasi verò non referat gloriæ Principis , inter Principes , quàm inter sentes duntaxat dictare. Metuantur cum Busiride , quorum par Tarquinio est regula ; aut cum Ottomanna barbarie , cujus cura præcipua , togâ perinde ac sago illustrem nobilitatem ad sordes , & oblivionis quisquilias damnare. Aliter longè æqui perinde , ac Patriæ Patres Principes. Non illis verenda Nobilitas. Tutiùs huic salutem suam se rati confidere , quam gloria in fidem acuat ; ac populo , cui ferè ibi fas , ubi plurima merces. Famularia memorantur fastis mancipia , nunquam aliàs dignanda nomine , nisi , ut incenso Dianæ fano Herostratus , sic excidio Principum orbi clarescere voluissent. Dum contrà bello , & pace æthereus est Reipublicæ murus Nobilitas. Pacem colat Respublica , nobiliora in decus , & commoda meditatur sanguis consilia , dum terram sapiunt vulgi ingenia , non agendi virtute , sed odio tabescentis. Bellum ingruat : præterquam

quòd toto nunquam discrimine fervilis dimicet anima, nihil admodum pensi habet, cui sceptro pareat: nominis perinde ac generis incuria, aut metu, aut pretio venalia habens omnia. Dum nobilitati nativum decus est calcar ad gloriam, servandi nominis, augendæ famæ fitis, fidei non jubet esse sollicitam; pericula ipsa, si modò stet Patria, lucris; mortem in arena triumphis gratanter accensens. Nobilis virtus co ipso, quòd Nobilis sit, velut inter adaman-tes pyropus se distinguit. Acriori fulmine percellit æmulum, Patriæ majorem conciliat securitatem unà, & Majestatem.

NEGATUR.


FELICIOR potestas nulla, ac ea, cui jus summum; pari juri securitas dominandi. Quæ porrò major securitas, ac ubi rivalis nullus generis, gradûs, potentia? Felicior, quia facilius, possidetur solum, ubi serviunt omnes, vetus erat paræmia. Ægrè cervicem tollunt, quos gravius jugum premit: aut si sustulerint, ut torrens furor creseit, & cum eodem perditur. Furunt ingenia populi, at cerebro carent; vanæ sinè viribus iræ suis se flammis depascuntur, nisi potenti vento impulsæ sibi pabulum, & vires sumant. Rudia sunt vulgi studia, præceps impetus, suique impotens ferocia. Hinc patent ferè consilia, simplicitate vim malo tollente; quod, cum patet, robur, ut corallium flexibilitatem amittit. Præfocantur in herba ejusdem molimina, quæ in flammam seditionis erumpere audent nunquam; vixque serpunt sub cinere, nisi adsit autoritas sanguinis: quæ, quantum nobilitate, opibus, affinitate florescit, tantum redditur potentiâ rivalis Principi, Reipublicæ formidanda. Pestifera Optimatum dos magis, an labes est, nescire terminum ambitus, ventorum in morem montes tollere, dum scyllæ, & charybdi impacta pereat Reipublicæ navis; quæ portum leni provecta vento, id est: æquali Civium sorte suffulta tenuisset. Quò rarior Reipublicæ nobilitas, clarior est Principi gloria, certior civibus quies. Aut seminarium, aut fomentum discordiæ est dispar conditio; dum contrà uniuntur consilia viribus, vires consiliis, dum, quia fors, mater concordia, æqualis est omnibus, tribu-

tributorum onus pari jure tribuitur, emolumentum pari gaudio sentitur. Contemptui ferè est plebi nobilitas; risui est plebs nobilitati: illam vitium nocturnæ ad solem caligantis; hanc calcar gloriæ stimulat; veretur illa à majoribus opprimi, dum ut honor omnis mutandis moribus calcar addit insolitum, sic pronum ferè est quibusque altissimis, subjecta omnia elata fronte despicere. Quod si splendorem Principis à nobilitate augeri contendas; quid, amabò, interest, augere gloriam, sed minuere potentiam? rivum unum addere flumini, ut duplicem tollas? Quid, quod & in regia sæpe æraria harpyas nobiles necessitas cogat illustris? Non una cum Ruffino alienis dives splendet cornicula plumis; Principis, an Patriæ majori dedecore, aut detrimento, ignoro: cujus succum, & sanguinem hirudo nequam abligurit. Syrma clientum premit vestigia, creditorum fundis dotatum. Auro, & argento fascinantur oculi, nitor omnis emungitur. Vitellii, & Sybaritica fervent symposia, præter nomina nihil manet nobilitati residuum. Eheu! emendæ nominis gloriæ tot consecrantur nomina, quot sunt syngraphæ testes inopiæ, aut, quod deterius, virentes familiæ, quas luxus unius extremâ conficit egestate. Sudat avara inferni viscera perscrutans plebs, dum uniones funder Cleopatrx insanis cupediis, aut Antonii baltheo servituros; sanguinem egestas è venis elicit, dum auro dolorem inducat, quo niteat nobilis fastus. Quasi verò & metalla, & unio palleant, quia tanto se parta esse sanguine pudeat, quæ alienam pascant aut arrogantiam, aut cupiditatem insanam. Inopum inyriades censeas, ubi copia est nobilitatis. Ut montium apices vallium fundant abyssos, sic horum splendor, & commoda, sexcentorum incommodum est perinde, atque ingloria. Non æquat fortuna solem, pari omnes radio beans. Quantum adjicit uni splendoris, auget alteri aut miseriæ, aut vilitatis. Nilo æmula, qui, quò latius Ægypto funditur, minùs rigat. En quanto Principis decori, Reipublicæ comodo sit nobilis sanguis. Cujus Mater arrogantia, obstetrix luxus, germen cupiditas. Amplioribus semper inhians, suo nunquam contenta. Donec, ut nulli satisfacit minùs, ac nobili indigenti, ipsa etiam Reipublicæ

blicæ commoda privatæ serviant ingluviei. Quo verò id Patriæ fructu ? partire flumen amplissimum in rivos quàm plurimos, vixdum rivus erit : sic ærarium , aut potentia Principis nobilitati multæ communiter fundum arat. Mensuram creatura , cornu copia ipsa fundum habet. Parca contrà si Nobilitas sit , paucitas ipsa reverentiam, virtutis cultum, amorem conciliat. Ornabitur Princeps, non onerabitur. Respublica decus, tutelam Cives, salutem omnes recipient. Planetis septem cælum distinguitur, & orbi sufficit, illuminando pariter & fovendo. Multiplica, si liber, censum ; quantùm anxeris, tantùm noces. Partita nimium luximicat debilior. Quid multa ? Nulla nobilitas, virtutis, decoris, gloriæ est exterminium: Nimia, prodigalitat, luxûs, ambitionis fomentum est. Medium Princeps retine. Orna te, tuosque ; non onera. Patres Patriæ & culmina funda, non sanguifugas.

§. III.

Quæ olim Respublicæ ?



Publica res quondam rudis, indigestaque moles,
 Vixque fuit primis effigiata notis:
 Scilicet est quædam cunctis infantia rebus,
 Maxima ab exortu parva fuere suo.

DOCTRINA POLITICA.



Lato, quantumvis nomine suo ceterà *Divinus*, lepidæ sanè Reipublicæ author fuit è mente Socratis. In hac enim volebat unitatem summam. Et quidem non tantùm unitatem concordia (quâ etiam res parvæ crescunt) quæ semper maximè laudanda est; sed talem unitatem, quâ omnia sint æqualia, ità, ut unus etiam tantum possideat, quantum alter. Quod sanè impossibile est; nam, ut numerus personarum definiri non potest in civium domibus, eò, quòd major uni, minor alteri sit fæcunditas, ità neque pares esse possunt omnibus facultates; cùm pluribus egeant ii, qui plures; paucioribus contrà, qui pauciores sunt numero. Si verò maximam, quæ dari potest, unitatem Plato petat, tolli debet penitus civitas, quia major est unitas in unico individuo, quàm in tota civitate, in qua solùm est unitas conjunctionis.

Absurda præ ceteris est communitas uxorum ab eo admissa, quæ naturæ, & justitiæ repugnat. *Naturæ*, quia gradus consanguinitatis confundit, naturalem viri cum uxore nexum dissolvit, fæcunditatem impedit, & filiorum certitudinem, ac parentum curam tollit. *Justitiæ* adversatur, quia concordiam, quæ bonum est civitatis, dirimit; reverentiam Magistratui adimit, concupiscentiam nutrit, ordinis omnis, æquitatis, dignitatis contemptum causat; virtutem omnem, quæ civitatis felicitas est, penitus extinguit. Quòd Socrates mentis hujus fuerit, quis miretur? ut, qui Xantippen domi furiam expertus est indies; cur tamen Plato adeò à recto erraverit, vix penetrare liceat.

Meritò rejicitur ab Aristotele Phalææ quoque Chalcedonii Respublica, ut, quæ Civium bona, & patrimonia esse cupit æqualia. Nam æqualitatem *absolutam* in omnibus, vetat inæqualitas familiarum, quarum una sæpè 10. altera 100. numerat capita. *Respectivam* verò æqualitatem, quis ad amissum regat? sicut ergo neque Cræsi in Republica ferendi, & Midæ, qui insanâ opes cumulandi libidine licentiam, ambitionem, injustas civium oppressiones, atque adeò perturbationem ordinis, & interitum civitatis per alienam invidiam, & æmulationem causant; ità
neque

neque Iri tolerandi, quorum mendicitas contemptui apud externos, desperationi inter domesticos viam sternit. Illa ergo laudanda divitiarum parandarum studia, quæ justitiæ, æquitati, & statui conveniant. Sic nec sutor suam ultra crepidam, neque nobilis per suppressionem civium, sorte sua contentus, suo & Reipublicæ commodo deget.

Hippodamus sua in Republica civitatem 10000. definitam capitibus in *agricolas*, *milites*, & *artifices*; & civitatis agmen in tres partes, *sacram*, *publicam*, & *privatam* divisit. Inventores magnæ utilitatis, honore, ac præmio afficiendos esse censuit; ac demum liberos eorum, qui pro Reipublicæ salute obiverunt, sumptu publico alendos constituit.

Primum, quis cum Aristotele non reprehendat? quæ enim superstitio decem millibus civitatem constare debere? anne, ut numerus ferveret, cæteri occidendi, aut proscribendi? cur rustico, & artifice arma adimantur vitæ ac fortunis tuendis sæpè necessaria? Servi militum hoc pacto forent artifices, & coloni, neque civitatis participes. Agri divisio suo non caret errore. Cur enim Sacerdos, & miles ab agricola in terra colenda non differat? cùm neque aræ, nec arma. seu tempus operi finant, seu tantam vilitatem admittant. *Tertium* de inventoribus etsi Aristoteles omnino non appobet, tanquam illicium populi ad moliendas res novas, & dissensiones populi, altero dicente, rem novam utilem esse Reipublicæ, altero negante; salvo tamen magni Viri iudicio, quis hoc non approbet? Cùm bene de Republica meritis præmia decerni ratio dicet. Quis verò ampliùs meretur de eadem, quàm utilitatis ejusdem repertor? cujus arbitrum esse oportet tribunal summum Reipublicæ, & experientiam rerum optimam testem, quibus dissensio omnis faciliè compesci potest: neque periculum illud novorum moliendorum videtur, *rari* enim *nantes in gurgite vasto*, quibus tanta vis ac perspicaciâ, ut utilia Reipublicæ aut reperire ipsi, aut reperta exequi possint.

Lacedæmonii fortitudinis, & sapientiæ laude illustres Lycurgo moderante sãubria multa, hæc tamen reprehendente Philosopho vitiosa habuere: 1. Servitiis cùm abundarent,

uarent, nulla iisdem coërcendis lex condita. 2. Mulieres in flagitium omne cum ruerent, frænum pudicitie nullum. 3. Possessionibus amplissimis alii, tenuissimis alii è legum præscripto frui. 4. Magistratus à plebe electi, & iidem quasi venales omnibus. 5. Perpetuus erat senatus, neque ulla ab iisdem ratio exacta muneris gesti. 6. Convivia publica non pauperum minus, quàm divitum sumptu celebrata.

Athenienses Legislatore Dracone & Solone, ab Archontibus velut Principibus regebantur: hi primùm erant *perpetui*, deinde *decennales* creati; ac pestremùm *annui*.

Cretenses demum Minœ, Regum omnium iustissimo, imperante, multa Lacedæmoniis habebant communia. Lacedæmonii Elotas, Cretenses Periæcos colendis agris destinârunt. Convivia publica, sed sumptu pariter publico celebrârunt. Lacedæmoniis Ephori quinque, Cretensibus decem Cosini, seu Magistratus imperabant. Illi eligebantur è quavis sorte hominum, etiam de trivio, hi verò tantùm ex certis familiis.

QUÆSTIO ETHICO-POLITICA.

An consultius orbi foret, omnia esse communia?

AFFIRMATUR.

Nihil optabilius Reipublicæ, nihil Principi salubrius, ac unio subditorum. Da unionem germanam, Spartam toto fundabis in orbe, ubi unus pro, & præ mille. Fabiorum virtus quantum facessivit quondam negotii æmulis Romæ? neque alio id potuit medio, quàm unione. Præsidia ipsi etiam naturæ, & arti invia prorues, si rinas agant: Exercitus fundes, ubi latus lateri, galea galeæ, atque viro vir mordaci non cohæserit tendine. Lapis lapidi nisi necetur, nihil gloriæ, nihil robori, nihil decori in ævum fundabit architectura; sic animi, ut sibi constet Respublica. Animorum unio manium vicem ubi subiverit, saxo æmula stabit communio. At si cōmunionem omnibus Socratis, aut Platonis consilio ærarium feceris, pari fidelia,


delia, non fundabis modò, sed incrementa addes unioni. Nulla major animorum consensio, ac inter Cœlites, quorum par fors; da bonorum communionem, exulabit indigentia, exulabit arrogantia, cœlum orbi geminabis, dum quisque sic suis contentus, ac si præter ipsum nemo quidquam possideat; sic omnes abundant, ut singuli; nemo sit indigus, nisi & omnes. Lites hodie, discordiæ, odia, rapinæ, orbem æstuantis instar maris convellunt; fontem quære acerbæ tot inter funera mortis: sola est rerum cuique suarum proprietas. Bellorum iliade intentantur regnis excidia, hæc pestis toxica spargit. Gentes colliduntur gentibus, armis, & animis; rumpit fœdera hæc flamma cupidinis. Amicus amico vix ullus, frigus hoc verbi *meum*, & *tuum*, amoris æstum omnem in scintilla restinguit. Qui hodie momento rumpitur amor, tam adamantis naturam induet, dum omnis cuique, & quisque omnibus amans, & amatus. Liber enim quisque affectu, cujus defectu in bonorum delectu scinduntur animi. Liber cupiditate lucri, nemo æris, & insatiabilis erit rabiei mancipium. Dum hodie procellâ hâc jactamur, curis decumanis confecti, pressi insomniis gemimus, dum quò plùs sunt potæ, plus sitiuntur aquæ. Crede mihi, tempestas nulla sic Erythræum exagitat, ut cupiditas animos. *Meum*, & *tuum* iquantum, quàm multorum hodie fomentum? iniquitatis in judiciis, invidiæ in urbibus; æmulationis in domibus; rapinarum, ac cædium in viis publicis; dum, quos delectat vivere rapto Cacos, atque Scirones, suæ forti ut faveant, humani non pudet esse generis hostes. Tolle fomitem mali, quia nemo tum Codrus, nemo Polycrati iavidebit Samio; quia quisque erit Polycrates, ubi omnia amicorum fors fecerit esse communia. Nemo ad fores Cræsi squallebit Irus, quia Cræsus nemo solus, sed omnis: pari sorte famulam sibi, & Dominam omnium opem experturus. Domestica cuique felicitas, dum curarum exercitus, quibus hodie conficitur anima, nullus erit, quia divisus in omnes. Metuit siccitatem hodie quisque, quia ad tenuem, suum videlicet rivum confidet; procul tum timor ejusmodi, quia totus ei præstò erit oceanus. Quid multa? quæ Reipublicæ fors, eadem esset singulorum. Sublimatur illa,

aut premitur, par fatum foret omnium. Accessio, aut defectus totius, singulorum esset aut commodum, aut detrimentum. Ferrea fuissent Saturni lustra, nisi commune omnibus bonum inaurâset. Par virtus felicitati talis Reipublicæ, bello enim decernendum si fuerit, quid inexhausto deerit mari? ubi nervus pari alveo fluit ab omnibus, qui pro omnibus; virtute insuperabili, quia invicem junctâ.

NEGATUR.

BEne habet. Pro domo sua perorat Tullius, dum communitatem bonorum omnium suadet. Publici prætexitur tituli color, & privatum quæritur bonum. Unio mentito blanditur nomine, majoris semen discordiæ, quàm sit bonorum, & cultûs disparitas. Satiùs Reipublicæ cujusvis privatis fortunis consulitur, imò satiùs cuivis privato. Argus hoc pacto suis est quisque impendiis, qui Polyphemus foret, dum nihil cuiquam proprium. Nil demitur publico, quod privatis sic accedit commodis. Augeatur fortuna domestica; semen terræ creditur, Reipublicæ fæneraturum. Nervus publici privata sunt. Hic ille magnus, quo mentes omnes, quas rubigo secus consumeret, artibus, studiis, cultui aptat, & expolit. Sexcentos reperias, quorum genium ad ignaviam, & otium formavit natura, stertent hi pigri instar Arcadis, dum eis parata sint omnia, quia gregi communia. Melioris spes fortis, aut opimi fanoris aurea cujusvis ætatis est virgula, quâ lactatis nulla fiunt, quæ ardua tempus, imò impossibilia credulitas finxit. Malè sementi ac horreis consulueris, si injusto etiam vomere, sibi quo victitet, adfuturum spondeat quisque. Hectorem nullum aut Scipiadas cum Græcis Roma jactabit, ubi par Martis stipendium feret virtus, & ignavia. Pallas ipsa ignara lucis pulveres incolet, si res angusta domi ad acuenda in fabricandam sortem ingenia non addiderit stimulos. En nuce in una malorum Illiæ n. Ignorantiam, egestatem, bellorum diluvia, famem, orbis universi excidium bonorum à communione inducta. Palmetum Respublica omnis est, nisi prefferis singulas, caput nubibus inserent nunquam. Horologii rotulæ nisi pondere firmentur, tempora ordine suo discescent nunquam.

Quid orbis finè ordine? nisi redivivus orcus. Quis porro ordo, nisi bonorum divisio ordinem fundet, servet, stabilitat? Varietate statûs, gradûs, fortunarum animatur Respublica. Quis servitii, aut laborum patiens futurus, ubi pares omnes? quis Princeps finè subdito, Dominus finè mancipè? at subesse, & mancipari nolet, qui præmium officii, aut obsequii referre possit nullum, cùm par sit cuique sorte, & vivendi opportunitate. Insana foret operantis industria, deliræ curæ, ubi pari lucro redimitur torpor, & colentis solertia. Naves in Oceano anchora, spes auri suis in curis firmat omnia. Aliena rarus, sua quisque cordi habet. Nemo unus ex toto industrius, qui non toto sit Dominus. Hanc causam arbitror, cur DEUS ipse talenta partiatur, & gratias, neque pares cujusvis orbis plagæ velit esse fortunas. Ebore Indiam, thure Sabam, serico Seres, aliis alios abundare, singulis ut affluant singula, nulla omnibus: fomentum illud singulis, incitamentum istud spei, lucri, industriæ. Avidiùs ab aliis quæritur, quod singulare est paucis, dùmque mutuo participant fructu, unio ipsa sapientissimo naturæ authoris consilio stabilitur. Quid, quòd & virtutum copiam hæc partitio causet. Quis munificus, magnificus, misericors, ubi inter pares, & paria omnia miser est nemo? quis fœdera amantum jungat, ubi siccat vena gratificandi? Deme igitur singulis dominandi, communem omnibus vivendi adimis felicitatem.



§. IV.

Quotuplex hodie Respublica ?



Hortus in areolas ut se fecat undique plures
 Irrigat & variam fons tamen unus humum.
 Res ita amat varias populorum *publica* formas,
 Sed populi cunctas dirigit una salus.

DOCTRINA POLITICA.

EX suprà dictis intelligis *materiam* Reipublicæ esse pagos, vicos, urbes homines. *Formam* esse modum regiminis; seu *ordinem imperantium*, atque *imperio parentum*, ita Contz. l. i. c. 14. Ex Arist. qui ordinem tum circa Magistratum principalissimum, vult Reipublicæ formam esse. Principalissimus Magistratus in Democratia est penes totum populum; in Aristocratia penes paucos; in Monarchia penes unum.

Ex fine, quem Respublica habere debet, & modo hunc procurandi, colliges divisiones ejusdem. Finis enim est, *communis utilitas*, & *felicitas populi*; quæ non tam ex opibus, quàm virtute nascitur; sic enim bene, & beati vivunt animi, si per virtutem sua quærant, & possideant.

Hunc finem , quia per regimen , seu ordinem gubernationis præcipuè potest spectare , & curare unus ; vel pauci , & illi optimi ; vel totus populus simul ; hinc triplex oritur forma Politicæ , seu Reipublicæ ex Arist. 3. Pol. c. 7. Et è contrà , quia pariter tripliciter ab hoc fine deficere potest , vel unus tantum ; vel plures , pauci tamen potentiores ; vel demum totus populus , quærendo videlicet non utilitatem *communem* , & felicitatem , sed suum tantum *privatum commodum* , triplex pariter oritur Pseudo-politica , seu mala Respublica.

Recta Politica) si hoc nomen *generaliter* pro Republica , seu ordine gubernandi sumatur) est vel *Monarchia* , seu *Principatus* , id est : unius imperium , legibus , aut moribus delatum , susceptum , gestumque parentium bono. Vel *Aristocratia* , seu *Optimatus* , ubi pauci , iique , qui vel sunt , vel esse deberent *optimi* , ad utilitatem subditorum regunt. Vel *Politica* seu *Respublica* strictè sumpta , in qua totus populus summa cum potestate communi consulit utilitati , & regit. Ad hanc reducit Aristoteles etiam *Democratiam* , ubi secundum proportionem numeri personarum elewantur aliqui ad Magistratum gerendum. In *Monarchia* est unicus capax potestatis summæ. In *Aristocratia* , pauci virtute , vel stemmate nobiliores. In *Politica* quivis è populo capax est Magistratus gerendi.

Ab hoc fine utilitatis publicæ , tanquam Cynosura , si deviet Magistratus , oritur Politica *non recta* , quam Philosophus vocat *Reipublicæ digressionem*. Unde si Princeps non communitatis , sed suam tantum spectet utilitatem , ex Monarchia oritur *Tyrannis* , quæ palam in bonorum ruinam incumbit , communitatis felicitatem tollit , in vicem legis suam fovet libidinem. Si pauci ad terrorem aliorum , suas opes cumulandas : & secundum arbitrium proprium omnia dirigant , oritur *Oligarchia*. Ex ultima demum , quâ privatorum pauperum commodo tantum consulitur , fit *Ochlocratia* ; quæ omnium perniciosissima est , & sævissima. Sicut enim optima est servorum conditio , si moderatè frænctur ; ita *asperius nihil est humili* , cum surgit *in altum* ; & ferè sui impotens evadit , atque acerrimè , in nobilitatem cumprimis , grassatur , dum eandem elidat.

Væ Romæ in Gracchi seditione ex servis cōalita ! Liv. l. 24. Væ Germaniæ sub Carolo Quinto ! colonis arma gerentibus immani Provinciarum excidio. Unde certa est Aristotelis observatio 5. Polit. c. 10. quòd nemo tyrannidis , & cupidus magis & sui impotens sit , quàm , qui conditione vili , ac proinde indole , ac sanguine est abjecto.

Tyrannidem dividit Philosophus 4. Polit. c. 10. Primam ait : esse *barbarorum* , à quibus Princeps eligitur , leges statuuntur , sed ad arbitrium Principis violari possunt , unde despoticè hi suos gubernant ; utpote in quorum manu spes , ac res , vitæque ipsa subditorum pendet. 2dam *Græcorum* , quos *Æsymnetas* dicebant , legibus adstrictè viventium. 3tiam *Tyrannorum* , qui , sicut vi imperio sunt potiti , ità nullis legibus adstricti pro libidine sua omnia decernebant. Sed inter has tres primæ duæ , *regiæ potestates* potiùs dicendæ : tum quòd volentibus imperent ; tum quòd juxta leges , & consequenter subditorum utilitatem gubernent. Et ideo veteres *Tyrannum* pro Rege usurpabant. Sic quondam Tyranni Siciliæ. *Tyrannica* verò potestas propriè est , quæ vi , & consequenter nolentibus imperat ; & cùm nullis stringatur legibus , suo tantùm , non subditorum commodo studet.

Nota hìc : tres Reipublicæ non *rectæ* species huc pariter referri per analogiam , tanquam contraria , videlicet *rectæ* Politicæ. Contrariorum enim eadem est ratio , & locus tractandi. Sicut cùm de scientia agitur , per accidens agitur etiam de ignorantia. Quod si contingat misceri Reipublicæ species inter se , ab ea nomen habebit Respublica , cujus gubernandi forma cæteris præponderat. Si enim unius arbitrio plurima dirigantur , & pleno jure decernantur. *Monarchicum* ; si non unius duntaxat , sed plurium Optimatum res omnis statuatur vel imperio , vel auctoritate , *Aristocraticum* : Si denique populi universi res deferatur assensui , tametsi summa penes unum potestas sit , strictè *Politicum* dicendum erit imperium , seu Respublica.

QUÆSTIO ETHICO-POLITICA.

*Utrum felicius, frui gratiâ Principis, an plebis,
& Optimatum?*

PRO PLEBE, ET OPTIMATIBUS.

Ancipitis res plena est alex, fidere malaciæ, favore suo syrtes regenti. Ridet aura, & pleno favore vela prosequitur, dum perdat. Lufit Narciffum reddita in aquis forma, sed formâ variâ delufit. Illuminant orbem momento fulgura, sed procella comes est. Cave, dum pleno orbe tibi Luna fulget, durable nihil est; hoc *auge* splendoris est decrementum. Sic favor est Principis; gignit illum eventus, lactat inconstantia, fors cæca enutrit. Quantò tutior, qui Optimatibus, qui vulgo fidat! Arduitate, & periculo non caret gratia Principis. Arduitate, quia ut unius tibi favor arideat, jactura myriadis est facienda. Non alio tibi gemma hæc venalis est pretio, quàm plebis, aut Optimatum invidiâ, odio murmurare. Ipsum ingenium docile, ipsa gratiam demerendi dexteritas censuram patitur. Qui Achates Principi, petra ferè scandali est vulgo: quorum, ut certum est in contemptu Placentinorum ingenium, in quorum omnem figuram se fingit, sic in odio ferreum, quod unius se flecti arbitrio nolit. Ardua res favori unius nundinando, omnem ejusdem mentiri affectum, nutum prosequi, prævenire animum; eo fano-re, ut placitum unius, vectigal sit inevitabile odii universalis. Odit ferè placentes populus, quasi verò vulnus id, & sentiat, & vindicet, quod oculus Principis, ut solis radius omnibus debitus, fiat seu furtum, seu mancipium unius. Accessus ad ortum, ab occidente recessus est; sic gratia Principis, & Optimatum, ac vulgi odia ferè sunt relativa. Illos æmulatio, hos opinio inflammat. Quantum gratiæ, & commodi sibi meretur beneplacens fide, officiis, studio; tantum suo se credunt fraudari, qui defectus suos alieno metiri solent incremento. Vulgus conrrâ, quidquid adversi Reipublicæ obvenit, Cynico dente in felices ejusmodi conjectat. Sinistram regno jecerit aleam
Bel-

Bellona , tributis amplioribus prematur populus : hoc à fonte , per Principem tanquam canalem , manare conclamant ruinam Provinciæ. Hic unus est regula , ad quam error Principis exigi debeat. Ille non suspitione , sed fide certissima pyxis illa Pandora , unde Reipublicæ pestis ducatur. Adeò facilè grandi in numero bilis movetur. Et insipidus palato communi est bolus , qui capiat Principem. Ut facilè raperit acrimonia sanguinis , quod vitiet. Sed & periculi res plena est gratia Principis: Fumus , umbra , vitrum felix est gratia : cum splendet , rumpitur ; Euripo , si quid inconstantius est naturæ , favores sunt Principum. Lubrica nunquam ampliùs via est , quàm in alto. Et unde auxilium , si fulcrum auferas unum ? Felix , qui pluribus nititur , futuris auxilio , si cætera dempseris. Ut plurimum oculi plura spectant , sic manus ampliùs firmant. Da multiplicem navi anchoram , securi ridebit procellas , quas una non ferret. Certior tibi est portus , ubi frequens est Pharus , viæ index. Cynosura si exstinguatur una , actum agitur. Ut faciliùs longè fuerit unius , quàm multorum gratiæ jacturam facere. Pereat (quod momento nec opinanti contingit) gratia unius , uno casu perduntur vita pariter , & fortunæ. Quasi verò surgere in altum debueris , *ut lapsu graviore ruas*. Placent aulæ officia , dum vires , ætas , vigor animo ac corpori. Severior fortuitò aura verbuli unius aut signis afflet. Fumare continuò montes , fulmina sereno succedere , & quem Gratiæ adduxêre Principi genium , super sepiam omnem invisus , te tristi damnatum cernes exilio.

PRO GRATIA PRINCIPIS.

PLacere , quàm vox chara , tam res rara , si fiat , ut oportet. Placere conatur quilibet , adipiscitur rarus. Æqui , bonique amore placere deberent omnes , conantur pauci. Quòdque mirum , placere potiùs vulgo , & Optimatibus , quàm Principi : tanquam aut faciliùs sit satisfacere omnibus , atque uni ; aut conducibilius , astrorum luce respici , quàm solem sibi habere faventem. Non tutò displices Principi , ut populo placeas , à quo pendet & vulgus. Et quamquam non facilè oderit vulgus , nisi quem improbum au-

dit; periculosus tamen est beneplacitum ejus, quia tumultuario amore rapitur, quem præconcepta fundat opinio. Lévi de causa displicet illi, qui fidus Domino. dum contrà malitia per noxia etiam, modò tecta obsequia gratiam refert. Parùm tutò amatur, qui sic amari cupit, quia nimiam. Vitium est placere populo, si virtus displiceat. Displicet ei passim, qui placet ampliùs Principi; ipsum placere ampliùs, argumentum est odii; deterrimus omnium videtur, quem prudentiorem sæpè ac meliorem existimant. Secura ei felicitas, cujus vela favor provehit. Quid refert minorum siderum uti gratiâ, quæ nil ampliùs possunt, ac luminis à sole participant. Principis solius virtus, te finè comite felicem facere potest, non item vulgi. Inconsultè rivulos captas, cui fons puriori & pleniori patet solatio. Poteest, si velit Princeps, cui velle ipsum posse est. Fatum id orbis est, gratiam Principis ut habuerint multi, quia unius; Optimatum pauci, quia multorum: populi nemo, quia vento est æmulus. Jam blandè aspirat, jam furit exitio: jam pleno provehit alveo, jam in sicco cymbam destituit. Genius illi & varius, & mutabilis. Dissident animi, & sententiæ, nocentibus innocens, innocentibus nocens audit idem non pro merito, sed pro judicio, absolutus pariter, & damnatus. Sisyphi saxum tollit, qui omnium sibi favores ausit conciliare, ubi varia genii, indolis, nationis, gradûs, officii, & dotum est differentia. Gustus ante, quàm judicia omnium conciliabis. Homine major sit, qui speculi in morem arrideat omnibus. Lepida vindictæ videtur pœna, ut quia nunquam omnes ad salivam nobis, nunquam nos omnibus simus ad eandem. Displicet sæpè virtus vitio, vel invidiæ honor. Neque magnus unquam per orbem audit, cui multiplex censor domi defaerit. Ferè enim unius comoda, alterius sunt connexa incommodo. Medium nescit popularis amor perinde, ac furor. Fac ei omnia, nunquam tamen præstabis, quò non exigit amplius. Vel unum negligè, quia impetu ducitur, non ratione; oblivione sepelit omnia, tametsi maxima, quia vetera. Quòdque durius, parca illius est in præmiando se voluntas, quia eadem incus omnibus, & singulis designatur in vulnus.

nus. Faciliùs multò capitur, stabilitur, & possidetur favor Principis, quia unius; quàm vulgi, quia multorum, cui & suadere difficile, & persuadere penè est impossibile. Purpura eadem, quæ delectat, & recreat sensum, & genium nobilem, tauri rabiem in furorem exagitat. Satiùs ergò Principis solius adhæseris lateri, ut heliotropium Phæbo, navis cynosuræ uni. Quippe oderint licet cæteri, parum refert, dum supra invidiam sis. Eris, dum Principis gratiâ tectus sis. Delicata hæc, quamvis in uno sit, ut delicatus ferè est genius Principum: levior tamen, & mitior tibi unius quoque (si præter spem accadat) erit offensâ, quàm sit multorum. Leniùs injuriæ veniam magnanima, ac abjecta; una, quàm multiplex largitur indoles. Imò si furat, mitiùs, quia rationabiliùs furit. Placebis affatim, si recti & Reipublicæ amans placere per adulationem studeas nemini; uti omnium amicus, nullius solet esse amicus. Stabilis tibi hæc erit gratia, virtute parta. Sufficit hæc si non ad reprimendam, ad tolerandam certè inevitabilem Politico malevolentiam nonnullorum.



Q U Æ S T I O III.

Ratio Reipublicæ.

§. I.

Quæ optima Reipudlicæ forma ?



Tot licèt astra polo numeros , tamen omnibus unus
 Sol satis est , uno hoc nox nitet , atque dies.
 Vivat ad exemplum hoc mundus. Rex imperet unus,
 Indè dies regnis surget , & indè quies.

DOCTRINA POLITICA.

INter alias gubernandi formas, comuni veterum cum Arist. Platone , Xenoph. & recentiorum , Lipsii , Contzen , Savedra , Barclaji , (si Hor- nium excipias , Hollandiæ statibus faventem , quia clientem) imò SS. Patrum sensu , optima est *Monar- chia*. Primò enim Divinæ gubernationi (quâ nihil perfe- ctius) est conformior , & naturæ. DEUS cælo est unus ; imago DEI Rex est in terris. Sol unus cælo ; duo si sint , periculum est , ut omnia incendio perdantur. Familix Homero teste , *herus unicus esto , unicus & Princeps Rei- publi-*

publicæ : quæ major est familia. Una corpori anima est, unde Tacit. 1. Annal. unum imperii corpus unius ad nuntum regendum videtur. Bruta ipsa ducem unum ; apum Respublica unum sequitur Principem, ita Plinius.

Hinc factum secundò : ut ab omni ævo hæc divinissima gubernandi norma gentibus probata sit præ cæteris. Arist. 4. Pol. c. 2. *Principio enim rerum , gentium , nationumque imperium penes Reges erat.* Ita Justinus l. 1. Sic gubernata Monarchiæ 4. totius orbis ; Assyriorum , Medorum , seu Persarum ; Græcorum , ac demum Romanorum. Sic à Fojo Sinæ , à Pharamundo Galli , à Brittone Angli , ab Athanarico Hispani , à Dano Dani , à Lecho Poloni , ab Attila Hungari , ab aliis alii leges , & jura acceperant.

Quid , quòd concordia non alibi floreat magis , quàm in Monarchico Regimine. Et sæpe è mente Taciti , discordiarum (quæ Provinciarum exitium sunt) non alius sit modus sedandarum , quàm si ab uno Patria regatur. In hoc enim neque Princeps ulli quicquam invidet , velut qui supra invidiam est , quæ non nisi inter pares grassatur ; neminem verò habet , quem metuat , utpote dignitate & potentiâ superior omnibus : atque adèd justitiæ & domnandi cura est certior , cùm neque corruptelæ pecuniariæ sit occasio. Cùm ferè tam pudeat Regem captare munera , quàm imperare delectat ; ac proinde tuta suo in sacrario imperet Themis , quæ privatos inter parietes nummulis , lepusculis , & munusculis stringitur , & expugnatur. Accedit , sic celari arcana consiliorum magis , quàm si inter plures pateant , quorum ferè venales nonnulli sunt ; atque adèd felicior , & certior semper est executio negotiorum , dum autoritate unius frænati omnes morem gerunt , & Respublica quiescit. Tamen si enim etiam hîc plurium audiantur consilia , non secus , ac in Aristocratiâ , vel Politia , id tamen unum exequendum decernitur , quod uni omnium Principi consultius videtur ad commodum Reipublicæ. Quod si Principem errare contingat , non desunt Ambrosii , & Chrysostomi , non desunt Ecclesiastæ religiosissimi , qui neque mala unquam commendunt , neque veritatem aut taceant , aut dissimulent sanctissima libertate.

Non

Non diffiteor sanè , cum Hornio , & aliis paucis , Aristotelem ipsum , aut Aristocratia , aut plebis imperio favere ; verùm si rationis momenta ab iis ipsis pro Monarchia allata considerem , Patriæ solius affectu sic scripsisse omnes certissimum est. Aristoteles sub Optimatum imperio , Hornius sub Hollandiæ Statibus degens , ambo suorum clientes suis faverunt. In Aristocratia namque multiplicato Optimatum numero , tot subesse Regibus cogitur populus , quot sunt membra senatûs : quæ , quia potestate paria sunt , quàm facilè in transversum acta , aut suos amore , aut invidiâ pares prosequuntur ? familiis suis dignitates , opes , & commoda pleno alveo invehunt , onera in suos clientes derivando ; unde virtuti stimulus præciditur , & si labe aliqua corrumpantur Optimatum mores , quis eos reducet ? nisi dum Rempublicam suo casu in interitum præcipitârint.

In Democratia porrò , ubi populus imperat , quàm sæpe fasces imperitis obveniunt , quibus tam necessaria rebus gerendis prudentia , quàm consilium in sola est utilitate. Populus , & procellâ invidiæ , metûs , & factionum ventis jactari solet , & fræni impotens abripi vehementiâ cæci impetûs. Et quia sapientiâ ferè destituitur plebs , cùm honore , æstimatione , & præmio ingenia & virtus careant , jacent virtutis studia ; regnat interim adulatio , aut virtutis species , dum eloquentiæ fucò ad ipsam etiam virtutem morte multandam impellitur populus , & malevolorum artes triumphant super levitatem ejusdem : ut quondam Ostracismo Græcorum , insontes , & Patriæ Patres damnati. Verbo : nulla compede duriori premitur libertas , quàm ubi sic triumphare videtur.

Nolim tamen existimes , me hîc Monarchiam illam defendere , quæ multis adstricta legibus πανπασιλεία Græcis dicitur , dum omnium absolutus Dominus Princeps despoticum jus populo dictat. Cujusmodi est Turcis imperium , quorum Princeps , fortunarum , vitæ , auræque ipsius sic Dominus est , ut omnes mancipia ejusdem sese dum profitentur , ab ejus nutu penduli , nunquam sui securi , omnia hæc ei se in acceptis referre ajunt. Apa-
ge

ge vitiosam hanc gubernandi rationem , & sicut decoris omnis , ita æquitatis laude carentem *communiter*. *Communiter* dico ; scio enim barbariem esse tantam nonnullis Gentibus , ut ex nativa stupiditate ingenii ad servitutem redigi & debeant , & possint. Quia tamen communiter multi etiam liberè dedititii sunt , ad frændam gentem domandi sunt pauci , quorum contumacia id meretur ; cæteri ferè Regem sentiant , sed benignitate gubernantem.

QUÆSTIO ETHICO-POLITICA.

Quæ ætas regendo aptior ?

JUVENTUS.

Pessimè rationi congruit , aut orbi cõsulit , qui statèrâ pari exigit omnia. Non omnis fert omnia telus , nec omnia possumus omnes. Inæqualia sunt orbis partium pondera , pares molibus humeri. Quid valeant humeri , spectandum singulis inclamabat antiquitas ; audivisset monitum Phaëton , malè consultis Patris habenis orbem non involvisset. Anne tamen vel eò juventus sceptris indignior ? absit. Grandius pondus diademate orbis non habet ; væ , si infirmæ basi credatur. Malè putre molem sustinet. Non occupando , sed opprimendo est senio machina , quæ non nisi Herculeum petit latus , & mentem. Si fatiscat Princeps corpore , parum distat , quin fatiscat & mente. Agere fortia & dura pati , se & velle , & posse doceat , qui magnus esse famâ ; & gestis cupit audire , ut est folio. At quid horum aut velit , aut cum velit , possit is , cui ætas ruinam minatur ? ut Paridis pomum , sic imperia , gentium abritrio , vestigal erant florentis gloriæ , & fortitudinis. Quasi verò non solum virtutis , sed & vigentis fortitudinis atrium gradum sternat ad templum Majestatis regnantis. Et bene. Vigean in venis spiritus ; ut corpus animâ , sic vigeat virtute Respublica. Securitas , decus , incrementum fructus erunt Juventutis regnantis. Langueat contrâ caput ; ut senectus ferè est morbus , flaccescent omnia oportet. Sin cadat ,
titu-

titubant gressus, dum effatos artus acerba, vixque offibus hærens hyems constringit. At, estò, constet sibi mens grandis imbecilli in corpore. Nemo grandia patrat, cui non anni, sed momenta vix censum ducunt. Felicior nunquam Respublica, ac uno sub capite diu regi. Vix destinandis, nedum exequendis fatisdatur, dum menses ætatem definiunt. Turbantur ferè imperia, cum mors frequentior folio Principes donat. Successorum aliena sapè sunt consilia, placita, clientes. *Destruit, ædificat, miscet quadrata rotundis.* Verbo: confundit multitudo; quod, una si terminasset manus, ac mens, orbis probasset, regnum fundasset. Nova capita, novas sententias; hæ novas ferè leges parturiunt, & ut mutatio sin periculi, odii certè plena est semper, sic geminari credit populus jugum, dum geminatur legis arbitrium. Ut ut tractabilis sit populi cervix, durum tamen illi, alia, & alia in dies jura accipere, non secus, ac si membra eadem alteri semper applies capiti. Tempora consule, ubi frequens calor, & frigoris, pluvii, ac sereni vicissitudo: sunt morbi frequentes, fruges nullæ, aut vixdum coctæ. Typum hîc habes Reipublicæ, dum cana duntaxat filicernia sceptro digna creduntur. Mille remoras consilia optima, sirenes adulantum aulæ frequenter, tempestates & malaciam Reipublicæ mare patitur; quàm vegeto opus Navarcho, ut eluctetur? Et senium hoc ausit, ignobilior vitæ portio? in qua canities ipsa inertiae testis, aut quietis fomentum est? Rarò augusta sunt sensa animo, qui occasum jam spectat ætate. Tædet namque vel consiliorum, nedum ausum, quos vitæ jam tædet. Sera itinera lassatæ vires, sera consilia gignit mens annis gravis. Quid ausit pro Patria, qui quo pacto sibi constet, vix pensi sat habet? Malè navi pondus committis, quæ suis vix cohæret tabulis. Assymbola juventuti est purpura, quidnî ergo, & dotibus debita? Stat vivido ingenio, constanti pectore, memori mente ad magnos ausus Respublica. Malè his omnibus senium proficit. Vix gressum figit, capiunt oblivia mentem, constantiæ locò pervicacia dominatum obtinet. Judicii sui præsentia ac tenacitas, virtus illis visa, vitium est ferè domesticum; ut mortuo mederi, & senem admonere,

idem

idem meritò videatur Diogeni. Fatiscit denique vigor ingenii, cùm lux ipsa mentis fatiscit. Non annis, sed meritò stat folio suppar virtus. Nives, & rugæ quoties sunt mentis prudentiam? & pueros centum annorum reperiās. Neque enim ætatis lege meta prudentiæ definitur. Alexandrum severum ætate puerum, indole Imperatorem; Gordianum undennem, Othonem vix duoden- nem Imperratores fasti commendant. En quanta juven- tutis præ senio merita. Jure ergo finè ætatis discrimine Magistratûs quondam petendi veniam fore antiquitas sa- piens definivit. Ut natura non ætate, sed qualitate ter- rarum virtutem germinum, sic gratia non annorum, sed dotum syllabo definit gubernandi dotes. Quoties memi- nère fasti vel aucta, vel servata per Juventutem Imperia, quæ provectior vel minuisse ætas, vel perdidisset. Nun- quam Macedonia orbis limitem in Magno suo æquasset, si ætate provectus hæres sceptrā Patris sumpsisset. Cautela color mendax est, quo timorem sæpe palliat senium; & quia ardua vel tentandi, vel perferendi metus animum, spiritu, viribûsque jam fractum incessit, in occurrentibus ferè reddit trementem, nedum in majora Patriæ decora illustria quæque audentem.


S E N I U M.

QUàm multi regere cupiunt congenita indole, tam pauci virtutis merito possunt. Non fortuiti hæc dos vigoris, sed artis est. Rara ars, quæ longo non stetit stu- dio, si perfecta. Artem artium regimen esse meritò sa- pientes commendant. Prudentia, consilium, experientia bases, & fundamentum sunt artis, quibus molem omnem superstruit. Provectæ hæc omnia tributaria sunt ætati, non Juventuti. Semper purpuram concolor in venis sanguis ambit; an sympathiâ, an dominandi magis libidine? du- bium esto. At ferè, quod ambitur nimium, noxium est; ut cibi, quos adultera morbidorum deperit fames. Ut meritò non consiliis modò, sed curiâ ipsâ interdictum adolescentibus voluerit Tullius. Temeritas, inconstantia, vitæ libertas juvenilem sequuntur sanguinem plurimum; quid agent, si habenas, sui impotes, alieni impatientes fortiantur? Rarò ornat sincera gloria virtutibus animum,

nisi

nisi , cum forma , ætate ac viribus corporis ornare cessat natura. Tum maxima sumit incrementa virtus, cum exhausta propè languescunt membra. Mente, non otibus hæret ratio. Sapientiam in juventute desideras? senii dos est præcipua. Dedissent Superi ! non unum Regnis datum Icarum , non jam fabula , sed facti censerent , qui , quia præmaturè levati , se unà, ac folium perdiderunt. Domandus antè est sonipes , quàm fræni nescius gradiatur. Non petulcientis hæc spes ætatis est. Experientia , rerumque usus nisi clavum moderantibus acus sit nautica ; syrtes , ac scopulos Respublica metuat. Tempore stant utraque , non hodierno , aut hesterno duntaxat , sed lanuginem dudum emense ætatis. Silicernia dicat vulgus , aut sentiat , quos ætas aut lassat , aut frangit ; vident acutiùs mentis acie , quod alii toto intellectu non capiunt , suis ipsi usibus docti , quid sibi , quid suis , quid Patriæ profit , noceátve. Fructus credas , quos natura maturos antè , ac salubres non gignit , sed dum cura putridos facit , tum profunt. In Mespilo , ac sorbis senum lege consilia. Erroris hæc ferè expertia , quia carent temeritate ; fixo ætatis , & inconsulti ardoris Mercurio ; licentiæ limes statutus est , dum suo docta vel malo , vel documento canities est , & è malis propriis velut totidem spinis fructus successori legit dulcissimos, leges nempe quàm optimas. Calcarî gloriæ urgetur Juvenilis indoles , neque curat , neque præcavet crastina. Subitis , modò gloriosa sint , non salubribus consiliis rapitur ; dum errore suo, Reipublicæ aut periculo, aut damno præcipitem lugeat impetum. Gradario fertur senium pede , ut quod non risum modò , & blanditias , sed & dentem fortunæ persensit. A senibus nomen mite Senatus tulit Quiritum. Neque Athenæ Prætorio digna censuere consilia , nisi decas integra lustrorum exacta sit consultandi. Tum enim verò est acrior menti vigor & consultandi pernecitas , dum tardior est gradiendi facultas. Fruges Senatum consumere , aut numerum facere apta est juvenus. Zeri sunt Juvenes , unitas senis alicujus addita , omnibus dat vim , vigorem , regulam. Errando discere Juventus debet. Gubernanda magis , quàm gubernans. Infelix Respublica , quæ suis

erudiat damnis navarchum. Quisquis artem discit, instrumenta plura pessumdat. Utinam non, ut nonnulli Medici corporum, sic Republicæ exitio Juventus & discat, & doceat gubernare. At, estò, sibi constet vigor, & indoles Juventutis. Contumax ferè, & indomita plebs est; audet, cum trementem, aut flecti facilem sentit. Aut terretur, aut cedit facilè ætas imbellior. Non ità usu docta Reipublicæ basis. Umbra hujus plùs ponderat, quàm gladius juventutis. Non vitio magis, quàm affectibus patet cereus juventutis animus; aut tueri nescit sapienter sancita, aut umbras formidat. Nempe fluctum quemvis horret, qui mare non vidit furens. Conclamatum credit, cum alter operi manum admovens, fluctum frangit, & triumphat. Seris hic venit usus ab annis. Ut meritò Laconibus Seniores Lacedæmonii Lycurgo; Patres canis conspersi Romulo; Moyfi ipsi DEO sanciente Seniores in consilium adlecti. Nempe mens, ratio, consilium, senes, velut aras Numen inhabitat. Aras inquam, à quibus agendorum oracula, quia sexcenta sunt actorum monumenta. Quæ præteritis experti casibus, egère studiis, cos sunt & mentis, & animi, sive ad præcavendum, ne veniant, sive ad obviandum, cum venerint aspera: sive ad agendum, cum læta ingruerint; nè postremis elatio, primis abjectio mentem, animósque eripiat. Dùm contrà inops horum omnium Juventus, quia inops & temporum.



§. II.

*An successio electione præstantior? Quis ejusdem ordo?
& an fœminæ capaces Imperii?*



*Herculeum defessus Atlas in pondera robur
Poscit, & assueras grandia ferre manus.
O bene! si semper regnorum pondera natis,
Transcribant simili conditione Patres.*

DOCTRINA POLITICA.

Gentium, & populorum consensus geminam hanc imperiorum viam constituerunt, frænum videlicet innatæ humano generi cupidini imperandi. Torquentur Politici æriter, utra præstet; definit electionem Lipsius. l. 2. Pol. c. 2. *Cum spreto natalium jure Princeps suffragiis designatur. Successionem verò: cum gentilis is honos est, & Princeps & Principe nascitur.* Electio placet Germanis, Polonis, & aliis. Imò in Aristocratia, & Politica necessaria est, cum non omnes possint imperare. Hispani, Galli, Angli, & plerique hæreditariam successionem amplectuntur. Utraque sua habet commoda, suis non caret incommodis
utra-

utraque. Spectatis tamen omnibus successio electioni præferenda videtur; quam apud Veteres receptam ait Aristoteles 5. Pol. c. 10. Imò Lipsius. l. 2. c. 4. hodie (exemplis gentium, serie, & annalibus temporum testantibus) receptiorem ac meliorem asserit, cum Contzen. l. 1. c. 25. etsi electio foret antiquior. Et meritò id quidem, sive *successor*, sive *Rex* ipse, seu *regnum* spectetur.

Successor, ut ferè regio est sanguine, ità indole & virtute ad summa natus. *Neque enim imbellem generant aquilæ columbam*: & providentiâ Numinis, si umquam aliàs, virtutes Patrum cum sanguine in liberos transeunt; præterquam quòd educatio peculiaris, natura, & disciplinæ relictudo grandem animam, ac dotes communiter eisdem instillet. Unde præcipiant communiter Principum liberi, altis duntaxat intenti, & imitatione Majorum ad æmulationem accenduntur; viri autè, quàm alii adolescentant. Estò tamen, quod rarum in terris: stupidiore Principem cerebro gigni, aut infantem, vel puerum hæredem dici: nunquid Consiliariorum industria, vel Matris tutela (quam in monitis Politicis Lipsius commendat) felix Principi sustentaculum esse possunt; ut quondam Jojada sacerdos parvuli Joæ L. 1. Reg. c. 11. Irene Mater Constanti filio. Theodoricus Almarici Hisp. Reg. Dux Aurelianensis, nuper Ludovici XV.

Regem præcessorem si spectes, hæredem sceptri si sciat filium, quantâ curâ suo velut patrimonio Regno invigilat; ærarium, armamentarium, commodum publicum, velut sanguini suo æternum curat? dum alius, qui, ut Seneca loquitur, diadema gessit, cujus electio invidia, continuatio labor, & finis est odium, hæredem non habiturus coronæ, tamen si sanguinis habet, non adedè regni, ac suorum prospicit commodis, ut videlicet hi se meminerint Regios fuisse liberos, opibus, & dignitate pollentes; etsi regnum inimicis ipsis in prædâ obveniat, illi & citra metum securi, & supra invidiam potentes sinè sceptro perdurent. Unde fit, ut, cùm fortuna mores etiam mutet persæpe, principio electionis Trajanum populus exspectatur, & quietem; deinde verò sub Diocletiano, aut

Maximiano ingemiscat, & seditionibus ac turbis commota omnia defleat, & queratur.

Ex parte *Civitatis* porro quid successione felicius; tum quia veretur populus in eum quid iniqui tentare, quem successorem Patris simul, & vindicem novit; tum quia suapte ad reverentiam, & obedientiam magis inclinatur, dum cunas pueri ad purpuram nati, à DEO, & natura ipsa sibi velut digito demonstratas, & erroribus minùs obnoxias, quàm in electione fieri soleat, adorat, & veneratur. Ideoque nec indignatur parere ei, quem priusquam lucem subierit, nasci scivit, ut imperet. Præterea in successione abest civitatum pestis discordia, & seditio, quæ in electione specioso libertatis titulo adest communiter. Ambitio privatorum, & cupiditas eligentium, factionibus urbem convellunt, quæ sæpe (ut quondam Romanos Syllæ, & Catilinæ tumultus libertatis causâ excitus) non nisi urbis excidio, & civium sanguine restinguuntur. Dum, qui imperare ambiunt, opibus, genere armis, & animis pares, nec cedere invicem volunt, nec regere unà possunt. Electorum animos aut terrent, aut emunt; & qui eligunt, non virtutis (Lipsius in monit.) sæpe rationem habent, sed qui affectui, spei, ac lucro eligentium servit; jam etiam corruptela pecuniis, sponsionibus, ac matrimoniis votorum trahit suffragia: eligiturque, non qui optimus, & dignissimus, sed potentissimus, aut felicissimus, cujus ignavia Electoribus ipsis regnandi potestatem sæpe concedat.

Unde meritò Tacitus 1. hist. c. 56. *minore discrimine sumitur Princeps, quàm eligitur*: nam in electione electus ipse obnoxius vivit eligentibus, utpote quorum votis debet imperium; & cum in hos sæpe nihil audeat, non levis justitiæ sit remora. Cum porro liberos suos à morte in ordinem redigi posse noverit, deglubit regnum majori studio, ut suis corradat; & insolita dignitas animos suscitatur ad audendum in suos. Vel certè, ut filio regnum stabiliat, venales emit animos, nundinatur favores & amicitias Pater, per quas procantibus exteris regnum præripiat. Ex quibus si partium studio eligantur plures, vix Reipublicæ! Ut sensit Imperium Germanorum extincto
Hen-

Henrico VI. Friderico II. Rudolpho I. præsertim verò Henrico VII. Anno 1322. dum alii Ludovicum Bavarum, alii Fridericum Austriacum delegerunt. Sensit Hungaria, dum aliàs superior Ungaria Joannem Zapolya, inferior Ferdinandum I. Regem salutavit; alia Mathiam Corvinum pars, pars alia Casimirum Polonum scepro ornatum volebat. Sensit Græcorum Imperium Alexio Imperatore finè liberis decedente, dum, ut habet Choniates, *alii atque alii variè nominabantur; sed omnes, qui sibi opportuni, aut utiles essent, nominabant.*

Et quamquam non suâ causâ, sed ratione sinceritatis genti ingenitæ, amoris in pacem, & Patriam, genti alicui convenire præ cæteris possit electio, præ successionem, ut est in Germanico Imperio: his tamen ipsis incommodis ut mederentur leges, quàm exiguo numero Electores definiunt? quàm acriter stringit aurea bulla? quanto studio contemptui Imperantis præcavent? dum ferè potentissimum, & clarissimum deligunt; quàm denique finè præjudicio electionis liberrimæ, Electorum modestia, prudentia, & in Patriam charitas ferè tamen in Imperantium liberos diadema transfert, ac purpuram? adeò, ut testantibus monumentis Antiquitatis, nullis Imperatoris filius quietâ electione sit præteritus. Quod ipsum Augustissima Domus Austriaca, communi orthodoxi orbis gaudio, continenti in 286. annos serie hodièque satis demonstrat. Quod ipsum bellicosa Polonorum Respublica utinam eâ constantiâ observâset, quâ Jagellonicam Familiam pari serie, sibi olim regnantem constituit, dudum sanè finè sexcentis tumultibus, quibus hodièque scinditur, Ottomanæ Portæ dominatum vel ad Euxini Ponti terminos, vel in Asia Istro transito victrix minuisset. Claudio rem omnem cum Lipsio in monitis: *ubicunque bonum, & laudabile regnum in Perside, Macedonia, Ægypto, Sinesibus, in Hebræis ipsis, successio valuit.*

Si succedere genitori liberos oporteat, legitimis tantum jus est. Spurii, gentium, & populorum jure ventantur. Inter legitimos primogenito jus favet; & si duos nasci uno partu contingat, uter prior in lucem prodit, sceptri jure potitur. Primo-genitus is porro etiam jure

cenfetur, qui ab hoc regni capite, etfi nondum regnante, fit genitus; fanguini enim natura id tribuit in fucceffione, qui in utroque filio idem eft; neque enim per acceffionem regni mutatus eft in Patre fanguis, ut alter regni tempore genitus alteri fit præhabendus.

Quodfi primo-genitus mente fit captus, jure regni non gaudet, ut qui nec fe, nec fuos regere poffit. Secundo-genitus igitur regnum capeffit. Quodfi verò infania ad tempus, vel aggritudo obftet, jure non deftituitur, fed adjutorio eum levare oportet. Imò neque Sacerdotei non religiofum (nifi peculiaris lex gentium veter) jura, aut exempla arcent à folio. Sic Henricus Cardinalis Lufitaniam, fic plures alii alias rexerunt Provincias. Dixi tamen *non religiofum*; nam religiofus alieno obftrictus imperio, nifi votis à Pontifice folvatur (cujus exempla non defunt) regis fucceffionis capax non eft. Si Primo-genitus vivo Patre decedat, Regis nepos fuccedit præ patruo, quia in fpem regni natus eft. Si moriantur omnes hujus liberi, fuccedit Regis frater; fi hic quoque mortuus fit, fuccedit is, qui vicinior eft lineâ, non autem gradu. Lineæ regis tot funt, quot filios Rex relinquit: ex his fuccedit prior linea, quamdiu hæc durat; hæc extinctâ fuccedit fecunda, & fic reliquæ. Ut cum Juris confultis cenfet Vernulens. Fratribus Regis ac fororibus, cum Rex omnibus potiatur, vel certa regni portio pacificè poffidenda, vel penfiones annuæ ftatuuntur. Barbarum enim, quod gentibus nonnullis cum Turcis commune eft, ubi inauguratio, novi Principis, Fratrum, & fanguine junctorum cæde crudeliter decoratur. Felix cæterâ imperium, cui plures in fucceffionem funt Principes. Numerus enim horum, firmiſſimum Imperii columnen Lipſio, munimentum Tacito dicitur.

Fæminarum porro imperium, nifi lege, aut Patriæ moribus vetitum fit, non eft, cur penitus rejiciamus, ut bene Lipſius l. 2. c. 3. Eftò namque rideatur Europa à Sinis, velut fæminarum Imperium, cum tamen ipſi, Martino Martino teſte, inter prima fuæ Monarchiæ tempora fæminam imperantem cenſuerint; eſtò conſiliis, & ſenatu Roma fæminas exeſſe voluerit; eſtò imbecillis, &
gran-

grandibus curis minor, imò & sævus, & arrogans per
licentiam sexus judicetur; cùm tamen neque illis vir-
tutis via præclusa sit, coronis cur arceri debeant sexus
soliùs causâ, non patet. Fuêre scelestæ nonnullæ, fa-
teor; Jezabel impia, crudelis Athalia, Laodice sex filio-
rum suorum carnifex, luxuriosa Cleopatra, & in fratrem
immanis, Messalina, Faustina, Fredegundis sentinæ fadi-
tatum; sed hoc pacto nec viros imperio dignos concludere
oportebit, cùm & horum plures infanda quæque patrâint.

Ætas omnis heroicæ mentis fæminas nacta est, quæ,
ût bene Tacit. l. 6. caris virilibus fæminarum vitia exue-
runt. Sacræ literæ Jafelem, Deborah, Judith, Esthe-
rem, quantis laudibus prosequuntur? Historiam reliquam
nunquid Placidia, Pulcheria, Mathildis, Irene Augusta,
Libussa Bohemorum, Wenda Polonorum, Maria Ungaro-
rum, Margaretha Belgarum, Anna nuper Anglorum, Augu-
sta MARIA THERESIA hodie Ungarorum, & Bohemorum
Imperio recens plaudente, orbe toto stupente com-
mendant? Annon Semiramis Babylonem auxit, & muni-
vit? Justin. l. 1. Nunquid Tomyris ipso Cyro perempto
fines auxit? Herod. l. 1. Nõne denique Artemisiam Ca-
riæ Reginam pro Xerxe contra Græcos strenuè pugnâsse
ex eodem l. 8. novimus; ût Amazones, quas inter fabulas
æsent nonnulli, decantatas, Zenobiam Palmirenorum, Mau-
viam Saracenorum Reginas regnis formidandas omittam.

Una inter omnes Pulcheria ad vindicandum hoc fæmi-
nis jus suffecerit Theodosii Junioris soror; Imperii, dum
is adolefceret, felicissima gubernatrix. Cujus prudentiam
Lipsius in monit. l. 2. c. 2. testatissimam vel eo facit, quæ,
ut errorem fratris, libellos supplices, nè quidem visos,
subscriberis corrigeret, sapiens id inventum comenta
est; libellum ejusmodi à se confectum Fratri porrigit,
quo Eudociam Fratris conjugem in servitutem sibi depo-
scit. Annuit non viso libello Theodosius, & Pulcheria
Eudociam sibi mancipat aliquanto tempore. Repetit con-
jugem Princeps, cui sapiens Domina reponit: id, quod
Cæsareo suum esset jure, se minimè reddituram. Libellum
unà Theodosii manu subscriptum pandit, quo ruborem fra-
tri, nè lecta quidem minùs cautè subscribenti, iniecit. Ab-

It proinde universum illud Aristotelis l. 1. Pol. c. 8. quid-
quid masculinum, naturâ magis factum ad imperandum
femineo. Unde & Salica lex tum solum mulieres arceat
à solii hæreditate, dum mares adsunt; cui & ego libens
subscripserim.

QUÆSTIO ETHICO-POLITICA.

*Uter Principatus felicior, gentis rudis, an
Cultæ?*

PRO RUDI.

NUnquam felicior repit serpens, ac dum aprica val-
lim nullis horrent sentibus, aut spinis. Serpens
regnantium omnium icon pariter, & censura. Be-
ne consultum Principi, melius Reipublicæ, cum Provi-
dentia serpentem signat in Principe, nullis in via dolis
colombæ simplicitas lucet in populo. Quia obicem non
patitur oculus, ubi recessus nulli, non tam lustrat omnia,
quàm lustrando deliciatur. Candor vulgus, Principem
vis mentis commendet; ut regat iste, Cælum constituit,
regatur illud. Alterius officio, præter excelsam indolem,
mente; hujus obsequio, solo opus est animo. Neque ru-
di deest simplicitati animus, dum imbecillis conscia men-
tis, alienis & cupit, & gaudet regi juribus, tutius rata
jubentis parere arbitrio, quàm duci suo. Et bene; do-
cet ferè, quod nocet; docet pariter, quod deest; errat
semel, qui sequitur, si error obveniat; duplo errat, qui
ducit: quia erroris sui pariter, & alieni prædes est. Me-
ritò gentes complures debitam cunctis dotem credebant,
infra Principem sapere semper velle: quisquis supra illum
sapere ausit, læsæ reus sit Majestatis. Acerbior nulla hu-
manæ vitæ est sors, ac Judiciorum, sensuum, &, si ita
fas loqui, cordium singulorum telonia. Omnes hâc ostra-
cismi lege si non damnamur, multamur certè; Princeps
tantò ampliùs, quantò ut eminet cunctis altior, super o-
mnes natio finè esse eundem seu dignitas jubet, seu po-
pulus cupit. Quàm felix hoc uno titulo Princeps, cui
rudis,

rudis, populus paret; simplex mens, ut simplici oculo spectat consilia, & facta Principis; sic benevolo est animo, agendo omnia è jubentis imperio, ipsis aded nutibus obsequendi. Quàm commune, tam acerbum ferè Principibus malum est, subditorum curiositas, quæ, quantum alieni scrutatrix est muneris, tam sui incuria. Abest hæc, dum rudis simplicitas populum tenet. Cessat tum observantia temeraria, cessat judiciorum, & decretorum trutina; cessat animus, quo, aut urgeat, aut, dum in scirpo nodum quærit, vincat contraria. Da rudem gentem, regula illi non imperia, & minis firmata erunt sancita, sed nutus; umbra sui solem index, vulgus tale Principem sequitur, non quia debet, sed quia vult. Hic unus illi super Pandectas omnes, & sacram est paginam. Oraculum in eo Delphicum se rati habere, quod audiant, cui obaudiant. Cautos super Argum; providos, & sapientes se censent, tum maximè, dum unius ductu sinistris obicem statuunt, aut medelam ferant: secundos eventus aut fundent, aut prosequantur; belli & pacis studia pari sorte definiant. En quanta felicitas populi, Regis, Reipublicæ, dum simplicitas pacis atque concordia est fundamentum. Felicitas populo, facilitas Principi, reverentia in Regem, universi salus. Manus, ut oportet, sexcentas talis numerat Respublica, caput unicum. At estò, aut langueat, aut obtundatur vigor dexteræ noxio spiritu: sibilus flectet myricam; dum cultioris, quia doctioris gentis quercina robora vix fulmina torquent in obsequium. Væ rectoribus animantium, si suas nòssent vires. Nunquam paveret sonipes, plaustra camelus non ferret, turres Elephas, nisi ignorantia eos obsequentes, nos felices suâ ipsorum faceret ruditate. Quid, quod nulla hic conspiratio, seditio, doli. Ut quæ oculatos petunt, quibus, dum suspecta omnia, aciei quoque sint pervia regnantum consilia. Curiositas cultum, & doctrinam sequitur. Hæc in nullo ferè Principe, quod carpat, non reperit. Spernitur tum facilè, qui carpitur. Ægrè paretur ei, qui spernitur. Dum contrà nunquam se magis produnt obsequia, ac ubi amplissimum à scientia, cultuque discrimen est; ut luna, quod à sole remotior, clarius nitet.

PRO CULTA GENTE.

Quid acerbius Principi, vastras, an duras moderari cer-
vices? problema esto: ego sententiam fero, utris-
que pari demerito igni, & aquâ interdicendum esse. Um-
bra est Princeps, cujus nutus legum vicem non obtinent.
Quam porro vicem referant, ubi pervicacia clavum tenet?
quæ enim speranda aut promptitudo, aut constantia ob-
sequii, ubi exilitas mentis cerebri loco congenita neque
dignitatem purpuræ, neque sui debitum officii noscendi
est capax. Quantò ampliùs eminet Princeps fastigio,
tantò majoribus licèt sit dignus vulgi officiis, non in hoc
tamen passim censetur à populo stare dignitas ejusdem,
solii nempe culmine, decore purpuræ, pompæ frequen-
tiâ. Imbecillis est populo mens. Non assequitur Hercu-
leis paria viribus curarum pondera, quibus ampliùs, ac
ornetur auro, gravatur purpurâ: Spinas diadematis nescit,
quibus caput Principis petitur; cæcutit, quo pacto tor-
menta animi felicitatem illam extenuent, in qua, quia
nihil asperi palpant, reperiri quoque nil existimant. Men-
sura nempe judicii mensura ferè est sensuum vulgi, cæcu-
tiunt ad solem noctuæ, sibilum surdastri non sentiunt.
Acriores quamvis sint stimuli, quibus Princeps configitur
(ut ferè latentia mala furunt acerbis) nulli tamen esse
creduntur, quia nulli passim videntur. Et nōne vel eò
acerbius sit fatum purpuræ, tum quia ruditati cæcæ im-
ponitur fulgore ejusdem, aculeis spinarum scatentis; tum
quia potentiùs configunt animum vulnera, quæ, quia la-
tent, nulla censentur: atque adeò adiutorem, aut miseran-
tem nullum habent. Quare cum suis divitem commodis,
nullis obnoxium incommodis vulgus Principem spectat,
ut amamus nostri causâ acerba ferentem, sic sinistro judi-
cio proum est Principem minùs amari. Minùs quisquis
amat, si ruditatem addas, ut pervicax nullo negotio est,
timoris ferme solius fræno stringendus est. Neque mi-
rùm. Nulla ignoti cupido, minùs amor. Pabulo nutri-
tur flamma; amor amantis per aduersa meritis, ut pabu-
lo crescit. Hæc si non videantur, amabilitatem non in-
di-

dicant, atque adeò pondus amandi non addant. Nemo unus inter homines diligit, nisi quod tacitè ut minùs, fin palam probet in altero. Probatur nobis ampliùs nihil, ac dum nostri causâ mala ferentem cernimus; propterea, quòd nos ipsos reflexo amore diligimus, cùm alterum amamus, quia nostri commodi causâ patitur. Quid porro ab ejusmodi fungis sperandum, hoc præsertim ævo, ubi consiliis plura aguntur, quàm viribus? Da discrimen, quis se ahenum pro Regis capite opponet? Quis sanguine, & morte Patriæ, ac Reipublicæ fidem satis suam probabit? Fidem nescit, qui neque, cui fidem probet, Andabatarum more, neque cur probet, satis cognoscit. Commendat Principatum amorì comes tractandi facilitas. Non hæ rudis populi sunt prærogativæ. Cervicem rudem durities, & pertinacia passim consequitur. Scilicet cùm ratio, judicium, providentia exulat, impetus ferarum more habenas regit. Tormenta ipsa, aut verbera vix adeò durum compescat, ut verba, ac ratio cultam, prudentemque gentem pelliciant. O quanto felicior purpura, suavi cincta illicio, quàm duro compedum, aut catastarum satellitio horrida. Ad hæc inconstantius nihil multitudine rudi. Arundo ectypon, sit, auræ cuivis obaudiens. Verbis rapitur, quæ audit; non merito, quod non assequitur. Corticem pensat, non nucleum. Hinc pretio ferè cuique venalis. Da Catilinam, non pro Rostris cum Tullio utiliter, sed plausibiliter dicentem; mancipia linguæ suæ gentem totam numerabit momento. Trajanus testis sit. Limes ejus erat Imperii communis cum orbe, & natura. Et tot subactis gentibus vix ullam censuit fidem, quia omnem rudem, & barbaram. Pari levitate stat illis fides, atque perfidia, quòd stoliditate suâ nec illius decus, aut debitum, nec hujus probrum, aut scelus assequi possint. Et quo pacto Argis ævi nostri hostibus noctuæ hæ suas ipsæ amantes tenebras resistent? non clangor litui, fragor armorum, aut impetus laurum extorquet, meliùs rudi gente id tigris, aut panthera præstabit. Jungenda militari virtuti cura, solertia, providentia, non ignavia rudis; nè lanicnam magis subeas, quàm arenam. Cultioris hæc omnia sunt


sunt populi decora. En, ut & in pace decus, & in bello præsidium gens culta sit Principi, præ ruditate inculta.

QUÆSTIO IV.

De Rebus publicis hodierni orbis.

§. I.

Romani Imperii Respublica; numerus, & munia ejusdem Electorum.



Signa quot alta vides Domino famulantiæ soli,
Cuncta suas obeunt officiosa vices. et
Multæ Teutonicæ quoque sint licet æra coronæ,
Nulla vacant: proprium singula munus habent.

DOCTRINA POLITICA.



Europa omnis partium orbis mole suâ, & ambitu minima; dignitate, opibus, scientiâ, & armis maxima, Monarchicam alibi, Reipublicæ formas alibi obtinet. Duo censet imperia, Romano-Germanicum, seu Occidentis; tum Orientis, seu Romano-Turcicum, cui hodie præest Achmetes. Regna
majo-

maiora decem, minora complura; Ducatus, & Principatus quàm plurimos.

Romanum à Roma condita anno orbis 3230. Regibus primùm, tum Consulibus, Cæsaribus deinceps, seu Imperatoribus paruit. Primus horum Julius Cæsar, à cæsarie, cum qua natus, vel à cæsa Matris alvo dictus; Imperatores porro dicti sunt, eò quòd invisum Romanis Regum nomen fuerit. Cæso per Julium Brutum, & Cassium in senatu deinceps Cæsare, Triumviri Imperio dominabantur, Antonius, Lepidus, & Octavianus, qui superatis cæteris, & ad Actium præsertim Antonio cum Cleopatra, Imperio potitus, annis 40. dignitatem hanc stabilivit, & posteris transcripsit. Caput orbis, & Cæsarum sedes Roma sola permansit, donec Constantinus erectâ Urbe sibi cognomine Constantinopoli, Imperium in occidentale, & orientale per filios est partitus. Desiit subinde in Augustulo Imperium Occidentis, & Regibus paruit Italia. Donec Carolus Magnus Adriano Pontifici contra Desiderium Longobardorum Regem suppetias tulit, & in gratæ mentis contestationem, annuente Nicephoro Occidentis Imperatore, Romanorum Imperator à Leone Tertio est salutatus, anno Domini 800. A Francis in Saxones, Bavaros, aliòsque sceptrum subinde translatus. Donec concordii Principum Germaniæ calculo sub Ottone III. Imperatore sancitum, neminem, nisi germani nominis Principem in Imperatorem eligi posse, quod ipsum à Gregorio V. Ottonis consobрино legibus confirmatum. Tum devolutâ in Rudolphum I. Habsburgicum coronâ, & per varios Imperio gubernato, hodie continenti successione, ab anno 1438. Augustissima Domus Austriaca clavum moderatur. Quodsi mirari velis hanc continuam domûs unius successione, causam accipe ex statu Imperii, titulo de Opibus Imperator: Ubi præcipitur: licet electio vigeat, tamen inter alia, quàm maximè Electores opum & divitiarum tenentur habere respectum, ut videlicet talem in Imperatorem eligant, cui ex patrimonio proprio tantum supersit æris, quantum ad magnificentiam hanc sustinendam satis esse possit. Neque libertati Germaniæ Virtus Austriæ coronata unquam fuit adversa.

Forma duplicis hujus imperii est Monarchica. Germanici insuper est Electitia, Aristocratia, & aliquantum Politia mixta. Lampadio teste P. 3. c. 7. Cæsar Aristocratici Imperii partem diuidiam solus obtinet, & multa solus monarchicè temperat. Multa enim, præter Imperatorem, qui caput est, etiam à cæteris, veluti à membris, dependent in hac gubernandi forma, scilicet ab Imperialibus statibus, qui tres sunt. 1. Electorales. 2. Principes seu Ecclesiastici, seu sæculares; ad quos Landgravii, Comites, Barones reducuntur. 3. Libera Civitates, quæ in Suevico latere sunt 31. in Rhenano 35.

Imperator Romanus, cum per bullam auream à Carolo IV. certis legibus definitam, jure jurando in coronatione, & unctione sua se obstringat: *Se velle Catholicam Religionem servare*; præterea cum habeatur in capitulatione Imperii, quod juret: *Se velle debitum Pontifici honorem habere, & Ecclesiis donata conservare &c.* videre licet, non nisi Catholicum hanc dignitate ornari posse. Jura ejus sunt: bella indicere, sancire fœdera, Civitatum, & Academiarum jura tribuere, Electores facere, Duces & Principes creare, imò & Reges dicere, ut Henricus IV. Wratislaum anno 1086. Philippus Imperator Primislaum Bohemorum Ducem Regem an. 1199. ita Stranskius in Geographia Bohemiæ c. 8. Leopoldus I. Brandenburgum Electorem Fridericum tertium 1700. Regem Prussiæ dixere. Vectigalia tamen non sine Electorum consensu instituit. Spirensi Camera Imperiali Cæsar non subest, sed caput ejus est ipse. Ubi Cæsar residet, vi bullæ aureæ C. 9. Judicium Imperiale morari potest, Imperii res tractans; hujus tamen consilii Cæsarei Vice-Cancellarius locò Moguntini licet esse possit Nobilium quispiam è Comitibus, vel Baronibus Imperii, non tamen potest esse Nobilis terræ alienæ.

Primus ab Imperatore Rex est Romanorum, qui ut vivente Imperatore eligi potest, ita electus, sæpius nihil, vivente, nec impedito, aut inhabili reddito Imperatore, suo nomine facere potest. Vicariâ potestate præest imperio, & successor certus sine nova electione, ut Delphinus Galliæ, Walliæ Princeps in Anglia. *Caput &*
Aut.

Augustus dicitur, simplicemque aquilam in insigni gerit, Imperatorem tamen *Dominum* nominat, qui etiam *semper Augustus* dicitur, & duplex eidem aquila pro scuto est. Hodie cum etiam Reges hunc sibi titulum arrogarent, Imperatori dari solet *Augustissimi* titulus.

Imperator olim omnium statuum suffragio eligebatur, sub Ottone III. ad 7. duntaxat Electores devoluta est fors, quod ipsum *Bulla aurea* Caroli IV. confirmat. Regia horum est dignitas, & potestas. Unde Ecclesiastici 3. Moguntinus, Colonienfis, & Trevirensis Cardinalibus ipsis in celebratione Curiae Imperialis non cedunt; sic Colonienfis Legato Apostolico Cardinali Maronio non cessit. Saeculares pariter 4. videlicet Rex Bohemiae, Palatinus Rheni, Saxo, & Brandeburgus Regibus ipsis competunt; hinc Marchio Brandeburgicus Rudolpho II. tum Ungariae Regi Ratisbonae cedere detrectavit. Jus est Electoribus Imperatorem dignum eligendi, qui etiam Wenceslaum ignaviae suae causa post 22. annorum gubernium exauctorarunt. Praeterea ad utilitatem Imperii celebrandi comitia inter se, monetam cudendi, fodinarum &c. quae Regum propria sunt. Juxta bullae aureae sancita non requiruntur ad validam electionem omnium Electorum suffragia, sed sufficit eorum pluralitas sola. Haec bulla aurea à Carolo IV. sapientissime instituta est, ad firmandam pacem Electionis Germanicae, quae alias facillime turbis obnoxia esse consuevit; estque bulla haec nihil aliud, quam consensu Imperii statuta nonnulla, circa requisita ad eligibilitatem, item modum coronandi Caesaris, & ejus auctoritatem, demum circa Electorum potestatem.

Romani Imperii nomine tota venit Germania, quae à Caesaribus Maximiliano, & Carolo V. in 10. circulos distributa est. Suum quivis circulus directorem habet, ad quem querelae deferri possint, & debeant, priusquam ad Curiam Imperialem, & Caesarem rerum omnium arbitrum causae devolvantur. *Austriaci* director est Archi-Dux Austriae, Serenissima hodie Regina Hungariae, & Bohemiae. *Bavarici* Archi-Episcopus Salisburgensis, & Dux Bavariae. *Suevici* Episcopus Constantiensis, & Dux Wirtembergicus.

Rheni Superioris Episcopus Wormatiensis, & Palatinus. *Rheni Inferioris* Archi-Episcopus, & Elector Moguntinus. *Burgundici* Rex Hispaniarum. *Franconici* Episcopus Rambergensis, & Marchio Culmbacensis. *Saxonici Superioris* Elector Saxoniae, & Elector Brandenburgicus. *Saxonici Inferioris* Dux Magdeburgicus, Dux Bremensis, & Dux Luneburgensis alternant. *Westphalici* alternativè Episcopus Monasteriensis, Rex Prussiae, quæ Dux Cliviae, & Palatinus Jul. Silesia, Bohemia, & Moravia circulo nulli adscribitur; rege tantum suo gubernatur. Mantuam, Mutinam, Regium &c. Matricula Imperii per Lampadium sibi adscribit, jus tamen suffragii non habet.

Celebratis comitiis, quibus non de Rege, vel Imperatore eligendo agitur, Electores, & Principes viritum dicunt suffragia. Comites & Prælati curiatim. Civitates simul duo obtinent vota, & quidem sententiâ non nullorum non modò consultandi, sed etiam suffragandi.

Septem erant Electores principio, ut dixi. Additi his sunt duo *Bavarus*, & *Brunsvico-Luneburgicus*, seu *Hannoveranus*. *Moguntinus* dignitate eminet. Decanus hic est Collegii Electorum. Mensis unius spatio, Cæsare fatis functo, convocat Electores, eorumque suffragia excipit. Custos Matriculae Imperii, tanquam Archi-Cancellarius Germaniae. In Germania extra Diocesim Coloniensem dextrum latus occupat Imperatoris.

Trevirensis, cum Gallia olim ad Imperium spectaverit, Archi-Cancellarius est per Galliam. Primum ei votum aurea bulla tribuit. In confesso ex adverso Cæsaris sedet, facie in eundem intentâ.

Colloniensis Archi-Cancellarius est per Italiam. Votum habet secundum. Alternativè cum Moguntino coronat Imperatorem, extra Diocesim alterutrius, scilicet in sua quilibet. In sua Diocesi, & extra Germaniam à dextris Imperatori comes est.

Rex Bohemiae, quicumque à suis electus fuerit (antequam Augustissimæ domui Austriacæ hæreditarium fieret regnum) elector erat Imperii; cæteri enim Electoratus

gaudent succēssione, quæ si deficiat, Imperator pro libitu confert, quod non erat in Bohemiæ Regibus. Hic ergò Rex in electione est arbiter suffragiorum, & decidit, si vota sint paria. Per bullam tertium votum habet. Pincerna est Imperatoris, & primum offert potum Imperatori, non id tamen tenetur præstare coronâ actu redimitus, nisi propriâ sponte velit. In comitatu Cæsaris, Cæsarem, & Regem sequitur, Imperatricem præcedit.

Palatinus Rheni, nondum instituto Electoratu Bavarico, Archi-Dapifer fuit, & primum Imperatori attulit cibum. Vacante Imperio, per Rhenum, & Sueviam vices agit Imperatoris. Pomum aureum Cæsari desert.

Saxo Archi-Marescallus avenam primum solet distribuere, dum solennia Curia celebrantur. *Ensis* portare solet ensen Cæsaris. Per inferiorem Germaniam Vicarius est Cæsaris.

Brandeburgus Archi-Camerarius, aquam manibus Cæsareis porrigit. Sceptum Imperiale gestat in publicis actibus. Sextoque voto gaudet per bullam auream.

Bavarus Electoratus suum sumpsit initium per Maximilianum, in præmium bellicæ operæ Cæsari fideliter navatæ, cum factiosi Bohemorum non nulli Fridericum V. Palatinum in Regem assumerent, adversus Ferdinandum II. vivente adhuc Mathiâ Imperatore, Regem Bohemorum anno 1617. creatum. Pugnaverat Fridericus hic sinistrâ alæ ad Pragam 1620. tum ad Hollandos salutis causâ sese recipiens, Electoratu exutus est. Recepit deinde, Osna-brugenſis pacis pactis, Carolus Ludovicus Friderici filius cum Palatinatu inferiore, & cum Archi-Thesaurarii titulo Electoratum suum; eâ tamen lege, ut Bavaris cum Palatinatu superiore, & Archi-Dapiferi titulo Electoratus maneret, quorum stirps, si penitus fatis cederet, Palatino omnia rursus obveniant. At cum aliter visum esset Numini, & Palatina priùs deficeret linea, 1685. Leopoldi I. favoribus Philippo Wilhelmo Neoburgico Duci Palatinalis Electoratus collatus est. E cujus sanguine Magnorum Genitrix Cæsarum Eleonora Magdalena Theresia Leopoldo conjux adlecta anno 1676.

Brunsvico - Luneburgicus, seu *Hannoveranus*, suam Leopoldo I. debet originem. Archi-Vexilliferi titulus cum Electoratu Ernesto Augusto obtigit primum. Cum tamen Dux Wirtembergius, utpote cui Imperiale vexillum commissum, non modicum obfisteret. Excepit ab hujus factis Electoratum Georgius, Britannico hodie folio clarus. Gemina Brunsvicensis Ducatus linea suo merito memoranda nobis hic venit. Luneburgica, seu Hannoverana altera, ex qua Wilhelminæ Amaliæ, Augustæ Josephi I. Conjugis Genitor Fridericus Calenbergæ, & Grubenhagii Dux. Altera Daneburgica, seu Wolffenbütellana, ex qua per Ludovicum Rudolphum genita Elisabetha Christina, Augustissimi Caroli VI. Conjux Augusta.

QUÆSTIO POLITICA.

Utra felicior Respublica, multitudinis, an paucorum suffragiis Principem legens?

PRO MULTIS.

JUS naturæ, & Imperium duo sunt nomina, res una. Membra mentem, orbis Numen, Principem populus cælo datum adorant. Quid mirum, pacis, bellique interesse plurimum, ut ab uno pendeant omnia? cum finè hoc, nè domus quidem, aut mapale rusticum, nedum Respublica sui secura consistat. At estò, unum præesse velis Imperio, hic unius, an plurium calculum ferat, vix quærendum existimo. Amari ab omnibus, & coli Principem lex, & Respublica imperat, quæ ametur, qui imperat forsan invitis, aut invisitis? Regit omnes; ut rectè regat, amans nempe, & amatus, delectum, & suffragia ferat omnium, oportet. Non solis Procerum aulis, caulis æquè, & mapalibus civium dat jura sceptrum. Pari forte parent fora cum Curia, communi lactantur sanguine, vectigalis, homagii, fidei. Quid nî ergo omnium quoque vota & petat antè, & referat imperaturus? Ægrè sanguis impenditur ei, quem indignum censent alii; parere aut nesciunt, aut nolunt, quorum adversatur aut ingenium,

genium, aut animus. Fides incerta est, dum invitis leges dictantur. Det ergo sua Nobilium cætus suffragia, stat horum gloriâ Principis decus. Accedat civis, cujus nervo si non fundatur, stabilitur securitas solii. Claudat agmen plebs infima, quæ vita est Reipublicæ. Cui sunt primi, nervi secundi, sanguis ultimi. Quidquid horum adimas corpori, truncum sinè vigore cadaver; quidquid horum adimas Principi, umbram magis, quàm Principem spectabis in solio dominantem. *Per me Reges regnant*, divino docemur oraculo. Nunquam certior non tam hominis, quàm DEI deligentis est regula, quàm dum concors est suffragiorum unio, & sententiarum par sensus. Quem populus uno deligit corde, cæli, non mundi calculo solium tenet: vox enim populi, vox DEI. Discordia mentis, & oris, mendacium cælo & orbi invisum est; dum discordant suffragantium studia, mendacio par fatum Reipublicæ pestis est. Feliciùs nunquam, ac dum multitudo consentiens in solium levat. Nil Orienti, Sueciæ, aliisque frequentius, ac regni totius, plebis, & Optimatum studiis sceptrum deferri. Quàm sæpe, quia Electores pauci, pestis, non Pater occupat diadema? dum clitella auro onusta gazas primùm, tum animos deligentium occupat, aut argentanginâ fauces laborant, nè deligant, per quem consultum publico, sed quem utile privatum poscit. Procul est pestis hujus discrimen, ubi populus deligit: quem si cælum ipsum aurum depluat emere nunquam possis. Flectuntur donis Numina, quidnî & paucorum venalia plus offerenti suffragia. Multitudini contrà ferè comes est veritas. Sed & pestis rara, quæ, potentissima sit licèt, grassetur in omnes. Quid si tamen indemnitas sint deligentium corda, sint manus innocuæ hâc Autolici pice. Consentiant singulorum studia, nè deligatur alius, nisi qui dignissimus visus. An non prouior nihilominus error paucorum, ac sit Universi? Quæ Pharus aded aut excelsa, aut clara, quæ vadum omne sinè offensione pandat decursui? Plura cerebra, plura volvunt; & oculi plura vident. Nihil magis Reipublicæ interest, ac deligi quemque optimum. Amariùs quippe suo, & subditorum imperat comamodo delectus, quia vel eò dilectus. Mos geritur im-


peranti faciliùs, cujus sponte sunt expetita imperia. Ut & pondus ipsum suaviùs premit, quod manus, aut arbitrium proprium lacertis imponit. Ubi amatur cum præcipiente præceptum, decumana etiam pondera solatia censet omnis Respublica.

PRO PAUCIS.

ERrat, qui principiorum multitudine perfectionem metitur effectus. Non copia, sed præstantia fundat felicitatem. Monstrum natura sæpe nesciret, nisi multiplici genitum sanguine. Quasi verò devium sit, quod in multa divisum, aut è multis connexum. Ordinem ferè paucitas, confusionem multitudo comitem habet. Plurium manus iconem, coquorum ferculum, architectorum mens palatium non perficiunt, sed deformant. Discrepant ferè sensus, ut genii, gustusve mortalium; quòdque probatum uni, non vacat alteri culpâ. Nunquam calculorum numero, sed judicio acri eventus rei pensandus. Et quis hoc quærat in trivio? abdita & sacraria, non compita sunt oraculorum delubra. Delectu Principis nil Reipublicæ majoris est ponderis; nil expectatione majus orbi: in hoc quantum multiplicantur sententiæ, acrimoniæ distrahitur. Vigent spiritus ampliùs nunquam, ac dum stringuntur in centrum; languent, dum dissipantur. Flamma flammæ addita incendium, & vim auget, quia naturæ ejusdem. Calculus ubi additur calculo, frequenter retunditur; quia ubi copia, certa una hæc regula est, judiciorum fore dissensum. Pœna hæc, an natura sit congenita hominibus arrogantia, dubites. Caput sensum sequuntur ferè sententiæ; quòdque acerbius, dum suæ cuique placent causæ, ut matribus liberi, quin ut quisque sibi; tam ægrè receditur à suscepto, aut propugnato consilio, ac à se, quia nemo facilè displicet sibi. Paucorum vota vix idem sibi sæpe statuunt centrum, quid multorum factura sunt? præsertim ubi spes allicit, metus retrahit, imber aureus fascinat? Facilior fors est paucos, atque multos in unum inflectere. Ut rivum duxeris leniùs, quàm torrentem. Naturâ ferè comparatum sic est, quantum distat à cælo orcus, tantum nobilis à plebejo sensus. Ille, quia superficie capitur,

pitur, ut cortex solus sensui subjacet, sic colorem vixdum, & vultum Principis spectat pro merito; dum sensus intimos rinatur alter, atque adeo suppres clavo animos, & mentem pandit. Væ Reipublicæ avium, si talpa sententiam ferat, nunquam Aquila chorum ducet volantū. Adde, quod scindi vulgus ferè oporteat, vel ideo, quia vulgus est? levitate, impetu, fūco ducitur, imò rapitur. Inconstantia pari, quā sceptrum defert hodie, rapit postredie, jure non demeriti, sed arbitrii inconsulti. Seditioni magis, quā delectui plebs opportuna est. Error eidem pronus & facilis simplicitate nativā: doceri tamen impotens, quia parem non patitur, majorem non vult; erroris redargui minū; quid superest? nisi ut sæviat licentiā furens. Sopit flammam cinis; auram præbe, excidium vomet. Sic plebs, vim si addas, cervicem sceptro fleçit, fortunis interim imminet, non animo, sed occasione nocendi carens. Occasionem præbe multorum delectu, intra urbem hostem senties, qui dum distractis viribus grandia tentavit nunquam; unitis, quæ tentat, rumpit. Numero arrogans fit ruditas, dum potentia & protervia ad arma provocet, & ferro decidat. Rara plebs, cujus pars læsa non sit: coquantur injuriæ veteres, & in ultionem urget memoria vulnerum, dum occasio cætūs est. Cerebrum scrutariæ penūs vix capax, de rege, de folio judicet? sus de Minerva? Apage, nisi flagitiis, quibus non caret vulgus, vel patronum, vel conniventem deligi malis, quā vindicem legum, & arbitrum juris. Orbis sententiam vide, & concludere. Romanos fasces non plebs, sed senatus Patrum annis, virtute, sanguine nobilis sacravit quondam: hodie Imperium Imperiorum novem virorum delectu; vicarium ipsum Numinis solium purpurati duntaxat cætūs
sententiā coronatur.

§. II.

Quæ Imperii Orientis Respublica ?

Si virtute pares inter stirpe eminet alter
 Æmulus, est summo dignior ille loco.
 At solos qui jactat avos, stirpemque vetusta
 Æmulus, est summo dignior ille probro.

DOCTRINA POLITICA.



Imperium Orientis, quod hodie Achmetes regit,
 à Constantino fundatum Græci Imperatores te-
 nuerunt usque ad annum Domini 1204. quo
 Comes Flandriæ Balduinus, Imperator electus,
 succedentibus deinde Latinis aliis, rexit. Anno 1452. sub
 Constantino, Mahometes orbis terror Bizantium barbaræ
 potestati subiecit, & expugnavit, Græcorum avaritiâ, &
 perfidiâ, hostium molimina promovente.

Ex eo tempore *Sultani* rerum potiuntur. Monarchi-
 câ quidem, ad eò tamen barbarâ potestate, ut suprà Q. 3.
 §. I. sub finem dixi, ut nè quidem auræ hujus, aut vitæ,
 quâ fruuntur, sese Dominum, quisquis ille fuerit, dicere
 ausit; sed vitam, & fortunas gratiam esse Cæsaris, velut ali-

alicujus Numinis, fateatur. Neque immeritò, nam etfi
elementiæ laudem peculiari studio Sultani Turcarum (itã
hodie communi vocabulo Imperatores dicunt) in popu-
lo, ac subditis venentur, unius tamen illius arbitrio mo-
mento quovis fortunæ, ac vita cujusvis, vel maximi, pen-
dent. Quo factum, quòd cupiditate inducti, belli cum-
primis tempore, quos opulentiores Provinciarum Præsides
nòrunt, vitã sæpe, ac fortunis momento exuerint. Reis,
leviorum sæpe criminum causâ, bonorum omnium jactu-
ram, & mortem ipsam gladio, vel resti ut plurimùm gen-
tis more, oppetendam ob Imperatoris Imperium in lu-
cro, & honore ponentibus.

Nullus apud hanc gentem nobilitatis, aut hæreditatis
est cultus. Virtus bellica sola nobilitatem fundat, & pro-
mover: ac præsertim acre in Christianos odium. Litera-
rum pariter, ac sapientiæ nullus usus, naturale duntaxat
rationis lumen, & experientia moderatur consilia. *Bassa*
iis dicitur, qui nobis *Comes*. Geminæ in signum eidem
præferuntur (nobilitatis id decus censent) caudæ equinæ
perticis affixæ, vulgò *Tug*. Cui trium caudarum jus est,
nobis *Princeps*, iis *Vezirius*, seu *Uztuglii Bassa* dicitur;
neque ulli gloria hæc obtingit, nisi quibus Cæsaris nomen
decretis subscribendi munus est. Aut si quem peculiaris
fides bellica, & virtus distinxerit. Imperator 7. *Tug* ho-
noratur.

Duo in aula à Cæsare obtinent summam dignitatem,
& potestatem. *Vezirius*, seu *Vesiriasam*, belli Ducum
caput. Et Præfectus aulæ seu *Bascapu agassi*. Ille bellum
omne moderatur, & Patrimonii Cæsarei custos, & pro
necessitate eventuum, alienator est. Camera Præsidis ra-
tiones exigit, & thesaurarii. Aulæ Præfectus Cæsarei æ-
rarii tributa, & rationes lustrat, nè aut fraudibus detri-
menta, aut injusta incrementa sumat cum onere populi.
Utriusque rationes vestigantur à duobus, quorum summa
est autoritas, Cæsari à secretis; qui fraudem, si quæ in
perniciem ærarii admissa sit, Cæsari detegunt morte pian-
dam. *Vezirii* porro dos maxima censetur, singulos in
annos ærarium aliquã sui parte ut augeat; neque enim
aliàs meliùs gentis avaræ animos lucrari potest.

Quatuor à Vezirio Principes, Ægyptum unus, Babiloniam alter, Nissam tertius, Bosnam quartus obtinet. Triennio rerum potiuntur. Tum successor Provinciæ statuitur à Vezirio. Hi ferè reduces à sanctioribus consiliis, & Vezirio ipsi sunt successores. Septem aliis ad consilia Vezirius utitur, quos vulgus *Cubbe Vezirios* nominat, quorum caput *Nissanghi Bassa*, tum maris Præfectus *Capitan Bassa*, qui absente Cæsare vicariæ sunt potestatis. Et præsentem etiam eodem Sultani nomen subscribunt. Vezirio tria, Cube Vezirio mille, Imperatori 40. Janitscharorum, 30. Spahorum millia (Equites isti, pedites illi Turcis sunt milites) comitatum præstant, & excubias agunt.

Dicti 4. Principes consiliis à Vezirio reguntur. Primus eorum *Ægyptius* 27. censet Provincias, 20 millium præsidio firmas. Pars horum Candiam, pars Meccam Curraë Mahometis sanum, pars præsidia, & confinia adversus Indos, & Sinas tuetur. Belli tempore horum 20. millium numerus demitur nunquam, sed suo ære Pro Rex octo hominum millia sistere jubetur. Quodsi Indos bello petat Pro-Rex, cum suis octo millibus ipse cum Imperatore cogitur proficisci. *Babylonicus* 12. bellatorum millia numerat, Provinciis quinque, maximè adversus Persas tuendis, necessaria. Si bellandum cum quopiam, Persis exceptis, sex millia secum in Cæsaris obsequium ducit, reliquis 6. præsidio relicti. Si Persa petendus, vi omni domi suæ hostem adortur. *Bosnensis* tria bellatorum millia sistit; quia verò regio omnis, Imperatoris munere, & in octingentos penè *Saimos*, virtutis bellicæ causâ, divisa est, horum penè quivis belli tempore 100. secum pugnatore cum adferat, quot ex his millia cogat, nullo negotio conjeceris. Ad hæc tartaro si pax sit, trecenta millia sistendi copia est facilis, quæ tamen vix vicenis ad belli regulas culti exercitûs millibus paria sint.

Belli, si quod immineat, apparatus, universo imperio geminis datur mandatis, ad Vezirium altero, altero ad Janitschar-Aga, seu peditum Ductorem. Hi subinde ex omnibus ditionibus militem cogunt, quisquis armorum tractandorum capax. Tum mercatoribus, & cauponibus, ut alimenta Provinciis, ut viarum commoda procurent, impe-

imperatur. Nullis stipendiis meritori, ad exercitum, plurimum millium censu, confluunt; qui exercitum suum excursionibus identidem præcurrunt. His portò cum per solas excursiones vitam ducere non liceat, annona sumptu Cæsaris tribuitur. Procedente Exercitu ea est disciplina, ut minimam colono, fortunis, aut agris illatam injuriam morte piare debeat miles. Vicem militum, si res poscat, opifices, lixæ, & calones subire coguntur.

Occupatis regnis, Cæsaris arbitrio dividuntur Provinciæ, harum tributis militaria penduntur stipendia; quod his redundat, Patrimonio Cæsaris libero obvenit. Nam cæterum prædæ pars ioma Cæsaris, officialium, & militum cætera est. E captivis junioribus, stus quisque obvenit Imperatori. Hic si moratus, aut docilis, aulæ adlegitur; sin contrà, Janitscharis adscriptus aut fidem ejurare, aut necem oppetere, aut Imperatoris triremes petere cogitur.

Tria cæterum gens omnis commendatione digna numerat. Caput est, quòd ad odæa sua frequentanda impellat. Misericordiæ, & in multis etiam æquitatis quòd adeò amantes sint, ut pro eadem extrema quævis pertentent. Nam & egentibus, aut infirmis ferè succurrunt benigniùs; & (cùm Cauponis viatoriis regio ferè careat) domibus amplissimis viatorum commodis servitutis instruendis, tum etiam fontibus publicis curandis immensam auri vim profundunt, perenni nominis sui gloriâ, & aliorum commodo. Hæc si excipias, ferina barbaries, & sui impotens luxuria omnis gentis est regula, & idæa; & Vatiniano majus in Christi cultores odium. Quo stimulati, cùm numero, & viribus corporis valeant, Christianas dudum sub jugum misissent Provincias, si disciplinæ militaris, præsertim Janitschari patientes forent.



QUÆSTIO ETHICO-POLITICA.

*An Nobilitatis potior sit habenda ratio ad Reip.
munia?*

N E G A T U R.

UT costa quadrati cum diametro Mathematicis, sic Reipublicæ mederandæ dignitas sanguinis regulâ metienda non est Politicis. Virtutem poscunt munia, non sanguinem. Cui æmulus in arena est Hector, non auream quærit vel hastam, vel Cassidem; sed robur, & aciem calybis. Ubi architecto, pictore, navarcho res eget, non unde is genitus, sed artis specimen petis, ut salutem tuam committas, ut sapienter deligas. Sic deleturus, non quo sanguine, sed quâ virtute sit animus diligendi, considera. Quot flumina, suo etiam principio grandia, absorbet Ister, qui origine rivus est? grandia omnia id sibi vendicant nomen eo, quod actu sunt, non quo cæperunt. Imò melius est ferè, quod seriùs venit; vel naturâ, vel arte nempe politum magis. Quis auro pretium neget, etsi Ditis fauces in cavernis occupet? purpura mare quondam incoluit, byssus vermis erat, unio fundus abyssi, cedrus planta fuit exilis. Quis merito? quantus animo? non, à quibus? in Ministro spectandum. Genus, & proavi, & quæ non fecimus ipsi, non ea nostra sunt. Suo levare quemque oportet decore, non alieno. Non nascuntur, sed fiunt merita; utpote decora, non uteri, sed animi. Non origo, sed qualitates hominem probant, laude vel opprobrio, atque adeò solio, aut pulvere dignum efficiunt. Quid sædiùs, divitem, gloriosum, fortem videri, sed alieno duntaxat? ridebitur, ubi cornicula plumas posuerit. Fama ipsa, si dissimilis sit meritis, obest magis, quam prodest. Quantò felicior! qui Patriæ, & sanguini nobilitatem fundare ipse & possit, & velit. Ut adeò à viro & sanguis, & patria, non à Patria, & sanguine vir gloriam auspicetur. Sortis, non animi est, aut sanguine, aut patriâ nobilitari. Laude porro indignum est,
quod

quod fortuiti duntaxat est eventus. Meritò Alphonſus Regis filium, Regis nepotem, Regis fratrem ſe dici audiens, riſit, laudanti reponens: *hæc mea non eſt, Majorum eſt. Nobilitas vera non à teſtamento, ſed à virtute.* Multos Therſites genuit orbi natura, heroum tamen numero accenſuit virtus. Alios genuerunt Scipiadae, & in Therſitem inſoles, & facta mutârunt. Viſ nôſſe, uter dignitate ſit dignior? vide à quo major accedat Patriæ dignitas. Multi ſæpe ſunt hæredes ſanguinis, non tamen unâ virtutum ſanguini parium. Non diffiteor, latent in traduce propagine ſemina ipſa cum vita congenita; at hebetatur nativa calybis acies dulcore ſuccorum. Enervârunt Campanæ delitiæ domitorem Urbis. Quid dicendum, dum ſuos primis à cunabulis non niſi Campanas inter Bajæ nobilitas educat? indulgentiam, & blanditias generoſus nescit animus. Serpentibus gaudet Alcides, dum vixdum, quem proterat, ſatis cognoscit. Deſipit togâ, ac ſago illuſtris Pallas, ubi licentia, & libertas animum occupat. Non bene Martis incommoda, regionum, aëriſque intemperies ſapiunt animo voluptatibus effaminato. Vigiliis Marti, aut Minervæ non conſecrat, cui cervicali opus eſt ſemper. Malè frænatur Respublica, cùm vanitas dominatum, literæ exilium colunt. Conſiliis non fervebit anima; cupediis, & ſpectaculis à puero docta. Hinc Carolus V. Cæſar egenos Pariſiis virtute pollentes prætulit ſanguini ad dignitates. Supplet namque induſtria, ſcindi, agendique cupido, quod negat ſanguis, imò etiam excedit. Oneratur, non ornatur ignavo nobili Respublica, partim exemplo, partim appendicibus clientum, quos quia ſuo pares & cerebro, & ſanguini nactus eſt, non niſi Magiſtratu dignos exiſtimat, & promovet, ſolius Reipublicæ detrimento. Quasi verò ceræ veteres calculus eſſe mereantur etiam ignorantia ad purpuram, jacente interim virtute, quia ignobili in concha latente. Procul errorem. Reſtio erat Valentinianus, opilio Maximus, bubulcus Juſtinus; & quid vetuit orbis commodo trabeam, & diadema capeſſere? Cùm & ſceptrum ipſum, cui gentes lunantur, heri arbor fuerit ſylvarum, & ventorum ludibrium. Animus nempe, non origo, & meritum, & gradus ad ſolium

solium est, quo constet Respublica. Non tam parca est natura, ut soli nobilitati virtutes in dotem transcribat.

AFFIRMATUR.

SI natura calculum ducat, trutina pro nobilitate libratur. Quod sapientum cum Aristotele dictat ratio, experientia firmat. Præstantissimos non nisi præstantissimis gigni, ut Phænicem Phænice. Nulla lepori cum leone est communio animi, quia sanguinis nulla. Tributaria ferè virtus est sanguini; Vehiculum, aut semen dotum illustrium dixerim, nescio: illud scio, vivaciora ferè, & præstantiora esse germina, quæ calor amplius, cum feruntur, participant, ut aromatum radix. Quæ generis in Nepotes propago: virtutum ferè delectus est compar. Igne nihil potentius natura, auro censent metalla, flamma illud commendat, & vim præbet, hæc flammæ in visceribus naturæ coquentis est munus. Cælestis penè origo est nobili, vigor igneus; quid nisi aurea ab his Reipublicæ lustra speranda? non plebejum illis lutum nativum, humile nihil, aut sordidum adhæret animæ, conamina non nisi grandi Reipublicæ commodo, quia honestissima. Ut speculum nempe Majorum sunt decora; si fatiscere libeat, futura seu calcar virtutis, seu pœna opprobrii. Mensura filiorum Patres sunt. Virtutum Primordia ægrè degenerant in vita; ut nescit cinnamomi radix viperas, & aconita, aut alere, aut germinare. Qui tepet in plebe, bullit nobili in vena sanguis; satiari nescius, nisi litro æternitatis. Quod hæc minus est, se, quia nobili, indignum ratus, ad vulgi scruta condemnat. Sed & si nobilis moderetur, gloriosa illi nomina, & trabeas veretur laceßere invidia; debitam rata gloriam animæ, quam ipsa nascendi conditio ignobile super vulgus fecit clarescere. Quis enim nisi demens invideat aquilæ, quod cælo æmula, solem irretorta sustineat? Non rodit livor facilè, quod à cunis cum sanguine destinavit hæreditas. Ubi æmulandi libertas est, ibi duntaxat est arena invidiæ. Non decora, sed hæreditas nobilitati sunt fascës, purpura, secures. Non gravant elementa hæc, quibus orbis constat, aut nobilem, aut orbem ipsam: quia dum in eo sunt, in loco sunt proprio.

Suas sibi sedes purpura vendicat, dum nobilem ornat, ut ornatur ipsa. Erubescit amplius, cum vilem tegit, tum quia admirationi, tum quia æmulationi majori obnoxia. Quasi verò rubore ipso metum pandat, nè latens sub murice formatum vili è massa pectus, nihil dignum suâ gloriâ unquam patret. Magnam mentem seu inveniendo, seu exequendo requiunt magna. Provincias consule, rerum delectu, & frugum exquisitâ præstantiâ non æquè gaudent frigida, ac calida. Sic nativa hyems generosissimos præfocat spiritus, nè possint, & audeant angusta. Ægrè ad nobiles ausus animatur sanguis vulgaris, natali ferme solo respondent fructus, & germina. Sed etsi fascibus ornatur ignobilis; quàm ægrè feruntur imperia ejus, quem ad obsequia magis, quàm jura sanguis ipse damnavit? Quàm ægrè mos geritur, quem heri parem vulgus & vidit, & fortè contempsit? Malè secures tractat, quem stiva usu ipso congenuit. Ut contrà gaudent in officia ejus populi, cui sceptrum natura à fasciis destinavit. Vivere nempe nolens, nisi regnaturum. Vis causam discriminis? habe: si vulgus sit obsequens, sola ibi regnantis autoritas, hìc authoritati muneris debitum reverentiæ in sanguinem extorquet obsequium. Sin contrà jura danda sùnt nobili, quis æquius rexerit nobiles, ac nobilis ipse? non Rempubliam, sed se, suâque quærit ferè hirudo vulgaris, luteæ à teneris aquæ assueta. Æra magis, quàm homines regit, ut ditenter æraria nascendi sorte inania. Felix vetus Germania, non nisi è nobilitate; felix hodierna, non nisi amplissimæ domûs Regem, è mente bullæ aureæ, sumens.

Et bene Quàm miserum terris astrum est Princeps,
cui obscura semper sidera famulantur.



§. III.

De Republica Russiæ.

Quæ propius conspecta juvant, distantia formam
 Surripiunt oculis, diminuuntque tuis.
 Sæpe peregrinis propius succedere regnis
 Profuit, & Patriæ consulere indè suæ.

DOCTRINA POLITICA.

Roxolanorum Imperium, in Europæa Sarmatia, seu Russia, & Moscovia, despoticâ aliàs, & cæteris mitioribus Europæ regnis, atque Provinciis multùm abhorrente potestate gubernârunt Principes sui, olim *Magni Duces* dicti. Unde tamen si Religionis sacris à Turcis alieni (Schisma enim Græcorum sub Patriarcha peculiari sequuntur) moribus tamen, cultu, legibusque non admodum discrepabant. At eorundem Princeps, Petrus Alexioviczius, sapientiâ, indole, ac mente dignitati tantæ par Dominus, visis Europæ Provinciis, aulisque Austriæ, Franciæ, Angliæ, & Hollandiæ, Italiæ, & Belgii lustratis, ad earum normam suam cœpit fundare Politicam, seu Monarchiam.

Peri-

Periculo (ut fieri in rebus grandibus ferè affolet) non caruere magna molimina. Cum enim Austriam primâ suâ protectione peteret; siue potentiæ, & oneris tributarii impatientes, siue libertatis cupidi, siue reducere alienum cum alienis moribus Principem veriti, absentiae opportunitate usi, accerrimam in eundem tempestatem per seditionem moliantur. Quam Princeps magnanimus presentiam suâ è vestigio sopivit, reditu maturato; ut dubium orbi fecerit, an maior ejusdem in compescendis tumultibus magnanimitas, an severitas in necandis pari sorte Principibus, ac plebejis, genti domandæ necessaria fuerit. Pace regioni paratâ, rebûsque compositis, Galliam, & cæteras Europæ cultioris aulas revisit. Ubi perspectis rei nauticæ, bellicæ, Oeconomicæ, militaris, & quæstus faciendi institutis, ad paria regioni suæ commoda fundanda, animum adjecit.

Ad omnem proinde opportunitatem comœtantium navium instructo, & contra adversam hostium vim munito portu *Arch-Angeli*, invitatis ad quæstum faciendum mercatoribus, datâ iisdem liberâ religionis cujusvis veniâ, & privilegiis non levibus, Apothecas exterorum mercatorum ingentes allexit. Fabricas varias (*manufacturas* vulgò) adductis ingenti ære opificibus, gentis uni eris bono, & eruditioni, in urbe sibi cognomine *Petroburgi* fundata erexit. Rei nauticæ servituros epibatas, & architectos navales impendiis grandibus ex Hollandia, & Anglia advehi fecit, qui & opportuna classibus struendis sylvarum loca deligerent, & ædificii struendi normam dirigerent, & suos indigenas erudirent. Cujus eruditionis gratiâ suos quoque in exteris Provinciis sumptu regio alebat artifices; adeò, ut ad invidiam gentium aliarum cum mercatoria, tum navali potentiâ floruerit Princeps hic.

Pari curâ artifices alios variarum artium, & scientiarum grandi ære evocatos, & honoribus, immunitatibus, ac fortunis auctos Russiæ amore inescavit. Unde Petroburgum, inculto cæterâ, & minùs salubri cælo situm, Moscâ (Ducum priorum sede) illustrius ædificiis, populosius censu capitum, artium, & mercatorum evasit.

Trifariam Respublica omnis dividitur. Magistratus Princeps ea, quæ Politica, seu civilia dicimus. Bellica alius.

alius. 3tius Nautica curæ habet. Omnia hæc Europæis aularum cæterarum institutis. Prior horum, legationum, dignitatum Civilium, & tributorum exigit rationem. Secundus instructâ Tentonicum in morem militari Legionum disciplinâ, indolem nativam coërcet; armis iisdem, eodem arma tractandi modo, Ducibus ipsis alienigenis uti jubet, & mereri stipendia, sicque ad securitatem suam & commodum, terrorem seditionum, frænum hostium suos regit, ac temperat. 3tius non secus, ac Anglia, Gallia &c. summo rei navalis Principe, quem *Admirallium* dicunt, gubernatur.

Ea hodie Magni Ducis hujus (quem gens Czarum, derivato Cæsaris nomine compellat) est potentia, ut centum velorum classem, quas inter gravissimæ etiam triremes bellicæ non levi sunt numero, censeat: præter bis centena armatorum millia, inter quæ Europæo cultu frænata propè 70. hominum millia, Ducibus, ut dixi, exteris, partim etiam indigenis gubernata.

His institutis mansuescere sensim docetur populus, nondum tamen Europæ cultioris morem omnem satîs patitur. Mercimoniis, & mercatoribus abundânt dicta cumprimis duo emporia. Arma gentis Carolus Sueciæ Rex ad Pultavam 1711. & ex eo tempore Suecia omnis terrore vexata experitur constanter, uti & Polonia bello priore non leviter pressa; proximè demum lapso 1723. anno, ad mare Caspium fines gloriosè aucti testantur.

SucceSSIONEM Russi præferunt electioni. *Czaroviczius* Incolis dicitur vivente Genitore Princeps successor; quemadmodum Hispanis primo-genitus *Infans Asturiæ*, Galliæ *Delphinus*, Walliæ *Dux* Angliæ audit. Universim plenâ potestate in fortunas juxtâ, ac vitam suorum Princeps potitur.

QUÆSTIO ETHICO-POLITICA:

An consultum Principi, visitare Provincias:

NEGATUR.

NON bene conveniunt, nec in una sede morantur Majestas, & amor. Minus inquires, & regnorum curæ.

curæ. Atlantem Mercurio juere nunquam bene congruit. Illius vires molem omnis sustentant. Hujus inquietas eundem perdat, oportet. Cedet enim securitas, si loco cesserit ipse. Decumana moles est curæ gerendi. Par nemo huic oneri, nisi sit roboris gigantæi. Fulcrum, & fundamentum salutis publicæ est valetudo Imperantis. Neque enim valere membra possunt, ubi caput, à quo vigor, & vis, languet. Hæc est naturæ indicta seu doloris communio, seu misratio. Et hoc fulcrum obijciatur discrimini, alienum solum lustrando? Sint namque proficiscenti Principi commoda, extenuant vires itinera, etsi opportunissima. Lassitudo comes, auræ, alimentorum, vivendi ordinis mutatio, quid nisi quantum molestiæ tantum cieant periculi Principi? Ut enim ab assuetis, sapientium sensu, non sit passio; sic contrà, si primorum quietem turbes annorum, turbinem cies certissimum. Terrestria animalia mari, æquorea terris credis, si patrii cœli influxibus Principem assuetum alieno Jovi confidas, sin dispendio, periculo longè certissimo. Neque refert periculo certo, si quod sit, incertum emere commodum. Dudum id Vates præcinnit: *Felix, qui Patriis ævum transegit in annis: una domus Juvenem quæ capit, una senem. Errat, & extremos alter scrutatur Iberos, plus habet hic vitæ, plus habet ille viæ.* At estò, non viæ modò, sed vitæ studiosus Princeps, sideris, & fulminis more omnia adeat, lustret, audiat. Eripitur suis tantum, quantum aliis commodatur. Satis hoc damni est suis, quorum curis animum si non avocet, somni instar oppressum tenet. Juvat equidem peregrinatio Rempublicam. At vagamur ferè plerique, mores, & cum his vitia populorum cernimus, probamus, referimus, non doctrinam, quam oporteret; emolumentum, quod Patria, quod Majores petunt, pulchrum, fateor, Urbes, Provincias, gentes vidisse; mores, legesque Urbium disquisivisse, societates, & fœdera cum institutis lustrasse, artes. & munimenta, æmulorum sibi Principum virtutes perinde, ac vitia, Ministerii florem, & Politicæ formam tenere. At intentus pluribus sensus, ad singula, & domestica quidem redditur minor. Abyssus sit licet consiliorum in Principe,

perit, si tot in alveos dividatur. Malè cōsulit viribus suis natura, dum terminos sibi constitutos excedit. Ut oculus, sic providentia mentis cō magis confusè, quo magis remotè spectat omnia. Bizantii ætatem omnem exegit Amurathes, & se ipso teste, orbem majoribus perculit victoriis, ac ullus Majorum. Nempe & architectus in conclavi lineas ducens urbes struit, & mania Nullum non movit lapidem, ut Carolum V. Regem Gallia, regno tantisper suo moveret Anglia, bellorum non æstu modò, sed turbine. Actum egit. Nullius tamen majori, quàm Gallia commodo; fatente æmulo Anglo: neminem eorum, quibuscum pugnaverit, minùs armatam in Angliam; neminem tamen periculis, & majoribus præliis attrivisse. Fervent membra, dum adest anima. Felicitas viget domestica, cùm urget præsentia Turni, fidelitati in stimulum, & solamen, perfidia in pœnam, & terrorem. Quantis ardere cæpit flammis Russia, cùm sæculo priore Magnus Russorum Petrus Viennam tantisper incollet? Jacuit, & repressa momento seditio, cùm Princeps suis redditus; fraudes aulae ministrantium vestigatæ, & penetratæ, belli æmuli vis compressa. Ut solis nempe, sic Principis obtutus dissipat Reipublicæ pestem coactam in nubes. Efficaciùs agit Luna, non quòd efficacior, sed quòd orbi vicinior. sic in bellis vicinia Principis. Domi suæ cùm Princeps est, horizonti suo diem fundit; alienum subeat hemisphærium, noctem dabit. Stat influxu Principis suorum opulencia, quia stat affluxus. Exhaustitur contrà proprium, ditatur per absentiam alienum ærarium. Pericula vitæ, viæ docent, & gentes, quas colit. Aut enim amicæ sunt, aut invisæ? Amicæ donorum illicio, invisæ armorum metu in officio continendæ; nè fortè agatur insidiis, ubi nulla felicior occasio vindicandi Provinciam, ac unius discrimine omnes involvendi. Utrumque facultatum, & virium suarum dispendio. Eo solo fortasse detestando fructu, & commodo, quòd exteri adhæsurus sint Principi mores, ut qui abiens cultu Patrio sibi eorda devinxit, alieno redux affectu suorum perdat affectus; Paucis: vagetur Princeps, vagabitur felicitas regni, succedet ilias vel damnorum, vel periculorum.

AFFIRMATUR.


Lustrandæ Provinciæ studium, aut sapientiam dissuadere, parum est rationis, ac ponderis. Caput sine cerebro est Princeps, cui sapientia exul est: sine dexteritate est mens, quæ suum præter solum, & solum nihil orbi esse existimat. Viâ lacteâ pandi ad superos iter somniabat Ægyptus, lustratio via est ad germanam prudentiam. Nulla præter Græciam tellus Athenas numeravit quondam; felix sæculum, quod Athenas penè Regnorum numero supparet hodie numerat. Videndi, audiendi, assequendi copia frequens ea quoque artium portenta, quæ vetustas ipsa sua esse, si viveret, cuperet. Non soli aureæ hæstæ, aut clavi aditus panditur, sed & artificii gladio, cum Urbs, mænia, situs, robora, aditus discuntur antè, quàm designentur in victimam. Bellat, quia triumphat felicius nemo, quàm, qui gentium mores, ac indolem præcipit. Felix auceps, qui quâ semente aut ducatur, aut oblectetur avis, prænoscit. Novisse genium, capisse prædam est. Lustrentur Imperia, patent Reipublicæ leges, moderandi providentia, instituta, æquitas, consilia, fœdera. Quæ potior, amabò, formandique Principis aptior regula, quàm virtutum regiarum atrium? quo imperandi methodus; quæ expetendi, quæ vitandi sit ratio; quantum æquitati miscenda severitas, discitur, & docetur. Nunquam, mihi crede, tantus Æneas Latio, Ulysses Homero, nisi terras ementius, & maria heroem se & formasset, & probasset uterque. Rarum amanti spoliū Principe digna sapientia, nisi cum Jafone non colchidem modò, sed plura lustret imperia. Non injuriâ, prudentiæ sementem credit orbis, gentium conversatione succrescere; quasi verò certa exedat rubigo animas, quas domestica morantur siparia. Poliendi ingenii res est varietas rerum. Experientia mentem poliat, non sero sapiet cum Phrygibus Princeps. Experiatur, cum viderit. Aut enim aliena spectat damna, aut commoda? utraque fructu suo; illa accersere, hæc aut amoliri impendentia, aut cavere longinqua edoctus. Atteri peregrinatione vires clamitant; non atteruntur, mihi crede; sed roborantur motu pro-

portionato. Lustranda dico, non pererranda regna. Sapiens Princeps sui æstimationem, amorem, metum injiciet gentibus, nè tentare audent, quem tantum nôrunt, Sibi porro ac regno fructus leget; sibi vigorem mentis, quâ Promethei in morem flammis dives, suos animet felicitate. Regno verò, dum, ut horologium inquires, sic ipse sapientia rectitudinem promovet felicitatis. Felix Princeps, & Principatus, dum non solo aut ministrantium arbitrio, aut alienis cuncta statuuntur consiliis. Fit hoc, dum memoria, & usus fastos suppeditat Principi, & quibus actorum principia, agendorum sint regula. Facilia & felicia dicantur jura, dum dictanda multo usu combibita sunt: oracula, non consilia fluunt, dum non eventus, sed experientia Magister docet. Stratagematis vincitur, quæ per umbram antè excocta. Hæc omnium via, qui tanti futuri nunquam, nisi suis tantisper sedibus elongati. Caroli V. & VI. testes sint. Toga, sagum, pax, Imperatores cedro canit dignissimos. Jure Macedo gloriatus quondam, plura oculis se lustrasse, quàm Reges alii animo, & cogitatione sint affecuri. Jure, inquam; si enim segniùs irritant animos demissa per aures, quàm quæ sunt oculis subjecta fidelibus; quantus futurus est Princeps suis juxtà, ac exteris, qui nihil ferè suorum potest audire, quod præsens ipse non viderit. Adrianos, Germanicos, Trajanos Urbs. & orbis celebrat; quantis itineribus claros! Nunquam Mithridates 30. gentium dominus, linguis totidem suis amabilis: aut Sesostris Ægyptius ductis ad Taniam usque coloniis obeliscis perennaret illustris, nisi Arabiam, Lybiam, Æthiopiam, Indiam utramque, ac Scythiam, & famâ, & itineribus perlustrasset. Lutum colligit annis exundans, fateor, non Princeps errata, aut mores gentium, cui cum sanguine nativa est tessera: Plus ultrà, meritis, virtutibus, actis. Non ut curiositati, sed suorum imperet Utilitati? imò etiam gloriæ. Non memoro vetera, hodierna cum suppetunt. Magnum Europa Principem, Patria sidus, mastygem Oriens in Alexioviczio nactus est. Capacissimam facinorum grandium mentem quid stupenda orbi moliri fecit, imò & perficere? Provinciæ. Culta moribus ruditas, ordinis

dinis & disciplinæ patiens effecta militia ; methodum , stimulosque dedere exempla non audita , vel lecta , sed visa Germaniæ. Dominatus mari lectissimâ classe firmatus , mercimoniorum fundata , & privilegiis firmata emporia , flos artium regiis sumptibus accersitus , auctus , stabilitus ; fecere Europæ cultioris lustrata terrâ marique emporia. Gens omnis legere docetur Regnorum utrâque Pallade cultorum vestigia : Athenæis prima jaciuntur fundamina , solio ipsi , par aliis Europæ Principibus decus , diadema accersitur , Equitum nigræ aquilæ Ordo fundatur ; quis tantorum author moliminum ? nisi exterorum visa Regum , & Regnorum Politica. Nunquam tantum , id est Magnum gestis & nomine Petrum adorâset Russia , nisi Orbem sapienter lustrando , tanto se parem nomini , tanto Patriam dignam decore , tantis subditos monumentis felices Princeps fecisset. Tanti interest , sapientium more , mentem non sibi , sed Orbi natam , Orbem omnem cognoscere.



§. IV.

De Rebus publicis Variis.

Dissipit unius semper resonantia vocis,
 Plestra placent variis articulata sonis.
 Diversos diversa juvant: néque norma regendi
 Pluribus ingeniis una placere potest.

DOCTRINA POLITICA.

Regna, & Principatus Europæ cæteri, qui numero non modico desuuntur, hæreditarios sibi Reges deposcunt, & Monarchicam gubernandi rationem præligunt; unam si *Poloniam* excipias, quæ hodie dum electionem præfert, & ideo continentibus ferè bellis vexatur, potentibus æmulis *Poloniâ* ipsâ in partes divisâ, armis jus sibi deposcere contendentibus. Quod nostra memoria in *Stanislao*, & *Friderico Augusto* abunde testatur. Sed & regi electo, non nisi cum Republica, decernendi potestas est graviora regni negotia; ut pacis fœdera, belli apparatus &c. Felix *Polonia*! si in hac libertate sentiendi, de qua Nobilium sibi quisque blanditur, dum uno etiam 1720. anno tria lacerantur comitia, paucorum dissidentium votis, quibus, ut ipsi ajunt:

Acti.

Activitas sifitur, dum amittere metuit, ipsa sibi ultrò non minueret libertatem.

Polonis vicinior *Dania*, si Lipsio in monit. Polit. c. 3. fides fit, Electitia quondam, hæreditariis hodie annumeratur. Non item *Suecia*, quæ ad Friderico-Hallam fatis functo Carolo Rege suo, cum hærede careret, Ulricam Sororem Regis, Hasso Cassalensi Principi conjugio vinctam, Reginam sibi delegit, & coronavit, communi 4. statuum, è quibus Regia constant comitia, videlicet Ecclesiasticorum, Nobilium, Civium, & Rusticorum acclamatione, anno 1719. Cui anno subsequente, ut votis Regiæ regnum satsdaret, suffragiis paribus, pari potestate regnaturum delegit conjugem Regium Principem Hasso-Cassalensem, & diademate Regio, non ut aliàs Upsalis fieri consuevit, sed Stokolmiæ insignivit. Nec hic tamen libera omnino potestas est regia, sed cum 24. Senatoribus graviora conferre consilia, & decernere cogitur. Quod si hæres mas horum morte desideretur, liberam fore electionem pactis sancitum est sæpius.

Bohemiam, liberâ olim eligendi potestate gaudentem hæreditariam esse Augustissimæ Domui Austriacæ inficiari nemo potest. *Hungariam* quod attinet, sententia dici sanctior nequit, quàm Augustissimi ipsius Caroli VI. verba, quæ articulo primo Diætæ anno 1712. celebratæ reddidit, quibus: *legitimum hæreditarium Regem, ac Dominum* sese compellat. Quod ipsum concordia, Procerum Hungariæ, & Comitiorum Posonii celebratorum, studia, æternùm valiturâ lege, anno 1723. die 27. Junii firmârunt. Dum solenni ad aulam Cæsaream Legatione submissâ, non in masculinum duntaxat, sed & fæmininum sexum hæreditarium Augustissimæ Domui Austriacæ Regnum esse, & fore sunt contestata. Quod exemplum Ungariæ secuta est Dacia, lege sancita Comitiorum anni 1745.

Angliæ Regno, cui sub Anna Regina, Hybernia, & Scotia sub nomine *Britannia Magnæ* unita sunt, potentia Monarchica imminuta non nihil est. Nam Parlamenta duo, quorum aliud *superius*, aliud *inferius* dicitur, magnam ibidem obtineant authoritatem. Felixque Rex ille pace, & bello est, hostibusque par, qui hæc sibi consentientia habet.

bet. Leges enim condere, & abrogare, belli necessarios sumptus decidere, & maiora statuere omnia cum Rege solent. Accedit magna inter horum Parliamentorum membra similtas, quorum alii *Wigs*, alii *Torris* genti dicuntur, non secus, ac olim Romæ *Gvelffi*, & *Gibellini* contraria semper studia spectantes. In his ipsis tamen Parliamentis primus Regis est locus, quem ponè Cancellarius sequitur.

Hispania, *Grandes* quidem censet, qui tamen, cùm, præter veniam coram Rege verticem tegendi, potestatem singularem regiminis non evertant, Monarchicæ; & hæreditariæ dominationi nîl derogant. Quod ipsum de *Paribus Franciæ* sentiendum est. In hoc tamen regno id peculiariter notandum venit, quòd inter 10. Galliæ Parlamenta, quæ olim regnum censebat, Princeps dignitate juxtà, ac potestate fuerit Parisinum, ac Tolosanum, quorum tamen potentiam Ludovicus XIV. mirum quantum infregit. Certè memoriâ nostrâ anno 1720. Regens Galliæ Dux Aurelianensis, Ludovico XV. tum adhuc minorenni, Parisinum Parlamentum Pontefam relegavit, non rediturum Lutetias, donec voluntati Regiæ morem gereret.

Quotquot hodie Europa Respublicas censet, singulis aniam dedit aut eventus belli sinister, ut *Ragusa* in Dalmatia; *Venetis* in Italia; aut, quod frequentius, ac ferè uni erim, impatientia populi in Magistratus, ut *Genuæ*, & *Luca* in Italia, *Helvetorum* in Germania; aut metus eorundem; ut *Genevæ* ad lacum Lemanium, fæderati Belgii, quos *Hollandos* vocant; aut denique securitatis suæ amor, ac studium, ut *Hanseaticarum Urbium* in Germania. Quamquam, si cum Arist. 6. Pol. c. 2. ad Rempublicam necessarium sit, *ut sit in ea potestas cuius privata ad Magistratum veniendi, & per vices imperent omnes, ac pareant*, vix ulla dici possit Respublica, cùm id vix eveniat in omnibus.

Quinque inter has potentiores sunt. Agmen ducat *fæderatum Belgium* è septem Provinciis conflatum, videlicet Geldria, Hollandia, Selandia, Ultrajectum, Frisia, Transisalaniam, Groninga. *Fæderati Belgii* sortitæ sunt nomen à fædere, quod Duce Auriaco, adversus Philippi II. Impe-

Imperium, quod in Belgas, cedente Patre suo Carolo V. obtinuit, inivêre. Unde & in signum fæderis virumthorace armatum, gladium dextrâ, fascem sinistrâ tenentem delegerunt, cum lemmate: *concordiâ res parvæ crescunt*; quod ipsum hodierna Reipublicæ moneta luculentè ostendit. Causa gemina separationis dedit principium. Caput erat fastus, & ambitio Orangii, quæ hæresi per id tempus è vicina Gallia, torrentis in morem, non sinè turbis, & tumultu in Belgium se diffundente, usa fuit.

Sensit discrimen, Philippi secundi nomine Belgium id temporis gubernans, Soror ejusdem Regis, Margaritha. Et ut erat providentiâ, ac religione illustris, sic suæ conscientia imbecillitatis, malo serpenti, atque tumultibus leniter, ac fortiter pro opportunitate obviavit, eo profectu, ut vel ipsis hostibus non diffidentibus, vulnere medelam latura crederetur. Subinde verò Albani Ducis consiliis in severiora inclinato Rege, cùm providentissimæ Margarithæ ad Hispanos revocatæ, Dux Belgis invisus succederet, isque ipse imperii sui principia Egmontii, & Hornani Comitum sanguine auspicaretur, inclinatis in Reipublicæ & religionis libertatem incolis, sacrâmque Hispaniæ Inquisitionem execrantibus, furor, & desperatio aperti belli incendia, ferrum, & flammæ excitavit. Vim vi retundendam ratus Albæ Dux Gubernator, malo velut flammæ oleum affudit, quæ non nisi separatis, Hispano consentiente; Provinciis, anno 1648. sopita est, pace incolis redditâ. Ex eo tempore absque Duce ullo Reipublicæ Aristocratia vigit. Provinciæ 7. Legatos Generales Haagæ Comitum in Hollandiam deliberaturos de consiliis cùm suis, tum exteris submitunt. Summum hi Magistratum efficiunt, unde & *Generales Belgii fæderati status*, vulgò *Die Herrn Staaten* dicuntur. Non secus tamen, ac Venetiæ, & Genua *Serenissimi* titulo gaudent, Sui sunt Præsides & Gubernatores Senatui; Urbibus Consules, & Prætores &c. iique ferè tam delectæ sapientiæ, ut gravissima Europæ consilia Haaga Comitum, Ryssvicum, & cætera agitari, & confici videant.

Rei nauticæ, seu *Admiralitat*is ut vocant, hac in Republica summi est consilium. Hâc enim re cæteris ferè

palinam sic erripiunt, ut tamen omniū sit inops Hollandia sterilitate suā, omnibus tamen per mercaturam, quam exercet dextrimè, abundet. Hācque unā ferè tam modicis, & periculi plenīs initiis ad opes, & potentiam formidandam evaserit. Militia, fœdera, ærarium, & unio Republicæ fundamenta constituunt. De Religione mireris id jure, quod, cum omnis sit religionis libertas, solius: *Publicum exercitium Religionis Pontificiæ nullibi tolleretur, Jesuitæ excludantur &c.* lege sancitum sit.

Florentissimam *Venetorum* Rempublicam, etsi cum Contareno, & aliis, multi ex profuga nobilitate cunabula sumpsisse scribant, sub tempora Clesi Longobardorum Regis; communior tamen, veriôrque sententia cum Forestio, & aliis censet, ex profugis piscatoribus, & pastoribus coaulisse, quos furor Attilæ, Aquilejâ dirutâ, aquis salutem quærere coëgit. Unde eam statuum mixtionem venisse existimant nonnulli.

Duci paret Respublica instar principis, quem ipsi *Doge* dicunt. Dignitas eum, & cultus corporis discernit ab omnibus. Potestas hujus tanta, ut omnia nomine ipsius fiant: tam simul stricta, ut nihil per se statuere, consulere, &c. valeat; imò sine senatu nè literas quidem aperire. Sic sapienter præcavetur Duci, nè tyrannidem possit invadere. Unde nec Monarchicum iis, nec purè Aristocraticum est gubernium, sed harmonia potiùs ex omnibus formis. Quæ fecit, ut post Carthaginenses Respublica hæc sola, diuturnitate & potentiâ floruerit maximâ. Monarchiam repræsentat Princeps. Aristocratiam constituit grande consilium, seu senatus ex 40. nobilibus, seu Patriciis constans. Inter hos Regis vicem obtinent 6. Procuratores S. Marci dicti, præsertim ærarii; qui, uti perpetui, ità magnæ sunt authoritatis. Perpetuitas horum facit, nè experientiæ defectu peccetur aliquid. Democratiam demum refert vel magnum (ut ipsi vocant) consilium mille circiter, & 600. Nobilium, ad quod cuivis veniendi jus est, qui 25. annum exceßerit; quorum in numerum divites referunt, qui belli tempore Rempublicam pecuniis juvant. Reliqui 400. nobiles (bis mille enim Nobilibus constituitur) legationibus, & Magistratibus aliis

aliis distinentur. Vel etiam plebs, quæ nonnunquam consulitur. Civium multis ad minores dignitates aditus patet, non tamen nisi nobilium suffragio. Nobilitas triplex est; *vetus, media, nova.*

Bases Reipublicæ servandæ has ferè constituunt: 1. Censurâ inagis, quàm bello potentiam tuentur. Unde in Senatorum, Legatorum, Præfectorum (quos in Provinciis *Proveditores* dicunt) gubernium diligentissimè inquirent, nè muneribus fascinentur. 2. Potentiam nullius, etiam opibus, admodum sinunt crescere. 3. Nulli aut ab extero Principe sumendi stipendium, vel sacris initiato Magistratum in Republica gerendi fas est. Unde, nè obnoxii fiant Principibus, frequens est Legatorum mutatio. 4. Mercaturæ tantum est studium, ut Nobiles perinde, ac cives negotientur: imò nulla navigatio permessa sit, nisi Nobilitatis concursu. 5. Annonæ, & ærarii cura ut necessaria, ità maxima est Senatui. 6. Hoc mirandum in cæteris, quòd per conductos Duces bella gerant, qui, cum pecuniæ causâ, non pro Patria dimicent, minùs rem curare posse videntur. Quamquam incomparabilis Schu- lemburgii Corcyram hoc ultimo bello propugnantis virtus, Reipublicæ, & orbi commendari summè mereatur. Venetis ad has leges Politicæ non parum momenti attulit Petrus Süavis.

Genuensium Respublica, excusso Vice-Comitum jugo suam anno 1444. debet originem. Duci paret, non tamen annuo, uti Athenæ Archontibus; nèque perpetuo, uti Veneti, sed biennali tantum; ad idem tempus, octo Duci Gubernatores adduntur, qui rerum potiuntur. Major Ducis est potestas, quàm inter Venetos, sed minus tempus; unde verenda tyrannis non est. Dux hic Senatum cogit, ad illum referuntur, & per illum aguntur omnia. Gubernatores duo in Palatio Ducis. censorum instar, per vices habitant, ità ut bini tribus mensibus absint domo, & anno vertente vices suas obeunt omnes. Exacto biennio, qui Dux erat, fit Procurator, quod munus dignitatis in Republica magnæ est. Unde fit, ut expertorum virorum numero Respublica abundet. Procuratorum enim Collegii autoritate negotia omnia tractantur. Electioni severi-

rissimis cautum est legibus, & instituto religioso, quod videre est apud Contzenl. 7. Polit. c. 19. n. 11.

Helvetorum Respublica, quæ hodie Democratiam æmulatur, Atheniensi Reipublicæ maximè similis est. Nobilitate veteri pulsâ, aut in ordinem redactâ, sine ullo Duce summo, populare hodie regimen sequitur, & moderatâ æqualitate gaudet. Tredecim Respublica omnis *Pagos*, *Societates*, seu *Civitates* complectitur, quos Galli, & aliæ passim gentes *Cantones* dicunt. Horum singuli parvam constituunt Rempublicam, plena cum potestate leges, & jura sibi dicendi. Quodsi causa communis omnibus eveniat, ex singulis pagis *Thermas Helvetiorum*, vel *Aravium*, aut aliorum conveniunt certi, de summa rei deliberaturi.

Pagi singuli in Præfecturas dividuntur. Præfectos pro arbitrio anni unius, vel plurium decursu mutant, communi plebis, & nobilitatis suffragio. Quivis *Helvetus* Patriæ miles est; hinc si destinatis in montibus: quibus regio abundat, & se tuetur, ignes ab excubitoribus excitentur, 24. horarum spatio 100. facilè armatorum millia sistunt, quovis stationem suam, jam antè cognitam, occupante. Anno 1712. *Bernatenses*, & *Zürchen*ses hujus specimen dedere, dum in Catholicos arma sumpsere. Quatuor enim pagi, *Zürck*, *Berna*, *Basilea*, & *Schaffhausen* Calvinum sequuntur. Septem alii Romana Sacra colunt: *Lucerna*, *Friburgum*, *Solothurna*, *Zugum*, *Weiz*, *Uri*, *Unterwalden*. Duo pagi *Glaris*, & *Appenzel* mixtam tolerant religionem, hinc etiam dissidia. In reliquis verò, nè Religionis diversitas Reipublicæ officiat, pagum illum quivis colere jubetur, quam religionem sequitur; ac proinde, si religionem alicui mutare visum sit, pagum quoque mutare necesse est.

Frequentia montium cum sementem neget multitudini suffecturam, quam regio gignit; exterorum Principum stipendia merentur, & venalem habent peditem, roboris sui causâ bellis aptissimum. Peditem tantum militem alpihus plena regio exerceri sustinet. Initium Reipublicæ hoc ferè prodit historia.

Ducibus parebat olim Provincia. Ante 400. circiter annos Prætores suos ab Imperatoribus accipiebat. Unde ad Imperium pertinebat. Sub Alberti primi tempora Præfecti Provinciæ acerbius populum moderari, & non nulla imprudentius peccare. Ut erat Grisleri Præfecti imperium: quo pileus perticæ præfixus Altorffensi in foro sui locò honorandus præcipiebatur. Repertus, qui iussa detrectaret Tellius, Legis violatæ reus jubetur sagittâ pomum è filii sui capite dejicere. Paret duriori imperio Pater: sic tamen, ut cum duas sagittas sumpsisset, quæsitus causam, Præfecto audacter responderit: *te secundâ ut feriam, si primâ filium sauciissem.* Carcer æternâ pænâ dicitur dicto feroci. Fugâ elapsus Tellius tumultus ciet, & ad fædus paciscendum Provinciæ aliquot inclinantur, cujus fructus pulsus omnibus Præfectis anno 1308. fuit.

Vim adhibuere Austriaci, sed vi repressi; quæ cum Helvetis felicior identidem esset, æternum fædus anno 1320. pro libertate vindicanda sanxerunt. In quo adeò pertinaci concordia perstiterunt, ut ab Austriacis primùm, tum ab ipso Romano Imperio pace Westphalicâ anno 1648. liberi sint dicti: cujus libertatis titulo tres Provinciæ *Schweiz, Uri, & Unterwalden* dedere principium.

Ante bellum Burgundicum accesserunt. 5. aliæ, *Lucerna, Zurich, Glaris, Zug, & Berna.* Octo hi pagi unâ *veteres* dicuntur. Occiso deinde anno 1477. Burgundiæ Duce Carolo Audace, rursus se sociârunt 5, & novi sunt appellati. *Friburgum, Solothurna, Basilea, Schaffhausen, & Appenzell.* Atque hi 13. pagi propriè Respublica sunt Helvetiorum. Nam cum, tuendi sui causâ, cum Provinciis quòque vicinis fædera ineant, Provinciæ fæderatæ *socii Helvetiorum* dicuntur. Cum porro exigui districtus aliqui sint, qui nèque libertatis primæ, nec fæderis socii sint, *subditi Helvetiorum* dicuntur.

Celebre olim Germaniæ nomen, & fædus erat *Urbium Hanseaticarum.* Nomen suum veriori sententiâ à situ, quem requirunt, sortitæ sunt; eò quòd an *See*, flumini, aut mari aditas esse oporteat. Quamquam alii, *Fansa, Ligam*, seu fædus, veteri Germaniæ significatione dici contendunt. Caput harum *Lubeca*, quæ, cum olim

olim sola tam potens fuerit, ut classi toti adornandæ par fuerit, Occidentalium Principum, vicinorumque cumprimis invidiam concivit. Sux proinde securitatis causâ in communionem fæderis alias quôque liberas civitates invitat, fædus *Hanseaticum* fundat, & Urbibus nomen *Hanseaticarum* tribuit.

Causa fæderis erat, mercimoniis securitas, & flos: mutuæ auxiliæ, quod sibi diuturnis etiam, & sanguineis bellis fideliter præstiterunt. Donec sæculo 16. Carolo V. Imperatore, rupto fædere, potentia earum sit compressa. *Lubecca*, *Hamburgum*, & *Brema* nomen illud hodie conservant, quæ salubriori consilio legibus hodie non armis, potentiam, & opes, quibus florent, præsertim mercaturam tuentur. Dum enim armis tueri se volebant, libertas sub ictu stetit.

Sexaginta novem olim censebantur, in 4. classes divisa. Princeps erat *Lubeccensis*, sub qua cum *Hamburgo*, & *Limburgo* ex *Pomerania* & *Mecklenburgico* 13. universim sunt numerata. *Coloniensis* ex *Rheni tractu*, *Westphalia*, *Ducatu Cliviæ*, *Frisia occidentali*, & *Comitatu Marchiæ* complectebatur 30. *Brunsvicensis* cum *Minda Westphalorum* ex inferiore *Saxonia* 13. sequebantur. *Danziscana* denique ex *Livonia*, *Prussia*, & *Norvegia* 13. annumerabantur.

Harum in numerum Urbes recipi ut possent, tria requirebantur. 1. Ut maritimæ sint, aut celebriorem ad fluvium mari illabentem. 2. Ut liberæ sint Urbes, quibus clavium potestas sit. 3. Ut sint Imperiales. Unde vetabatur accessus *Daniæ*, aut *Sueciæ* maritimis quantumvis Urbibus.

QUÆSTIO POLITICA:

An consultius orbi futurum, tot Principes, quot urbes censeri?

AFFIRMATUR.

Felix moles globi terraquei, una sole uno per diem, unâ per noctem Lunâ illustris. Nee hæc, nec ille luce, & influxu satisdaret, si plures globos natu-

ra-cenferet. Pateretur quilibet, dum, ut unius augeretur Imperium sideris, orbium actaretur commodum. Sic Urbium sibi constat gloria, ubi sua cuique coram est anima, Princeps. Converti in Mundo omnia experiëntiâ cernimus, causa una est; rerum vicissitudo. Oriuntur omnia ut moriantur. Ruinæ destinantur principio, pari omnium fato, quia sorte mortali. Quæ hominum, par urbium conditio est, & naturæ consona Rerum-publicarum mutatio. Obviatur excidio, si, ut mundi factum principio, suus Urbi cuique sit Princeps. Grandius est munus Respublica, ac ut unius humeris sustentetur. Decipi cupit, qui dissita possidet villicus, urbes quis sinè periculo dissitas regat? Causa quævis, & virtus Principum limitem habet. Quantum dividis, minuis virtutem juxta, ac Majestatem. Acie præcellit aquila, soli tamen propinquat, dum se aquilam probat. Dissitum, aut divisum quisquis spectat, aquila sit quamvis, minüs, quia confusè spectat. Unde pestis Reipublicæ duplex: impunitas scelerum, quæ momento plecti; virtutis remuneratio sera, quam celeri præmio dignam meritum fecit. Fræno illa, calcari hæc egent, caret utroque, dum pluribus jura dat unicus. Centenos licèt oculos numeres, cæcutes, si dubiâ spectaveris luce; ut ferè fit, quod eminus cernitur. Leviùs sentiuntur damna, quæ seriùs. Quasi verò damnum non sit, quidquid, etsi grandius, remotius est intervallo. Non premitur, sed fatiscit sub pondere mens, dum singulis vix unus satisfacit. Quid ages multitudine cinctus Urbium? Singulis te dabis? omnibus te subducis. Pari lance vigilantia, & studia in unam, cæterarum aut incuriâ, aut negligentia librantur. Perfecti nihil causat divisio in natura. Hostis Gigantæus imbellis sternitur, si vires ejus diviseris. Dum contra, quod totâ fit mente, vires, animos, sensum omnem concentrat. Distrahe, & sibi ipsi animum eripuisti. Arenam prodit flumen, tametsi vastissimum, si ducatur in alveos. Influxum solis coronati partire, justitiæ mora, plebis murmura, nervi bellici dispendium fructus leges vastissimos. Imperium urbium ut grande est mole, sic carie ferè non caret; atque adèò fulminis ictui est periculosum, ut quercus grandes. Magni.

gnitudine suâ laborant moles corporum Gigantæ; vixque dum respirant, spirare possunt. Dum contrâ agile est, quod exile. Numine suo felix Urbs, quod, quia pluribus liberum, vix petatum, momento adest votis, apicibus ipsis intentum. Ardentius amatur sanguinis hæres unicus, amoris pignus. Sic Urbs Principi; à quâ bellis oracula, paci præsidia, eventibus medela coram sunt semper. Quid mirum? acutiùs paucorum indolem penetrat unus, frænaturus impetus, si res poscat; aut pacem servaturus. Dum contrâ sine suo frustrantur imperia, quæ quia distantibus è locis, advolant post eventus. Néquè suis omnia, néque nihil omnino credere Principem decet. Nihil ut fidere velit, vetat distantia Urbium. Omnia penè ut debeat, eadem jubet. Hinc pestis illa magistratum, præfidentia potestatis, temeritas, quodque Comes, oppressio civium, legum contemptus. Dum sexcentas novit semitas anguis! quibus etsi reus sit Principi, ac Reipublicæ, ejusdem tamen & consulentum oculos eò certius fallat; quò faciliùs elidit casses fera, quæ eminus à venatore spectatur. Denique ahenus Urbi uni est Princeps; quâ solâ amissâ, omnia momento uno amittit.

NEGATUR.

Commune vitium est; id existimare consultius, quod cupimus ipsi. Principem domi suæ, non Reipublicæ, aut Principis, sed suâ ipsorum causâ multi exoptant. Usque ad eò & hinc affine virtuti est vitium. Mentiri gaudet alienum nomen, quasi cognatum fiat, si mendaci velatum sit fucò. Alia longè est sapientibus sententia, ac ut singulatum Urbium limite Principem circumscribant. Nil magis analogum regnis, quàm corpus. Membra hoc, illud Urbes constituunt. Una membris anima Princeps, Regina, legislatrix. Una regit omnia mens. Voluntas unica jura dicat. Cur una pluribus mens impar sit urbibus, tam consortis impatiens, quàm rivalis? Indignum naturâ teste consilium, regalem trabeam spitamali, ut sic dicam, cingere limite, tanto sanè indignam vel nomine, nisi pleno gloriæ cursu axem universum lustraret sol, néque gravis nocturæ foret, néque fugaret tenebriones.

Nisi

Nisi omnia dominatu suo Cælum ambiat, quàm exilis, & manca erit Majestas? vilescit potentia, quæ finibus arctatur exiguis. Amplitudo dignitati sit suppar, ut magni nomen respondeat merito. Rideret orbis paria Consulatum jura, & Principum, si urbs quælibet in his solem, in illis lunam veneraretur. Amplius est, quod sibi gloriæ stadium aula deponit. Palatiorum dignitas, consiliorum frequentia, gloriæ splendor non unius plebis ambitu, qui quondam fines erant Carthaginis, cingi sustinent. Confundit aliàs, quod diffunditur; secus hoc in eventu est. Confunderet, quod arctaret. Plebs quippe aulæ frequentiam, civis consulentium duceret censum. Et quæ, amabo, à plebe Majestas, aut reverentia? quis à civilibus animis vigor mentis, Reipublicæ curis dignus, sperandus? Fascinat fulgor oculos, si eminus spectetur. Mitius tolerat oculus, quod coràm rutilat. Sic spernitur Princeps, cui urbs una patrimonium totum est. Nulla enim à tali sperandi, timendi causa vix ulla. Spem opes, & potentia fulciunt. Vires metum incutiunt, & sustinent. Neutrum finibus potest esse exiguis. Quæ enim opes agro uni? unde emolumenta vitæ tam cumulata? unde bellantium robora? belli nervus, ærarium? Adsit æmulus pro mænibus Hannibal, in tripalmari, ut sic loquar, ambitu, unde oro vis sistendo turbini? stipendia centuriando militi? delectus præficiendo belliduci? Bellum non auspicetur, cui suppetias tum virorum, tum auri virium penus non subministrat. Victorias, & triumphos non leget, sed sibilos, cui cæsà semel potentiâ, altera, quæ substituatur, non superest. Ludibrio habentur hodierno Marti exilia, fomentum militaris proterviæ, illcium cupiditatis, aut arrogantia. Illa ut ausit, hæc ut etiam velit. Imperare illa, hæc non nisi è ruinis, & bustis sibi dominatum gestit construere. Terret, & perturbat columbam accipiter, scombrum balena, catulum leo; sic grandis vis Urbis modicæ Dominum. Et quæ hinc civibus securitas, dum satellitii locò metus, molestiæ incommoda Principem stipant? Curâ cujusque privatâ, & commerciorum flore sibi constat Respublica, evertit utraque Urbium hic Principatus: dum enim nulla


fuis sic locuples, ut alienis non egeat, deglubere quavis alteram tentat, quia non sui Principis. Suorum porro incurius deget quilibet. Cur enim curæ sunt vitæ impendia? quæ vel in prædam hosti proximo, vel domestico sint in stipendium militi partienda. Divinè Plato, ut solet: Majestatem habes? non urbis, sed orbis, si non universi, certè majoris destina dominatum. Hæc mensura est magnitudinis, & dignitatis.

QUÆSTIO V.

De Magistratibus.

§. I.

Quid sit Magistratus? quæ ejus divisio? tituli?



Oecumbente subit Cælum soror aurea Phæbo,
Alternâtque suas orbe probante vices.

Quàm bene sæpe viris succedat famina: mundi
Nos docet exemplo machina tota suo.

DOCTRINA POLITICA.



Magistratus sive sumatur pro uno, sive pro communitate imperante (vox enim communis est omnibus) est potestas, quam is, qui præest, obti-

obtinet in subiectos. Hanc potestatem cum alibi Cæsar, alibi Rex aut Princeps; Prætor & Præfectus alibi; Senatus, Parlamentum, Respublica alibi obtineat, omnes & singuli Magistratus dicendi sunt; eò quòd velut Magistri Iudum, sic Legibus subditos pro æquitate in commodum eorundem moderentur. Hæc enim potestas, sui officii Magistratum quemvis communefacit, cum non *finè causa Princeps gladium porret* (per Paulum) *sed ad puniendum malos, præiudicandum bonos.*

Magistratus alias est *supremus*, alius *medius*, alius *infimus*. Primum orbi referunt Imperator, Rex; in Republica Senatus universalis, quo videlicet major non est potestas in Republica. Secundus Magistratus sunt primi aulae Ministri, à quorum iudicio videlicet ad solum caput summum licet recurrere. Cujusmodi sunt Prætores Provinciarum, Pro-Reges, Gubernatores, Consiliorum Principes &c. quos *Optimates* cum aliquibus liceat dicere. Infimum Magistratum constituunt, qui Optimatibus ipsis gradu, & potestate subordinantur, ut sunt Præfecti minorum rerum, Senatus in urbe subiecta Principi. Hi Magistratus, quia varia sunt Regum munera, & fines, varii quoque sunt: aulici, urbici, Iudiciorum, camerae, ærarii, Fiscii, legati &c. per quos auctoritatem, & potestatem suam Princeps in subditos exserit, cum ipse per se innumeris Reipublicæ negotiis sufficere nequeat. Unde qui his resistit, Principi resistere censendus est.

Alius est *Togatus*, qui pace; alius *Sagatus*, qui bello præest. Alius *ordinarius*, qui constanter Reipublicæ servandæ status est; alius *extraordinarius*, qui dum res, & occasio poscit, statuitur; cessante causâ tollitur.

Tituli hodie Magistratum sunt varii. *Imperatores* olim dicti belli Duces, ab eo, quòd militi imperarent. Et primum à Constantinopolitanis Cæsaribus nomen usurpatum. Hodie pro *Cæsare* sumitur, quod nomen Imperatoribus primus dedit Julius Cæsar, vel ex eo, quòd *casus* in lucem sit editus, vel potius, quòd natus *casariem* aliquam in summo capite habuerit. Imperator dicebatur *Agustus* ab Octaviano Augusto, ab augendo virtute, armis, ac gloriâ imperio. Cum verò etiam deinde Rex

Romanorum diceretur *Augustus*, dici cæpit Imperator *semper Augustus*. Donec aliis quoque Regibus hoc nomen sibi usurpantibus dici cæperit *Augustissimus*.

Regibus, ac Ducibus *Serenissimi* hodie nomina deferuntur, quod idem Reipublicæ Venetæ, & aliis datur. Quamquam olim parca ejusmodi titulorum vetustas Regem *Dominum* tantum nominârit. Principes *Celsissimi*, *Illustrissimi* Comites, & Barones dicuntur; quos inter aliqui *Excellentissimi*. Quis inter nobiles *Perillustres*, *Eques*, *Nobilis* audire debeat, Politici certant, & adhuc sub iudice lis est. Tu morem gentis observa, & cum 600. hodie sæpe sint nomina, vix ullum meritum, titulis nè parcito, nâmq̃ue nil demet verbum.

Sub Imperatore & Rege nobilitas est. De qua sentio cum Juvenal. Satyr 8. *Nobilitas sola est, atque unica virtus*. Fumus enim, & umbra sunt omnia, si absit virtus. Duces, Principes, Comites, Marchiones, Barones, & Nobiles variis gentium institutis complectitur. *Duces* à populo ad bellum ducto nomen sortiti sunt. *Princeps*, ut plurimum pro Domino ditionis propriæ accipitur, quæ tamen ditio regno par non sit. Sic sunt Imperii Principes. Quamquam omnis summa potestas *Princeps* dici possit, atque adeò Cæsar, qui etiam Reges subiectos habere potest: ut Romanorum hodie Imperator Regem Bohemiæ. Principes nonnunquam sunt majori potentia vestigales, ut Moldavus, & Valachus Orienti, & non penitus subsunt; aliquando verò penitus subsunt, ut sunt Principes non Imperiales in Germania. *Comitum* nomen à comitando natum, dum olim Consules, vel Cæsares alii comitabantur. Deinde verò nomen factum est dignitatis. Nobiles ejusmodi majores etiam censet Germania: *Pfalzgrafen*, Comites Palatinos, *Margrafen*, *Landgrafen*, & Comites Tyrolis, qui hodie Principes Austriæ. *Barones* iidem, qui liberi Domini sunt. *Nobilis* ex eo, quòd per virtutem ipsam è vulgo noscibilis sit. Secus enim phaleram clitellario adde, & nobilis merito suo evadet, quod falsum est. *Sremmata quid faciunt? quid prodest Pontice longo sanguine censerì? virtus si deficit*. Bene olim Vates.

QUÆSTIO POLITICA :

An felicioꝛ Respublica , cui Magistratus p̄rennis ?

AFFIRMATUR.

MAlè consulit communioni hominum , & animantium , qui aërem , victum , vivendi ordinem mutat indies. Pejus Reipublicæ , dum Magistratum mutatur imperium. Non hominem , sed semi-DEUM poscit ars regendi ; neque , si ut oportet , tractanda , aliâ faciliùs discitur methodo , quàm experientiâ Magistrâ. Non anni , sed lustrorum & ætatis hic labor , hoc opus est. Nemo grandia molietur , cui dum animus incipit , potestas moliendi desinit. Quî reddat felices Princeps , quî vix tempus , quo felicitas nitatur , nactus est , ut condiscat ? Momentum unum , aut annus nec populi genium , nec statuta regnorum , nec momenta felicitatis penetrare sat potest , Non una Scipiadem format arena. Nec fluctus duntaxat visus domitorem Oceani. Assuetas , & expertas clavus , & habenæ postulant manus. Periculosè discitur , ubi non nisi Reipublicæ damno error conjungitur. Loqui ad libellam , tacere pro meritis , distinguere fucum à colore , ex æquo librare rerum momenta , ponderis res est Divini. Malè , quia serò discit is , cujus , dum imperare cæpit , verba sunt oracula , facta omnia sunt exempla. Non unius hæc stipendii viros postulant , sed quos usus probavit , duravit , quales Reipublicæ admovendos jussit callidus aliàs regendi Tiberius. Exilis profectò usus , experientia esse potest ei , qui hodiernam , vel hesternam potestatis vix numerat diem. Novitas quævis , audaciam , & animos nova suggerit moliendi , si populum ; se ditandi curam , si Principem spectes. Intendit hirudo sugendi acrimoniam , cùm tempus defuturum novit , quo ingluviem satiet. Quæ porro hoc è fonte tributorum vel copia , vel acerbitas verenda. Satiata hirudo , etsi hirudo sit , quia satiata est , mitius furit sitiente.

te. Novitas intolerandum populo, invisum Principi jugum est. Acerbum est genti Protei in morem jam læta, jam nubila coquere pro genio, & ingenio capitis, cui parent. Imperanti porro tantum admittitur gloriæ, & Majestas, quantum temporis. Vix enim exordiis grandibus breve tempus satisdat. Aut si exordia videat orbis, consummatorem non habet, qui sequitur. Displicet, & vilescit purpura, càm veteri, vilique palliolo commutatur. Non Mercurium, solem æmuletur Princeps, ut folio aptus sit. Dura ars ambulatorio nunquam, ut dicimus, fertur ordine. Rara avis tanto digna munere. Ut dextera clavo, sic rara mens regni curis, quia grandibus, suppar est. Non omnis acies amplissimis par est curis. Regna omnia, quibus Magistratum consueta varietas, minùs ferè felicia. Decumanis jactatæ procellis Athenæ, neque grandium admodum tolerantes, neque tyrannidis contemptores. Nunquam egère suo nomine digna, id est grandia, nisi diuturno fortium virorum ductu. Secus enim, qui brevi est tempore, secures antè ponit, quàm præesse pariter, ac prodesse didicerit. Suum meditatio, suum executio, suum experientia tempus poscunt; mutatio Magistratus frequentior vix meditationi, atque adeò designandis felicioris fortis consiliis spatium finit, nedum experientiæ, quâ solâ nititur Magistratum dos, & Regnorum flos maximus. Scientiam nullam Philosophus numerat, nisi scire se sciat. Scit se regere, & feliciter suos, qui felicitatem, quam Patriæ fundavit, aut stabilivit, videt ipse Magistratus, & sentit. Raræ imperantium sunt mentes, quibus eadem in eodem quoque munere sensa sint. Probata uni consilia damnantur alteri: perpetuâ quasi scenæ mutatione, quâ non alteri nocetur magis, quàm Patriæ, quæ Principem hac in fabula chorum ducit.

NEGATUR.

QUOD Poëta de Dea: & tantum constans in levitate sua est, verum de hoc universo est hodie: hoc unum in natura stabile esse, quòd instabilia sint omnia. Alternant vices tempora. Tam implexis, quàm occultis se ipsum


ipsum volvit, & revolvit Mæandris per terræ viscera abyf-
sus. Nunquam ut cursu, sic aspectu sibi constat Luna,
pari mobilitate flectuntur sidera, & his motibus stat na-
turæ felicitas: stabit pari fato fors placita Reipublicæ, si
sibi non consentent perenni serie Magistratus. Da constan-
tem, aut Sirium, aut Plejades orbi; torrebit ille, inen-
dabunt hæ omnia, perdet utrumque fidus. Vel Atlantis
vires aut lassat, aut frangit decumana moles imperii; ge-
statur facilius, cum Hercules succedit ut oneri, sic hono-
ri. In auras abit unde motu perrenni bulliens, & flamma
lucens, nisi pabulo nutriatur. Sic sui ipsius incuria est
subditorum cura; languet vigilantia alacritas, torpet in-
dustria, cum idem cerebrum cura semper fatigat. Et ca-
lybs atteritur frictu non interrupto, & vigor mentis ob-
tunditur, si agat semper. Age, vices muta siderum.
Quia fervet omne principium; labor ipse regendi non
quietis erit monitor, sed incentivum alacritatis. Quam
indignum avaritiæ genus, quod virtus, & merita desti-
nârunt pluribus, paucorum sinu arctare? Sapiencia, pro-
videntia, virtus complures Magistratu dignos efficiunt;
cur præmium, quod jubet æquitas, non obveniat meritis?
Et gloria Principum, & subditorum felicitas est, mul-
tos ornare posse, multos ornatu dignos videri. Aut enim
expetendum est decus, aut malum verendum est Magi-
stratus? Si decus: ornentur plures. Si malum: non op-
primatur unus. Servat Rempublicam civium singulorum
moderatio, dum contra Marii, Syllæque protervia, po-
tentiâ suâ Romanam convulsit Rempublicam. Muta Ma-
gistratus, moderationem fundâsti. Jacet enervis arrogan-
tia, dum parituum se postridie novit, qui hodie clavum
tenet. Non aded præsentis fulgor sortis excæeat, ac futu-
ræ expectatio, dum adest certitudo, in ordinem se re-
digendum propediem. Temperamentum, & condimen-
tum est arrogantia hominibus congenita, nè quis se su-
pra se ausit levare. Ipsa fascium gerendorum temporis
brevitas, quia semen aut famæ, aut probri est sempiterni,
acriores ciet curas ad agendum, animos ad audendum. Nul-
lus tum pensi est labor, cum momento venit existimatio
æternitatis: Sic, quod tormentum vetustas cæca credi-
dit,

dit, gaudium erit, quia commodum mundi, Regibus subdi. Nemo unus est facilè subditorum, qui non etiam obsequio, ut Princeps offendat imperio. Medela malo est amica, Magistratûs varietas, Oblivioni namque novo cum Magistratu dantur veteres parentium seu incuriæ, seu noxæ; tantoque spes affulget amplior, quanto amænior semper ridet Phæbus exoriens. Cum contrà radices quæ egêre mala, vix, ac nè vix quidem tolluntur, cujusmodi sunt veteres Principum offensæ. Si porro unius sit jactura gratiæ facta non antè, quàm tuo, vel imperantis funere est terminanda. Imago veritatis hujus sit Princeps mundi Imperium, Roma. Affusus solio ejusdem universus orbis, dum lapsu annuo Magistratus mutavit. Ubi hanc mutavit regulam, aliam rerum facies scenam induit, non rarâ Tyrannidis, & arrogantiae catastrophæ vitiata. Nempe, non amænium modò in hortis, sed utile quoque in orbe est nihil, nisi sit varium. Color unus effigiem nunquam ornat! Ipsa noctis & coloris umbra decus & pretium conciliat iconi, & diei. Heu, quàm malè consultum foret orbi, si idem semper Planeta regnaret. Vices horum originem, sæcunditatem, decus naturæ conservant. Busta, & cineres generabit orbis Vesuvio similis, si perenni sole coquatur; flaccescent contrà humore omnia, nisi subsequens Luna ardores æstuum temperet. Gaudet natura ipsa perrenni motu dominatum infringere; nè, quod prodesse oportuit lumine, calore, influxu: obesse incipiat neglectu, temeritate, Tyrannide. Impatiens ferme oneris diuturni est validissimus etiam lacertus; & quia impatiens, facilè negligens; tum verò & officii osor, suo primùm, tum Reip. detrimento.



§. II.

Præcipua summorum Magistratum , seu Regnantium dores.



Aurea poma facit non tam color extimus auri ,
 Quàm liquor , & succi dos pretiosa sui.
 Aureus esse cupis Princeps ? color imbuat ora
 Virtutis : mentem sed magis ipse tuam.

DOCTRINA POLITICA.

HAs ut compendio absolvam , ultimorum 4. Austriacorum Cæsarum symbola refero , & cardinibus totidem virtutes definio Imperantium. Ferdinandus III. Salomon ille Germaniæ dictus , *Pro pietate , & religione* tesseram sumpsit. Sapientiâ suâ Salomonis nomen sibi proprium fecit. Optimè sibi , & Reipublicæ consulit Princeps , qui sapiens ipse. Aptissimè enim ad virtutem animum doctrina præparat , è mente Senecæ ep. 88. Unde bene de Alphonso Sapiente Magnus ille : non memini feliciorum , & majorem Principem , quàm Alphonsum ; non feliciorum , & majorem Rempublicam , quàm ab Alphonso.

Doctrina Principis alia *Splendori*, alia *Prudentiæ*, alia *Virtuti* serviat. Splendorem conciliat eloquentia, ut erat Cæsaris, & Augusti, gravis, ac fulminans. Accedat linguarum, præsertim subditorum suorum, notitia. Nul- lum 32. gentium suarum Mithridates, nullum Ferdinan- dus hic per interpretem audiit, singulis responsa dabat ipse, vel magis oracula. Quid illustrius, & amabilius Principe tali inter suos? quid formidolosius inter externos? ut quem Reipublicæ scientia, & historia, rituum, morum, inclinationum, studiorum omnium scientem, eoque in- genio potentem fecêre. Et quamquam potentia Imperii opibus, armis, consiliis, sæderibus, & fortuna paretur; omnia hæc, si sapiens Princeps sit, & parabit pro debi- to, & cum successu tractabit. Basis nempe virtutum scientia, & amor est literatorum. Evertit porro, non conservat Rempublicam, qui bonis pacis artibus, & scien- tiis se, suosque cultos non cupit. Hasta, & ægis Palla- dis usu exercita tueatur imperium; eruditio regat, & cautum faciat: ut Julius, & magnus ille Macedo trium- phis clari, nunquam adeò illustres, si non pariter literat.

Religio scientiæ, & cæterorum omnium caput esto. Regem aræ tuentur, Rex aras vindex. Harum mystas & colat, & tueatur, oportet. Veritas, & sanctitas religio- nis cordi sit, Divinique cultûs augmentum, sinè quo quid sperare Princeps possit, non video. Si enim per Arist. Polit. 5. c. 11. obedientiores sunt subditi Regi pio, quippe qui putant Deos vindicatu- ros, si quid in pium Principem peccaverint; sanè contrà agenti quid evenire necesse sit, nemo non videt. Quid? quòd componitur orbis Regis ad exemplum, nec sic inflectere sensus huma- nos edicta valent, quàm vita Regentium Claud. de 4. Conf. Honor. Ausus olim gloriari Tullius: Romanos non calliditate, aut robore; sed pietate, ac religione gentes omnes, nationesque superasse. Hodie felicior domum. non refert omnium sæculorum historia hâc ipsâ Austriacâ, & tamen cunabula, & meridiem gloriæ omnem uni in acceptis refert religioni per Rudolphi pietatem. Hinc peculiaris eius in Romanam quoque sedem veneratio, juris- jurandi religione firmata toties, quoties diadema novus

Cæ-

Cæsar capeffit. Et bene Protector Ecclesiæ ac vindex, non caput. Utinam eadem Henrico VIII. Angliæ quondam observantia ! non tam lugubri Metamorphosi Anglia se aliam fuisset mirata, non ipse supremis vocibus *omnia* cum religione se perdidisse fuisset confessus.

Iustitia caput est alterum. Eam hîc intelligo, quâ Princeps legum conditoridem, & observator est, per rectam in moribus, & omni actione vitam, ex honesti norma, Si enim secus egerit, exemplo plûs nocet, quàm peccato. Ferè enim iustitia, aut iniquitas dominantium in virtutes, ac vitia transeunt subditorum. Cùm hæc sit conditio Principum, ut, quidquid faciunt, præcipere videantur. Sol Princeps est Reipublicæ, subditi astra, Luce careant, oportet, si ipse tenebras alat, non lucem. Sed etsi hoc absit, minùs ei licere credendum, cui plûs licet. Cùm omnia facta, & dicta Principum rumor excipiat, & amorem cum autoritate amittat, qui, cùm præsit ordine, virtute melior esse debere existimatur.

Consilium sequitur Leopoldi. Hujus nomine, anchora illa, & Reipublicæ acus nautica, venit *Prudentia*: quæ Principem Cynosuræ suæ, seu bono subditorum intentum & prævidere facit, ut præcaveat; & providere legibus, ut gubernet, & dirigat. Rara hæc dos naturæ est, quia raros natura destinat ad regendum. Hæc enim una, præsentia ordinat, futura providet, præterita recordatur. Mater felicitatis; dum contrà imprudens pleraque, & se præcipitat. Pars princeps prudentiæ solùm optanda est, quæ à se habetur; scilicet lumen inditum cæli mungere, quod usus, & experientia firmant. Secunda tamen ad volandum ala requiritur etiam, videlicet consilia libri, amici, scientia; hæc, quæ *ab aliis* veniunt, fulciunt prudentiam. Certè si suo solius sensu Rex agat omnia, superbus magis, quàm sapiens audiet. Aliter Alexander, de quo Lamprid fuit consuetudo ipsi, ut si de jure, aut Magistratu tractaret, solos doctos, & disertos adhiberet; si verò de re militari, milites veteres, & senes bene meritos, ac locorum peritos, & castrorum, & omnes literatos: ac maximè eos, qui historiam nôrunt: requirens, quid in talibus causis, quales in disceptatione

ne versabantur, veteres Imperii seu Romani, seu exterarum gentium fecissent.

Industria Princeps qui caret, quid? nisi ventis semina sparget, etsi consiliis ac sapientiâ sit Alphonfus. Hæc impendiis sæpe non grandibus grandia & molitur, & conficit. Hæc si curam gerit suorum, quæ prima Principum cura est, ut suæ quoque dignitatis, cultûs, & Majestatis non oblita soli *publicæ* serviat *utilitati*, quam regnantium regulam esse oportet. Neque enim adeò Cives Regi, quàm Rex Civibus Pater, & arbiter, ut sol cælo & astris datus videtur, secus, ac, Lipsio arbitro, Romani illi censebant Imperatores, qui non tondebant oves, sed deglubebant; Provinciarum prædones, non imperantes.

Amorem *Clementia* conciliet. Stulta vox Machiaveli de Cæsare Borgia: *metui tutius esse, quàm amari*. Firmissimum Livio l. 8, imperium, quo obedientes gaudent. Infirnum est imperium, cujus fundamenta sunt ossa civium necatorum: & ferè nimium non lubricus modò, sed præceps est trames Civium sanguine irrigatus. Hæc vox digna Principe, quam deliciæ generis humani Titus olim: *non oportere quemquàm à facie Patris tristem discedere*. Non honestiores modò, sed & tutiores præstat clementia Reges, ornamentum imperiorum simul, & certissima salus. Trajanus omnium instar testis sit, sub quo meridiem altissimum Roma tenuit; tantus in hunc subditorum amor, ut alii se satis vixisse ipso viso, alii ipso viso magis prædicarent vivendum.

Quamquam crudelis evadat clementia, si gladius absit *Justitia*. Væ Reipublicæ! cum impunè grassantur scelera: sic enim quò majus regnum, eò majus est latrocinium. Cum ferendo injuriam veterem, invitetur nova. Hæc una seditionum parens est certissima, dum quæ libent, licere cernuntur omnia. Contrà, ut immodicus, & constans metus vindictam, sic temperatus observantiam gignit, & Majestatem firmat. Ament probi, legumque custodes Principem, ut Patrem. vereantur improbi vindicem, quod necessarium sæpe. Aurelianus tametsi severus, *necessarius* Princeps est judicatus, quòd vitia mitiorem Principem non admisissent. Pari causâ Severorum

rum aut non nasci, aut non mori debuisse censuit Senatus. Cæterum rogatus, si tutò possit, ignoscat Princeps: non semper (ut in parvis delictis) cum possit, puniat; sin parcere pœnam possit, temperet Absit enim sævitia, quæ pœnam semper diligit: clementem volo justitiam, quæ pœnitentiâ sæpius, quàm pœnâ contenta sit. Vel certè à qua ad paucos pœna, metus ad omnes perveniat.

Constantia, quem virtus reliqua secundis casibus firmat, adversis adamantinum reddit. Non semper mare æstuum, cælum tempestatum est expers, basis Constantia est Principi; sui securus splendoris, tempestates coercet. Jure lauris cinxit coronatos vertices antiquitas, fulminibus majores, & constantes. Cadat imperium necesse est, quod arundo, quovis Martis, aut Fortunæ turbine mobilis succollat. Sed & illa constantia cordi sit Principi, quæ æquales semper habenas moderetur. Præterquam enim, quòd vilescat Princeps, qui, quæ jusserit, vetat, quæ vetuerit, jubet. Accidit Reipublicæ, & legibus innovatis, quod Plantæ: quæ non convalescit, si sæpius transferatur. Cum certum illud sit Taciti: ferè *super omnibus negotiis meliùs, atque rectiùs veterum legum statutis esse provisum.*

Fortitudo agmen claudat virtutum. Agere fortia Romanorum olim Principum hodie magnorum sit tessera, si hoc nomine digni esse cupiant. Leonis ferè exuviæ, & clava Herculis hos decent, solo etiam nomine formidandos; quamquam belli stratagemata vulpinum quòque suo tempore non recusent pilum. Verentur Principem fortem hostes, quàm aggrediendo cautum, & providum, tam si aggressus sit, cedere nescium, & invictum. Quantum verentur isti, tantum confidunt cives, nubem credentes, quæ cum magno illo Cunctatore (ut agebat Hannibal) in montibus sedens sollicitatâ procellâ imbrem datura est. Præsertim cum nullum belli genus sit, in quo eum fortuna non exercuerit. Et si Princeps non tam imperet, quàm ostendat tolerare labores.

QUÆSTIO POLITICA :

An consultum Principi , omnia per se decidere ?

NEGATUR.

Felix regnum , cui tantus Princeps , ut , quantum dignitate , tantum mentis acie cunctis antecellat suorum. Jure ; quia tutò vitæ , necisque arbiter Prætorio præsidet. At quemadmodum optanda magis , quam speranda hæc omnibus felicitas , ita optanda magis fors , ut aliorum arbitrio Arcopagum Princeps cedat , quorum acie momenta cognoscat , discutiat , concludat. Quoties felix cum Nerone plaufit Respublica , dum per arbitros ; quoties luit infelix , dum per Principem jura accepit ? Amplior est imperantis aut dignitas , aut Majestas , ac ut Prætorem agat. Anima sit Princeps , oculi sint Ministri , quos ipse organorum vice informet. Quantum addis frequentia cum subditis , tantum minuis Majestati ; tollit enim frequentia æstimationem. Horreri sacro non est , quod gressu teritur indies. Summa quæque magnitudinis admirationem , & pretium perdunt , si semper spectentur. Ut aliena ferè magnifica decantat fama , sic longinquitatis comes est reverentia. Quot partibus se , amabò , Princeps distinguat , si omnibus partiri eundem oporteat ? Eò singulis minor , quò communior ; ut minùs acutus est gustus , qui per multa discurret. Hebetat magis , quàm oblectat confusus odor , & canis per floreta discurrens feram amittit. Senatus integros censoriâ dignos credo virgulâ , sibi omnia deposcentes. Quantò magis Principem ? Suo carent fine membra , si caput ; suo pariter tribunalia , si Princeps egerit omnia. Pater Patriæ , & legum vindex sit Princeps , non Æacus , aut Rhadamantus. Damnet reos , aut mitiori faveat calculo , non per se , sed per suos. Secùs enim , dum impunitatem scelerum foverit , tyrannus erit , qui malis audiat bene : illo si satsidet Justitiæ , Pater erit , sed à malis ipsis audiet malè. Utroque sibi injurius , dum & facilitas auctoritatem , & severitas amorem imminuet. Error si sententiæ , aut sancito obrepit , alienus erit , non Principi imputan-

putandus ; qui index sit horologii , non rotula ; horas aptè partitas indicans , non cursum ipsum torquens. Aliorum cum Carolo V. consilia audiat , sua reticeat. Vel certè cum Claudio sic dubio proponat sensu , ut quæ Principis mens sit potior , noverit nemo. Assentationi , communi consiliorum , aularum , & regnorum pesti , via sic momento præcitur. Quam ut Romano senatu exulem faceret , Druso filio Consuli sententiæ dicendæ copiam lege cavit Tiberius. Arctatur , si non eliditur , consulentium libertas , tibi coràm est Princeps , quem reveremur. Frequens sæculo avis est , quæ placendi studio rationum postponat pondera ; ubi leges ipsæ palmam cedunt aut spei , aut metui Majestatis in alia inclinantis. Utinam nunquam Themidi adversa sanxissent consilia ! dum metus , nè aut minùs placeas , aut dicendi libertate displiceas , iniquum ipsum æquitatis colorem fecit mentiri. Blandiri conantur non rarò , qui sensa noverunt capitis deliberantis. Servare semper est Principis , non damnare. Fidem devincire clementiâ , non terrere imperio ; quia Jovem refert , qui veteribus nunquam , nisi faventis author fideris credebatur.

A F F I R M A T U R .

Monstrum naturæ parturit , qui otio purpuram , desideria , aut licentiæ solum damnat. Nunquam languor commendat Principem. Credidit Astræa lancem Principi , gladius libratur unâ , parte alterâ sceptrum. Utroque pari studio curato salus , & tutela suorum est Princeps. Cum & gigantum ausus arceat , & causas sublevet inopum. Quid horum aget , qui , quid actum sit , vel agatur , ipse ignorat ? Animam Reipublicæ Politica censet Principem , exsangue est cadaver sinè influxu , trunca Respublica sinè præsentè anima. Rarò fons in canales ductus primâ sibi constat puritate , rarò aliorum sensu relata primo veritatis colore. Tutius quisque credit , quæ cernit ipse , ac ea , quæ alieno sensu intelligit. Extenuat sæpe , vel auget momenta causæ , referentis aut consulentium seu affectus , seu odium ; & dum æquilibrium non servant pondera , quid mirum , Principem inclinari in illud

Ind, non quod cuperet, sed quod inaudiit? Pudenda res, mancipium suorum facere eum, quem dignitas non sequi, sed ducere voluit, & docere. Per Labyrinthum errat, qui aliena duntaxat studia sequitur. Suis oculis, alienis exequentium manibus utatur Torquati consilio Princeps; imperet, & regat, exequantur Ministri. Ut cera, sic per multos anfractus certior redditus facilè recipit Princeps, quod subdola plagiariorum vafrities tentàrit imprimerè. Regio, non Ministrorum arbitrio creditus est orbis; ille scripturà teste ferat iudicium. Nescit consortem imperii; Ministrum, non æmulum patitur Majestas. Cui jus dicendi potestas creditur, creditur & Majestas, umbrà duntaxat sceptri servatà. Nihil geri feliciter credit orbis suffragium, si Principis non agat Majestas. Et meritò. Tutius, quia labi eò minùs obnoxium iudicium, quò excelsius. Rara orbi felicitas est, nullum in tribunalibus cor, & linguam reperire venalia. Non auri fascinum sentit Aquila, Vectigales non curat rivulos, cui famulatur abyssus. Non adulatio, non metus, non reverentia Principem tangunt; nubes sunt inferioris regionis, olympo nondum pares. Dum compede sive aurèa spei, seu ferreà metùs libertas iudicium minorum non una succubuit. Quot non annos, sed hæreditatis spoliū numerant, quibus lites forentes sunt curæ! commodum causa sentit, quia finem maturum, cùm Princeps jus dicit. Dignus secùs voce illà mulieris, Alexandro jus in via dictare nolenti inclamantis: *si nolis judicare, noli regnare*. Sollicitudinis ut minùs in reliquis, si non alacritatis fomes est Princeps, ipse causas cognoscens.



§. III.

Pauca de Magistratibus cæteris.



Deligit è multis , quæ sit magis apta columnis
 Diva manus , niti quâ diadema queat.
 Scilicet haud quovis bene stant diademata fulcro
 Firma lege , ut firmo stent tibi regna loco.

DOCTRINA POLITICA.

TRia minorum Magistratum nomine indico. Senatum , Magistratum , Judicium. Reipublicæ felicitas , & Insulæ fortunatæ obtingunt , his tribus si beatur. Senatu , in quo consilium ; Magistratu , in quo imperium ; judicio , in quo justitiæ , & æquitatis habet asylum. Romam florentem adoravit orbis , dum Senatus purpurâ , Magistratus gladio , Justitia æquitatis floruit balance. Emareuit gloria , cum Senatum furor , Magistratum timor , Justitiam favor , & pretium occupârunt. Hæ pestes nè in Reipublicæ exitium irrepant , pauca præmitto universim de minoribus Magistratibus , dum sigillatim virtutes expetendas , vitia singulis cavenda. Censent plures verissimum de Republica il-

Id: meliorem, & tutiorem fore Reipublicam, cui malus Princeps, & Magistratus boni; quàm, cui Magistratus mali, & Princeps bonus obveniat. Cùm faciliùs sit à valentibus membris caput debile fulciri, & à multis bonis aut corrigi utcumque, aut celari vitia Principis; quàm à solo valente capite membra omnia putrida emendari.

Tria in minoribus his Magistratibus deligendis cumprimis specto. ut dignè, & cum utilitate Reipublicæ his fungi possint. Primum est *vita probitas*, & sinceri animi justitia. Gladius in manu furentis est potestas improbo collata, hinc ruina Reipublicæ, & Magistratûs. Quo enim plûs potest, plûs nocet. Hinc procul à Magistratu, qui acriter, importunè, dolis & artibus variis clavum deponunt. Sed & illos arce, qui cum Tiberio ambitum occultantes nimitùm se excusant, aut impotentiam, aut metum prætexentes; insanè, tamen occultè appetunt, & amplectuntur, cùm seriam Principis vocem: *aut age, aut desiste*, intelligunt.

Procul aut potentes nimitùm opibus, aut pauperes. Illi, quia præfidunt, & sui impotentes; per vim, non consilium moderantur. Arrogantia publicam illis delictorum causat licentiam. Amplitudo familiæ, & clientum subditos gravat, & cùm ferè crescat amor nummi, quantum ipsa pecunia crescit, horum cupiditates plus habendi, magis destruunt Reipublicam, quàm multitudinis, ut monet Aristoteles 4. Pol. c. 12. Pauperes è contrà hirudines sunt divitem provinciam adeuntes, ipsi divites eandem pauperem relicturi: hinc jus, fâsq; eorum cuique venale, occultè prapos, & in rebus exiguis fraudatores meritò compellat Aristoteles 2. & 4. Polit. Unde ex iisdem capitibus, idem Philosophus cum Solone, mediocrium tantùm opum homines ad Magistratum sumendos censet, & probat Politicorum c. 11. Quamquam si justitia, pietas, prudentia sic aliquem divitem faciant meritis, ut nihil horum verendum sit, néque habilitate hominis promovendi obscuretur Magistratûs authoritas, non omnino excludendi sunt pauperes à Magistratu.

Arcendi denique, qui largitionibus Magistratum sibi comparare velint, ministrorum animos, commendatio-

nem pecuniis, & promissis eementes. Quodd si enim dignitas, quæ virtutis merces, & præmiu est, non meritis, sed divitiis detur, non modò malè conitutæ Reipublicæ id argumentum cum Platone, c. 8. de Rep. sed, ut habet Vopiscus de temporibus Aureliani, in ruinam vergentis imperii omen esse meritò potest. Quâ causâ vapulat ab Aristotele Carthagenensium Respublica, venales esse volens Magistratus, cùm *lex talis pretiosas magis faciat divitias, quàm virtutes, ac civitatem totam ad studium pecuniarum convertat.* Quoties enim sordidissimâ hâc mercaturâ (ut eam Bodinus nominat) culmen tenebit ambitio, & scelus, virtute pecuniis destitutâ, rectis studiis, & artibus humi serpentibus? Unde tollitur studium virtutis, & scientiæ, reverentia Magistratuum, amor Patriæ. Quoties in talibus emptoribus verum erit? quod Seneca l. 1. de benef. c. 9. & Tullius censet, quodd conaturi sint impensas in Magistratum factas, venditâ etiam justitiâ, compensare, & lacunam illam rei familiaris explere. Et quod deterrimum omnium, quoties verum erit illud Severi? *necessarium est, qui emit, vendat; nec sinè rubore puniri possit is, qui, quod emit, vendit.*

Virtus porro singulorum, quæ in collatione Magistratûs spectatur, curanda est, nè pereat, nimîâ Principis beneficiâ, favoribus nimis, & pluribus Magistratibus uni collatis. Natura ipsa pluribus destinata partitur officia. Singuli enim exactiùs muneri suo deserviunt; nec ità præfidentes fiunt potentiâ, quibus pars committitur, quàm quibus summa creditur omnis. Néque alius magis, quàm Respublica patitur; nam & alii virtutis suæ præmiu se acquisituros desperantes, aliorum se convertunt; & patriam obsequiis fraudant, imò cum Patriæ perniciæ alibi idem consequi contendunt. Et quamvis dexteritas, & ingenium nonnullis sit ad admirationem, & multis par; caveat tamen Princeps hos levare nimium, nè fortè gigantes efficiat. Rejiciendi, qui ambitione suâ facere omnia volunt, & dum ipsi omnia nequeunt, Vicarios sui Reipublicæ detrimento multiplicant. Bene Lacedæmonii, Romani, & Macedones lege cavere, nulli duos in civitate honores conferri. Sed de majoribus

hæc Magistratibus dicta intellige, minora si tibi non ob-
sint, nil refert connecti.

Alterum caput est in promovendis ad Magistratum de-
ligendis, *Amor Patriæ*. Cùm enim Magistratûs regula
sit utilitas publica, huic consulat optimè, quisquis amat.
Amare majori fide censentur primùm *Indigenæ*; hinc ex-
teris, cæteris paribus, præferendi per Aristotelem 5.
Pol. c. 3. Adamantina hæc lex est Sinis, qui externos etiam
summâ curâ suis arcent, utpote à quorum copia sedi-
tiones, legum, & morum everfio. Suecia cum pluri-
bus, externos arcent officiis, duplici ratione. Tum quòd
offendantur, se neglectis, plûs fidei, & munerum tri-
bui exteris, quàm Patriæ filiis; ut exemplo sunt Siculi,
qui cùm Wilhelmus Neapolis, & Siciliæ Rex solos exte-
ros officiis præponeret, omnes Gallos iêto fædere unâ in-
teremerunt. Tum quòd ad consulendum bono publico
Reipublicæ, requiratur notitia ejusdem; cujus notitiâ ut
plurimum carent exteri, tenaciori ferè affectu, & studio
suam in patriam affecti: Atque adeò potentiâ, & autho-
ritate ad hujus statum, cui malè addicti sunt, everten-
dum abutuntur non raro. Quanquam, cùm æmulis acua-
tur virtus, quæ non solis favet indigenis, sed etiam in
hoste sit æstimanda; proderit, rariùs nonnunquam, ad
stimulandos indigenas, excellentis virtutis exterum suble-
vare; præsertim si, ut agebat de se Cicero, cum sibi con-
suli peregrinum solum objiceretur: *non adeò sint pere-
grini habendi, quorum nomen, & honor Urbi jam inve-
reravit*. Sic Trajanus Hispanus licèt, imperio præfuit,
à quo tamen hodie, nisi Germanos arceri vult omnes
Bulla aurea.

Amore Patriæ excellere præ cæteris plebeiis censendi
sunt *nobiles*. Quamvis enim in plebeis quòque virtutum
splendor originis vilitatem possit compensare, dum scili-
cet, ut se laudabat Iphicrates coram Harmodio Nobili vi-
litem generis exprobrante dicens: *meum genus in me
sumit gloriæ principium, tuum in te videt exitium*.
Quamvis plures cum Dentato Romanas secures sapienter
perinde, ac feliciter tractaverint, ac proinde concordie
servandæ causâ ad minora officia his aditus patere meri-

tò possit, nihilominus tamen palmam his jure præripiat in majoribus Magistratibus gerendis Nobilitas, ut quæ & genere ipso Magistratui authoritatem conciliat, cum Aristotelis placito 1. Pol. c. 8. ideo Nobiles *generosi* dicantur, quia animum habent generosum vel hoc solo argumento, quod virtutes Majorum eosdem stimulent ad rectè agendum. Et vetus hæc Tacito teste inter Germanos fuerit prærogativa: *Reges ex nobilitate, Duces sumere ex virtute*. Meminere Annales Galliæ, Nobilitatem offensam, quod neglectâ virtute, sanguine, ac meritis, obscura genere, & agendi dexteritate hominum trias à Ludovico XI. Gallorum Rege non finè discriminè Regis ac Patriæ sit sublimata; Sutor videlicet internuntius regius, tonsor Legatus, alius demum magnus Regni Cancellarius dictus. Contrà verò, minùs Reipublicæ plebejos affici est necesse, ut quorum fors bonorum expers, odio stimolata, quod egeat, rariùs publicæ intendit tranquillitati.

Hujus amoris causa est, quod quisque naturali pietate in suam feratur Patriam. Etsi quivis ad Magistratum sumendum cogi possit, eò, quod quivis teneatur Patriæ bono præstare, quod potest, dum ejus obsequio Patria eget; imò pro eadem mortem oppetere sit obstrictus, utpote, quæ uti potest filiis suis, veluti instrumentis suæ incolumitatis: quod ipsum Horatius Cocles, & Curtius Romani, Rex Codrus subditis suis testati sunt. Quamvis insuper Gentium leges pœnam detrectantibus Magistratum indixerint, ut Lacedæmones exilium, Athenienses supplicium capitis, Romani libertatis dispendium; nihilominus tamen non facilè cogendus quisquam, qui gravatè admodum humeros subdit oneri specioso, dum justa est excusatio, & metus periculi fortassis emerfuri. Quodsi verò prætextus etiam, & averfio subsit, rarò *invitis hominibus*, quod ajunt, *arare* optatum messis fructum fundabit. Ubi verò diffidentia sui duntaxat, & modestia animi in nonnullis excusationem totam faciat, juverit Principem, tales Magistratui præ cæteris præficere, qui deinde quàm optimè commodis Patriæ sunt prospecturi; ut sexcenta docent argumenta historiæ utriùsque.

Tertium demum est *rerum usus*, & *scientia muneris*, ad quod quis legitur administer. Hæc enim si desideretur, statua erit Magistratus, quæ careat motrice omnium animâ. Reperias ævo hoc officio sæpe candidatos, qui tûm primùm Magistratûs gerendi artem discere cupiunt, cûm Magistratui præesse oporteret; atque adeò petentes, quod non intelligunt. Quid mirum, erroribus talium implicari Rempublicam; everforésque fieri Patriæ, qui Patres, & Servatores esse debuerant, ut dicebantur. Hic rerum usus, & scientia, cûm ferè ætatis vitio in juvenibus desiderari possit, senes meritò virtutis, experientia, & ætatis præferendos censet Philosophus 7. Pol. c. 14. Senum enim, ait, esse imperium, juvenibus restare obsequium. Unde à *senibus nomen mite Senatûs* habet. Hinc Roma antè 43. ætatis annum Consulatum cuiquam dari vetabat. Imò Plato negotia publica juvenibus simpliciter vetuit committi 3. de Legib. ob temeritatem; quàm ferè in agendo exercent.

Quamquam si contingat in nonnullis 100. etiam annorum senibus, non *pueritiam*, sed, quod fædius, *puerilitatem* manere; contrà verò, præspere juvenes ingenio, consilio, dexteritate, & prudentiâ, præferendus est juvenis etiam Nestori; ut, cujus ætas non annis, sed meritis, & maturitate judicii metienda est. Sic Scipio Africanus, & Pompeius ante præfinitam ætatem fasces Romanos obtinuerunt. Præterea officia nonnulla, velocitatem, & robur corporis, & animi cupiunt; ut sunt militiæ studia; quis sapientum cum Platone juvenes hinc excludat? ut qui *hastas*, *galeam*, & *clypeum* juveni; *consilia*, & *Senatûm* seni attribuit.

Hæc rerum scientia, & usus ut perficiatur, consultius erit in Imperio Monarchico, Magistratus summo imperio subordinatos, perpetuos esse, sed ad Principis nutum amovibiles, si culpa obrepat; quæ tum patebit, si ad rationes munerum suorum dandas singuli adstringantur seriò, & munerum acceptio severâ lege tum interdicitur, cûm potestas confertur. Nam perennis illa mutatio levis causæ argumento, inconstantia notam Principi, Reipublicæ accersit incommoda; dum nullus ferè perfectam

Atam muneris sui rationem penetrat, tum subito eâdem defuncturus, cum melius, & fortius bono publico præesse nōset, & prodesse. Scio Romanis tum Consules domi, tum Provinciarum Prætores, & præfectos lege XII. tabularum latâ mutatos, & soli Censori quinquennii tempus indultum fuisse. Exprobratum item fuisse Tiberio, quod Magistratus perpetuos statuisset. Qui tamen sapienter responderit: Hirudinem multo tempore sanguine potatam quiescere, recentium porro morsus esse accerrimos. Denique per Aristotelem 2. Pol. c. 3. hanc perpetuitatem Magistratuum seditionis causam apud illos esse, qui nullam possident dignitatem.

Pace tamen magni Philosophi de sola Aristocratica Republica, vel Politica id verum esse crediderim, in qua ambulatorium (ut nominant jura) Magistratum summum, spes civium, ordo civitatis, & justitia ipsa meritò videatur exigere. *Spes civium*, ut qui stimulo honoris ad virtutis studium incitantur. *Ordo civitatis*, qui hoc præscribit, & postulat, ut merito virtutis inter cives Magistratus tribuatur, & jus consilii. *Justitia*, quæ ideo Reipublicæ trutinam moderatur, ut dignitates civitatis meritis tribuat, quæ non unus tantum, sed plures sibi comparant. Hinc etiam Romnana Respublica hæc lege XII. tabularum sibi cautum voluit, & consultum. Contrà est in Monarchico Imperio, in quo Magistratuum majorum perpetuitas seditionem potius aut sopit, aut impedit, dum Princeps Magistratui à se constituto assistit; & Magistratus ipso regendi usu magis & prævertere fraudes novit, & retundere impetus audet. Quod ipsum experientia plurimum probat. Quamquam minores Magistratus ubique mutabiles esse possint nullo Reipublicæ incommodo. Hinc sapientis est Principis, adepto imperio Magistratus non innovare sinè causa graviore, quod ipsum æternæ laudi tributum Antonio Pio, quod nullum ab Adriano præcessore promotum, dignitate moverit.

Tanto Reipublicæ commodo, rerum videlicet scientiâ suos ut imbuant Nobiles Veneti, eoque Magistratui gerendo reddant idoneos, Majorum consiliis anno ætatis 25. interesse jam sustinent. Universim certè proderit Nobi-

les, ingenio, & virtute præstantes absolutis literis, Legatis exteras Provincias petituris adjungere, cum ut officii publici administrationi attendere, vitare errata, benefacta notare, iisdem liceat: tum ut hominum, & rerum naturam videndi, nutus, & verba aliena cautius observandi, sua prudentius gubernandi, iisdem copia detur. Secundò: Fas erit publicis nonnunquam adhibere consiliis, non suffragii ferendi, sed aliorum prudentiam, & consilia noscendi causâ. Ex quibus & Reipublicæ negotia penetrent, & Legatos cum audiunt, Legatos agere discant, & dum consiliis intendunt, jam à consiliis esse incipiant. Datâ iisdem veniâ loquendi, ad excitandam industriam, non oberit quandoque eorundem sententiam, & iudicium percontari. His ferè stimulis, atque principiis imbutos juvenes, lectissimos cum tempore nanciscetur Respublica Patres, & servatores.

QUÆSTIO POLITICA.

An felicius regnum, cui bonus Princeps, à consiliis mali; an è converso?

PRO CONSILIARIIS BONIS.

MIra quæstio. Exigua est regno felicitas, quacunque problematis forte tangatur. Quodd tamen dicenda felicitas sit, cum Principe malo, consiliis bonis est adscribenda. Sortis enim ludus est potentia quævis, ac solum, consilio non directum, tam gnaro præsentium, quàm præscio futurorum, Seipsam mole suâ conficit virtus etiam maxima, ubi caret consilio. Hoc enim effecit frequentius, quodd vis nè ausura quidem fuisset, nedum potuerit. Ipsum etiam Principem sua, id est regni in commoda flectit, vel nescientem, vel antè non volentem, quàm se decrevisse jam cernat. Idque felicius, quantò angetur usu ipso consulentium virtus, dum contrâ vis aperta momento deficit. Inclinationes, & sensa Principis quia præsciunt, obicem aut remoram sapienter statuunt à consiliis, quia boni. Duo sunt Reipublicæ tem-
po-

pora, belli, & pacis. Utrôque, etsi malus sit Princeps, felicitati consultum est publicæ, si boni sunt consulentes. Felicius, quia securius bellat cerebrum, quàm dextera, & calybs. Facile triumphat gladius, dum æmulus jacet antè consilii victima, quàm arenam subierit. Non vincere, sed suorum sinè strage, imò & comodo vincere decus est. Habet hoc Respublica, dum malo etiam vexata Principe, consulentibus bonis nititur. Prærogativa hæc solius est consilii. Amplius semper sunt verenda sapientum consilia, quàm exercitus dominantis. Aut enim grande est regnum, aut modicum? Si grande? quantum magnitudini addis corporis, tantò amplius destinās vulnere, quo sauciari possit, nisi præcaveant consilia. Si contrà exile sit: nbi consiliis agitur, tantò amplius crescunt modica, quantò lenius serpunt. Celantur tum consilia plurimum, nè vim amittant, ut aquæ odoræ spiritus. Cuniculis qui agit, hostem celat. Si pacis sint tempora, ferè Princeps malus cum agere multa ipse aut nolit, aut nequeat, paucis intendit. Tum enim vero abstracto in alia omnia Principe, securius Reipublicæ comoda promovent, qui à consiliis. Securius tum illis cadit fera, cum nè vestigium patet. Rubere corallia cernimus, dum patent; quasi verò erubescant & consilia fructu irrita, si malo Principi pateant. Celant tum sensa, ut pectus natura, cui Momus scrutando petiit fenestrellam. Nunquam nempe melius operatur bombyx, ac dum obvolvitur. Et meritò: terretur amplius, qui faucium se sentit, nec opinantem. Amplius torquetur hostis malo, quod non prælagit. Delectatur Princeps comodo, quod non prævidit, etsi malus sit, si deinde sentiat. Felicius nunquam provehitur Respublica, ac dum exteri tua verentur omnia, quia, quid timendum sit à consiliis excubantibus. non penetrant satis. Néque modus, neq; res dum patent, cruciant singula. Ut æstimatio, sic metus sæpe major est eorum, quæ non videmus. Nunquam audaci pede vadum tentabis, cujus te fundus latet. Sic evenit Reipublicæ consiliis optimis communitæ. Hinc ea Regnorum omnium, & Regnantum cura, ut consiliis floreat, quibus sapientia acus, Probitas sit cynosura. Radicem arboris qui

exedit, tametsi florentissima sit arbor ipsa, pessimis nunquam melius imminet captis, ut eandem evertat. Sic, qui Rempublicam tentat elidere, raro Principem ipsum petet, donec antè radices succiderit, id est consilia. Consiliis res omnis volvitur, ut orbis polis. Infirmus ubi axis est, aut ruit, aut exitio proxima moles est. Starent imperia, pessimis etiam gubernata Principibus, si fors eadem beâisset lætior, consiliis meliorum. Magni legimus hodie nominis umbras, quia his basibus caruere. Quàm felix Roma! dum, tametsi non auditus, vixit tamen Seneca: quia quamvis pleno non licuerit prodesse arbitrio; Sapiencia tamen fecit, ut sentiret orbis, quid sapiens & probus malo etiam sub Principe possit; si velit. At quàm lugenda orbi patuit scena, ubi non aulâ duntaxat, vel aure Principis, sed vitâ caruit. Usque adeò verum est, felicitas publica major sunt proborum Consulentium suffragia, etiam sub iniquo imperio.

PRO BONO PRINCIPLE.

FELIX infelicitate suâ est corpus, cui dum languent membra, caput viget. Desint officia, non deest tamen mens omnium moderatrix. Acerbior contrâ pestis nulla, ac quæ ab affecto capite manat in membra. Hoc unum vigoris, vitæ, valetudinis fons est, & delictum. Calamitas, defectus, exitium certa sunt Reipublicæ, cui malus Princeps. Acerbius fatum nequit furere, quàm si hoc feriat fulmine. Valentissima Consulentium membra quid agant, nisi se ut perdant, dum insanit caput? Illud est, quod cum arbitrio utitur, non ratione, optima etiam pessumdat consilia, ut adeò corruptio optimi non nisi pessima fiat. Dum contrâ, estò mala sint consilia, bonus si sit, qui imperat, aut ager ipse, cælo ferente suppetias, aut certè effectui non dabit consilia salutis publicæ perniciofa. Consultor ipse sibi, & anima executionis. Erret Cælo Saturnus, Jupiter, aut Venus; rarus est, qui Planetæ minoris errorem sentiat, quia rarus est, qui observet. Erret sol unus die, Luna nocte, orbis omnis compatitur. Illatior nulla est fors forte

Prin-

Principum; at vel eò, in ruinam perinde, si malus, aut florem Reipublicæ, si bonus sit, gravior: quia quot stipantibus latera, tot vitæ, verborum, actionum testibus cingitur. Nunquam solus est, cujus nutus ipsi, & sensa suos habent exploratores. Potentiùs mephitis nocet, dum ex edito oritur, quia aurâ quâvis in vicinia latè dispergitur. Execrabilior est murex, & purpura vitiis squalens, quam levis etiam umbra magis deformat, ac alium noctes integræ. Privilegium hoc, an pœna sit regnantium, anceps esto, centum oculis ut observentur. Neutrum judico: sed calcar potiùs, quo stimuletur in honesti regulam semper, qui agere, aut loqui potest nihil, quin agat orbi. Ut acriùs impellit pondus, quod ab alto vires sumpsit, ac impetum: sic potentius est exempli pondus malos etiam in consulentes, si bonus sit, qui clavum tenet. Cynosura hic unus est, quem remiges perinde, id est populus; ac turba cætera studiis suis prosequitur. Regiam ferè viam quisque diligimus. Aut convertuntur, aut frænantur Consulentium etsi malorum studia, dum imperantis exemplum, aut imperium est, aut frænium contrarii. Tacito semper pudoris, metûs, vel doloris agitur stimulo subditus, ubi bonitas Principis malitiam exprobrat, & vel silendo bonitatem accendit. Panthera, si fides Plinio, odore feras allicit, ut perdat: idem præstat exemplum boni Principis, suis Patriam, Patriæ suos, se utrisque ut servet. Da mala consulentium ingenia, sequi cogentur Principem bonum. Rectè enim facere cogitur, qui in momenta docetur. Non potest non regnare in Curiis æquitas, in templis religio, in communi vita tranquillitas, ubi Princeps bonus est. Nihil enim membra sinè anima possunt. Rectè sensit: qui Ectypon Principis populum dixit, & consulentes. Reddit Echo vocem, quam accepit. Virtutes, & vitia Principis, omnis Respublica. En fundamentum felicitatis. Voluntas, & potestas, quàm distincta sunt nomina, tam diversa in Reipublicæ commodum sunt momenta. Quid, amabò, possit voluntas consulentium, quantumvis optima. ubi dominantis potestas aut ligat, aut evertit omnia? Contrà verò, quid voluntas, pessima quantumvis, in
rui-

ruinam possit facilè, quæ, nisi altiore libretur pondere, in auras abit? Quoties audivêre consilia Titi, Justiniani, Ferdinandi, non servandæ, sed evertendæ Patriæ sin destinata, certè opportuna? Quàm gloriosi iisdem elisis? Quàm felix Patria uno horum arbitrio? Casura secus, si consulentùm votis fors suos junxisset furores. Nempe solis lumine utut non illuminentur omnes; sic tamen non sentiant lumen nocturæ, ut sequantur, sentiunt, ut crucientur. Sic Principis bonitas, quantum bonos afficit, tantum sin trahat, cruciat æmulos, ut floreat Patriæ. Hanc prælige, quisquis Patriam diligit.

§. IV.

Virtutes, & vitia Magistratum eorum, qui à consiliis.



Remige cum Zephyris dum concordante phaselus
 Alta petit, tumidis tum bene fertur aquis.
 O quoties ires fausto res publica cursu!
 Nî discors studiis turba ministra foret.

DOCTRINA POLITICA.

Duplicem inferiorum Magistratuum sortem cum Lipsio 2. Pol. c. 3. adstruo. Consiliis alii, & obsequiis alii, & officiis Principem, & Rempublicam juvant. Vulgus illos *Consiliarios*, hos *Ministros* aulae, vel officii nominat; Quamquam Causinus Dis. 45. eos, qui officia exequentur, *Administros* dici malit; qui verò aulae addicti obsequiis, & Principis lateri constanter adhærent, *Ministros* dicendos putet.

Viros, qui à consiliis Principum sunt, *rerum peritiâ*, & *fide* præstantes cupit omnis Respublica, à quibus belli & pacis consilia in Principem manent. *Peritiâ* duo constituunt, *morum Patriæ*, *hominumque notitia*, ut supra dixi. Ad consilium, ait Tullius de Rep. dandum, caput est, nōsse Rempublicam; secus de colore differet cæcus. Accedat *scientiarum peritiâ*, cumprimis *doctrinæ morum*, ut videlicet omnia non tantum commodo, sed æquitati, religioni, & conscientiæ consonent. His adde *Jurisprudentiam*, *Eloquentiam*, quæ prudenter concepta, disertè, & fundatè exponit: *historiæ cognitionem*, ejus præsertim, quæ Principis Majores, Patriam, vicinos, hostes concernit: *linguarum* demum peritiâ, atque *Politicam*.

Fides eorundem in virtute, & probitate statuitur, ut vult Lips. 3. Polit. c. 4. *optimum* enim quemque etiam *fideliſſimum* meritò asserit Plinius. Virtus certè regulabit virum quemque *ratione sui*, *Patriæ*, & *Principis spectatum*, quàm optimè. Regulabit consiliarium *ratione sui*, ut caput rerum, & consiliorum *taciturnitatem* colat. Marmoris inscripta sint omnia, quæ coram hoc in deliberationem venerunt. Nunquam certè res magnæ suscineri ab eo possunt, cui tacere grave, ità Curt. l. 4. Trium rerum fuga tacere te faciet. *Vino*, *faminâ*, *penuriâ* abstine. Magni viri dictum, & experientia regicinis cujusdam erat, consilia statûs nōsse omnia, generosiore vino sepultis domi suæ consiliariis. Utebatur hic nempe, ut dicebat Ambrosius, vino instar dulcis equali;

lei; ut, quibus tormenta non eliciunt vocem proditiōis, eos tentet bibendo, ut Patriæ statum, salutem Civium, defensionis suæ consilia hoc pacto prodant. Fit enim, quod ait Seneca ep. 48. quod onerati mero, quemadmodum non continent cibum vino redundante, ita nè secretum quidem. Dixi 2dò *faminā*. Blanditiæ, versutia, adulatio, forma, in hac hyæna, aurea sunt vincula ad elicienda animi arcana: quæ si vel uni detecta sint, jam triuiis, & tonsoribus omnibus nota erunt, tuo sæpe exitio, ut Samson sensit in Dalila. 3tò *pecuniis*. Paræmiâ enim veteri vel Deos aurum fascinat. Procul ergo à consiliis ii, quorum fides alteri Principi est obstricta, quos hodie *pensionarios* dicimus.

Perficit consiliarium virtus ratione *Patriæ*, ut eidem liberè consulat, & *constanter*. Utrumque maxime necessarium Patriæ, & Principi. Cùm enim nullâ re magis aulæ laborent, quàm iis, qui verum dicant, è mente Senecæ l. 6. de benef. c. 30. nihil æquè necessarium Principi, ac modesta consulentium libertas. Hi enim, cùm vi muneris *quæ optima*, non *quæ suavissima* sunt, dicere deberent, sapius magis cùm fortuna Principis loquuntur, quàm cum ipso, ut habet Tacit. i. hist. Cujus amor, vel timor dum animum obtinet, ita, ut gratum tantùm consilium adferre velint, vel consequi aliquid sperant, multa sæpe dicenda tacent, verùm sensum suum celantes, suspensa, & quò inclinatura videntur, respondent, ita quandoque ambigè, ut opposita velle, & loqui videantur. Liberè ergò loquendum cum Principe (quanquam modestè) nunquam tamen de Principe. Sermonem puro, dilucido, plenòque ponderis, non prolixo, aut affectato.

Constanter consulere virum decet. Meritò Carolo V. in Consiliariis vacillatio inuisa, quos ut maturè deliberare, ita seriò statuere semper decet. Quid enim boni speres à mutabili consilio, quod (ut bene culpat Salustius) ex aliena libidine huc, illuc fluctuans, interdum alia, deinde alia decernit; ut eorum, qui dominantur, simulas, aut arrogantia fert, ita bonum, malumve publicum existimat? Ut nihil dicam de solius inconstantiae nota merito suo omnibus inuisa. *Morum gravitate*, quam vir-

tus suprà dicta ingenerat , si consiliarius emineat , constantiâ consulendi non carebit.

Perficit demum virtus ratione *Principis*. In quem cum inviolata fide *Modestiam* indit consiliario. Hinc liberè loquendum Principi , *modestè* tamen suprà monui. In Principem quidem modestiæ specimen Hephæstion dedit ; cui cum à Magno Macedone jus datum fuisset liberè Principem admonendi , libertate hæc sic usus Hephæstion est , ut Curtio teste , magis permissum à Rege , quàm à se vindicatum crederetur. Offendit contrà Calisthenes , qui tamen Regi eidem diceret , quæ oportebat , non eo tamen modo , quo decebat , asperitatis censuram non evasit. Ad eandem modestiam referenda est modestia in alios , quæ patienter collegarum sententias audiat.

Quatuor consiliariis pestes vitandæ. 1. *Affectus* : omnes quippe homines , ait Salustius in Catil. *qui de rebus dubiis consultant , ab odio , amicitia , ira , atque misericordia vacuos esse decet*. Præsertim verò moderanda est *ira* , cum qua nihil rectè fieri potest ; ut suprà fusiùs dixi Qu. & §. ultimo Ethicæ. Item scopolus maximus *avaritia* , quæ Salustio omnia venalia habere dicitur. Hanc suam cujusque utilitatem , allegat causam Arist. 7. Pol. c. 9. cur mercatores à consiliis sint removendi , vel hoc ipso parum magnanimi , & splendidi , & sententiâ affectibus excæcatâ. Sapienter tamen advertit Lipsius , posse consiliis quoque adlegi mercatores , ut Batavi , Veneti , Genuenses hodie , dum videlicet famulorum operâ ; non se ipsis ea munera exercent curarum vacui magis.

Vitanda 2do *discordia*. Sæpe enim , quod observat Tac. 1. hist. *stimulat privati odii pertinacia in publicum exitium* , quod consequi necesse est , cum Plutarchi sensu : *infirmum reddatur , quidquid inter se diffidet*. Unde Aristides , & Themistocles : ante pugnam cum Persis ad Salaminem tentandam , privatas , quas inter se inimicitias foverunt aliquo tempore , Patriæ in finibus posuerunt. Hæc ipsâ causâ sapienter Alphonsus ante Senatûs cuiusvis propylæum Fanum concordiæ se arbitro censuit erigendum , in quo senatores consultaturi , privatas similitates ,

&

& odia ponerent, in Reipublicæ solius commodum depurato animo consilium adituri, ut suprà indicavi.

Vitanda 3tiò est *celeritas*, nisi consilium in arena, ut dicitur, casu sic ferente summendum sit. Nihil enim magni discriminis consiliis tam inimicum, quàm celeritas, ait Liv. 1, 31. ut quæ ferè improvida, & cæca est. Sapiens erat Leonis Imperatoris monitum ex Philosopho 6. Eth. c. 9. ad filium suum: *delibera tardè, nisi aliqua necessitas* (ut suprà dixi, rei occasionis, vel temporis) *celeritatem requirat, at ubi consulueris, festinanter exequere.*

Vitanda demum ultimò est *pervicacia*. Etsi enim celebrârim suprà constantiam consilii, nolim tamen ità contumacem semper consulentem, ut quidvis patiatur potius, quàm sententiam mutet. Melius enim est cum Luciano è medio cursu recurrere, quàm malè currere. Néque inconstantis est (ut habet Cicero pro Balbo) sententiam tanquam aliquod navigium è Reipublicæ tempestate moderari. Alii porro ità naturâ suâ pugnaces sunt, ut solis aliorum sententiis contradicant. Bis stulti Lipsio meritò; sive, quod omnes sapere cupiant ab ore suo; sive, si quid authoritatis in ipsis est, quòd crebris contradictionibus destruant.

QUÆSTIO POLITICA.

Utrum consultius Reipublicæ, concordia, an discordia esse consilia?

PRO DISCORDIA.

NOn semper discordia pestem genuit. Pace ipsâ meliores sæpe orbis ex hac radice fructus legit. Quò ampliùs à sole luna sejungitur, orbem illuminat ampliùs, quia clarius; lucem minuit, quo propinquat magis. Minùs coquit sol fructus terræ, cùm vicinior. Urit acriùs, dum altior imminet. Nihil oblectaret aures musica; nihil concentus, organique concordia, nisi discors foret. Rarò felix est bonum publicum, ubi nimio inter se nectuntur glutine Optimates. Urbi & orbi servando utiliùs nihil diffidentiâ prudente. Mater hu-

jus

jus discordia est sententiarum. Sapientior in salutem corporis medicus nullus, ac qui damna dividit, quæ conjuncta cor opprimerent. Quid agat Princeps, ubi omnes unum excubant Argi? quia una in omnibus mens & studium. Tum scrutandi, vestigandique mentes est animus, ubi alteri nemo, aut rarus suspectus; quia nemo, aut rarus non æmulus alteri. Ac proinde, ut duplici semper acie cernit animus parum pronus; nodum etiam in Scirpo, quod dicimus, quærit, ut error minimus observetur. Acutiùs ferè lustrantur, & liberantur eorum singula, quos novimus studiis dissentire. & quia minimi sic patent nævi, dum singuli placere student Principi, patent eidem latentia omnia; quo fructu? ut Respublica floreat. Opprimunt juncta pondera vires sæpius. Æquilibrium divisio fundat. Funambulus Politicæ est imago, si dexteram solam pondus gravet, quia prægravat, labi necesse est. Servandum æquilibrium Reipublicæ semper, nè violentiam patiatur. Donec æquali nisu aut aër, aut unda premit, violenta non sunt; patitur corpus, dum æqualitas nisu tollitur. Fornices summi potentissimè molem sustinent suam, quia singuli lapides singulis obstitunt. Væ Reipublicæ concordēs tantum animos habenti! Collusio est facilis, ubi par est sensus. Cedit unito robori, quod singulorum vim elusisset. Facilis comes est junctis studiis aut temeritas, aut audacia. Præsidit facilè, qui còmitenti sensus sui se novit habere. Discrepabat Romæ plebs, & Nobilitas, Tribuni, & Consules, & regna subegit. Discordia ipsa hydræ virus latens sæpe præfocat. Tolerant nonnihil medicorum placita febri in corpore, donec noxiùs consumatur humor. Sic noxia Reipublicæ adiuntur studia, dum nihil regem latuerit. Latebit nihil, si discordes tantisper sint Optimates, scissis nàmque partium studiis singuli singulorum actis & verbis, ut Rhadamanti intendent. Elementa ipsa nisi forent discordia, sibi orbis non constaret.

PRO CONCORDIA.

Regni salus concordia est consulentum. Hoc munita præsidio tuta sunt vastis etiam regionibus diffusa imperia;

peria; quæ si conjuncta locis forent, vix securitati suæ
 sat consuluerint. Facilius multò præpeditur exitium
 à catenatis, quàm divisis. Prunas junge, se mutuis fo-
 vebunt præfidiis; quas si dividas, vim omnem ammittunt.
 Corona rumpitur, dum grana mali punici se cernuntur.
 Non urit per causticum vitrum ignis noster, quia radios
 quaquaversum spargit. Ureret non secus, ac sol, si con-
 centraret in focum. Nunquam excidio vicinior est Pa-
 tria, ac dum intestinis lacereatur dissidiis; armorum fo-
 mitem habes, ubi discordia est animorum. Quæ in ho-
 stem æmulum, aut publicum commodum acui, & inten-
 di oportuisset, germano euduntur sanguini tela, ruinæ
 mutux intentantur. Actum est de salute publica, dum
 pax privata non colitur consulendo. Quos summa junxit
 potestas, pudeat privatâ similitudine distendi. Rarò centrum
 idem discordes respiciunt animi, Patriæ nempe felicitatem.
 Valent membra, dum pacem servant qualitates
 concordēs. Confundi valetudinem proum est, ubi hæc
 valetudinis elementa dissentiunt. Confusionem omnis tra-
 hit dissensus, ruinam porro confusio. Callidis machinis
 subvertuntur consilia, dum anima dissident, jamque ipsum
 Patriæ displicet commodum, quia ab invisa mente pro-
 motum. In herba felicitatis spes omnis eliditur, dum
 aut semen præfocatur, aut morâ res omnis evertitur, aut
 retardatur ut minùs, quò Respublica ipsa non nisi mutila
 sibi plaudere possit felicitate. Et quantum, oro, tor-
 mentum Principi discordes conciliare sententias? ignem
 antè aquis conjunxeris, quàm discordium terminos con-
 siliorum; quæque connecti est impossibilitas; alterutrius
 sequendo placitum, alterius emendi odii est acerba sem-
 per necessitas. In,icta stetit Numantia etiam in illum
 Heroem, quem Africa tremuit, donec sibi concors. Ce-
 cidit hosti victima, dum præda suorum antè discordiæ ce-
 cidit. Néque mirum: seipsâ major semper est virtus
 concordix. Nervus adest consilio, & executioni robur,
 dum una omnibus est tessera. Divide, si quem imbecil-
 lem volueris. Ut amicitia aut servat, aut firmat
 omnia, sic perdit dissidium.

§. V.

Virtutes & vitia Ministrorum, & Administratorum.



Tutus fune super tenso ut funambulus erres,
 Armât utrinque gravis peritica longa manus.
 Lubrica res regnum est; si vis stabilire, memento:
 Ensis ut indè manus, & liber indè gravet.

DOCTRINA POLITICA.

Ministrorum, quorum via, & vita quò magis cum
 Lipsio 3. Pol. c. 11. lubrica est, eò magis
 unâ *prudenti cautelâ* virtus definitur; nè, ut
 habet Augustinus, per pericula ad grandius
 periculum perveniant. Diverbio enim veteri: *aula omnes*
laqueis plenæ. Nec *Malæa* ulla tot scopulis, & pericu-
 lis fallax, quot infamis est *aula naufragiis*, per ipsas sæ-
 pe blanditias, & honores exitium struens vel maximè ca-
 venti. Calumniantium non caret insidiis, quibus crimina-
 tione subdolâ, & latente infametur ignarus, imò palam
 laudatus laudem ferat ideo, ut incautiùs decipiatur. *Pru-*
dentem tamen velim esse *cautelam*, non umbris quibus-
 vis, & insidiis animi bicordis innixam, quæ omnia etiâ

tuta vereatur, sui ipsius & hostis, & tortor. Cautela comes erit *modestia*, quæ scilicet, è mente Plinii, non Principis, sed suâ se fortunâ metiatur. Certè populo perinde, ac Principi suspectus is jure est, qui suprà statûs decentiam, comitatûs splendore, vestium, & conviviorum luxu diffuit, inertia magis, quàm industriæ, & ministerii ostentator. Habendus ergo dignus statu cultus, sed quasi is ipse admissus duntaxat, non studiosè curatus. Absint universim ministro pestes geminæ, *simulatio*, & *adulatio*, suprà Qu. 1. jam damnatæ.

In Principem *fides*, ac *reverentia*, ut suprà jam dixi, clavum omnium virtutum teneat cum *probitate*. Voluntatem Principis, ut vehementem, sic mobilem, sæpe sibi ipsi adversam vereatur minister, & revereatur. Quantum proinde in omnia Principis obsequia semper intentus est, tam indagandis curiosè Principis arcanis absteineat, nec nisi moderatione summâ, sibi credita gratiæ in vicem excipiat. Denique accedat frequens, insinuet comis, amet fidus, ut amari mereatur. Sed & nimium vereatur amari. Plerumque enim nimium felices successus exitus habent præcipites, quia summa diu stare loco nesciunt. Testis Sejanus, qui par propè Tiberio, ejusdem imperio trucidatus. Petrus de Vineâ Friderico II. summus, oculis demum orbatus. Górczium ævo nostro Suecia, alium Hispania, plures regna plura non nesciunt. Ferè námque felicitas nimia aut arrogantiam, aut invidiam æmulantûm ut pariat, est necesse.

Administrandi denique præter integerrimam in Principem fidem, fines operum suorum eisdem statuunt, & inviolatè custodiant, quos Princeps in Reipublicæ solius salutem constituit. Fons enim ille est, hi canales salutis sunt publicæ. Hujus obtinendi causâ, cum adversa evenire ferè necessum sit in exequendis imperiis, *magnanimâ patientiâ* firmari animum oportet. Hæc regula est magna agendi, & ætatem (quod in aula est rarius) provecctam consequendi è Romano Philosopho l. 2. de Ira. c. 33. *injurias ferre, & gratias agere*. Rectè porro agendo neminem vereatur Administer. Tametsi enim
non

non contumacem, firmam tamen frontem desiderant negotia publica, inquit Seneca de tranquillitate.

Obsequii promptitudinem sic muneri cuivis promptam impendat, ut scopulum duplicem Jactantiæ caveat. Primus est præfidentia, quæ ceu pluribus par, multa nimis humeris imponit, quibus cum distrahitur, aut, succumbere cogitur, aut ingenti Reipublicæ detrimento obiter & confusè peragendis se potest impendere. Integrum magna quæque negotia, ut dicere solemus, sibi hominem deposcunt. Fatiscit Atlas sub pondere geminato. *Jactantia* alterum caput est, quod de Heraclide ille apud Philippum Macedonem, & Pisone legimus, qui cum otium diligere, negotiis se sufficere jactabant, omnia agere se posse censes sine cura, non alio, quam ostentationis noxiæ fructu, quo Principi, & aliis invisi effecti sunt. Nolim tamen exhinc vel sollicitudine nimiam anxios teneri administratos, vel minora sapientiâ, dexteritatêque suâ sibi assumere: sed universim, *quid valeant humeri*, spectare. Hæc qui agit Administer, ut non obvis fortè est, ita auro, cedroque dignissimus: dignus certè, quem vel Roma lapideum inter populum colossis suis accenseat.

QUÆSTIO POLITICA.

An armis, an consiliis magis servetur Respublica.

PRO ARMIS.

Pudet comparari armis consilium, & consilio arma. Ardua sibi semper deligit virtus. Gloriatur sentibus; & quia arduis pascitur, non nisi per decumanos obices palmas legit, & coronam. Sudore, & labore diffuit, ac pene fatiscit armorum contentio, dum inglorio squallet otio, & torpescit consilium. Meditabitur, vel somniabit potius belli, pacisque fructus Respublica, ubi operantium armorum fragor consiliis pondus non dederit. Fugitiva semper est regnis felicitas, arma fugam impediunt, vias omnes prævertunt. Noverint modum, se-

riem, eventum Curia; quid felicitatis fundabit notitia, si virtus cum Hercule desideretur? Nisi manum admoveas remo, nunquam navis insidias evadet malacia. At hic labor, hoc opus armorum est, non consiliorum. Gloria, & securitas sementis prædulcis est, alteri non cedit falci, quàm executioni. Servatur utroque, & augetur Respublica, unà & armorum tutelâ. Lustremus imperia; quot reperias mentes, quibus ut nihil grande nimis, aut horridum, sic speculationi modus, via, moles omnis quàm perspectissima sunt, Grandia sunt consiliorum oracula! at simul, ac admovenda clavo fuerit dextera; ubi audendum, agendum, languent, concidunt omnia. Nempe diversæ est alex speculari grandia, & conficere. Rarus, qui aut velit, quia arduum; aut possit, quia decorum istud: speculatio plurimum decus est. Bella, & arenas etiam inter pocula crepant multi, tentant pauci. Quantum generosi mero, tantum metuentes sanguine. Aliud est in conclavi, vel inter pocula, aliud in stadio, & virtute hostem fundere. Audent id multi, quia temeritatis: possunt hoc pauci, quia solius est dos, & cos virtutis. Quâ num servetur Respublica? Politicorum dubitat nemo. Facile de summa rerum, de sanguinis gurgite decernitur, ubi tuta omnia, & pax pleno annuit risu. At cujus hic fructus? nisi armorum. Discepta de præliorum eventibus: periculis bellorum, quantum libet: nisi arma rem statuant, ages nihil. Audendo, & agendo, non segnis consiliis servata sunt cum Roma imperia. Nunquam tormentum bellicum hostem aut proteret, aut arcendum terret, nisi igne tonet admoto. Difficilior semper fors est, virum viro opponere, quàm consulere. Multi de rebus gestis perinde, ac gerendis dicunt sententiam, quas gerere vel nōssent, vel ausuri nunquam. Rivales habet sexcentos securitas Reipublicæ semper, at solo consilii illicio non capitur. Virtute opus est, ut teneatur. Viros amat ausum, non ingeniorum duntaxat. Millena consilia acue, executionem deme; tantum egisti, ac si colossus, cui pondus innititur, ademeris. Tolle arma, ægyde carebit Provincia, quæ armis fulta, cruore hostico, lactis vice pasta terminos produxisset.

Ener.

Enervis, & ludibrio est, vel audaciæ, vel arrogantia, vel protervia etiam sapientissima ratio, ubi vires arma non fulciunt.

PRO CONSILIIIS

Infelix publicum, ubi futuris non præcavetur periculis, non prospicitur momentis. Nihil in orbe insidiis magis obnoxium, quam Respublica. Felix, qui huic operam locat. Divinitatis tesseram possidet, qui communi bono cum possit, & consulit. Merito Deorum censui adlegit eos antiquitas. Hoc uno namque nomine nihil in orbe divinius. Actis, & agendis illustratur, crescit, & servatur omnis Respublica; quid agat pro decore, nè dicam pro commodo, quod consilio non fundatur? Tolle cerebrum capiti; sibi dedecus, orbi probrum erit, parvum orbis compendium, homo. Tolle consilium, sibi gravis, ludibrium orbi erit Respublica. Vis metiri gloriam, felicitatem, robur? consilia dimetire; mensura consiliorum, plenitudo est omnium. Malè cohærent inter se singula, dum hæc amissis non dispescit ordinem, causas librat, casus amolitur. Mole suâ ludibrium concidit, quod fundamento hoc caret. Turbo primus suæ statuit protervia, aut temeritatis exemplum. Futura prospicere, moderari præsentia, astum astu prævertere, legibus sancire omnia, solius est consulentis Jovis, aut Palladis decus: & his parta servatur felicitas imperiorum. Opere contrà explere statuta, consummare sancita, minoris res ponderis est, & momenti. Ut ictum duntaxat fortuito librare aut arcu, aut balistâ, res est facilis admodum, dura e contra, certior in perniciem designare centrum: sic elumbis est ipsa etiam fortitudo si vivat, dum consilii animâ caret. Non terrori, non gloriæ, sed direptioni destinatum est regnum, pro quo vigil non excubat oculus. Hebes est, qui rei librandæ immemor solo armorum fremitu rem confici omnem existimat. Sexcenta non potuit vis, quæ prudens moderatio præstitit. Tutius, & felicius feris hostem consilio, quam calybe. Tempus hodie vivimus, si Tacito credas, quò plura consiliis, quam telis

telis gerenda, & manibus sunt. Victoriæ non quaruntur, sed sponte fluunt ad arbitrium, Provinciæ lauri locò properant ad cingendum triumphatorem, ubi caput gladii oculus est consilii. Quod ausus tentavit Abderita, cui non plus erat oculi prospicientis; quàm dexteræ armis instructæ? Non solum jam caput oculus obtinere debet, sed & manum, dum pro Patria est agendum. Rarus hodie, qui agenda lance acri vestiget. Quàm multa, etiam vilissima quæque promovet servile obsequium; rebus magnis mens necessaria est. Epibatarum sudore promovetur triremis, sternitur gregarii militis furore æmulus. At ignotas ex astris per maria vias legere, latentes scrutari rerum fines, periculis & prævenire venturis, & venientibus obviare, animi res est altioris, quàm sola sit dextera. Sæpe acies mentis viam pandit, quò mucro non potuit, Præcurrit ad lauros consilium, sequitur gladius.

Consummat iste duntaxat, quæ sapiens illius
diphthera jam confecit.



QUÆSTIO VI.

Momenta servantia Republicas.

§. I.

Authoritas, & benevolentia, salus Principis.



Ut sol, sic nimios radiorum temperat ignes
 Ut foveat pluviis, non ut inundet aquis.
 Præmia sic Princeps tribuat; nè quem obruat illis,
 Sed magè ad officium provocet, atque fidem.

DOCTRINA POLITICA.



Magistratibus variis ad momenta transeo Rem-
 publicam servantia, de quibus, ut cum Aristo-
 tele 5. Pol. c. 9. sentiam, tria præ cæteris sunt.
 Magistratuum *in subditos amor. Potentia* ad
 exequenda statuta. *Virtus*, atque *Iustitia*. Hæc si adsint
 in Principe, duo illa, quibus Lipsius, Causinus, & cum
 his omnis Politicorum torrens servari, & firmari censent
 Rempublicam, adesse necessarium est. *Authoritatem*
scilicet, & benevolentiam. Authoritas enim virtute, & po-

gentiâ, benevolentiâ, subditorum in Principem, Principis in subditos amore, & justitiâ conciliabitur. Pauca de singulis delibabo.

Authoritas Lipsio 4. Polit. 8. est *impressa subditis, aut exteris opinio reverens de Rege, ejusque statu.* Nihil, vel certè parum admodum sinè hæc Princeps domi, forisque. Tria, per eundem Politicorum Principem, parant auctoritatem, *forma imperii, potentia imperii, mores imperantis.* Primum est *forma imperii*, quam severam, constantem, & adstrictam esse oportet. *Severam*, cum sapienter advertat Cicero pro Mil. maxima peccandi illecebra, spes sit impunitatis. Unde certus Principis contemptus sequitur. Severitas hæc tamen sic adhibenda, ut quæst. priori §. 2. de justitia dixi, scilicet ut clementiâ in tempore mitigetur. Si enim canit Vates: *quoties peccant homines, sua fulmina mittat Jupiter, exiguo tempore inermis erit.* Multos fragor terret, paucos fulmen sternit. Quodsi tamen pervicacia sint vitia, illud Publii certum sit: *crudelem medicum intemperans æger facit.* Solum enim hic pietatis genus est, esse crudelem. 2dò Constantem esse oportet, ut inviolabilia semper velit, quæ semel sapienter constituit Princeps. Procul ergo novatores, Religionis præsertim, & legum, qui ferè *etiam recta commutant*, novitatis adducti libidine, *ut aliquid de suo videantur adferre*, ut ait Quintil. Nunquam ergo mutanda vetera, nè quidem consuetudines, aut ritus gentium, nisi aut summa necessitas, aut summa, & certa utilitas suadeat. Velut, cum lex *noxia*, aut *inutilis* per tempora, & circumstantias esse incipit; quemadmodum exponit Aristoteles ipse. Et tum quoque *leniter* absque strepitu, gradatim, & lentè mutatio facienda est; quo solo, Dione teste, sibi Augustus firmavit imperium, non omnia simul exequendo, quæ volebat; in quo Julius vehementer peccaverat. 3tiò *Adstricta* sit imperii forma, ut præcipua vis, & honor non solum à Principe, sed etiam in Principem sit. *A Principe*, ut res maximas omnes ipse aut agat, aut lustratas confirmet: ut innotescat omnibus, ab eo omnia expectari tanquam arbitro, re, ac nomine Regio. Sed & *apud Principem* honor maneat, nemi-

nemini aulicorum se instar Macedonis erga Clitum & Hephestionem facilem nimis exhibendo; præsertim, si quis audax, de vili, rerum non satis peritus, vel in deteriora propendens; ut bene observat Contzen. l. 8. c. 4. Quia per Philosophum 5. Pol. c. 11. communis Principatus custodia est, neminem unum nimis magnum facere.

Secundùm authoritatis parandæ medium est *potentia Imperii*, quæ propriè est *facultas, propria servandi per media idonea, & aliena obtinendi cum jure*. Parum enim videmus dominatûs inter animantia obtinere ea, quæ imbellia sunt viribus. Sed de hoc breviter agam, cum de bello; cum iisdem potentia paretur mediis, quibus bellum geritur, & promovetur.

Tertia ad authoritatem via sunt *mores imperantis*. Hi sunt duplices, *interni*, qui in animo; *externi*, qui in corpore resident. Illi sunt virtutes, præsertim providentia, ac pietas, & religio, quæ vinculum est fidei, & humanæ societatis; hæc enim sanctit fœdera, & necit animos. Ubi contrà religionis est diversitas, alii alios velut impios adversantur, Et quæ sit, amabò, societas, aut amicitia inter cives? observantia in Principem inter subditos? Merito Lipsius: *religionem evertit, quisquis libertatem inducit, ex qua confusio, & contemptus*. Potentissimus nempe est religionis affectus ad audendum, cum adversarius adest. Et quæ hîc Majestatis securitas? cui-cunque enim faveat, adversantem partem sentiet alteram. 2dò Providentiæ comes est industria Principis, & Magistratum; quæ si sapientiâ nixa sit, salus adest Reipublicæ; si vigilantia fulciatur, securitate beat cives, terrore hostes exarmat. Externos mores, species corporis, Majestas frontis, non acerba, vel affusâ, sed maturâ comitate gravis efficit; quam cum velocitate ingenii, & naturæ dotibus non vereantur subditi, sed revereantur,

Benevolentia definitur à Lipsio 4. Pol. 8. subditorum in Regem, ejusque statum prompta inclinatio, & amor. Hunc Civium amorem inexpugnabile Principis munimentum nominat Sav. Symb. 38. Tria eandem Reipublicæ comparant: *lenitas, beneficentia, indulgentia*. Lenitatem facta, & verba probent, omnia velut sereni cœli, & riden-

videntis solis faciem exhibentia: hoc enim Senecæ consilio fit, ut juxta Tacitum, & meliùs, & fideliùs pereatur à subditis. Omnia tamen temperanda sunt. Huc revocaverim curam Principis, ut facilis sit subditis ad eum accessus, exemplo Rudolphi I. satellitibus suis dicentis: *per Deum finire homines ad me venire, non enim ad imperium ideo sum vocatus, ut in arcula includar. 2dum est beneficentia*, quia per Senecam beneficiis meliùs custoditur imperium, quàm armis. Sed & hìc vitandus est scopolus prodigalitatis; cui, quâ causâ, & quantum tribuatur, ut spectet Princeps. Nam ut observat Tacitus 2. annal. modò simplicitas ac liberalitas, nisi modus adsit, in exitium vertuntur. 3tium est *indulgentia*, id enim est hodie ferè ingenium hominum, ut *nec totam servitutem pati possint, nec totam libertatem*, Tac. 1. hist. c. 16. Quare curandum, ut quantum sinè luxu, vitæque licentia, & morum corruptela fieri potest. populus affluenter, & jucundè habeatur. *affluenter*, quod victum, & commoda attinet; cùm Tullii monito omnes, qui Rempublicam gubernant, consulere debeant, ut earum rerum copia sit, quæ sunt necessariæ. *Jucundè* habebitur, ludis videlicet, & voluptatibus æquis, qui hilaritatem foveant, non lasciviam fundent. Quamquam amorem hunc subditorum in Principem naturalis eorundem sæpe inclinatio vestigalem faciat. Præsertim si se à religionis ejusdem, virtutis præsertim æquitatis, & sui amante non tantum audiant, sed experiantur, & sentiant gubernari. De religione satis dixi. De æquitate per judicia, & amorem in subditos pauca privatim.

QUÆSTIO POLITICA.

An expediat Reipublicæ multas dari immunitates?

AFFIRMATUR.

Nihil tam divinum homini, quàm bene mereri de aliis. Hâc largitate potentiâ pariter, & affectu diis

diis par est Princeps. Nemo parere non gaudet ei, cujus pondus, quantum gravat, tantum spes recreat, merces etiam, ut exspectatur; oblectat. Nullum potentius dominandi est genus, aut sublimior servitus, ac immunitatibus parta. Vincula ipsa gaudens tolerat, quæ injecit gratia. Felicem namque censet se omnis, cum subest ei, per quem felix est redditus. Optimum securitatis genus est, benefactis rapientibus animos se munire. Rapit nihil magis, quam immunitas collata. Securitas certa est, dum præsidio sunt gratiæ. Tot pro se mænia fundat, quot immunitate quis dotat. Feliciter expugnatur animus, ubi hæc liberalitate cerratur. Nil feritur irritò, quod sic profunditur. Circumstant benignum læti oculi, candor, fiducia, sequitur memoria sempiterna. Parcum contra morosi, simulatio, dolus, oblivio. Tam ferè nescitur, qui non vixerit. Amore munitur solium; non amari non potest, pro quo beneficia linguæ sunt, ut ametur. Hac de causa Princeps, ut firmamenta regnorum, amorem, & honorem referrent, tot in aulis munera, & dignitatum gradus excogitarunt, ut infonti profusione, dum immunes reddunt plures oneribus, publicam securitatem fundent, Majestatem ornent. Respublica nulla est, quæ togâ perinde, ac sago illustria non censeat nomina, horum meritis sæpe etiam populo immunitas sit solatio. Principis, Reipublicæ, remuneratorum causâ. Hoc uno munere par diis est Princeps. Auro privata etiam penus munerari virtutem potest, at immunitate Princeps solus. Respublica immunitate donata quantum crescit affectu, tantum virtute in Principem; sibi decora, exteris formidanda. Nunquam indignus videri populus hoc munere debet. Etiam Piratis mare, idololatriæ terra est libera, sol idem est omnibus. Tyrannis ipsa tolerabilis vulgo creditur, ubi immunitas aliqua liberalem populo Principem probat. Tam enim hæc in illo amabilis, ut si desint cætera, ametur ex una; ut contra odio sit ex uno rigore constanti, si cætera adsint omnia. Remunerati porro immunitatibus provocati se Patriæ, sibi Patriam probant. Torpere ardor nescit, cui hoc calcar subdideris. Larva sæpe personata est discrimen, umbrâ non merito suo terrens.

Has adde gratias invitantes , nihil metûs obtendet larva periculi. Hanc metam præfige stadio , præcipitia ipsa erunt amanti compendia. Estò , ars & natura nocendi artibus sudet , invia belli , pacisque artibus nulla est via , cùm bravium immunitas est. Malo immunitatum prodigum , quàm tenacem. Sibi prior nocens prædest aliis ; hic bonus nemini , sibi pessimus , dum felicem reddit neminem , odia omnium nundinatur. Non horreo condenda sementis est , ut tumulo , sed ut penui. Referandum in tempore , credenda auræ in tempore , legetur fructus cum tempore. Munificum perinde ; ac magnificum nihil magis , quàm Roma , & Græcia , quo fructu ? stetit , crevit , floruit orbi utriusque imperium. Obsit privatis immunitas , non obest publicis. Virtuti calcar est , cui nulum satis pretiosum adamantem natura , magnetem protulit gratia.

NEGATUR.


Perniciosius corpori virus nullum , ac quod viscera : Reipublicæ , quod adoritur leges. Ut corpori pro illis , sic Principi pro his magis semper pugnandum , quàm pro focis. Aperta vis est , quæ petit mænia ; occulta , quæ leges incidit. Perniciosior hostis , qui cuniculis agit , quam qui palàm classicum intonat , & flammæ loquitur. Serpit ille , & nervos exedit , fundamenta convellit ; hic eminus ferè , & incerto vulnere sauciat. Tuti semper sunt finibus limites , ubi suum legi robur constat , & vigor. Hæc sanguis publici est corporis , quantum vel vitias , vel adimis sanguinis , tantum roboris , tantum vitæ ademisti. Si porro lex quælibet uniformitate , ut ordo stat concordia civium : immunitate pereat , oportet. Invisus passim redditur publico , qui exemptus ; suspectus eximens ; temeritatis hic , adulationis ille sin meritum , censuram certè vix , ac nè vix quidem evadit. Plebem tangit invidia , pares æmulatio , sæpe eximentis perinde ac exempti discrimine ; pari certè contemptu , & quod sequitur , odio. Dissolutionis nutrix immunitas est , dum , quia communi ferè pondere premitur populus , tantum sibi plaudit exemptus , quantum inter myricas cupressus. Quid , quod & bene-

beneficium destinat esse gratia . quæ traduce sive in populum, sive in familiam duntaxat gradu ducitur. Temporum lapsu fons esse vix creditur Princeps, à quo constanter alveo derivatur. Accit fidem, amorem . virtutem immunitas. O pulchra nomina ! amatur principio , labente tempore proterviam stimulat. Fomentum exitii tempus efficit, quod gratitudinis esse fomitem oportebat. Rarò respondet populus muneri , quia rarò gratiam assequitur Principis. Oneris penè tædere jam incipit , cùm immunitas libertatis virus palato offundit. At si immunitatem hanc non multitudinis , sed personæ malis ; Objectum mutatur , non periculum. Raris si conferas, æmulantes acuis ; vixque sentitur dulcor, qui guttas aliquot torrentis afficit. Pluribus commune si facias ; vilescit, quod passim confertur. Impetûs namque censetur profusio, non virtutis præmium. Credas multiplicato munere semen ingratitude multiplicari. Utimur immunitate, dum incipimus ; abutimur ferè, dum tempus fluit. Ampliora cancrenæ instar sibi semper deposcit jura libertas. Spernitur contrà lex , quæ non omnes, vel non pari pondere gravat. Gravatur ferè alienæ cervicis jugum , quod adimitur suæ. Ut nihil exempli vim referam. Naturâ ipsâ semper faciliùs trahit libertatis , quàm observantiæ semita. Regna consule. Rarum cernas , cui , immunitas seditio-num, aut pestium aliarum semen non fuerit. Utinam non sensisset Bizantium, Græcia, Roma, Germania! dum in periculis Patriæ immunitas sola, sera navium, æris, annonæ, militis subsidia sistens, exitium Patriæ maturavit.



§. II.

Judiciorum ratio , & disciplina Civium.



En mucto , pro meritis usum est ad utrumque paratus;
 Vulnera ferre malis , munera ferre bonis.
 Cernat ô hoc utinam gens subdita , & experiatur !
 Nec mora: qui ferrum est , aureus orbis erit.

DOCTRINA POLITICA.

Iudiciorum æquitas fundatam servat Rempublicam; quâ neglectâ , cùm jaceat observantia legum; marcere Rempublicam consequens est. Sceleratos reperiri ubique mortalis facit conditio , puniri ratio dicat: cùm nimia in sceleratos bonitas, extema sit ferarum crudelitas. Judicibus ergo tanquam animato jure , ut eos nominat Contzen l. 7. Pol. c. 22. consulendum Reipublicæ , qui mediatores sint , partes æqualitate juncturi; sed & arbitri sint, lites scissuri, vindices scelera multaturi, quorum causâ fasces & secures Consuli Roma constituit.

Quamquam pro varietate causarum , delictorum, & eventuum, imò etiam multitudine , multos variarum litium

tium Judices à Principe statuendos Rerum publicarum usus nos doceat. In omnibus tamen hæc cumprimis observanda sunt paucis. I. Judicium omne esse administrationem justitiæ in causa cognita per judicem. Hinc duas judicii cujusvis partes constituo: primam cognitionem causæ; & secundam pronuntiationem sententiæ. Personis tribus definitur: *actore*, qui litem intendit; *reo*, cui lis, vel dies dicitur: *Judice*, qui auditis partium momentis sententiâ suâ litem terminat. Dotes in eo has præcipue petit publicum bonum. *Imò* timorem Domini, qui sanguinem, qui per judicia vel funditur, vel fugitur inter partes, de manu judiciis requiret. *2dò* Potentiam, quæ audaciæ, & temeritati protervæ frænum injiciat. *3tiò*. Fidem, & candorem non modò malo, sed nè suspitione quidem mali laborantem. *4rò*. Contemptum pecuniarum. & munerum: quâ causâ Turcarum, & Sinarum patiuntur imperia; & Thebæ sinè manibus judices effigiabant. *5rò*. Legum, & consuetudinum peritiam exactam. *6rò*. Sedulitatem, & solertiam in litibus cognoscendis, & terminandis, quas Justinianus quidem de judiciis loquens, ultra triennium nunquam voluit producendas; sed, quæ fors temporum nostrorum est, ut optare quidem id liceat nonnunquam, vix, ac nè vix quidem sperare.

Litibus promovendis hæc ferè idonea sunt. *Imò*. Si nè judiciis sententia tentanda unio partium. Melior enim est semper macra concordia, quàm pinguis sententia. *2dò*. Supervacanea, præsertim dilationes in jure tollenda; & malitia litigantium, vel provocandi licentia (quæ sola sæpe litium causa est) castiganda. *3tiò*, Pauperibus statuantur Advocati, per quos si dubia causa sit, potissimum faveatur egenis, viduis, & pupillis, quorum hoc casu est æquior causa.

Quatuor Judicium animos à recti sententia amovere possunt. *Imò*. Timor præsertim Potentium, aries vehemens animis infirmandis, nisi potentioris, Dei videlicet timor dominatum cordis obtineat. *2dò*. Cupiditas, seu lucri, & commodorum aviditas. *Quid enim non mortalia cogit pectora auri sacra fames?* *3tiò*. Amor, quo

confanguineos, affines, vel amicos suos complectuntur. Hinc velata Themis figurabatur veteribus, quam néque auri fulgor, & personarum delectus fascinet; aut miserratio potius à recti tramite possit dinovere. 4to. Odium, quod veneno suo & livore etiam æquissima quæque vitio laborare existimat. Interpidum proinde, cupiditatis, amoris, & odii expertem judicia arbitrum poscunt; quibus Reipublicæ salus nritur. Judiciorum porro regula semper sit *Lex*, quàm meritò litium rete nominat Cæntzen §. Pol. 11.

Lex hîc cum D. Thoma accipitur, non pro pæcepto tantum, quod ad tempus imponitur, sed pro constanti *ordinatione rationis ad bonum commune, ab eo, qui curam communitatis habet, promulgata*. Dico: *constanti*, quia perseverat, & successores quôque ac pòsteros obligat. Dico 2dò. *ordinatio rationis*, cùm enim lex non tyranni, sed Patris in morem imperet, bonum publicum spectare debet; iniqua lex ratione caret. Dico 3tiò: *ab eo, qui curam communitatis habet*; nam legem condere, mutare, vel abrogare summæ tantum est potestatis. Leges nulla non ætas, & Provincia habuit, ut meritò salutem civitatum Arist. 1. Rhet. c. 4. eas nominet, cùm videlicet ad pacem inter cives servandam ut necessariæ sunt, ità plurimum faciant. Peccata enim cùm evenire oporteat, leges quôque condi oportuit, quarum regulâ etsi peccata non tollantur penitus, servantur multi, & qui perituri sunt, lenius cadunt. Legis virtus per Modest. l. 7. de legib. est imperare, vetare, permittere, punire, & præmio afficere. Tria in his considero: primum est universale, & cumprimis curandum, videlicet, ut leges optimæ sint, quæ mores fundent, non quæ affluentiam rerum curent.

Optimæ, & justitiæ consonæ erunt, si pauca, brevius conceptæ, tamen etiam ad minora extensæ, à Principe statuantur. *Paucas* volo, ut enim multitudinem morborum pharmaca, sic corruptissimam Rempublicam, & perditos mores legum multitudo indicat. Erant tempora, quibus legum copiâ laborabatur: ex quibus, cùm una sæpe alteri esset contraria, confusionem multitudo gigneret

ret ipsa, hīrudines quondam non Advocatī partium emer-
serunt, quibus lites in immensum excreverent, dum de-
mum universas Justinianus arctaret. Olim lex tota erat
moderantis arbitriū. Hodie paucae sint leges, optima
erit Respublica. *Brevius, & clarius conceptas cupio,*
quia cū observandae sint omnibus, obscuritas inexcusabilis
esse debet; hae enim sola est, quae disputandi, & erran-
di sufficit causam. Verbo: legum pugna, Causidico-
rum praeda; dum videlicet legibus munita Respublica le-
gibus ipsis per eodem evertitur, dum huc, illucque non
ratione, sed libidine leges trahuntur. Denique ad mino-
ra etiam sic extensas velim, ut cum frantum luxui specta-
culorum, vestium, ludorum, & conviviorum statuitur
(quorum luxuriam *agra civitatis indicia* nominat Sene-
ca Epist. 114.) sua quoque lex sit ponderibus, mensuris,
& modis quibusvis, pecuniae cum aequitate lierandae, ex
quorum neglectu scelera, & turbas in Republica oriri
neceffe est.

Alterum, quod in legibus curandum, est, ut non o-
mni genti lex eadem imperet. Ut enim diversae sunt in-
clinationes populorum, ferventium, mansuetorum, ser-
vilis animi, ita legis variae, & severioris, aut minūs
asperae cura esse debet. Diverso jure gaudet Germania
sola. ut caetera sileam; Belgium, Saxonia, Austria testes
sunt, singulae diverso jure utuntur. Quaecunque verò
lex lata fuerit sapienti consilio, nunquam omnino mutan-
da est, & abroganda ē mente Cleonis, nisi ē mutatione
legis ingens utilitas certa sit, & nullum Reipublicae ob-
venturum incommodum cognoscatur.

Tertium est: quod, cū plurimi homines sint, ut
observat Dio, qui nec benignitate, nec beneficiis in officio
contineantur; atque adeò pœnales quoque leges esse oport-
teat, quibus plectantur, qui peccaverunt, non tam ipsi
ut pereant, quàm ut ipsi alios pereundo deterreant. Tria
in pœnalibus his legibus prae caeteris notanda sunt. Pri-
mū delictis gravibus gravia statuuntur supplicia, ut mi-
tigatio ipsa gratia esse possit. 2dò. Pœnae pro ratione per-
sonarum temperentur. 3tìò. Nemo ab hac exemptus sit.

Unde tamen si Principem ; legis authorem , à lege ipsa plecti congruum non videatur , cum superiorem sua in Republica se Princeps non habeat ; tamen si suis leges cordi esse cupiat Princeps , se ipsum iisdem regi , & gubernari ostendat , faciens ipse , quæ præcipit , conformia præceptis subditorum facta exemplo magis , quam lege impetraturus. *Patere* aiebat Cato , *legem , quam ipse tuleris*. Certè si Platoni l. 5. de legib. fides sit : paratum exitium illi civitati est , in qua non lex magistratibus , sed magistratus legi præstant. Hinc ævo digna vox illa Trajani , electo Prætorii Præfecto , cum eidem gladium in manus daret , dicentis : *hunc cape ensen , & si bonus fuero , pro me : sin malus , contra me utitor*. Manlius certè filio , lauream ab hoste quantumvis cæso reportaret , non pepercit , eò quòd contra legem prælium iniisset. At illustrius longè est Seleuci , qui , cum filius adulterii reus in jus vocaretur , nè legi labem inureret , ejusdem servandæ causâ sibi unum , filio alterum oculum effodi nil pensi habuit. Claudat Aristoteles 3. Pol. c. 12. si quos præesse oportet , ità suis præesse oportet , ità sunt præficiendi ; ut sint custodes legum , & ministri.

Postremum , quo se amari sentiant cives , atque adeò amorem Princeps extorqueat , est cura ejusdem solers , ut artium quarumvis , liberalium vel maximè disciplinarum studio liberi eorum excolantur. Injurius est Reipublicæ , & hoste quovis deterior , cui juventutis institutio cordi non est. Ut enim in semente spes messis , sic in liberorum educatione est spes civitatis , & Reipublicæ. Pallas Principi in amoribus semper sit , non ea duntaxat , quæ armis , ut sequenti videbimus fectioe ; verùm ea magis , quæ pacis studiis Rempublicam decorat , & conservat. Stabat Græciæ pro foribus bubo signaturus Athenas , non secus , ac Gorgonis caput Martis sacrarium indicabat. Bove , non Jove imperii digna erat vox illa . omnia sapientum scripta ; & scientias omnes dignas esse flammis , & oblivione. Quid enim obganniunt caudices ejusmodi ? hebetari optimarum mentium ad alta natam indolem ; emasculari robur heroicum ; ad lucernam , & pluteum contabescere animos ; solitudinis , non illustris faci-

noris patrandi, aut Patriæ tuendæ causâ reddi idoneos, & quæ fursuris ejusdem sunt vetera. At verò retundunt rudium istum sexcenta lectissimarum mentium exempla, quæ sic utrâque Pallade claruerunt, ut testimonium orbis tulerint, usque adeò se claros orbi futuros nunquam fuisse, nisi, quæ dextera literis digna gessisset, dextera eadem perenni memoriæ consecrâset. Convincit quotidiana experientia, multum ruditatis, feritatis, & barbaræ truculentia iis inesse gentibus, quarum Provinciis Minervæ sacris est interdictum. Quid felix ea in Republica, amabo, cum stolo in purpura leges rogat, dum Arcades in consiliis, & judiciis sententiam dicunt, indolati trunci, & stipites moderantur omnia? Speciosum cadaver sine anima. Turcicum testetur imperium, cuius sapientia, & nobilitas omnis uno in calybe. Monstra dicas immanitatis, non decora furtitudinis, quæ celebrant ipsi Amurathes, Mahometes cum reliquis. Quàm longè sibi ipsi dissimilis Russia, ex quo artium variarum studiis gens illa Magni sui Principis curâ excollitur? Adde literas, Russiam in Russia propediem desiderabis. Quid enim Musis antiquiùs, quàm ut cultu faciant mansuescere gentes, & è rudi marmore Memnonis miracula renovent? Convincit denique Europæ cultioris tot regnorum, & Principum concors sententia, quâ nil Reipublicæ gloriæ, & utilitati duxerunt congruentiùs, quàm Academiis, & literatorum cætibz ornare Provincias, laborem improbum incitare stipendiis, redditibus levare tædia, & privilegiis grandibus stimulare, fundare, & dotare Gymnasia: eâ quidem contentione, & studio, ut quiritari jam non nullis visum sit digniùs, quòd abundant, quàm quòd antè caruerint Athenæis. Quamquam momento unico quiritationi causam adimas, si non copia, sed delectus, quem in milite legendo omnes commendant, in Musarum quoque Alumnis imperio Principis observetur. Néque enim omnibus doctam datum est penetrare Corinthum. Quid verò proderit Reipublicæ numerus? fruges consumere natus, non parare. Onerabit, non ornabit; evertet, aut turbabit potiùs, quàm servabit.

QUÆSTIO POLITICA.

An consultius Reipublicæ , jus dici ab exteris ?

A F F I R M A T U R .

Regnorum basis Themis est. Dum ordo Reipublicæ esse desinit anima, latrocinium est, non civitas. Infirma â basi nititur, quod ad Justitiæ libellam non est fundatum. Salus una Reipublicæ æquitas, æquitaris porro interest Judicium delectus. Alienos prætulerim jure, quorum jus ferè felicius. Quid enim necessarium magis jura dictanti, ac libertas affectuum? Hæc ferè præ ci-ve triumphat exteris. Solem Ideam statue, Judex esse si cupias. Radius ejus inæqualis est nulli. Procul Judicem, qui amicus est. Arbitrum fora cupiunt, non Patronum. Veletur oculus, stringatur dextera, nulli pateat odii vel amoris illicio. Causam nâmq; & momenta discerni, non sanguinem, formam, originem, petunt Curia. Alieni hæc dos certa est judicis, non domestici. Purius videt oculus, quem glaucoma non vitiat. Glaucoma porro obscurum. nullum est. ac quod terræ purimum vehit. Non movetur sanguine, quem aliena tulit regio. Sinceriori liberatur, & triumphat pondere veritas, cum patrociniò caret originis, merito tantum suo fides. Felicitas judiciorum puritas sensuum est, & libertas. Nihil affectum flectit, aut laqueat; dum familiarium nemo, qui clienrelam sumat, est coram. Rarè omni caret labe domesticus. Natura ipsa pronum causæ dum facit, si non fascinat, dubia certè reddit ejusdem pondera. Par quidem in omnes fulmen contulit dignitas, sæpe tamen in columbas sævit acrius, mitius in aquilarum pullos, quantumvis nocentes, sin prorsus prætereat. Gravius premit pondus, quod, quia destinatum omnibus, in paucos cadit. Facilem patitur lex, quamvis stricta, exceptionem, ubi sanguinis jus præcellit. Hinc ea mens Principum plurimum, exteros rerum arbitros legere Curiis, Provinciis statuere. Clarius Apollodorus Athenis, Apollodo-

Iodoro Athenæ , quia exterus Athenis fasces gessit. Nunquam Genuenses tanto sibi plauderent flore , nisi in lustra singula exteros litium arbitros adsciscerent. Divinum enim vrrò consiliū ! Peregrina nempe , ut cibos aromata , sic condiunt , aut asperando prædulcia , aut temperando calida , aut animando frigida , atque adeò valetudinem firmando , vitam servando. Consulitur Patriæ , dum indefessa exterorum industria quietem nescit. Ad hæc circumspiciū longè , quia omnium oculis in se intentis ; cordatiū , tanquam ignotis : impensiū , qui æmulantum impulsa studio agit plurima , dum aut otio langueret domesticus , aut affectu illectus torpesceret. Quo minus spei à subsidio est alieno , tantò acriū virtutem exserit , quæ sola extero patrociniatur. Confidentiā ferè est in iudicio indigenæ. Terror contrà ab extero , quia cū alienum ut solo , sic moribus nōrint , vindicem pavent , quem sola causæ gravitas in vindictam exacuet , re nullā in patrociniū perorante , nedum inclinante.


N E G A T U R.

Potentius nihil natura tulit , & gratia amore. Vinculum hujus adamantinum & orbi , & menti , ubi sedem fixerit firmam. Saccharo condit fructus ars , ut ætatem ferant inoxii , & dulcescant. Dulcorat , & servat amor omnia pari naturæ ludentis miraculo. Triumphat amor , dum domesticus est , qui jura dicat. Hæc causâ præ exteris domesticos adlegi consortes imperii , inoriens Cyrus jusserat filium. Ut enim odiorum , sic ferè motuum fomes est potestas exteri jus dicentis. Æacum execratur populus , Astræam diligit. Sola illis lancem librat severitas , quia ut animorum , sic & morum discors est sensus , atque adeò factorum perinde , ac consiliorum. Quantum linguâ , tantum ferè dissident studiis gentes. Non sterilis adeò aut mentis , aut virtutis ulla est regio , quæ suppres curiæ non gignat arbitros Themidis. Et cur domesticis exteri palmam eripiant , livore æmulos , turbine Patriam repleturi ? quos Lycurgus nè Lacædemone quidem , nedum curiâ dignos censuerat.

Scrutare fora. Ubi nationum collavies , aut discordiæ , aut odia dominatum tenent. Et has flammæ jungat prætorium? Nunquam quos dissidia cives lacerant, in idem consilium Patrum nectet Senatus. Invisus Romanis Julius; Macedonibus Alexander , quod Persis hic aurem, ille Gallis curiam & senatûs munera fecisset obnoxia. Præsignavit vetustati discrimen Græcia. Causa erat, quam dudum Alcibiades arma movens prædixerat; quod neglectis indigenis togâ & sago jura exteri dicerent, concordibus nunquam studiis Patriæ commodo consulturi. Cui neque feritur, neque metitur fundo in peregrino; vespillo magis est sæpe felicitatis Patriæ, quam arbiter. Dicis fascinari amore domesticum judicem. An acrius fascinet odium? problema esto. Felix, qui faventem causæ nanciscitur Judicem, dimidium litis obtinet, si in Prætorio Prætor faveat. At nunquam faveat, qui exterus. Roris in morem facundat alter, hic pruinx acrimoniâ cuncta concoquit. Non causæ merito, sed præjudicio mentis, vel non maturâ satis deliberatione definiens, vel suis sæpe commodis studens. Unicus ferè, vel calamus piscatorius est exterus Judex, in eam se inclinat voraginem, ubi præda adhæserit. Injice auri pondera, æquilibrium rupisti. Nunquam illius gladius oleâ cingitur. Distriktus semper, non præscindendis, aut vindicandis sceleribus, sed frugibus metendis. Adde judiciorum caput præcipuum, jurium Reipublicæ notitiam. Horum ignarus ferè est exterus. Placent peregrini soli, ut origo, sic instituta. Et quanta novitas, quæ Reipublicæ petitis est, tum verenda? Displicent namque alieni ferè partus. Et audacter tentat leges rogare, ubi alienus à gente est animus, cui jus dictatur. Consilium id quondam Mecænatis Augusto datum, Romanos cunctis deligeret arbitros, tum quia Patriæ institutorum conscios amplius, tum nè Rempublicam innovarent. Quid, quod jacentibus domesticis semen futurus sit exterus, cujus exemplo pares ambiant gradus: donec Regnum ipsum in regno sero quidem, sed non mutando eventu requiras.

§. III.

Belli studia, & conatus.



Hinc aquila, indè leo dum regna tuentur, & ornant,
 Illa minax triplici fulmine, hic ense minax.
 Parce timere ullum, sit quamlibet efferus, hostem:
 Eminus hæc feriet: cominus ille peret.

DOCTRINA POLITICA.

Dixi de communibus Reipublicæ servandæ momen-
 tis. Superest ultimum, quod sui & suorum
 potentem sic reddit Principem, ut sine eo re-
 gnare diu vix possit; cùm temporum vitio pa-
 rum tuta ferè Majestas sit sinè viribus. Vires has, seu
 potentiam Principi opes, arma consilia, fædera, & for-
 tuna parabunt. Hæc in pace Principem tutum, in bello
 victorem constituunt, non tuendæ tantùm, sed & ampli-
 ficandæ Reipublicæ parem. Sæpe enim Reipublicæ ser-
 vandæ causâ Principi in arenam est descendendum.

Bellum Lipsio 5. Pol. 3. est, vis & arma in Principem,
 aut populum alienum. Duplex quidem id esse ait Plato:
internum seu civile, & externum, seu peregrinum. Ve-

rùm civile bellum, quamquam magis nocivum sit Reipublicæ, eò quòd proprias vires atterat, non tam bellum dicendum est, quàm potius potestatis executio. Aliud est *defensivum*, quod tuendo; aliud *offensivum*, quod invadendo alterum geritur. Bellum, quamquam cum Manichæis Hæretici oblatrent multa, secundùm se licitum esse, scripturæ testimoniis, exemplis sacris, & ratione certum est. Nam si quævis perfecta Respublica sibi ad beatè vivendum debet sufficere, quomodo, amabo, sufficiet Respublica, quæ sui ab hostibus tuendi est impotens, nequit ulcisci injurias, neque per vim rapta sibi potest asserere?

Tria proinde in bello omni considero. Principium, prosecutionem, & terminum; singula erroribus sexcentis obnoxia sunt. In Principio requiro *Justitiam*. Hæc habebitur Imò si à legitima potestate, qualis est Regia, vel summi Magistratûs, suscipiatur. 2dò. Si causa justa adfit; id est, ut habet Augustinus l. 22. contra Faustum c. 74. tom. 6. v. g. ultio injuriarum: si, quia gens vel civitas, quæ bello petenda est, vel vindicare neglexerit, quod à suis improbè factum est; vel reddere, quod per injuriam ablatum est. 3tiò. Ut servetur debitus modus in illius prosecutione, & victoria, cui recta intentio ad commune bonum addatur. Sæpe enim fit, ut bellum justè, & pacis, ac tranquillitatis studio cæptum; successu temporis nocendi cupiditate, ulciscendi crudelitate, feritate rebellandi, libidine dominandi vitietur.

Dixi suprâ justam belli causam esse *injuriam illatam*; hanc *gravem* esse oportet, seu illatam, seu certò inferendam, nisi bello præoccupetur: nam *levis* ad excusanda tam gravia damna, quæ bellum infert, non sufficit. Justum ergo universim est, cùm ab ænulo injustum bellum infertur, quia naturalis juris est & se, & sua tueri. 2dò. Ad graves suas, vel fæderatorum injurias vindicandas, & repetendas res ab aliis detentas. 3tiò. Cùm Religio Orthodoxa impetitur; quia quæ religioni, eadem infertur DEO injuria, ac proinde vindex illius causæ DEI est vindex. 4to. Ad plectendos complices, & adjutores belli injusti. 5to. Cùm fæderati injusto bello

lo petiti, aut innocentes oppressi opem implorant. 6to. Cum Princeps exterus seditionem movet domesticam. 7mo. Si violentur Legati, quos Jura Gentium, tanquam pacis, & conciliationis faciales, esse volunt sanctos atque immunes.

Injustum porro est bellum, ditionis tantum amplificandæ causâ susceptum. Quamquam Machiavellus, Latronum magis, quam Principum institutor, nil pensi habeat, imò laudi summæ id tribuat, si fraude, vel Marte orbem omnem sanguine, flammis, & turbinibus impleat, gloriæ, & triumphi cupidine, ambitu, & dominandi libidine, nocendi rabie, luxu, felicitate, & inquietudine mentis insaniens Princeps.

Quare, si aliàs unquam, ad bellum cauto opus consilio. Carò sæpe stetit belli temeritas præcipiti animo. Facile enim, ut observat Salustius, bellum omne suscipitur, sed ægerrimè desinit; nec in ejusdem potestate initium, & finis est. Unde nunquam suscipiendum videtur, ut bene Augustus apud Suetonium, nisi major emolumenti spes, quàm damni metus ostendatur. Id fiet tribus, à Lipsio constitutis, ante bellum curatis: *Apparatu, Viris, Consiliis.*

Nomine *apparatus* intelligo res necessarias ad usum belli, ut sunt pecunia, comeatus, arma. Opes enim, seu pecunia belli nervus sunt, & quemadmodum in animos hominum, ità in loca, & munimenta, vel adamante obfessa dominatum exercent. Argentangina Demosthenem olim; Philippici, vel aureæ, & argenteæ hastæ etiam magnanimos tributarios reddunt. Hoc de alienis. De propriis porro sic intelligendum est; quòd miles proprius leonino more in hostem ruat, cum stipendiis ritè acceptis suis sibi prospectum videt pactis à Principe. Neque enim timet miles, quando vestitus, armatus, calceatus, satur, & habens aliquid in zonula, ità Lampadius in Alex. c. 25. Aderunt cætera ferè omnia, &, quod caput est, amor in Principem, & ardor bellandi in milite, si hæc rerum animâ, & dominâ pecuniâ sustentetur. Non libet ire per multa. Hollandia verticem tum caput altius tollere, cum nervum Hispano sustulit, addidit sibi, interceptis opibus Orientis. Ludovicus XIV. orbem quoties

ties circumegit? hoc uno potens in omnes, & omnia. Felix ergo Respublica, quæ Aristotelis placito 2. Pol. c. 7. ærarium sic semper conservat paratum, ut publicis belli sumptibus impendia suppetant. Quod si enim eâ causâ utilitati publicæ consulendum non foret per ærarium pinguius, quia hosti in prædam cedere potest, nemo mortalium opibus pro dignitate parandis posthac det operam, quia lavernionum, aut belli periculis pariter omnia sunt exposita. Sic suis rebus Veneti, imò & Turcæ consulunt, thesaurum Reipublicæ communem annuis incrementis augentes, belli usibus servitutum. Fecisset id olim Sparta, meritò ab Aristotele reprehensa, non hodie nominis tantum umbra foret. Durum enim est admodum bella grandia gerere, & tum primùm viritum à civibus impendia corrogare. Duo tamen hic cavenda à Principe: alterum nè jactantiæ, aut ostentationi opulentiæ hæc serviat, præsertim advenis eadem obtrudendo, cujus gloriæ apud Assyriorum legatos quæsitæ causâ Ezechiam plexum cælitus legimus. Alterum, nè avaritiæ ansam prebeat ærarium; dum (quod facile evenit) auri amore capta mens exitium Reipublicæ minùs curat, quàm ut æraria recludat. Quod ipsum excidii in Imperio Græco Bizantii causa fuit. Sentiat ergo civis à Principe, non suâ, aut gloriæ, sed Reipublicæ causâ opes augeri. Sentiet, si in pace res bello aptas adornet, bello orto conservet, quæ felicitati ejusdem serviunt.

Opibus *commeatus annonæ, arma, & præsidia* juncta sint. Unde enim vires militi, imò vita, nisi ab annonâ? Pauperies summa rabiem, desperationem, & defectionem causat. Arma non ea, quæ veterum, sed quæ hodierni Martis aut disciplina, exercitui curanda. Præsidia benevolo inter subditos metui, potentiæ & terrori in externos serviunt. Arces, & castra, nisi naturâ loci opportunis admodum sita sint terminis, unde ob inaccessos aditus, & angustias itineris, aut fluminis, dominantur, frænum exiguum sunt in grandibus Reipublicæ motibus, etsi in modicis spernenda non sint. Præfidiis in meditullio Provinciarum, Belgium, & Hungaria, illustra bellorum theatra, præ cæteris triumphant. Sunt, qui pro-

proberent, ingentes hostis cujuscunque obices; sunt alii, qui Galliæ, Turcarumque exemplo in finibus duntaxat eadem cupiant. Quamquam sapienti illo Carolo sti monito, quo equo grandi (Gandavum intellexit) frangum necessarium esse dicebat: magnis etiam urbibus castra in praesidium ab hoste, frangum à cive addi posse existiment. Sic Neapolis cum primis cum aliis Italiæ, & Germaniæ urbibus se tueretur.

Viri bello apti sunt, multitudo armata apta impugnare, & repugnare. In hac Dux alius, alius miles est. Rursus miles hic pedes, ille eques est. Dux caput est omnium; quinque in hoc universi exercitus velut corporis spiritu requirit Lipsius: *Imò.* Multo bellandi usu scientiam, seu peritiam comparatam. Cujus fudit imperio, ruit miles, non tam pugnae, quam victoriæ certus. *2dò.* Virtutem generosam, seu corporis & mentis vigorem intrepidum; ut qui de se dicat: *facta, non dicta, sequi te, miles, volo.* Leone tali duce, vel cervi palmam ferent, quam cervo Duce leones amitterent. *3tò.* Providentiam, id est, cautus ut sit Dux. Piaculum enim est Plutarcho, bis in bello errare. *4tò.* Felicitatem, quam quidem solius DEI munus agnoscit Cicero pro lege Manil. Felicior nemo illo, qui dicebat: *veni, vidi, vici.* Tremuit hostis congressurus cum tali, ut Solimanus de Carolo 5to: *Fortunam Caroli timeo.* Idem recenter hostis Otomannus de Eugenio, avi nostri Camillo. *5tò.* Auctoritatem, quam præter dicta fama universi, & Nobilitas comparabit. Complexus hæc omnia sapienter est Cæsar, qui cum adversus Legatos Pompeji Hispaniam peteret, agebat: *vado ad exercitum sine Duce.* Thessaliam contra dum petiit adversus Pompeium, ait: *vado ad Ducem sine exercitu.* Indicare volens, hic milites tyrones sub præstanti Duce; ibi legiones præstantes sine Duce illustri se reperit.

Miles pedes equiti an præstet, vel è contra pediti eques? Pollitici certant. Polybio eques præferendus videtur; melius alii, si de bello universim sit sermo, præferunt peditem. Cum in oppugnandis, vel impugnandis urbibus non magnus sit equitum usus, nisi obsidentibus

tegen-

regendis. Præterea neque montanis, & impeditis in locis, quod ipsum Helvetii hodièque observant. Unde & Tacitus de morib. German. omne, ait, in pedite robur. Lipsius sapienter definit: ubicunque bona, & composita militia, pedes prævalet, apud rudes, & barbaros contrà, ait ille.

Militem non tam multitudo, quàm virtus hosti formidabilem reddat. Duo ad hanc sunt necessaria, *delectus*, & *disciplina*. Delectus primùm est, nè videlicet purgamenta Urbium, ut notat Curtius, eò confluant; videndum idcirco, unde, quo robore, & quàm patientes laborum centurientur? Deligendus idcirco domesticus præ externo; & auxiliari. Externus enim miles ærario gravis, quia majori mercede conducitur; duci molestus, quia alienus, refractarius, infidus, in pugna frigidus, & sinè pudore flagitii profugus; & *quid mirum?* ajo cum Tac. 4. hist. c. 76. *Non fide, non affectu regitur*. Dum domesticus miles fidus magis, atque obediens; acrior in pugna, quem Patriæ, & Principis amor accendit; par denique huic fides est, & fortitudo. Expertus id est Christianus exercitus non uno damno suo vel nostrâ ætate, majora longè emolumenta belli laturus, si proprio semper milite Cæsari pugnare licuisset. Cui malo ut sapientia Caroli bello ultimo Turcico, annis 1715to, & 6to mederetur, suis militem omnem viventem stipendiis, sui unius & belli Principis obsequentem imperiis ab exteris quoque Provinciis summens, eos legit biennio triumphos, quos iustra bina vix datura credi possent. Atque hoc pacto militem exterum nunquam rejecerim; sicut enim non tam exterus, quàm domesticus dici potest. Quamquam si necessitas poscat auxiliari quoque militi locus sit, modò corpus & robur è domesticis sit.

Cæterum in delectu militis 5. spectanda: Imò *Patria*, bello aptiores una præ alia fert regio. Durabiles belli arduis Bohemi, ignibus cumprimis; non item Provinciæ adjacentes. Velitationi aptior Ungarus, par ratio de cæteris. 2dò. *Ætas*. Regnorum regula ab anno 17mo, aut paulò suprâ militem scripsit. 3tiò. *Corpus*, in quo Vegetii sensu, non tam staturæ, quàm roboris habenda est

est ratio. 4to- *Animus*, videlicet, ut audaces, & gloria cupidi, quibus cum Catone : serpens, sitis, ardor, arenæ dulcia sint semper. Vel, ut melius Salustius, quibus sudor, pulvis, & alia talia epulis sint jucundiora. 5to- *Vita*, seu quo genere quæstus se sustentarint; mirum enim quantum ad molliem, vel duritiem, ignaviam, vel ferociam ista conducunt. Hinc lanionum turba sanguini assueta præ cæteris.

Delectui *disciplina* jungatur, cujus necessitas, & utilitas tanta, ut meritò tenacissimum vinculum & robur exercitûs dicatur Valeſio I. 2. c. 7. Munus hujus primum est *exercitium*, quo videlicet miles in armis, & labore exercéatur assiduè; ut juxta Vegetium discat laborare, decurrere, pondus portare, & solem, pulveremque ferre; hæc militem indurant, qui cæteroquin otio consenescit. 2dum est *ordo*; miles sinè ordine, latro magis, quam custos est Reipublicæ per Dionem. Neque utilius, neque decorum magis homini quidpiam ordine. 3tium. Censet Lipsius *coërcitionem*, quâ frænentur militum mores. Certè indomitum illum, & invictum nivibus, alpiûsque animum fomenta olim Campaniæ enervârunt, Armis vicit Hannibal, vitiis victus est. Continentia præ cæteris, molestia, & abſtinentia militem commendat. Continentia in cibo, potu, & venere. 2dò. Modestia in verbis, nè videlicet jactabundi sint; factis porro, Ducis sui non tam signa, quàm nutus sequantur. 3tò. Abſtinentiam, quâ à rapinis, & vi omni abſtineat. Denique disciplinam mirum quantum servabit exemplum, quod in præmiis, pro merito decernendis exhibetur; robur, & virtutem militum utraque vehementer accendunt.

Conſilium denique bello necessarium ità eſſe exiſtimo, ut sinè hoc exitium sibi bellator certissimum accersat, velut quod Matri temperamentum est optimum. Hoc Imò. occasionem observat, & arripit, quæ fronte capillata, tergo clava eſſe conſuevit. 2dò. Servit non nunquam famæ. 3tò. Securitatem nimiam, fiduciam, & hostium contemptum fugit; cùm sæpe hostis, quem contempseris, ipso contemptu valentior fiat. Testes huius eſſe poſſunt ultimi motus Ungariæ, nunquam adeo funestos, & diu-

diuturnos sumpturi progressus, nisi principia quorundam consiliis visa fuissent spernenda. 4to. Hoc inquit in omnia: eamque sibi magni Hannibalis laudem propriam facit, quod omnia ei hostium, non secus, ac sua comperta sint. Præsertim verò Ducis ingenium, & hostium mores, quàm optimè perspectos habet. 5to. Videndum, quando pugnandum sit, & quomodo. Celeritas enim nonnunquam rem omnem conficit, rursus cunctatio expedit magis, An vi apertâ hostis tentandus, an potius stratagemate? quod non licitum modò est, & tum sacris Josue, Davidis, Gedeonis &c. tum gentium profanis exemplis receptum, sed & laude, commendatione dignissimum. Cùm enim justum bellum suscipitur, Augustino teste, an apertè pugnet quis, aut ex insidiis, nihil ad justitiam interest; cùm eum simpliciter perdere fas sit. Fœdera, & pacta fallere injustum; hostem, suave est, & fructuosum. Melior enim est ingeniorum victoria, quàm cruenta. Ut simulare fugam cum Pæno, vel paucitatem militum; aliò iter vel transitum palam ostendere, aliorum reipsâ moliri; neque enim id facti mendacium est, quod hostis providus observare & potuisset, & debuisset. Absint tamen universim crudelitas, & dolus ejusmodi, qui ex se malus sit, ut veneno puteos inficere, aut arma &c. Stratagema Duce dignissimum, & optimum, cavere, & vincere stratagemata adversariorum.

Consilii ejusdem post pugnam est, ut si eam clades excipiat, prælii unius aleâ non illico hastam, clypeum abjiciat, & conclamatum esse pronuntiet. Cùm Mars communis sæpe palmam victis, victori herbam porrigendam decernat. Novi tum igitur habendi delectus, nova auxilia quærenda; quorum si desit copia, & potestas vires instaurandi, pax utilis, & honesta, vel cum virtute, & dignitate mors restat expectenda. Quodsi verò victoria prælium comitetur, cautela, lenitas, & modestia est curanda. *Cautela*, ut à præda miles arceatur, donec planè vicerit; nè vel obruatur incautus, vel nimium cupidè insequens, circumveniat. *Leniter*, nè hostis desperatione adactus in rabiem contra victorem resumptis viribus violentus assurgat. *Modestia* denique, quia felicitas fragilis est, & quos

quos diu profecuta ut sponsa est, repente velut fatigata destituit. Sunt, qui Romanorum veterum more, colonias in gentium victarum Provincias ducendas existiment, à quibus vereantur incolæ, & quæ motus secuturos compescant instar fræni. Verùm experientia testis contrarii est, colonias has sæpe magis nocuisse, quàm profuisse victoribus; cùm coloniæ hæ ferè in mores eorum transcant, ad quos ducuntur, inò iisdem sæpe deteriores evadant.

Denique ad consilium revoca *fædera*, quæ sunt pacta Principum, vel Rerumpublicarum, mutæ amicitiae in re quapiam societatis. His crevit olim orbis domina, Romana potentia; sinè quibus Reipublicæ, aut Principi diu præesse ferè impossibile est, quia æmulis nunquam carent imperia. Nocent fædera, quæ cum remotis nimium, aut miseris, quia juvare non possint, sanciuntur. Nec tuta sunt contra potentem cum nimis potentibus, qui scilicet, ut habet Tacit. l. 12. nec vincere, nec vinci sinè tuo periculo possunt. Quid ergo tam ancipiti duorum in bivio agendum, si duo inter se dissentiant, quorum tu in medio sis? Utri adhærendum, nè videlicet unius ruina tuam pariter trahat? Neutralitatem experientia aliquorum commendat. Savedra, exemplo Isthmi eleganter adducto, improbat; eò quòd hæc via media nulla sit, cùm utriusque te ambientis procellæ tam diu feriant, donec vel alterutra, vel utraque penitus obruat. Lipsius medium tenet, videlicet, si adhærendum sit, in causa palam dispari *melioris*, in ambigua *fortioris* partes amplectendas esse. Neque propria solum spectanda sunt; sæpe enim quem fortuna deperiit prospera. mutato ordine inimica persequetur.

Cæterum ut dicta hæc felicius cedant Reipublicæ commodis, belli studia pacis tempore tractanda constanter sunt; cùm exigua. aut nulla belli sit æconomia, tum primum agitare consilia, arma parare, ærarium ditare, dum Mars classicum intonat. Cùm vires, & valetudo suppetunt, præveniuntur morbi aptissimè, & tela prævisa ut plurimum feriunt minus. Contrà celerius opprimitur nemo, quàm qui metuit. Hinc sapienter Maximilianus I.

omnia cum cautione agenda monebat. Cneus Marius è contrà , quàm bello laudem meruit , in pace perdidit ; cùm enim in præliis vigil esset , adèd in pace sui degebat securus , quasi nunquam ad bella vigilandum foret belli duci.

Sunt , qui neque fæminas bello arcendas existiment , exemplo Amazonum , & fæminarum illustrium , quæ bella gesserunt felicia , ut Becuina Anglorum , Semiramis Assyriorum , & Tomyris cum pluribus aliis , præsertim cùm & regni capaces sint nostrâ ipsorum sententiâ. Verum congruum magis censeo : bella viri tractent , imbellem fæmina lanam. Quòd enim imperio pares sint , & una nonnunquam felicior numeretur , hirundo una ver non efficit , & Phænicem sæcula pariunt. Cùm interim bellum exercitus requirat ; exercitus porro fortitudinem Herculeam , & impavidos petit animos ; cùm fæminæ sexu ipsæ infirmæ , imbecilles corpore , instabiles animo , minùs cautè agendo , ob bilem temerariæ , paventes ingenio , consilii fluctuantes , prolibus , ut observat Philosophus , pariendis , nutriendis , instituendis , non armis aptæ sint. Amazonum bella etsi fabulis multi annumerent , si tamen & vera credantur , sexui , decoro , & ordini civitatis sanè repugnant , hinc nec longam lusère fabulam hæc monstra Bellonæ.

QUÆSTIO POLITICA :

Utrum gloriosius , fundare , vel augere , an tueri fines Imperii ?

AUGERE.

QUæ rerum in orbe omnium , Regnorum eadem est vicissitudo. Moriuntur alia , ut oriri alia possint. Nisi generatio unius corruptio foret alterius , & vicissim , natura nec tam fæcunda foret , nec tam benefica. Puunt regna , ut sæcula ; ut eorundem è cinere Phænices redivivi confurgant. Res alia est longè fundari , vel augeri , alia servari imperia. Primum consensus , & unio
repen-

repentina facit non rarò, aut collisio gentium, quæ fieri inter mortales aut furor, aut virtus, & æquitas temporum jussit. At rei naturâ suâ instabili perennitatis addere robur, id enim verò virtutis res est Divinæ. Sunt sua rebus singulis crescendi tempora, & se augendi, est & regnorum limes. Sua exedit teredo arborem, rubigo ferrum; sua est regnis ærugo. Decus omne, vel eò, quòd grande sit, admirationem primùm, tum etiam invidiam ciet; hanc æmulantùm ungui prædam eripere, ardui, mihi credito, res est laboris. Amplioris res tamen facinoris, vel fundare sceptrâ, vel augere fundata. Non pacis hic fructus, vel otii est, sed bellici fulminis. Id qui ausit, nedum possit, auro dignus & lauro est animus, virque viro major. Profunduntur namque Provinciarum æraria, dum pari fluxu, quo impendia fundator erogat, compendia relegat. Devorandæ sunt tempestatum iliades, fulminavertenda in pastum, in delictum sanguis. Et hæc omnia tam incertâ semper Martis aleâ, & sorte, ut sæpe qui alienis terrori futurus creditur, vix ipse suis auspiciis satisfacit. Principi omnia ipso ferè initio periculi plena sunt. Tum quòd radices nondum altas fixerit planta; tum quòd acriores ferè in primitias sint æmulantùm insidiæ: seu quia tenella ferè præplacent, seu quia faciliùs credit se furor triumphare posse principio, quàm dum morâ temporis molis vires auxerit suas. Suspecta nebula, pruina, venti floribus primis. Dies una periculorum fundat noctes, ut, quas sæpe numero lauros anni tulêre, in spinas turbo convertat momento. Consiliis solis opus est, ut tuearis parta, aucta, vel fundata imperia; ut fundes vel augeas, jungenda insuper est Providentiæ Imperantùm industria, cui fortitudo ipsa vix, quanta quantâ est, sufficit. Nutant enim in momenta singula initia. Cadit frequentius spe suâ industriâ, palmam alienam cernens, quam suam esse, vel fore credebat. Jurant in perniciem fata, & cladibus nunquam suavioribus, quàm primitiarum triumphant. Quæ multo vix sanguine parit miles, negotio nullo tuetur civis. Manipulus intra mœnia sui securus ridet sistitque exercitum, dum decas in unum palàm luctari cum morte; nec nisi cum virtute potest

triumphare. In otio fortunas fundat & ruricola; at heros duntaxat, aut rex pugnam ferit ex pugna, ut augeat suos virtute.

T U E R I.

Diadema diadema manet semper, five fundes, five augeas, five tuearis. Quid refert igitur, an fundes, an fundatum conserves? par diverso in nomine cura, & studium, par virtutis, & periculorum est gloria. Vetus est illud: *non minor est virtus, quam quærere, parta tueri.* Sunt sua principiis æmulantium, & sortis discrimina fateor. At nunquid par regit casus imperia etiam fundata, vel aucta, quia mortalia omnia. Quò amplius seu tempore, seu finibus fortunæ filum protenditur, facilius rumpitur, quia diuturnitate ipsâ tenuatur ferè. Junge regna, provincias uni, gentes adice; ipsum conjungi, est extenuari. Terminum magnitudinis, & gloriæ nanciscuntur; ut ipsum crescere, nisi providentia fulciat, principium penè sit decrementi. Par, mihi crede, fin major, seu consilii, seu virtutis est gloria, vetera perenni stabilitate, vel flore munire, quàm gentes gentibus, regna regnis adjicere. Bello- rum hic persequens, & communis eventus; illud non nisi mentis & amplissimi est consilii gloria. Persidem hodiernam consule, quàm facilè Miriweisius inuasor solii inundavit omnia: at, quàm ancipiti sorte triplicem inter Ruffiæ, Bizantii, & hæredis Principis exercitum fluctuans veritate suâ firmabit præmium: *citiùs fortunam invenis magnam, quàm retines.* Facilè namque propensa sceptrum caduntur in calybem, & quod splendorem dedit fulgetrum, momento pari fulmen librat; quo dum perimit, cunabula, & tumultum struat. Parùm, vel nihil contulit sæpe diademati parando justitia. Crevère multa ambitu, furore, æmulatione. Testantur fasti, me tacente. Stabilitum nullum, nisi ingenio, consilio. Alienis quæri possunt impendiis, virtute, potentiâ; servari non itèm, nisi eo, quod tuum est. Mens sola conservat, quæ peperit gladius. Furore aut calybe & vulgus eminet, non item mente. Momento sæpe fundata sunt, quæ vis invasit; at torrentis more dilapsa, quia mentis, & consilii ponde-

re caruere. Fines seu gladii, seu animi cum natura partitus est ille, qui è Macedonia fulminis ritu ortus, Persidem, Africam, Indosque domuit, et pari sui ipsius lapsu omnia tumultavit. Facilius est multa vincere, quàm servare. Multorum dos prima, paucorum est secunda. Ipsa sæpe felicitas Reipublicæ pestis, & exitium fuit. In pus namque, & ulcera degenerat fortuna nimia, dum magnitudine suâ laborant regna. Quantò majora, tantò sibi ipsi graviora, dum constans fortunæ ardor, aut arrogantia, aut præfidentia facit diffluere. Pax ipsa si nimia, non adeò servat, ac pessumdat imperia. Non quo pacto fundanda, sed quæ servanda sit felix Respublica, scrutatur Philosophia; argumento certissimo, augeri eandem, vol fundari facilius, quàm immunem servari. Tam enim præcavendis internis, quàm amoliendis externis pestibus locanda est opera, ut sibi felix hæc constet.



QUÆSTIO VII.

Momenta Rempublicam evertentia.

§. I.

Tyrannis.



In sibi subjectos, qui sic furit usque, suorum
Nunquam sincerâ nititur ille fide.

Dúmque timent omnes unum, timet unicus omnes.
Scilicet hoc lucrum triste tyrannis habet.

DOCTRINA POLITICA.



Um de momentis Rempublicam servantibus agerem, de modis eandem amplifiandi agere consultò distuli, ut contraria juxta se posita magis elucescant; videlicet boni Principis Rempublicam amplificantis conatus, ex studiis Tyranni eandem perdentis. Duplex bono Principi est Reipublicæ amplifiandæ modus, *internus*, & *externus*. Internus consistat industriâ, & naturâ, cùm scilicet industriâ terras excolit, aut loca antè sterilia feracia reddit, publicas & priva-

privatas opes, & dignitatem auget, & naturâ sese in liberis multiplicat, ac propagat; vel dum cives colonias ducunt, opibus, libertate, religione, vel aliâ causâ allecti, quæ omnia ad dignitatem, & incrementum Reipublicæ faciunt.

Externus est, cùm Principis operâ Provinciæ, civitates, aut fundi Reipublicæ adjiciuntur, sive id fiat bello, aut deditioe spontaneâ; sive coloniis, & ædificiis, ut faciebant Romani, cùm victa regna in Provinciam redigentes, Romanis coloniis ductis, Prætori Romano subesse jusserunt: sive demum fiat emptione, ac unione.

Alius Rempublicam augendi modus est, si Princeps Provinciam colat amœnitate loci, arti vel naturæ auctâ; si commoda & utilitatem advenis proponat, advehendi opportunitate constitutâ, rerum abundantia iisdem curatâ, escâ quodammodo, & illicio iisdem posito per libertatem, immunitates, & privilegia artibus, & mercaturæ proposita, quibus quantum creverit Russia, Angelorum, & Hollandorum advenarum accursu, ævum nostrum testatur. Accedunt artium, & studiorum emporia, & Athenæa, ad quæ frequentissimus Nationum, & Nobilitatis esse solet concursus. Principum item, ac Cæsarum sedes, vel certe Provinciæ Præsidum consilium, ubi jus summum dicatur; aulam enim, & potestatem summam sequi quàm plurimos cùm oporteat; seu officii, seu necessitatis causâ, crescere Provinciam opibus necessarium est, tot advenarum concursu. Vienna testis sit, vel unius sæculi cursu, tam sibi magnificentia, & opulentiâ suâ dissimilis reddita, non alio magis studio, quàm quia constans Augustissimorum Cæsarum sedes.

His, inquam, momentis servandæ, & amplificandæ Reipublicæ suam boni Principes locent operam, ut quibus sola *boni publici* ratio cordi & curæ est. Aliter Tyrannis, quæ sibi tantum studet, & factis non privatim duntaxat malis, sed & publico nocivis & noxiis Rempublicam perdit. Hæc illa est vipera, quæ sinu Reipublicæ concepta lucem prius non videt, quàm sicut vipera Matris alvo disruptâ, sic Reipublicæ excidio Tyrannis grassatur. Amor Principem, crudelitas tyrannum constituit; unde,

quid nisi oppressio subditorum, effusio sanguinis, cædes, rapinæ, legum convulsio, & summa rerum omnium perturbatio oriatur? vixque lacrimis ipsis, quod deterrimum est certissimo Patriæ exitio, bonis civibus liceat parentare.

Tria communiter Tyrannidem in Principibus causârunt. *Imum*. Erat virtutum, & morum mutatio. Ferè enim arriserat aurora imperii cujusvis, sed torrebat meridies in ruinam cives. *Mitissima nempe*, Lucano teste, *sors est regnorum sub Rege novo*. Principio imperii nemo Principum horum erat, qui amari non voluerit, qui mansuetus, liberalis, clemens, & providus dici non ambiverit; ubi tempore firmatum imperium est, simulatam animo virtutem exuere, & vulpēs animo latens detecta est. Hinc non rarò metamorphosi tristi pro mansueto, & provido Principe Tiberium, simulandi, & dissimulandi architectum, sibi doliùre obvenisse Respublicæ. Qui cum ambiret diadema, virtutis causâ simulabat se abnuere, quippe imparem se mentiebatur, re ipsâ postmodum exhibuit, dum Reipublicæ incurios, deliciarum, & scortorum mancipium, tantâ desaviit tyrannide, ut Magistratus ejusdem nil nisi Nobilium carnificina audierint. Pro liberali Principe, Cajum sæpe expertæ sunt fortunarum raptorem, & expilatorem magis, quàm Principem, qui unus dum voce eâ sibi plauderet: *oderint, dum metuant*, non moderando, sed perdendo imperio genitus videbatur. Pro clementi denique Domino, Neronem crudelitatis belluinæ portentum potiùs, quàm hominem præsse lacrimatæ, ut ejus vitia vix ullius vita superavit.

Causa mutationis hujus in Principe sæpe erat Princeps ipse, sæpe etiam populus, qui seditionibus, diâteriis, & conspirationibus Principem invadens, alienum esse coëgit, & dissidentem suis, velut suspectis, tametsi fuerint optimi, atque adedò prætextu cavendi fecit esse crudelem. Suasere Romæ non pauci, ut mediocria principio imperii Neronis vitia civiliter ferat, atque dissimulet; sic enim benignum servatum iri. At dnm spreto consilio importunè eundem carpere ausa, adedò ad frugem non reduxit, ut instar vulneris vexati deteriore longè effecerit.

Secundum erat ignavia, & indulgentia Principum, dum adulatores veriùs, quàm amicos, sic opibus, honoribus, & officiis cumulârunt, ut pares ferè fuerint Principi, vel certè casum suum Principi formidandum effecerint. Potentia à Principibus accepta, in plurimis Romanorum cum Sejano illo Tiberii adulate, Tyrannidis sementis fuit, ejus propagine perirent ii, qui beneficia in caput ingratum contulerunt. Quare, cùm nimius favor & potentia in unum collata auctori si non perniciofa, certè periculofa sint, fervet monitum id Princeps: *divide, & impera*. Favores suos sic partiatur in plures, ut ab unius metu pendeant universi; quod si necessitas postulet unum præ cæteris evehi, sic moderetur potentiam, ut plus honoris, quàm virium ex eo redundet in clientem.

Tertium erat ex illo Aristotelis 5. Pol. c. 10. ubi ait: *Tyranni ut plurimum facti sunt ex ductoribus populorum, fidem adepti ab initio propter calumnias contra nobilitatem jactas*. Hi enim vulgi Duces cùm deceptum populum habeant, tyrannidem, non dominatum sui impotentes exercent, & pro hac dominatione nihil pravitatis omittunt. Optantes cum illo apud Tacitum 6. Annal. c. 6. Neroni dicente: totum senatum unâ voce deleri posse.

Ex his signa Tyranni conjicies facilè. *Imum* est, virtutum, præsertim clementiæ, & justitiæ simulatio. Quæ patet, dum impunè non nullis licet, quod libet; aliis minora vitia cæde, & sanguine sunt expianda. *2dum* ex Aristotele 5. Pol. c. 10, Nobilitatem supprimere, viros eminentes minuere, & prudentes, & magni spiritûs homines tolerare. *3tium*. Animos civibus protervâ sævitie sic tollere, nè quis de afferenda libertate vel cogitet; sed in horas singulas vitæ mortisque incertus servituti, & abjectioni se dedat. *4tò*. Cives, amicos, Principes dissidentes, & sibi mutuò suspectos si reddat. *5tò*. Si crudelitate barbarâ potentiam suis sic adimat, ut vix vivendi, nedum agendi, vel moliendi quidpiam adsit facultas. Ut quondam Pharaos Israëlî divinâ teste paginâ. Hæc enim summa est Tyrannorum securitas, si nemo quidquam agere aut velit, aut possit. *6tò*. Superbos, crudeles, & avaros Magistratibus præficere. ut eosdem locupletatos è

medio tollat , instar spongiæ , quam arentem sanguini , & divitiis Provinciarum mergat , ut plenam prædari , & exprimere impunè possit.

QUÆSTIO POLITICA.

Utrum viro publico periculosius , Principis , an populi furor ?

PRINCIPIS.

Quidquid altiore natura gradu constituit , majori premit impetu , graviori opprimit lapsu. Jovi prior , vicinior si non lapsui , certè lapsus periculo est , quia vicinior fulmini. Mensura dignitatis , mensura ferè potentia est , & furoris. Quia vanæ , risu dignæ sunt sinè viribus iræ. Dum coronato furori nunquam parentatur satîs , nisi inter busta , & rudera Provinciarum. Exiguos movet cardines , quia limite cingitur modico vulgaris furor ; orbem succutit , qui Regium invadit pectus. Longas regibus esse manus , cecinit quondam Vates , acerbiores sunt animis iræ , fulminis ritu & perniciës , & potentes. Væ orbi ! si quantum ira suaserit , tantum permittat fortuna purpuræ. Ut animo vulgus non careat , caret potestate. Famulatur hæc Principi , quæ igitur metuenda excidia , ubi sædus armorum jungitur , & animorum ? Par illi meta sunt Regum solia , palatia nobilium , & mapalia , vel tesqua ferarum. Ipsi obices , & exercitus vindictam acuunt , non morantur. Nil tardant lamenta hos fluctus , neque subsidit procella , dum cadat victima , quæ destinatur exitio. Sublimitas ipsa ut arrogantiam , sic flecti nesciam addit constantiam , & cedere , vel moveri nescium pectus. Quasi verò flecti , aut non vicisse par fuit probrum. Palam ferè sævit , qui facilem aut reperit obicem , aut admittit. Eliditur vulgi impetus ; & quia , ut simplex , sic credulum est ; ut furens simia luditur , donec astutiæ in casses ruat. Majestatis furor quanto latentior , tanto potentior. Subterraneum æmulatur ignem , cui pila , & ludus montes sunt integri ; Provinciæ victima.

ma. Valentiùs sævit hic impetus quia fundamenta convellit, quibus stratis ruere omnia oportet. Non eo tempore dignitatis, non probitatis, non meriti est ratio, ubi furere ardor cæperit. Donec ambitio æmulum simulat, vel suspicio perduellem colorat, gaudet exitio. Cælum & terram fractis antè cardinibus subruï, vel Acheronta petenda sint, videas, dùm rivalis, aut ingratus, furori non cedat modò bacchanti, sed occidat. Credunt Philosophorum pars, ignes nonnullos alimentò non alio pasci, quàm quòd flamas ipsas in alimentum rursus convertant. Idem censent argumentum potentiæ Principes. Quantum furunt, tantum ipsum furoris remedium seu flamas in pabulum vertunt, ut eadem consummantur pariter & nutriantur. Vaporibus minimis quoties cogitur in nubes cælum, in fulmina coquitur? sic iræ potentium; Fit quandoque, vix ut sibi satisfdari posse existiment, nisi vindicta terminum petat. Nunquam senex, semper juvenis est furor Principum; eoque nonnunquam vicinior insanix, quia subtilior nobilitate ipsa est flamma. Quantum interest inter conum ignis, & ignem ipsum, inter pyrium pulverem, & aurum fulminans, tantum inter vulgi: & Principis iras. Impetu nocent cæteræ, sed suis duntaxat viribus, hæ etiam exemplis, quibus in consortium rapiunt flamas vectigales minorum. Nescio enim, quo fato, ruere gessit populus in furorem, cum Herculem nactus est Principem in Orchestra furentem. Quasi verò non errare modò, sed & perire sit volupe, dum communis error est ei, quem diadema cæteris prætulit. Patrocinium sibi semper quærit iniquitas; nunquam reperit majus, ac dum ducem in furores eum nanciscitur, per quem quies & salus stare publica debet. Æquum, sanctum, probatumque creditur, ad quod coronatus ducit. Quid jam torrente Reipublicæ obrutus ager vir publicus? Sacrum inter & Saxum hæret, an populi, an Principis furorem præligat? Oderit hic, par fatum à populo vel verente, vel Principi blandiente experietur. At estò, unus oderit sinè plebe Princeps, sibi unus sufficit, qui jura dat omnibus. Fulmineâ vi potentior nulla est. Sentiuntur damna nec præsignata. Declinari po-


potest furor plebis, quia indice tumultu proditus; non item Principis, qui dum jacet obrutus æmulus, tum primum notatur.

PLEBIS.

TRia sunt, quæ furorem omnem potentem reddunt, atque adeò metuendum. Cræcitas, impetus, vis. Cæcam pinxere nonnulli Furiam unâ, parte alterâ oculatam; quàm scilicet in damna aliena vigilem, tam cæcam nullo discrimine vel personarum, vel damnorum admissa. Pro mentis tamen furentis indole excæcata magis est una, quàm altera; quòdque acerbius, eò minùs flecti, quò minùs rationis vestigandæ capax, quæ innocentiam suadeat; errorem, si quis datus, excuset. Hæc plebis furentis est indoles. Ardeat quantumvis Princeps, mitius æstuat, quia mente majori fertur oculus, tametsi glaucoma aliquod ira offundat. Nunquam plebis æquat ferociam nobilior animus. Si nativa meretur cæcitatem indoles, morantur Majorum vestigia. Pudet communione furoris magnanimos profundere spiritus. Dum generosa mens nullâ magis gaudet victoriâ, quàm sui ipsius. In extrema non proruit mens, nisi via mædela superfit nulla, præter furorem. Arma gerit in fronte Rhinoceros, à latere tauri: oculum nempe ducem furori præfixit natura, quem etsi nolit, sequi debeat nobilior animal; ut noverit, ubi, & quando saviendum. En ideam Principum. Indignum est Magnos furere sinè mente. Quàm cæco gressu rapitur, tam vehementi ruit impetu plebs. Dum Principem etsi præceps sibi quasi eripuerit Ardor, innatâ nobilitate reducas facilius, ubi tot sunt duces, quod consiliorum participes. Uno licet aquæ fluxu flamma, quavis grandis, non cesserit, mitigatur iterato. Nam & durissima cavari cernimus marmora, dum gutta non vi, sed sæpe cadit. Sæpe, quæ suis non cernit, at discernit oculis Princeps, his præstat abunde. Surda è contrâ consiliorum quorumvis est rabies civium, atque adeò crudelior, quia sinè termino imputûs. Cessare nescit, nisi dum unâ se, & æmulum consumpserit. Quid enim tulerit, aut laturum sit ævum, neque memoria recoquit,

neque

neque intellectu assequitur, ritu bellæ, & ignis, non grassatur, sed proruit. Furentis Principis impetus tonitru est, auditum eminus terret; fulmen contrà est rabies populi, nunquam apta dignoscere, nisi dum sternit; tumque solùm audens, cùm reperit obluctantem. Quasi verò crudelis satiari vorago nequeat, nisi universi ruinâ. Ignis in morem, qui tum satiatur, cùm caruerit pabulo, quod absumat, atque adedò pereat ipse. Vis denique minor est Regia, quia oculo non caret. Cùm seditionum straverit Principes, residet. Modico satiari sustinet. Pœnam nempe petit, non vindictam; aut si hanc necessitas imperet, non nisi moderatam. Dii sunt coronati vertex. Unius exitio terrorem omnium, reverentiam, & amorem fundant. Non libet, nec vacat ire per fastos. Quoties sprexit mens magnanima, quæ simplicitas temeraria, aut simplex vulgi temeritas non nisi ferro & sanguine expiasset? Roman vide; Tribunorum & plebis tempestatibus dum successa, penè semper nutabat. Nempe, ut agendis, sic ferendis grandibus solium ipsum Principem format. Si sapientia, virtus, æquitas iras imperet: scelus ferè odit, non scelestum; hoc sæpe indemnè, illud persequitur. Venia datur non merentibus, sæpe certò nec sperantibus. Dum contrà plebs quantum sui impos sæpe in infantes furit, non antè erroris doceri patiens, quàm dum ingratham Patriam ante portas Coriolanus aut Alcibiades Græciæ infestus doceat; quàm longè periculosius sit populi, quàm unius Principis iras non tam mereri, quàm pati.



§. II.

Causæ remotæ aut mutandi, aut evertendi Rempublicam.



Alecyonea mihi suspecta malacia ponti est,
 Nam coquit atroces tum maris ira minas.
 Et timeo regnis nimium, fera damna, quietis?
 Nec diuturna mihi pax, neque bella placent.

DOCTRINA POLITICA.



Quæritur, & perire Respublicas, celeberrimæ orbis
 Monarchiæ cum omni testantur historia, neque
 id tamen aut fluxo siderum cursu, nec fata-
 lium annorum sit termino, sed ejus in morta-
 libus rebus ludendis Providentiâ evenit, qui mutat tempo-
 ra, & ætates, transfert regna, & constituit. Daniel. 12.
 Digno rerum potentibus, & subditis documento, ut hi
 videlicet discant eos quôque Principes venerari, & velut
 vasis iræ DEI subesse, quos castigandis Provinciarum cul-
 pis rerum omnium arbiter DEUS constituit; quales olim
 experti Assyri in Sennacherib, Nabuchodonosore &c. Il-
 li verò, qui moderantur imperia, noverint se in statera
 Divinæ potentiæ appensos, quâ transferri regnum possit,
 dum ipsa velit.

Prin-

Principum, populique vitiis everti Respublicas, cum pagina sacra ratio, & experientia nos docent. Sapientissimè Ecclesiasticus c. 10. Regnum, ait: à gente in gentem transfertur propter *injustias*, & *inurias*, & *contumelias*, & *dolos*. Vocibus quatuor elegantissimè Regum sapientissimus causas omnes, quibus turbantur, & convelluntur imperia, complectitur. Duplices aliàs communiter assignant Politici, *externas*, dum scilicet externo hostilium bellorum incurfu evertitur Respublica, de hoc dixi ultimo quæstionis prioris §. *Internæ* sunt reliquæ, quæ scilicet ex ipsis Reipublicæ membris nascuntur. Et harum aliæ esse possunt à Principe subditis ansam dante, quas Daniel *injustitias* nominat. Aliæ à Ministris, & hæ sunt *injurie*. Reliquæ à subditis, seu plebe, quæ communiter, ut est genus humanum querulum, facilè quemque pessimum provocat ad murmurandum; unde sequitur causa proxima, & executiva, videlicet *conspiratio*, *seditio*, & *factio*, quæ nomine *contumeliæ*, & *doli* veniunt in scriptura. De singulis pauca.

In Principibus duo notat Aristoteles 5. Pol. c. 3. everfioni ansam præbentia: superbia, & avaritia (inquit dicto loco) illorum, qui gubernant, incitant homines contra se, & contra statum ejus Reipublicæ, quæ ista fieri patiatur. Ex superbia enim contemptus subditorum, & dominandi abusus, quem ægerrimè ferunt subditi, ortum ducunt. Sequitur arrogantiam ira præceps in exequendo, & in plectendo crudelitas, quæ omnia primis Romanorum Cæsaribus Tiberio, Caligulæ, Domitiano exitium attulerunt. Accedit, si luxum, & projectorum morum licentiam subditi in Principe videant; fit, ut æstimatione & amore amisso facilè perditum velint, quem animo spernunt. vel metuunt etiam probis iniquum, vel facinorosis ipsis nimis crudelem oderunt. Infinitis historia exemplis abundat. Sic Tarquinius Regiam, Sardanapalus Assyriam, Heliogabalus Cæsaream purpuram amiserunt; primus mutandæ è Regia in Consulare; auferendæ 2dus ab Assyriis in Medos per Arbacem, 3tius de Principe in Principem transferendæ dignitatis per mulierositatem causa fuerunt. Avaritia porro injustorum, aut gravium nimis

mis onerum , & tributorum civibus imponendorum origo est : unde animorum commotio , & se vindicandi studia , exitium Principis ; rarum certè lucrum , nisi officium ipsorum.

In Ministris occasio scandali populo est , si , ut hi facultatibus sese per licentiam omnem ingurgitent , ut corruptelis suis , & luxui ad insaniam velificari possint , per invidiam cives deprimi , per vium & injuriam exsugere , patrimonium minui impunè videat , ex quibus odia in Principem hæc tolerantem redundare consequens est. Non esset necessarium scrutari veterum monumenta ad hoc testandum exemplis , non admodum longæ ætatis suppetere. Sola Helvetia , ut supra memoravi , testis sit , quàm rectè Lipsius 4. Pol. c. 14. judicaverit : quòd Europa tot motibus agitur , quòd Reges , & regna ardeant seditionum flammis , & bellorum , vera fortasse causa est , administratio parùm vera. Neque mirum horum injuriis incitari plebem , cum videlicet in horum velut sibi proximorum officia & mores , magis oculos , & mentem intendat , quàm in Principis ipsius , quem velut in speculo , & edito locatum eminus quodammodo , còque faciliùs intuetur. Minùs enim ferit oculum vis , quantumvis acuta , si longè , quàm si vicina sit sensui.

Ad hæc tum Principibus , tum Ministris viam sternunt duo. Primum est , nimia Reipublicæ felicitas. Cujus causâ suis tantùm rebus , & commodis intenti Principes , & Ministri , Reipublicæ malis obrepentibus velut lethargo non nunquam pressi indormiant ; civium causis cognoscendis , discernendis , & componendis nihil , aut parum admodum intendunt ; affectui , cupiditati , & genio habenas omnes laxant. Divinus Plato 5. de leg. rectè monet , tametsi felicitas ratione rectâ temperari possit , nimias tamen divitias Reipublicæ noxias esse ; tum suâ , tum plebis causâ : suâ quidem ; nam naturâ suâ insolentiæ domesticæ , discordiarum inter cives , in voluptates effusionis ; & invidiæ apud externos causa sunt. Plebis verò causâ , quia cum his plebs abundat , futuri immemor , contemptrix aliorum , veterno quasi indormit , tam nihil periculi sollicita , quantò difficilius est nimium felicem , quàm in-

infelicem finè vertigine ferre posse fortunam. Sic, Livio teste, plebs Romana non miseriis, sed licentiâ concivit turbas, & lasciviebat magis sæpe, quàm sæviebat. Unde concludit idem Legum Magister: optimè conservandæ Reipublicæ tum esse consultum, si non nimiâ felicitate latetur.

Causa altera est: Imperii negotiorum nimia moles, & multitudo, quâ sit, ut crescentibus supra facultatem rerum constituendarum consiliis, & causis domesticis, & externis, Princeps, & Ministri prospicere cum dignitate etsi velint, non possint, aut mole territi non velint; aut si possint, & velint, succumbant. Quod ipsum in Imperio Trajani (cui par nulla ætas vidit) felicissimi, sapienter observavit ille, qui dixit: magis magnitudine suâ, quàm hostium aut multitudine, aut feritate, atque potentia laborasse Reipublicam Romanam. Sive enim naturæ cursum spectes, sive Providentiam Omnipotentis, utrobique statutum molis suæ terminum habent: sic corpora post consistentiæ suæ statum inclinantur, & rosæ, quod sæpe odoris spargunt, eò sæpe pernitiùs extinguuntur. Denique ferè: *in se magna ruunt, lævis hunc Numina rebus crescendi posuere modum.*

Postrema, imò prima ferè motuum ejusmodi causa est plebs. Nam cum vulgus indoctum, & rude, impetu, non consilio, opinione, non prudenti sensu, utilitate, non decoro ducatur; ad hæc inter vulgus commune scelestos, & pœnâ dignos reperiri necessum sit, fieri nequit, quin turbas & novitates moliantur nonnulli. Qui scelesti sunt, licentiæ, & libertatis amore ducuntur; & cum aliunde præsens imperium subditis semper grave sit, fit, ut pessimus quisque Rectorem asperrimè patiatur; quia caret obsequio, quo mitigantur imperia, ut ait Curt. l. 8. Hi, qui in pœnam vindictam Principis meriti sunt, prævenire conantur, & suo à capite discrimen quoquo pacto amoliri. Neque pertinacior facilè ira est, quàm quæ ex tali desperatione gignitur. Quibus utilitas cordi est, adeò veritatem cordi non habent, ut hæc illis potiùs offendiculum pariat. Utilitatis enim amor, mentem & oculum animi fascinat, & cæcitatem, ac inertiam

offundit. Universim verò impetum quemvis sequitur populus, quia cùm naturâ suâ instar fluctuum instabilis sit, & ferè eò rapiatur, quo vel potentiorē quemque inclinare cernit, vel certè, quò plures sese convertunt, velut cùm ovis ovem sequi solet; fit, ut deinde opinione præconceptâ mordicus imbutus, torrentis instar grassetur, inundet omnia, franari impotens sit, seu spe, seu metu ultra modum proventus, non ante dominari superbè desistens, quàm cùm ademptis viribus, & capite proculcato coactum se sentit, ut hilariter serviat. Quod, quanto steterit sanguine ipsis sæpe Principibus, quanto Provinciarum impendio, Angliæ, Galliæ, & Germaniæ rustica bella docuerunt, centenis millibus vix restincta. Florebit omnis cum Spartanis Respublica, si ritè imperare Magistratus didicerint; magis verò, si cives discant obedire. Tolerari namque ingenia oportet, quæ cùm mutare non liceat subdito, instar vulneris contactu exulcerati exasperant. Quid si multa in plebe Principi sæpe ferenda sint, cur non ferat plebs pauca in Principe? cùm certissimum sit illud Lipsii: Regum, Ducumque clementiam non in ipsorum modò, sed & in illorum, qui parent, ingeniis sitam esse.

QUÆSTIO POLITICA :

Quæ aptior regendi dos, amor, an timor?

PRO TIMORE.

Saturnus est, qui semper fulminat, non Jupiter. Tyrannus ille, ut perdat, & inimicos; Pater iste, ut servet, & amantes augeat. Ut desperationem servitutes, sic metum salutarem causat severitas. Hanc habet, quisquis regis. Tam crudelis es omnibus, ac nemini parcendo; tamque perdis Rempublicam in neminem, quàm in omnes animadvertendo. Id unum difficilius, quod perniciosior sit error clementiæ, quàm rigoris. Si peccandum alterutro, secundum elige. Nunquam acrius insolecit vulgus, ac dum perenni palpatur benevolentia.

Vibrandus est calybs, sinè quo nulla est orbi æquitas. Peccat, tam qui errat, quàm qui, cùm potest, non ple-
ctit. Hic pænâ tamen dignior, cùm pënam dissimulat,
quia crudelis parcendo, qui clemens fuisset irascendo.
Delicti duplicis, conniventiae scilicet, & peccati ipsius
reus. Impunitas perennis fomentum scelerum est facto-
rum, faciendorum illicium. Petulcit populus liber, li-
bertatis incapax, nisi frænum metus adigat. Audax ferè
est, cui ut facilis, sic certa semper est venia. Jacet spre-
ta autoritas solii, reverentia legum, Magistratûs impe-
rium, ubi pro libidine impunitas quæ suaserit, persuadet
omnia. Certior nulla peccandi illecebra, quàm impuni-
tas certa. Cancrana vitium est, nisi ferro, & igne sta-
tuatur obex discrimini. Præsidium fidei, & Majestatis
potentius nullum est metu. Præstat nihil, quàm omnia
indulgere cum Nerva. Nunquam consilia Numinis pæn-
arum reperissent, & sanxissent genera, nisi tutelam Ma-
jestatis, limitem malitiæ credidissent. Natura ipsa ferita-
ti aut proterviæ multorum cohibendæ non sufficit; evin-
cunt id, quia arcent, supplicia. Inculta erunt dumeta,
vites, & horti, nisi rastrum, aut forfex multa amputet.
Rigor terminus est, qui lubrica in semita fallentia sistit
vestigia. Nunquam sanaret hirudo, nisi morderet. Ap-
tandus est vulneri calybs. Jovis aquila sunt Regentes.
Minis librant fulmina, ut probos rigor servet, improbos
frænet. Nemo cerebro tam est protervo, qui nihil pen-
si habeat legem, si semper ultor instet à tergo DEUS.
Rariora forent mundo scelera, si certa semper comes fo-
ret vindicta. Nam acrior esset metus pænæ in fugam, ac
sit illicium sperata impunitas, ubi vindicta est rarior. Ter-
ret unius exitium gentes. Dúmque terret, & erudit,
ac servat ampliùs, quàm clementia. Cautè prætervehi-
tur Scyllam quilibet, ubi naufragos novit plures. Qui in
salo graditur lubrico, fallentibus aliorum vestigiis provi-
dentiae admonetur. Fundamentum vis regni perenne? In-
violatum serva rigorem. Reverentia, & adoratio comes
erit perennis. Metus ipse amoris erit principium. A-
matur, cujus gratiæ jactura metuitur. Ubi porro jactu-
ra est facilis, nullius non intenditur oculus, Ubi dome-

stica est severitas, probi amando, quod metuant, improbi metuendo, quod diligant, semper habent.

PRO AMORE.

AMor cæli fascinum, orbis illicium, magnes omnium. Nil tutelâ hac fortius orbi toti est. Exercitus ipse discrimini est majori, ubi amor eum non animat. Præsidia nitratus pulvis, & ignes inexpugnabilia non sustinent ætate nostrâ. Natura & ars furori horum nihil habet impervium. Amor unus præsidium utrique est, saxo omni durius. Aut enim agetur insidiis? tum enimvero *non est, si non sit*, ut *litigiosus*, sic *ingeniosus amor*. Et quia suspicax tuta omnia timet, in omnes vigil excubat Argus. Aut vi certatur apertâ, & tum potentiâ suâ proterit omnia, qui cælum terris fecerat vectigale. Hoc gluten elementa, & cum his temperat universum. Mænium locô devincit pectora Principi suo. Amatur namque dominatus, dum leges rogantur mitiùs; & quamvis metus sit custos solii acerbus, firmitus tamen, quia tutiùs præest, quisquis amatur à suis. Exercitu stipante non eget, cui quivis pro mille assistit. Durabile nunquam est, quod rigore metûs servatur, quia ferè violentum. Hinc illud: violenta nunquam durant. Nativa acrimonia metûs, ut viscera humor exedit, & constantiæ succum adimit. Adamantis è contrâ ritu quia duratur indies amor, durat, & durare facit, quæ necit. Aut lictor, aut carnifex, non rector auriga est, si feriat semper. Virgam aut ostendat, aut simulet, ut ducat. At pestis publica remedium poscit. Bene haber. Tortor, non medicus est, cui sola in deliciis sint aconita, flammæ, ferrum. Infirmum vinculum metus est. Odit animus, cum metus deserit. Quôdque comes, perire cupimus, quem oderimus. Furentis bruti fuit, non hominis vox: *oderint, dum metuant*; mortem namque, & exitium sibi, suisque inconsulto hoc modo fundavit. Nero, Diocletianus, Caligula, & cætera imperii abortiva sint testes. Miles ipse non custos, sed hostis est lateris, ubi metus jura dicat Reipublicæ. Nemo unus amoris unquam, sexcenti è contra metûs causâ necati sunt. Obruit, & pessumdat


dat torrens , vel imber agros , quos pluvia , vel rivus rigat , atque adeò fecundat. In herba sementis cadit furor , & spes ipsa eliditur. Mitiora semper tentanda sunt , tum agatur acerbius. Cùm desperatum de cæteris est , secures expediendæ , & flammæ. Perimit , quisquis deperperat pharmaca. Si ullibi consulendum tempori , id in medicinis tenendum. Pæna omnis languori publico pharmacum est. Alieno vulnere sibi mortem accersit , qui metui cupit ampliùs , quàm amari. Rarò custodia ipsa Tyrannorum sat tuta , carnifices metus domi creavit , quos furor alibi metuit. Vitam odio eripuerè , quos metus alieni causa præsidio sibi Princeps , timore regens , constituit. Pæna profectò æquissimâ , ut qui metui mavult omnibus , omnes metuat. Quique Pater diligi , aut amicus non vult , ut pestis publica nemini non invisus , à nemine possit esse securus. Feras regat , ut quibus natura sola , non ratio jura dicat , qui metui tantùm cupit. Hominum jura , jura sunt filiorum. Hæc una felicitatis certæ semita periinde , ac tessera est : amari à suis. Finem brevem metus fin habeat , quærit. Iniquus gregi pastor est , qui tondere duntaxat novit . & verbera. Tutelæ , non servitio credita est à cælo Respublica Principi. Reipublicæ ipse , non Respublica ejus est. Metu hostes , amore triumphet subjectos , nisi non tam animorum , quàm corporum dici cupiat Princeps. Secus enim , quid amabò Tyrannum inter ac Principem intererit , si tam hujus quàm illius potestatis sit & testis & index vetus illud :

Hic ferus est , hunc tu Ramane caveto.



§. III.

Causæ proximæ mutandi , & evertendi Rempublicam.



*Si furat unda maris , medios , age , divide fluctus ,
Sicque per infestas tutior ibis aquas .
Si populi furat ira , globum , qui proximus instat ,
Frangere , cadet reliquum , si cadat iste , malum .*

DOCTRINA POLITICA.

His è fontibus , causæ , seu potiùs modi tres oriuntur in subditis , quibus omnis evertitur , aut mutatur Respublica , ut suprâ insinuavi , *Conjuratio , Proditio , & Seditio ; Seditio* , quàm Lipsius 6. Pol. 4. multitudinis , aut Magistratûs subitum , aut *violentum* motum nominat , ipso nomine quasi *secessio* , & *seitio* est , undæ publicæ quietis perturbatio semper est . Quæ si à subditis in Dominum moto civili bello oriatur , *rebellio* dicitur ; si subditorum inter se paucorum sit communicatio , & dissensus , dicitur *factio* . Universum nota , *Rebellis* est , qui subditus , vel fidei sacramento obstrictus debitam Principi obedientiam negat , & jugum excutit violentè . Hæc verò obedientia cùm

in

in tribus consistat, Imò. In audienda Principis sententia, & sequendo iudicio, 2dò. In exhibenda reverentia, & honore debito Principi. 3tiò. In suscipiendis, & exequendis ejus mandatis; *Rebellis* dicitur, qui iudicium Principis respuit, imperio resistit, fidem, submissionem, & observantiam negat Principi.

Seditionem nonnulli cum Machiavello Principum seductore in Republica aliquando non modò tolerari, sed etiam procurari debere contendunt, & suadent; eò quòd distractis in factiones varias cautior sit Rempublicam moderantis oculus, majori consilio, & providentiâ Magistratus prospicit universi commodis, & cùm periculi qualitatem, & quantitatem ex hostis ipsius cognitione prospiciat, fortioribus mediis civitatem laborantem communit. Sed, ut alia præteream, cum Aristotele sentire cogor, conversionum in civitate seminarium esse seditionem. Quæ enim, amabò, ex periculo ipso securitas speretur, cùm Magistratui civis, civi Magistratus diffidit, & uterque supplantat? Quæ Reipublicæ salus, cùm hostes ipsa suis gerit visceribus? acerbior pestis, & venenum est nullum, quàm quod visceribus ipsis jam receptum grassatur: certa tum corpori ruina est. Sic florantissimas Respublicas periclitari necesse est, si seditionum faces ardeant inter cives, quas amoliri facilius, & tutius est, si immineant eminus, quàm si cominus, & in aditis jam grassentur.

Neque Nobilium factiones cum Machiavello eodem probare sapiens poterit. Quas enim tempestates Gibellini olim, & Guelfii Romæ; quas albæ & rubræ rosæ quondam Equites, Angliæ veteri sæpe conciverint, quis ignoret? Sanè si Philosopho 5. Polit. 4. testante, excellentium virorum discordiæ totam post se trahunt civitatem; ex horum divisione Reipublicæ ruina, & dissolutio non oriri non potest. Quod si enim nervi corporis malè affecti sint, tremore succuti corpus totum videmus; sic nobilibus in factionem dissectis, Principes suos omnes civitatis ordines sequuntur; & cùm Ducem quisque suum, affectu, spe inductus sequitur, in æmulum cudi consilia, privato familiarum, & publico Reipublicæ detrimento

sentimus. Scintilla proinde levissima reprimenda confessio est Principi, cum è mente Tullii, non alius facile inter claros, & potentes viros discordiarum esse soleat finis, nisi aut universus interitus, aut dominatus, & regnum.

Duplicia sunt seditionum remedia: alia Princeps in se, & Ministris curet, alia universum. *Imò.* Virtutem in se præ cæteris foveat; injurias & contumelias præsertim potentium devitet, qui in omnem ulciscendi copiam intenti sunt, injuriarum eò minus patientes, quo per dignitatem suam minus affueti. *2dò.* Nullius potentiam firmet nimium. Excellentia enim cujuscumque si sit nimia, Principi, & Republicæ si non exitio, certè damno est populi libertati, & Principis Majestati. *3tò.* Nulli facile præcipiti nimium & inconsulto abreptus impetu minetur potenti. Tutius fuisset multis plerètere nocentes, quàm nimis exterritos in ultionem movere. Vitia suprà dicta evitet, tot enim ferè sunt causæ seditionum, quot vitia; hinc tot earundem remedia, quot vitiorum cautela, & fuga.

Cæterum initiis occurrere juvat præ omnibus. Omne malum nascens, observat sapienter Cicero, facile opprimitur, inveteratum fit plerumque robustius; neque sine damno, & luctu unquam avertitur. Quia in civili bello cum luctuosa sint omnia victoriâ ipsâ luctuosius nihil est. Facundus interpres, cui autoritas, & vulgus mulcendi sunt artes, delinendo populo mittatur, cauto consilio, non impetu persuasurus. Quodsi mali vis medelam benignitate non adinittat, decernendum est armis: neque id tamen continuò, sed datâ penitentiae veniâ. Ac tum quoque, cum gladio agitur, dare se aliquid subditis Princeps ostendat, justitiæ, & clementiæ, non verò timoris causâ; imò se libens indulturum exhibeat, nec petatum, nec rogatum. Per artes interim, spe veniæ propositâ, divellendi, & dissipandi sunt seditiosi. Quosdam allicient præmia, alios consilia non nullorum, autoritate inter eos pollentium, magis convertent. Illud semper cavendum, nè desperatio iis injiciatur; & nè fucatâ fide à Principe agi secum credant. Compressâ seditione, &

partâ victoriâ , authores seditionis si sanguine luant , sufficiat. Et horum ipsorum pœnam ex optima mente proficisci intelligat populus. Neque in complices anxie proinde inquirendum, neque in plures Principi saviendum, monet Livius; & tum velut sanato corpori de medela, sic de legibus prospiciendum. Præsertim milite firma semper servanda est Respublica; hoc uno enim pacto tria illa incētiva seditionum comprimenda in semente experientia docebit, quæ temporibus variis evenisse doctus est orbis. Videlicet Principum virorum in Republica discordiam, quæ inter familias privatim exorta, serpit, & gliscit, dum Regnum flamma involvat. 2dò. Speciosum libertatis aut asserendæ, aut rerinendæ; juvandi populi, tollendorum abusuū, & boni publici prætextum. 3tiò. Religionem, vel sub religionis larva licentiam, & temeritatem.

Et quamquam suprà dixerim, malitiâ, & injuriis Principum occasionem seditionum præberi subditis, nolim tamen exinde quisquam arbitretur, justam Reipublicæ causam esse rebellandi, si Princeps vitâ, & moribus liber sit, pactis non stet, mores non servet receptos. Clara enim est vox Doctōris Gentium, subditos ad obedientiam hortantis in Dominos suos, non tantum probos, sed etiam discolos, id est, perversos. Nam tametsi vita perversa sit, cum tamen Majestatis jus, & proinde fidelitatis vinculum maneat indemne, obedire subditum oportet; secus enim, cum, ut aliàs jam dixi, potestas omnis DEI vicaria sit, & à DEO sit, utente Principibus sive ut legis suæ vindicibus, sive ut ministris iræ suæ ad castigandam gentem, quisquis potestati huic resistit, DEI ordinationi resistit. Nunquam proinde in Sanctum Domini arma stringenda, nunquam consilia ejusdem, mores, & facta à subditis aut vestiganda, aut culpanda; sed si quid divinis manifestè injurium legibus, aut Religioni imperet, majori tum potestati, id est, DEO magis est obediendum; quodsi verò crudeliter saviat, patientiæ gloria restat, aut licet etiam per fugam saluti consulere, armis se vindicare nunquam licet. Testes sint horum prima nascentis Ecclesiæ tempora, quibus propagata per orbem

Christiana pietas crudelitatis omnis & scelerum portentis Diocletianis, Domitianis, Maximinianis, cum reliquis, subesse, & vel sanguine libens fuso Christiana Sacra vindicare maluit, quàm armorum fragore.

QUÆSTIO POLITICA:

An celeritas, an cunctatio in seditionibus præhabenda?

PRO CUNCTATIONE.

Quamvis Reipublicæ malum seditio, tam necessaria est providentia, medela vulnere ut feratur accommoda. Nulla providentia sinè cautela, cautela sinè cunctatione. Neque calore solo, nec frigore stat Reipublicæ compages. Calorem fove, calcaris vice; sed frigore tempera, ut fræno agendorum. Dissipat, & rumpit quidem celeritas, & furor, sed non emendat: tantò majore sin damno, certè periculo, quod integratis ausibus furor redeat. Cunctatio, quæ non negligit, aut contemnit, sed pacatè negotia transigit, utiliùs semper sedat discrimen. Non memento recedit noctis obscuritas, sed successivè triumphat lux; sic cauta periculi depulsio serenitatis constantis est prodromus. Repentina nimis mutatio valetudinis è morbo, Medicis ipsis ferè suspecta, quia periculosa. Rarum Principem sic fovit fortuna, quem casibus non nullis non preslerit. Aureum in his malum, quàm lignum. quem flamma persequens dum tentat, neque strepit, neque absumitur, sed flecti nescius durando rumpit; vel, si ferreus sit, scoriæ absumat flamma periculi, non substantiam. Fatiscunt sapius mala, si in mollem incidant; hebetat impetum globi, & celat terra, vel lana, quem durior obex ignes ignibus reddens sui ruinâ auxisset. Exasperat ampliùs indignatio præcox vulgus asperum; ut auget incendium agitatio, quod sopivisset neglectus. Sæpe languescit ardor æmuli cunctatione sapienti perinde, ac cordata. Triumphat hostis, dum metuentem videt æmulum. Celerat ferè, qui

qui metuit. Impavidus esto Princeps, durando amplius, quam repugnando celeriter, injuriam minues; contemptus cordatus vindicta, risus seditionis erit victoria. Reluctatur plebs fræno tantisper, ut sonipes; at labente tempore, dum obsequatur, quid refert arenam calce ejusdem turbari nonnihil? Furorem sensim frangit sessor, non festinatione præcoci; cedit suo etiam juri, ut cum fano-
re deinceps augeat. Paret tempore, & plebs, cum impetum fregit. Vim qui celeritate tentat, frangit, non flectit. Nolim tamen colluvioni Majestatem principis ob-
jici. Dissimulanda non nihil sereno vultu sunt vulnera. Tum quod congenitum vulgo gelu solvatur, ubi hic sol arridet, ut jam delectet parere, cui obluetari pudet. Tum quod risui æmulis, dolori sibi majori; & malum jam duplex sit, ferre nonnihil malum nec scire, nec velle. Dan-
dum ingeniis est aliquid, præcipuâ regnantium dote, dis-
simulando. Cedunt sereno frequentius, quæ turbido vix cessissent. Pacis gratiâ indulgendum non nihil temporis; nam mora ipsa periculi remedium eò sæpe certius fuit, quò certius benevolentia, & providentia indicium: En-
ripo æmula dum rapitur plebs, irruere, quò providum minus eo sapiens minus est. Gladiatorum est consilium in arena & capeffere, & exequi, non Principum. Juventutis hic scopu-
lus non virtutis, quam experientia, ratio, consilium & format, & firmat. Quisquis nimis citò sopire febrim cupit, auget. Ignis fatuus celeritas est, comites cum ignominia in felicitas, cum dedecore error, sine misera-
tione dolor. Emendari enim vix possunt præcipitata, quia ex alto rapitur impetus. Gressus lentior contra quia regressui spatium præbet, malo tutius cicatricem obducit. Non vincere duntaxat, quod novit & bellua; sed sine vel discrimine, vel sanguine vincere, laudi dandum est Principi. Cunctationis hæc dos est, & stratagema, non celeritatis. Gladius dicebatur Romæ Marcellus, scutum cunctator Fabius, meritò præplacuit iste. Periculosius iter nullum, ac seditionis; lentè cum testudine gradien-
dum, ubicunque cunctatio adfuerit, sub scuto Princeps erit. Tentat celeritas frequentius plura, quæ nisi consi-
lio pondus habeant, inconstantia pari dilabuntur. Non
lan-

languet qui providè, cautè, sapienter differt. Cauta magis, quàm felicia ex eventu Principem decent. Cauta facit cunctatio. Deliberet phlegma, dum executio ferveat instar ignis, id est *festina*, sed *lentè* cum Augusto. Lentè dilcute, celeriter age.

PRO CELERITATE.

○ Quàm bellum nomen providentia, consilium, cautela! At, quàm sinè omine omnia, dum sermo est de seditione. Scintilla, quam nisi sedes principio, incendia vomet, quorum furori solis Patriæ bustis parentetur. Cancerana, & pestis, quæ nisi præcidantur in semine, non nisi exitium voragini suæ limitem statuunt. Et hoc malum benevolentia, dissimulatione, morâ Princeps toleret? Nunquam in Patriam impius magis, quàm, cum in suos sic pius esse cupit: nunquam magis improvidus, quàm cum taliter providus. Dissimula latentis mali initia, tuba æmulis erit oscitantia, dum alii metum, alii ignorantiam, vecordiam, & torporem alii arbitrantur, & vel ideo, tam sui incurium, quàm Patriæ iniquum, ignavum Principem spernunt. Nunquam acrius furit plebs, ac dum primos cernit impetus è sententia cedere. Nunquam contrà domatur facilius, atque securius, quàm dum primis se cernit ausibus lusciam. Tum enim verò audaciæ, furoris, temeritatis trophæum momento statuitur. Quàm prona ad audendum sunt vulgi studia, si initia faveant, tam sui ipsius impos, & ignavus est furor ubi primos virtus Principis vitales spiritus, quasi florem pruina, decoxerit. Facit hæc omnia celeritas tempestati imminens, cum primum inaudit: hæc una felicitatis arbitra, spei, & votorum, & cedentium in comoda Patriæ eventuum est corona. Rumpes namque facilè, quæ rapueris consilia: Tum quia improvisa, tum quia eò acerbius mordent, quò prima hebetant gustum amplius, vel obtundunt. Rosa in orbem donec convolvitur, succo plena est, explicata marcescit. Qui in unum congestus Ægyptum omnem navigabilem reddit Nilus, leniter defluit in rivulos subteraneos sparsus. Sic seditio in semine oppressa, quia vim aut divisam, aut florentem duntaxat

taxat nanciscitur, momento perit. Pessimè Reipublicæ consulit, qui seria quamvis cupiat, sera magis suadet auxilia vel eò, quia sic magis proficua. At, quis sera præferat, oro, dum in cuspide, quod dicimus, Patriæ libratur felicitas, gloria, vita? Ubi litigare apes incipiunt, solvi Rempublicam: ubi scindi tabulas, triremem Urbi supparem mergi oportet. Ubi dissidet Magistratus, ac populus, exitium prope domesticum in momenta expectes. Quod conversiones Gentium, Regnorum, Urbium non spectasset orbis; hæc si principia cordi magis fuissent. At esto, sanctissima vitæ studia vigore careant, & sanguine, belli fortuna invisa ferè, & amissa defluat, si cunctentur; sanè veris primitias agricola si negligat, spem succidit; sic securitas, quies, felicitas secutura concidit cum prima occasione neglecta. Utinam Reipublicæ excidio hanc non docuisset Principes veritatem eventus lugubris! Quæ gliscentia in ictu præfocas, & configis consilia, ut invaluerint tempore, vires sumentia non nisi excidio restinguis. Languet ardor alius diuturnitate, non sedito, quæ torrentis more, quò dilatatur ampliùs, hoc grassatur impuniùs. Quoties servârunt Patriam suscepta in arena consilia! Rarò enim serium, quidquid serum. Cudantur consilia in curiis, rapi oportet unà & calybein seu pænæ, seu terrori, dum seditio viscera rimatur. Remedia omnia, aut segnes Medicos natura ipsa contemnit, quasi mori celeriter malit, quàm serò, & cum discrimine valere. Victor orbis Julius si, ut bello, sic seditione cellerasset, nunquam Bruto cecidisset.



§. IV.

Conspiratio , Proditio , Earum remedia.

*Divide, rivus erit, qui nunc rupto aggere torrens
Immensos vasto flumine mergit agros.
Divide; scissa perit, quæ ferret juncta ruinam,
Turba ferox, regnis seditiosa tuis.*

DOCTRINA POLITICA.

Conjuratio est plurium, vel unius consilium ad summi Reipublicæ Magistratûs exitium. Hoc consilium est aliquando unius tantum, dum videlicet unus nefando consilio in Principis personam conspirat; aliquando plurium, qui communicato consilio insidias struunt. Quod malum ut Reipublicæ periculosissimum, ita perniciosissimum semper est, & vel à metu crudelis Principis, vel etiam ex vitiis illius, ut dixi, in historiis duxit originem. Quamquam authores mali tanti ferè esse soleant Imò: *ambitiosi*, præsertim si iisdem dignitas & honor petitus negetur; potentes opibus, & clientelis, ac idcirco arrogantes. Hi enim omnes imperia graviter ferunt, contumeliæ vel

um-

umbram exēcrantur, & idcirco in Principem conspirant quā facillimē, ut quem, cū se majorem vidēant, in ordinem redigere contendunt. Ferē enim cæca est arrogantia, suāque ipsa felicitatem non capit, & majora cupit, quā mereatur, aut ferre possit. 2dò: *Inopes*, præsertim Nobiles, & profligatæ malitiæ. Illi, quia in affluentia nequeunt, in egestate vivere nollunt, odio fortunæ rebus novandis student, malentes publico, quā suo solius exitio perire. Hi verò, quia de vita sua desperant, in nefanda molimina sæpenumero prouunt. 3tò: *Inquieti, & turbulenti*. Est enim genus hominum Sal. l. 1. hist. cui in seditionibus quies, in pace turbæ sunt. Utpote cū honores, Tul. 2. in Catil. quos quietâ Republicâ desperat, perturbatâ consequi se posse arbitratur.

Medebitur Princeps conjurationi. Imò: si providē, & cautē per fidos, & solertes indaget, quid subditi aut dicant, aut faciant? Cū enim ferē, priusquam temeraria tententur, index consiliorum sermo præcedat; ii, qui criminantur, vel faciles criminantibus aures præbent, linguā prodentur. Unde Princeps exploratorum ministerio (quos conjurationis tempore nemo sapiens improbare potest) in eorum notitiam veniat, qui, ut notat Curt. l. 6. à temeritate linguæ ad gladios venire decernunt. 2dò. Delatores ut fidi sint, juverit (exemplo Regnorum complurium hoc ævo sæpius usurpato) præmia, & impunitatem ei decernere, qui conjuratos indicaverit. Quamquam summâ in credendo delatori cautelâ opus sit; si enim accusasse criminatori suffecerit, quis innocens esse poterit? Bene ait, qui crudelitatem hanc immaturam, erroris matrem, consilii dixit novercam. 3tò. Corpus custodiâ militum, animum dissimulatione, & diffidentâ prudenti muniat Princeps. *Prudenti* dico, non enim umbra quævis instar corporis metuenda est. 4tò. Innocentia, & virtus Principum, ex qua amor omnium in eosdem. In hac sola vel ab hostibus plus est præsidii, quā in custodia legionum. Accedit prompta semper talibus adversus insidias omnes providentia, omnipotentis protectio. 5tò. Etsi dissimulare interdum juvet conjurationem intellectam, sed quod solū sæpe insidiarum remedium Tac. 14. annal. judi-

judicet esse, si non intelligantur; quemadmodum Carthaginenses insidias Hannonis, Justin. l. 21. Eteocles militum conspirationem evasit, Xenophon. l. 2. hist. Græc. Consultius tamen est, si scelus constet, graviter punire, & quidem celeri pænâ; ut habet Valerius Maximus. Neque necesse est in actum semper fuisse deductum scelus. Nam scelus esse non cessat, quod tantum cogitatum est: imò non exitus rerum in nefariis ejusmodi rebus, ut habet Cic. pro Milone, sed & consilia legibus vindicantur; quia facinus sunt impietatis meditata, cujus solius deliberatio, & consilium vindictam meretur.

Proditio, postremus Reipublicæ evertendæ modus, est occultum cum hostibus consilium de Provincia, Urbe, vel arce ad Principem spectante; hosti tradenda. Eò perniciosius hoc malum est Principi, quò nocet latentius, & uno ferè tempore annorum complurium, & dimidii etiam sæculi labores heroicos evertit. Proniores in hanc pestem Reipublicæ sunt *avarî*, ut qui commodum suum, famæ, fidei, rebûsque omnibus, præponunt, teste Sallustio. 2dò. *Fraudulenti*, & *versipelles*, item *simulatores*. Nam bene Tacitus 4. annal. fidum non potest esse multiplex, & tortuosum ingenium. Incautus Princeps neminem talibus fidiorem censebit: adeò dextrè simul & subdolè fidem ostentant, & mentiuntur, ut meliores omnibus videantur, ut securitate ipsâ freti majori pretio fidem prodant, & nefaria consilia expleant. Unde omni Argo vigilantior eos Princeps observet, qui affectatè nimis amorem, & fidelitatem suam probare conantur. Ferè enim vel ad obtinendum aliquod occultum bonum, vel certè ad prodicionem fraude hâ sese disponunt. Quod si verò manifesta sit Principi proditio, nisi tyrannus esse velit in suos; & Rempublicam Princeps, spei, & veniæ det locum nullum, sed acerbitate, & celeritate pænæ compenset gravitatem delicti, ut exemplo docti, quos sceleratos Patria cives habet, ab ejusdem quærenda, aut promovenda ruina deterreantur.

QUÆSTIO POLITICA.

*Uter gravius erret , qui fidit , an qui diffidit
omnibus ?*

PRO EO, QUI FIDIT.

Nihil damnosius fiducia nimia. Oculo credulus ejus-
modi caret, & manu, quorum alter consiliis, al-
tera negotiis si desint, anima deest. Vel ventis,
vel undis credis, quæ facili nimium credulitate omnibus
pleno arbitrio credis. Expectatus ad curas, expectatus
ad sensa sit animus, ut & idoneis comittas tractanda, &
an tractata commissa sint, invigiles. Sexcentis dolis &
fraudibus sternit viam credulitas. Nemo præsumit libe-
rius, quam qui liber suspicionis à scelere. Tuta servis
ignavia est nimia securitas Domini. Sollicitudinis omnis
expers fiducia vel neglectus officii, vel interitus lucri ma-
ter est. Cautiore etiam qui rimatur obtutu, aut cæcu-
tit, aut fallitur sapius; quid aget, qui vel simplicitate
ductus, vel ignaviâ se communicat omnibus? Oculi &
mentis studio opus est, ut discernas, quid animo, quid
manui subsit alienæ: studium unum complurium ferè est
adulatione placere, virtutis specie distinguendi faculta-
tem excæcare, metus est obsequium, vis coacta venera-
tio, necessitas amicitia. Ipsâ veritatis larvâ sibi plaudit
malitia. Et huic te, tuâque tu fidere? Cave communica-
re tesseram, quia consilium ipsum hoc pacto communi-
cas. Metuendus est hostis viro publico, præsertim Prin-
cipi. At, si Augusto credimus, amici ipsi amplius; ut
quorum laqueis plures, quam hostibus victima cæciderunt:
eum hosti amicum, huic porro, si simulatus sit, oppone-
re liceat neminem, arcanorum utpote conscio, ac penè
arbitro. Proximus certè nocendi aditus est fides perfido
data: ut quæ cordis rimatur abdita, dum exploratis con-
siliis fascinet animum. Natura ipsa sinu intimo cor condi-
dit, doctura, raris patere debere. Consilium vel uni sæ-
pe detectum quoties domui, Urbi, Patriæ nocuit! Non

temerè quidem , neque tamen omnibus fidendum velim , quia error finè medela. Honorandos omnes , at paucis credenda sensa , regendi regulam dedit Apollonius quondam Babiloniæ Regi. Et bene : nisi pelluceret aqua , corallia & uniones non tam facilè raperet urinator. Tutius thesauros conservat terra , quia omnibus opaca. Errat communis omnibus fiducia , sive dum credit cuivis munera , sive postquam credidit. Neque enim ponderi cuivis super lacertus est omnis , ut gigantæo calybi dextera pumilionis. Aut si pares sint moli vires & animi : Mater indulgentiæ erit fiducia. Filia porro agendi seu incuria , seu licentia ; dum & contemnitur dominus , muneris collator beneficus : & administer ejus se opibus dicat , qui curarum esse vacuus cupit. Quid ? quod & potestas ei traditur , à quo pendere pleno jure vis omnia. Fastos lege , conspirationis hæc causa erat non una , sive præfidentia ejus , cui fiditur ; sive æmulatione aliorum , quos fiducia hæc aut premit : aut lancinat. Adjumentum regendi fiducia est , sed detrimentum , imò exitium , si nimia. Committantur virtutis merito plurima ; fidatur , quos merita jvant. Ne tamen plurimum jura , immunitates patiantur paucorum , vigil oculus adsit in specula. Conscium cupio & cautum , non scrutatorem. Negotia trade , non dominatum. Currum cede , non habenas. Fide denique , sed cui , & quantum , vide.

PRO EO, QUI DIFFIDIT.

Quamquam fidendum non facilè , ac ei , cum quo modii falis absumpti complures : Minus tamen nocet , qui omnibus , quàm qui nemini fidit. Minus namque nocivum non optimis fidere , quàm bonis ipsis diffidere. Uni sibi fidere videtur , qui didicit omnibus. Et quis ventorum ac marium gnarus adeò , ut unus insanum naufragii æstum securus adeat ? & tamen facilius tempestatis , quàm sæculi procellas evaseris. Metuere , suspicari , irasci , amare inaniter , & in sexcentis decipi oportet , quem omnibus delectat fidere , fateor. At , errat amplius , qui ut sapiat , vel magis sapere videatur , se unum fide dignum

gnum existimat. Odio ferè censor est, æqua perinde ac iniqua dijudicans; at majori, qui fidit nemini; cùm diffiteri nequeat ultimò, se sibi ipsi diffidere. Comem in omnes, retractum unà; candidum, cautum tamen te cupio. Neque sic obscuro amantem in te, ut nemo quid sentias, dispicere; sic tamen, ut non omnis possit, sed solâ duce ratione. Seipsum diffidentia perdit, si sinè fiducia sit. Torquet suspicio mentem lanienâ semper domesticâ, cui monstra sunt omnia, & umbræ in ruinam progenitæ. Vermis illi perennis in animo, convulsus ventis pelagus, tenebræ lumini omni infestæ. Et hic felix esse possit, qui pavet semper; rigetque perenni hyeme, tametsi caleant omnes? Nunquam tutus est, qui tuta veretur omnia. Infelix animus qui pusillanimis semper, qualem esse necesse est, qui diffidit. Risit Domitianum vetustas, quòd marmorea Pyrhitis cubacula incoleret, ut à tergo posita videre liceret. Sibi lo dignum censuit Dionysium Sicilia, nè liberis quidem barbam tondendam credentem. Mirata cum Carolo VII. Patre, veneni semper metu afflicto, Ludovicum XI. filium Gallia, custodes ipsos vitæ æmulos existimantem. Et hi somniatores umbrarum, sibi, ac Reipublicæ exitium non accersant? Sibi inquam, quia suspicax ferè duntaxat est, qui parisi reus delicti, pari omnes morbo furere existimat. Virtutis omnis vel cò inops, quòd nullius fidat virtuti. Nihil acturus, dum omnibus diffidere mavult. Jacent namque neglecta negotia, dum nec unus omnium capax, vec aliis per umbras fidens. Quid? quòd diffidenti fidat nemo; suspicio suspensiones mutuas proritet; dùmque alios credit moliri, moliri in se alios concitet; donec cadat eò faciliùs, quòd ferè insidiis petitur. Verba talis suspecta sunt omnia, torquentur in pravam facta, judicantur & ficta. Amicus sit quamvis, æmulus creditur, quia caret amicitiae glutine, fide mutuâ. Servos aspice, dum diffidit herus, pessumire sinunt omnia; ut diffidere deinde jure & possit, & debeat, qui injuriâ ante voluerat. Neque enim acriùs unquam vulneratur mens

fida , quàm diffidentia. Reipublicæ porro nocivus. Quis enim Patriæ sub Principe serviat , qui candorem non noverit? Piget litare sanguinem; quem suspicio rivalem, aut insiduum credit. Via moliendi exitium non una fuerat , dum immeritò credebatur malus , quem fidum Patria est experta. Fides semper tollitur diffidenti. Ut enim amor amorì , sic fides fidei redditur , aut mutatur. Fiducia namque cauta , nisi insanabilis jam sit perfidia , ad obsequium , etiam perfidum revocat vel reluctantem.

FINIS

PARTIS SECUNDÆ.





PROBLEMATUM

ET

DOCTRINÆ POLITICÆ

PARTIS SECUNDÆ.

INDEX.

Proœmium.	pag. 3
Quæstio I. <i>Quid Politica, quæ differentia, & ob jectum?</i>	4
§. II. Imago, & principia Pseudo-Politici.	10
§. III. Imago veri Politici.	17
§. IV. Quid Idolum Politicum, Fatum, Fortuna? Item anima?	22
Quæstio II. <i>De Principiis, & partibus Civitatis.</i>	
§. I. Origo vitæ civilis. Quid vicus, pagus, Civitas?	30
§. II. Quid Civis?	38
§. III. Quæ olim Respublicæ?	44
§. IV. Quotuplex hodie Respublica.	51

Quæstio III. *Ratio Reipublicæ.*

- §. I. Quæ optima Reipublicæ forma? 53
 §. II. An Successio electione præstantior? Quis
 ejusdem ordo? & an fæminæ capaces
 Imperii? 66

Quæstio IV. *De Rebuspublicis hodierni orbis.*

- §. I. Romani Imperii Respublica; numerus,
 & munia ejusdem Electorum. 76
 §. II. Quæ Imperii Orientis Respublica? 86
 §. III. De Republica Russiæ. 94
 §. IV. De Rebuspublicis variis. 102

Quæstio V. *De Magistratibus.*

- §. I. Quid Magistratus? quæ ejus divisio?
 tituli? 114
 §. II. Præcipuæ summorum Magistratuum, seu Re-
 gnantium dotes. 121
 §. III. Pauca de Magistratibus cæteris. 129
 §. IV. Virtutes, & vitia Magistratuum eorum,
 qui à consiliis. 140
 §. V. Virtutes, & vitia Ministrorum, & Admi-
 nistrorum. 147

Quæstio VI. *Momenta servantia Respublicas.*

- §. I. Autoritas, & benevolentia, salus Prin-
 cipis. 153
 §. II. Judiciorum ratio, & disciplina Civium. 160
 §. III. Belli studia, & conatus. 169

Quæstio VII. *Momenta Rempublicam evertentia*

- §. I. Tyrannis. 182
 §. II. Causæ remotæ aut mutandi, aut everten-
 di Rempublicam. 190
 §. III. Causæ proximæ mutandi, & evertendi
 Rempublicam. 198
 §. IV. Conspiratio, Proditio, earum remedia. 206

INDEX

Quæstionum Problematicarum

PARTIS SECUNDÆ.

- I. Utra major, & perniciosior orbis Politica, verborum simulatio, an operum? pag. 6
- II. An major Politicæ Regula: Simulatio, an Dissimulatio? 13
- III. An in Principe ut minus verborum duplicitas admittenda? 18
- IV. Uter stultior, unum negans, an plures credens Deos? 25
- V. An multæ leges signum sint bene constitutæ Republicæ? 34
- VI. An multa nobilitas decora Principi, Reipublicæ utilis? 40
- VII. An consultius orbi foret, omnia esse communia? 47
- VIII. Utrum felicius frui gratiâ Principis, an plebis, & optimatum? 54
- IX. Quæ ætas regendo aptior? 61
- X. Uter principatus felicior, gentis rudis, an cultæ? 72
- XI. Utra felicior Respublica, multitudinis, an paucorum suffragiis Principem legens? 82
- XII. An nobilitatis potior sit habenda ratio ad Reipublicæ munia? 90
- XIII. An consultum Principi visitare Provincias? 96
- XIV. An consultius orbi futurum, tot Principes, quot urbes censerî? 110
- XV. An felicior Respublica, cui Magistratus perennis? 117
- XVI. An consultius Principi, omnia per se decidere? 126
- XVII. An felicius Regnum, cui bonus Princeps, à consiliis mali; an è converso? 136

- XVIII. Utrum consultius Reipublicæ , concordia ,
an discordia esse consilia ? 144
- XIX. An armis , an consiliis magis servetur Res-
publica ? 149
- XX. An expediat Reipublicæ multas dari immu-
nitates ? 158
- XXI. An consultius Reipublicæ jus dici ab ex-
teris ? 166
- XXII. Utrum gloriosius fundare , vel augere , an
tueri fines Imperii ? 178
- XXIII. Utrum viro publico periculosius , Principis ,
an populi furor ? 186
- XXIV. Quæ aptior Regendi dos , amor , an ti-
mor ? 194
- XXV. An celeritas , an cunctatio in Seditionibus
præhabenda ? 202
- XXVI. Uter gravius erret , qui fudit , an qui diffidit
omnibus ? 209




IDEA SAPIENTIS
THEO-POLITICI,

ID EST:

Tripartitæ Morum Philosophiæ

PARS TERTIA

OECONOMICA.



PHILOSOPHIÆ MORUM

PARS TERTIA OECONOMICA. QUÆSTIO UNICA.

§. I.

De Patre familias.



Ut properent mandata feræ , rugisse leonem

Est satis; atque animi signa dedisse sui.

Quid quereris , cui cura domûs commissa regenda est?

Subdita , vis , tibi gens pareat & esto vigil.

DOCTRINA POLITICA.



Uamquam Aristoteles pauca admodum de Oeconomia tradiderit, quæ pro varietate locorum, personarum, & temporum varia est, & ferme circa singularia tantum versatur; cum tamen tertiam Philosophiæ Moralis partem Oeconomia constituat,

de qua idem Philosophus fundamenta quædam tradidit, paucis eandem expedio. Dirigit enim hominem ad domum, aulam, & rem familiarem Curandam non secus, ac Politica ad civitatem moderandam. Et quemadmodum varii sunt status, & munera hominum, sic varia dici potest Oeconomia. Alia est hominum *privatorum privata*: Alia *senatorum, Civilis*: Alia *Pratorum, & Magistratuum minorum*. Alia demum *Regia, seu Magistratuum summorum*. Quorum Majestati tametsi non congruat minimos reddituum, & expensarum apices vestigare, curæ tamen esse cumprimis debet, sic sumptus aulae, belli, & suæ in alios liberalitatis moderari, ut communis ille prodigalitatis scopulus vitetur, subditorum per tributa, & exactiones oppressio.

Oeconomus privatus is omnis est, qui rem curat familiarem. Oeconomia res ipsa est familiaris. Quæ primum constat familiâ, seu societate, unius Patris familias potestati naturâ vel jure subjecta. Cujusmodi sunt uxor, filius, servus, Nepos &c. item, quæ à fortuna sunt, scilicet possessiones, seu res possessæ, quæ vitæ commodè sustentandæ necessariae sunt. Triplex in hos sibi subjectos imperium habet Pater familias; *Civile* in uxorem, velut sociam, non ancillam. *Regium* in liberos, salvâ naturæ, & æquitatis lege, quòd vitam iis adimere nequeat. *Herile* in servos, tanquam instrumenta vitæ socialis.

Omne Patris familias munus Xenophon l. 3. complexus est, dum ait: ejus esse primum, ut subditos suos morigeros reddat, & obsequentes. 2. Singulis, quid agendum sit, præcipiat. 3. Benevolentiam omnium comparat, etiam viciniorum. 4. Malos puniat, bonos præmiet. 5. Socios adsciscat. 6. Sua diligenter custodiat, 7. Laboris sit tolerans, & accuratus. Addens œconomicum exemplum Ducis apum. Præstabit hæc omnia nullo negotio, si certus sit non in multorum possessione, & amplificatione opum (quæ etiam malis artibus fieri potest) sed in recto partorum usu boni œconomi laudem consistere, & providentiam. In hac enim tenere modum, servare ordinem, decoris, & honesti rationem habere, hic labor, hoc opus est. De quo paucis infra.

Hinc

Hinc Imò cum Cyro apud Xenoph. l. 1. Nihil DEI cultu neglecto aggrediatur. 2dò. *Providus* sit, ut debito tempore, loco parentur alia, mutentur alia, quæ quotidiano, menstruo, vel annuo usui serviant. Alia enim vere, alia æstate, alia autumnii tempore emi convenit, pretii, & bonitatis suæ causâ. Multa quóque è fundo proprio leget impendia, quæ incautus negliget alius; cùm tamen oraculo teste: nequam ille agricola sit, qui ea emit, quæ suus ei fundus potest præstare. 3tò. *Vigil*, & *cautus* sit; illud securitati domûs nunquam sine custode linquendæ, & servorum sedulitati conducit. Hinc primus surgat, memor illius veteris: *sanctificat*, *dicit se surgere manè*. Ultimus decumbat. Sic enim semper imperia in subditos manabunt à Domino. *Cautus* porro, nè famulis curam omnem finat, quæ ruinæ est causa. Urget fervorem, & fidelitatem subditorum præsentia Turni. In tabulas item referat omnia, ut accepti, & expensi ratio constet. Hæc causâ M. Antonius, imò nullus Romanis frugi Pater familias est habitus, qui has negligeret tabulas. 4tò. Quàm minimum impendii facere sic curet, ut tamen avaritiæ sordes vitet. Cato quæsitus: quis quæstus esset certissimus? reposuit: si bene pascas. Quis proximus? si mediocriter pascas, ait. Hoc utinam servassent multi, non verum illud Senecæ experti fuissent: *sera in fundo parsimonia*. 5tò. Rem supervacuum nullam requirat, hoc enim est abundantia; sed rem quoque necessariam nullam desiderari patiatur, ut monebat Pittacus. Unde emax, & cupidus non sit, nisi necessitas, aut utilitas urgeat. Sed parsimoniâ utatur, ut prius dixi. O Dii immortales! monet Tullius, non intelligunt homines quàm magnum vestigal sit parsimonia. 6tò. Diligens, & laboriosus constanter sit. Operâ sæpe, & diligentia multâ, non impensis res crescunt. 7mò. Rem familiarem honestis tantum artibus augeat. Secus enim laborat famâ, aut conscientia. Et cùm repererit omnia, nihil satis habebit. 8vò. In emendo cautus sit, & vigilans; non cæcâ cupiditate se illiciti ostendat. Unde videat, quid alii sapientes, & providi pro eodem daturi; & an decori, & utilitati sibi sit magis, quàm ostentationi.

QUÆSTIO POLITICA.

An otiosi, an negotiosi diutius vivant?

PRO OTIOSIS.

Non herculeos dedit natura lacertos homini, sed limitem statuit tum mentis, tum virium. Quid futurum proinde, si constanti labore vel Argum, vel comitem laboris Patremfamilias suis velis adesse? Atteritur perenni frictu calybs, cavantur guttis marmora, cedunt stillicidiis moles vastissimæ; & viribus labem non adferat cura perennis? Non saxea est mens mortalium, sed cerea: neque immensa, ut Philosophis loqui placet, agendi virtute ab authore omnium est donata; & hæc tamen constanti motu se indefessa circumagat, ut rem familiarem curet, liberis consulat, fortunas augeat? Vitrum aspice, fragile sit licet, si servetur in otio, ætatem durat & sæcula, dum interim in pulverem molitur lapis, minuuntur marmora, quæ perenni gressu teruntur. Non solus hodie orcus, sed & mundus suos censet Tantalos, quorum animas auri & argenti cura dies coquit, noctesque, non secus, ac ignis paleas, donec metallo, cui ætatem omnem consecrant, reddat concolores. Quid refert sollicitudine perenni ceu fluctibus animum vellicare? quasi verò Paterfamilias esse possit nemo, nisi vulturem Titii circumferat inquilinam, quæ æterno curarum vulnere cor sauciet. Sollicitudo qualibet vultur est. Procul sollicitudine, procul curis prima egere orbis sæcula: hinc durabilior vigor, mens, ætas; quæ quiete servantur. Liberis Pater ut consulat, quid refert Ixionis rotam volvere labore improbo, & ferè incerto? dum quod improbus ferè peperit sudor, prodiga dissipat manus & ingrata. Aliter, & melius consulit liberis sapiens Pater, educationis, non fortunarum thesauros impertiens. Non vacat sexcentis Patribus melioribus his gazis intendere, quia mens, animus, cura omnis in fortunas temporis rapitur, & detorquetur. Videas, & an fleas, an rideas indies, nescio: harpyæ in morem oculo & ungue in rem domesticam


sticam parandam, ornandam intentos, neque tamen ullius minùs providos, quam suorum. Aliena comparant, sua perdunt. Nihil enim tam suum, quàm liberi, alienum, quàm fortunæ. Etsi angusta sit nonnunquam suppellex, faciliùs in egestate virtutem coluerint liberi, atque in affluentia rerum. Virtutum hæredes scribito, non facultatum; & divites sin relinquis, facis. Amplissimum sibi Patrimonium virtus est, & negotio nullo fortunas parat, quas hæreditas non concessit; fortunas si non sæculi, certè animi. Hinc sapiens id Philosophorum quondam: consultius mediocres, quàm immensas habere fortunas. Ferè enim quo plus sunt potæ, plus sitiuntur aquæ. Imò & vitiorum fomenta fortunarum sunt incrementa. Quid necesse est ad metalla teipsum damnare, ut metalli glebam inferas gazis? Prodigere optimam mortalis vitæ partem, valetudinem, viresque aut frangere, aut ante tempus consumere. Genio, dum vacat, lita. Videas per sexcenta maris pericula institorem, in arena gladiatorem ad majus periculum ruere, vitam prodigere, utrumque nundinandæ rei, quæ vitæ ipsius tuendæ, & proregandæ causâ est condita. O præposterum naturæ, & naturæ conditoris ordini ordinem? Epibatas ad transtra damnatos credas, non suo negotiantes, si nonnullorum vita, labor, studia spectentur. Dies operâ, noctes curis ferè pervigiles: ut labor laboris non terminus, sed semen videatur. Sibi ut vivant, conditi sunt, & auctori. Auctori minimùm, sibi parum, posteris vivunt nihil. Auctoris namque ferè immemores, sui incurii, posterorum aut oïores, quibus per fas & nefas corradunt, aut ludibrium, dum alienus ferè improbus sudor alienæ est fomentum sin socordiæ, atque licentiæ, certè passim ingratitudinis & contemptûs.

PRO NEGOTIOSIS

Actum de vita mortalium, imò toto est orbe, si otium amuletum vitæ edicas. Chara pax omnibus semper, invisum bellum. Errat tamen, qui negotium belli, otium pacis symbolum dixerit. Faceſſat humana industria, vitæ non dicam commoda, sed alimenta, virtus
A 4
ipſa,

ipsa, ubi otium palmam tulerit. Non minuunt, sed acuunt animos curæ, si moderatæ. Elidat vim & vigorem omnem conatus, si decumanus sit, non tamen elidit, si humeris suppar fuerit. *Age quod agis*, inclamabat vetustas sapiens, sed addidit unâ: *Ne quid nimis?* Quid quid enim moderatione, caret una durabilitate, atque adeo ætate. Horologia quiete perpetuâ obsolescere, rauceſcere organa, experientia artis nos docuit, sic Paterfamilias. Nec sibi, nec orbi, nec posteris vivit, qui otiosus. Orbi si non noxius, odibilis ferè. Ut cujus torpore injusta semen-tem arva, vites palmitem, alimenta & fomenta Cælum ferat & terra. Quid agendum aut futurum in Curiis, si sybariticis tantum diffuere visum sit studiis? Quid securitatis Patriæ; quid fructus laurea arenæ latura est, si unum illud consilium placeat, quod caret arduitate? Vel eò contra displiceat omne, quia labori junctum aut difficultati? Grandis & utilis orbi nemo, nisi de quo Vates è vero; *Multa tulit, fecitque*. Neutrum sit otio tabescendo. At an noxius orbi magis, an sibi molestus amplius, dubium esto. Otium juge, ut rubigo calybem exedit, dum contra cote gaudet virtus qualibet. Politur exercitio ipso ingenii acies, ut virtus æmulo. Aqua perenni inquietudine rapta purior ferè atque Salubrior est; quæ stagnat perenni otio, infecta gignit, atque mephitim. Sic morborum exercitus, languor, hebetudo sensuum quotidianus vitæ otiosæ sunt census. Posteris demum quid condit, oro, seu solatio, seu documento, seu gloriæ? qui nunquam, quod dicimus, manum ad aratrum. Certa in fundo foret parsimonia colono, nisi æstum & brumam & pati didicisset, & vellet. Sapienter ille, cui Gentilitium quondam lemma: *Laborandum*. Et bene. *Qualis Rex, talis grex*. Torpebunt otio omnia, ubi oculus vigil non adest. Laquebit in Reipublica artium, literarum, virtutumque omnium studium, si hoc pacto liceat otio indulgere. Sanè tempestas nulla domui aut Reipublicæ majoris plena periculi, atque adeò majoris ferox perniciæ, ac hæc malacia. Leonem vide: rugitu unius attonita stant animalia cætera. Esto leo vigil in tuos, metu percellens torpentes. Unâ tamen horologium, mo-
vens

vens tuos , motuque tuo singulis agendi horas dispescens. Satis sic vives tibi , tuis , orbi. Diutius profecto , quia æternitas aut labores aut fructus tuos cum legerit , famam in fœnus reddet ac gloriam : dum deses in otio , tanquam veterno sepultus inglorius vixdum crastina dignus passim censebitur. Quàm rude artium , literarum , facultatum omnium sæculum viveremus . si in otio duntaxat stertere licuisset majoribus. Flos artium , sæculorum crudita tempora , ingeniorum inventa seduli sunt laboris fructus , non otii. Apellem , Phidiam , Archimedem mors & gladius sustulit. Potiorem , quia meliorem eorundem partem auferre non poterat , gloriam ; & quod caput est , durantem in posteris artem , & commendationem. Compendium hoc erat non torpentis præ desidia aut penicilli , aut scalpri , sed quotidianæ paræmiæ : *Nulla dies sine linea*. Neque tamen eò te ad labores Syfphi damnatum velim. Solerem cupio , non irrequietum : navum , non turbulentum : providum & acuratum , non sordidum & avarum , Agentem omnia , & tibi , tuisque , imò & aliis consulentem , nihil tamen quodammodo operantem. Magna omnia mens humana complecti , statuere , & designare potest , suavi tamen fortique una , quia efficaci silentio omnia & moderari , & promovere. Ut profundiores ferè alveos excavat amnis lenè decurrens ; ac qui turbulento impetu rapitur. Superficem hic ferè radit , non fundum. Vives sic tibi ampliùs , quia semper tuus. Tuis , quia nuntu pendentibus. Orbi , quia non tam tuo , quàm aliorum cominodo usque intentus.



§. II.

*Mutua Patris, & Matris familias munera. Eorundem me-
di parandi fortunæ.*



*Affidet unanimi concors cum turture turtur,
Atque obit officii munera quisque sui.
Connubium felix! si sic cum conjugè conjux
Vivat, & unanimum servet uterque fidem.*

DOCTRINA POLITICA.

Elix familia, in qua vir parandis, mulier custodiendis, & augendis rebus intendit; utriusque laus digna. Neque enim *minor est virtus, quàm quærere, parva tueri*. Viro cuius, virtute, non dote; famâ, non formâ; ætatis, & conditionis æqualitate ducenda est uxor. *Virtute, inquam, non dote, nam veniunt à dote sagittæ, intolerabilius nihil est, quàm femina dives*. Quæ verò dos materna pulcherrima? vita pudica. Ait Bias. *Famâ non formâ; fastus enim, ut notat Ovidius, inest pulchris, sequiturque superbia formam*. *Æqualitate, nam, si qua voles cautè nubere, nube parè*

2dò. Mulier ut tori habenda est socia, non ancilla. Famina, & servus naturâ differunt, monet Philosophus 1. Pol. 1. hinc ferviliter ab ea timeri nolit: leviora indulgeat, de majoribus cum significatione candidæ mentis moneat: neque curiosè nimis in acta, aut verba omnia indaget. Tum enim, ait Alphonsus Rex, tranquillum erit conjugium, si uxor cæca sit, & maritus surdus. 3tò. Cum eadem blanditiis nihil agat, quod vecordiæ est, coram extraneis illam nunquam objurget, quod insanix esse dicit Cleobulus. Hinc si vitium in ea sit iræ, loquacitatis, prodigalitatis, luxûs: exemplo, & lege, non ferro, & scipione emendetur. Emendari vitium si nequeat, ferendum tantisper, dum patientiâ, & exemplo, cujus vis est magnetica, molliatur. Allecta voluntas paret libenter, coacta contumax est. Convitia (Aristoteles c. 4.) & injuriæ absint semper. Rosa incautè tacta spinas intorquet. Sic mulier asperatur duris. Familiæ tamen honori sic consulendum, ut flagitia, & turpitudines penitus non tolerentur.

3tò. Ornatum pro conditione, & decore indulgeat, excessum refecet. Sæpe enim plus consumit arrogantia, quàm acquirit industria: esurit familia, & dorso splendor, & substantia omnis portatur, non sinè creditorum ipsorum damno, & lectu. 4tò. Arcana, nè levia quidem, ei detegat, aut si aliquid ei dixerit, rem certè totam non manifestet. Cæterùm omnia ei domi suæ confidat, præterquam officii publici. 5tò. In omnibus sic ei consulat concordiam mutuâ, ope, auxilio, consilio, & fidei integritate, ut neminem uxor præ se coli intelligat; neminem ipsa præ viro suo utiliorem sibi, & meliorem, sive præsentem, sive absentem existimet. 6tò. Universim si humilis sit, faveat; si prudens, commiter tractet; si stolidam, acriter aliquando increpet; si superba, coercet. Qui superbæ paret, imperium amittit; humilem qui conculcat, eandem perdit: qui prudentem acriter reprehendit, desperationem accersit; qui stolidam nimis blande regit, irridetur.

Mater familias contrâ his vicissim dotibus polleat, si substantiam servare, & augere velit in rectè instituta familia.

milia. *Imò.* Viro pareat, sociam, non dominam sese credens. Uxor, & maritus duo sunt Magistratus, ait Aristoteles l. 1. Pol. ille major, hæc minor: à majore pendeat, eique obtemperet. *2dò.* Sedula in curandis domesticis juxta mentem, & 1. es viri. Studioſa providentiæ in iisdem, nè rei alicujus sit inopia; nitoris, & honestatis, ne quid displiceat; ordinis, ne quærentem aliquid fallat; medioeritatis, & frugalitatis, ut valetudini, & rei familiari consultum sit. *3tò.* In acta viri non inquirat, neque in arcana, neque in externa munia. Nam *feminae silentium, & prudentia pulcherrimum, quia rarissimum,* ait Heraclides.

4tò. Sincerè cum viro agat, eundem æstimet, & colat, tum ejusdem sanguine junctos. Hinc eidem fidem integram servet, ejus nutibus in omnibus rectis, & æquis obsequens, adversæ, & secundæ sortis comes sit, & adiutrix. *5tò.* Modestiam, & virtutem, vitæ honestæ, & pudicæ studium curet, & ab hoc commendari potius quærat, quàm vestium splendore, formæ specie, corporis nitore, vel auro. Certa sit, gloriam hanc omnibus aliis antecellere, & plus hæc decora ad laudem sinceram, quàm illa ambitionis instrumenta conferre. Hinc rarò domo exeat, nec nisi è viri præscripto sumptus faciat. Parcius se vestiat, ac leges sinant. In domum neminem, nisi viri arbitrio, inducat. *6tò.* Denique id Romanorum cordi sumat, quibus infamiâ notabatur mulier, quæ legum harum erat contemptrix. 1. Ne inter spectacula fabuletur. 2. Ne cibus se ingurgitet. 3. Ne secreto cum viro colloquatur. 4. Ne oculos in fanis attollat. 5. Ne de fenestris prospectet. 6. Ne domo sinè marito exeat. Quod hodie compluribus, etiam Europæ cultioris, populis in usu est admodum.

Naturalis bonorum possessio alia est, ut agriculturæ, aucupii, venationis, pastionis. *Artificialis* est alia, ut mercaturæ, & commutationis. Illam natura, Parens hominum, hanc industria reperit. In illa primam sibi curam vendicat plurimarum, & optimarum rerum suis è terris copia. Convenit, & necessarium est in hoc cæli, soli, regionis rationem haberi, diligentiam locari. *2dæ*
est.

est vini ex vinetis. Curandæ ergò per Celsum vites, dum germinant, florent, matureſcunt. Sic natura ipſa juvatur ad ubertatem. 3^{ta} est olerum, & leguminum ex hortis pro familia. Hic olim victus erat univerſus. Salubris corpori, & ſinè invidia parabilis. 4^{ta} est pomorum è pomariis reponendorum. Certum id tibi ſit: Patrem familias eum cenſendum non eſſe, qui ea emit, quæ ſuo è fundo parare poteſt. Hæc humus miniſtrabit.

Accedat pecus omne, ſive quod villa, ſive quod rura alere ſolent. Grandia hinc impendia non privatis duntaxat, ſed & regionibus. Pecuariam, & vinum Hungariæ qui novit, nervum regni quantum in annos ſingulos jam complectitur? Jam pecnaria pro ſoli, & regionum varietate varia. Camelis Aſia, Elephantis India, equis, & cornutis cæteris Europa abundat. Non noſtrum eſt ire per ſingula. Experientia, & generalia hæc principia, ſi amor adſit, quémque docebunt: ut nilil de venatione, aucupio, piſcatione, & ruribus hîc dicam.

Artificialis acquirendi ratio naturæ non adverſatur, ſed juvat. Primas hîc obtinet *Commercium*, eorum videlicet, qui mercaturam exercent, & commutatione per nummum factâ divitias ſibi comparant juſtas. Olim nâmq; Ariſtotele teſte, res pro rebus cummutabantur; quemadmodum & hodie in barbaris Regionibus Indorum fieri, experientia docet. In cultioris orbis plaga ut faciliùs res procedat, beneficio nummi res nummulariis compenſantur. Leſtiſſima hæc eſt parandæ pecuniæ methodus, modò legibus infrâ ſcribendis agatur. Imò natura ipſa hâc cauſâ verum id fecit: *non omnis fert omnia tellus*, ut *alter ab alterius pignore ſumat opes*. Republicas ipſas creviſſe vidimus, cùm crevêre commercia, ut Hollandicam, Genueſem, Venerâmque hodiedum videre licet. Floruêre regna, florente commercio: jacere contrâ eſt neceſſe, ubi jacent commercia; quid mirum proinde etiam privatas ſic creſcere familias?

Hæc porro mercatura exerceri poteſt, vel navigatione, mari, aut flumine merces advehendo; vel devectione, dum terrâ advehuntur. Aut ſæneratione, cùm nummus nummum è cenſu parit. Huc referre licet & illud, cùm
fru-

fructus fundi proprii venduntur, ut ligna cædua sylvæ, agri fructus, fodinæ, metalla, lapides.

Secundus modus est artium, seu artificum industria, cum suam quis alteri pretio locet operam, ut est fabrorum &c. aut eorum, qui obsequium deferunt virium, ut qui ligna, lapides &c. indies operarii deferunt, sed hæc ut dura, ita difficilis est opum parandarum industria. Felix Respublica, quæ artificum sic abundat numero, & delectu, ut dare magis, quam accipere valeat. Næ multa: hæc causa est, ut ditaretur Respublica, cur Gallia tot artes coluerit, vulgò *Manufacturas*. Anglia. & Hollandia cur Belgio veteri æmula. Cur se supra se levet Moscovia; & Vienna flore, quem possidet, gaudeat.

In his omnibus laudanda est æqui lucri cura. Utinam tamen non id Ovidii l. i. fast. verum sit, *creverunt & opes, & opum furiosa cupido; & cum possideant plurima, plura petunt*. Hinc saluberrimum est, si legibus definia- tur tum mercaturæ ratio; ne illa doli meditatio, & mendacii tritura, hominum improborum, non conditio- nis suæ vitio evadat: tum etiam opum adhibendarum us- sus per leges sumptuarias, quibus noverit civis, & nobi- lis, quid in ædificii sui, ac domûs structura, quid in ve- stium cultu, conviviorum apparatu, suppellectilium de- lectu indultum sit. Felix Roma, dum censoria floruit. Marcescere capit gloria, cum luxus censorum virgulam superavit, & frænum excussit.

Paucis, priusquam inanum sumam de tabula, hæc, quisquis es, seu familiam, seu Regionem ditandi sume principia. Justè, industriè, & solerter tuis rebus con- sule, habitâ exactâ rerum, munerum, locorum, perso- narum, negotiorum notitiâ. Quidquid horum dempse- ris, momentum grande tulisti. Virtutes summorum Ma- gistratuum à me positas consule, & legis hujus cernes compendium. 2dò. Dignitati, necessitati, utilitati quod prodest, in eo Sumptui non parcat; quidquid in his, aut hæc excedit, refecet. Hæc causa tot Provinciis recepti moris, exacto bello exauthorari non necessarium militem, pompam inutilem refecari, munerum copiam minui, ut stipendiis his superfluis ditari ærarium, communi utili-
tati

tati prospici, creditoribus satisfacere, & imminenti necessitati valeat provideri. *3tio. Unde, & quo. Unde*, id est, vide, quibus est fontibus tui redditus manent, quo pacto parari, & augeri cum æquitate possint. *Quo*: vide, quos in usus expendas. *Immo* te vigilantem in tuos, nemini à rationibus dandis, ut supra dixi, impunitate concessâ, efficiet; nè Plautiani renouentur exempla, qui opibus suis Antonio Caracallæ ipsi formidandus, quia potentior evasit, liber videlicet rationum dandarum: sed & industrium efficiet consiliorum, ut quemadmodum Ferdinandus, & Isabella Columbum novis destinârunt provinciis, & opibus quærendis; quemadmodum commerciis, navigationibus, & Societatibus Europam fervere conspiciamus, sic alienis nuper, justè tamen per te comparatis opibus res tua abundet. *2dum* porro cautum, & sapientem esse docebit. Ad hoc ipsum verò conferet commendatum sæpius studium solers rationum à Magistratu quolibet exigendarum, à quibus Philosophus cum Platone immunem vult nullum; hæc eos est fidei in obsequiis, hæc anchora salutis, & securitatis Regum, & regionum. *Ultimum* esto: vigilantia summa, ne impendiis majores fiant expensæ. Abyssum ipsam exhauriri necesse est, & vel Cræsi divitias decoqui, si plus sumatur perenni alveo, quam scaturigo subministret. Non refert exemplis firmare momentum hoc: lacrimæ, & ruinæ indies obversantur familiarum, testes, & magistræ hujus, quam omnibus intimam cupio, veritatis.

QUÆSTIO POLITICO - OECONOMICA.

*An commercia, præsertim maritima, Rempubli-
cam felicem magis, an fortem reddant?*

PRO FELICITATE.

R Ara donorum est trias, quæ privatis perinde rebus ac publicis germanam fundat, auget, stabilit felicitatem: alienis non egere, domesticis abundare, fædere animos sociari. Pulcherrima felicitatis epitome, hoc fructuum est commercii ortorum compendium. Partita est
pre-

providentia natura Provinciis, Imperiis, Regnis opes, singulis penè singulas duntaxat, rariùs plures, nulli omnes. Vincit naturam institutorum industria, velis exiguis Garamantas & Indos sic Europæ nectens, ut orientem in occidentem credas migrare. Nanciscitur hoc pacto Patria quævis domi suæ omnia, quasi omnium sit mater Septemtrio, quæ orbis exterius non jam gignere, sed avara rerum vota possint, aut velint optare. *Alterius non sit, qui suus esse potest*, vetus erat Politica. Verior nullibi regula, ac in Reipublicæ felicitate. Quo enim pacto certius canalem hujus alienis è terris in tuas derivas, ac dum non precario tum commoda, tum subsidia vitæ comparas, alieno non pendes aut arbitrio, aut lege, aut favore. Tantò quippe minùs aliorum indigus, quantò tibi magis sufficiens. Vincit admirationem Gentium Hollandia, in qua cessat esse prodigium, quia indies innovatum; quòd inops ferè omnium natura soli, fæcunda tamen sit omnium per mercaturam. Orientis opibus nostras ditat Provincias, nostris suas: dum aureos non rivos, sed torrentes, atque adeò felicitatis animam, & Reipublicæ nervum sibi reddit vestigalem. Sequuntur cætera Europæ emporia, Anglia, Gallia, Lusitania, Dania, Russia: quorum cura Princeps, Orientis & Occidentis, Indiæ, Asiæ, Africæ, Americæ, & quæ sunt ejusmodi nominum Societates erigere, tueri, propugnare; quibus è mente Philosophi (l. 1. de Rep. c. 9.) ea fundetur orbi felicitas, quâ commodè sufficiat omnibus, quod avaræ aliquorum in finibus deest naturæ. Risum equidem cierent conatus Principum, & Rerumpublicarum tam improbi, nisi hoc maritimorum cumprimis commerciorum molimine felicitas Patriæ fundaretur. Felicem reddit belli nervus Rempublicam? filia est commerciorum. Succum, & sanguinem sanguisugæ rapiunt exteri, luxûs & splendoris artium reddentes inventa, nostris aurum visceribus deposcentes. Merces utilitas, aromata necessitas, exteri Cæli delicias decumano multi impendio vendicant; si primis è manibus institutorum hæc vela deferant; exiguo aliena dum comparant, aureos Jovis imbres, atque adeò Saturni lustra domi suæ promovent, & conservant. Sua

non

non finè fœnore dum partitur exteris Patria, & alienis se ditans se tinà felicem reddit. Non memoro adamantinam Provinciarum conjunctionem; non alio magis stabiliendam consilio, quam mercaturæ? Quid porro felicitati optabilius unquam, eo Provinciarum fœdere sic animos vinciente, ut res & spes Patriæ omnes pari lance librentur. Ecquid porro ab hac felicitate metûs redundet in æmulos? Quid enim mercantium vela paveat hostis? Quid commodis suis studentium consilia vereatur Bellona? Quid Mars, ferro ac flammis armatus, imbellia mercium plaustra, Oceano circumacta exhorreat?

PRO FORTITUDINE.

Illustre nomen felicitas, non tamen separabile in Republica à fortitudine, atque adedò æmulantûm merui. Nemo felix, nisi quem vereatur tentare æmulus. Stat felicitas Patriæ commerciis præsertim maritimis, quòd domi suæ nacta omnia, alieni minùs egens subsidii, domi na magis quàm serva: quòd Reipublicæ sanguine pecuniâ locuples: quòd animorum fœdere sociata. Eadem, mihi crede, metûs in æmulos, quia fortitudinis momenta quàm optima. Dotes sunt Reipublicæ, & orbi non terrendo duntaxat, sed frænando pares. Metuitur ferè, qui sic affluit suis, ut alienis nec crescere possit, nec velit emolumentis. Sic pavendi omni quondam Mediterraneo Baleares, Bononiensibus Veneti, Hetruscis Genuares. Brittones demum Galli & Angli temeratori cuivis suppa res facti. Aurum animorum philtum, belli animam, & robur nominat orbis, Habes hunc a commerciis nervum. Sed & Provinciarum concordia vel stabilita, vel aucta commerciis, robori, atque adedò metui servit amplius, quàm felicitati. Fœderatum cum Anglia Belgium Mediterraneo dominans dum spectat orbis, æmulo cuivis suppar veretur. Nunquam Galliam hoc ipso ævo Anglis, Hollandis, Italiæ, Hispaniæ, Rheno, & Belgio non æmulam modò, sed metuendam miratus orbis fuisset, nisi Presti, Telonis Martii, & Massiliæ mercioniorum stabilita floruisent commercia. Quid Mars, ferro ac flammis onustus imbellia mercium plaustra Oceano cir-

cumacta exhorreat ? quæris : Vah præfidentiam ! Malè hostis spernitur, cujus ruinam trahit. Imbellia non sunt, quibus potiora præsidia, Mars si vivat, sibi ipse non pō-
 scat. Vulcanias sinu devehunt, marique ipso æmula elemen-
 ta committunt. Coronatis imbellia hæc plaustra nego-
 tium faceffivère capitibus, Imperia constituere. Novit
 Albuquerqueorum, Vasquiorum, Mendozæ laureas Ulyssy-
 po : Hispanorum ausus America, Gallorum Fræncia nova.
 Roma superat suis conclusa finibus, dum terris contenta;
 orbis imperio æmula, cùm maris mercaturam exorsa.
 Genuensium, Venetorum, Turcarum dominatûs initia tes-
 tes sint veritatis. Hanseatici fæderis Urbes, Lubeca,
 Hamburgum, Dantiscum cum cæteris, Septemtrionis o-
 lim terror effectæ sunt, quarum infringendæ bellorum po-
 tentiæ par nemo, nisi quod id temporis Austriacos inter
 Principes major nemo, Carolus V. orbis domitor maxi-
 mus. Armatas fæderati Belgii classes memora, ductos sub
 Philippo secundo stupuit Hispania Exercitus, fundatam-
 que Rempublicam, non alio expeditionum nervo, atque
 flore commerciorum. Eo sanè felicitis fortitudinis & po-
 tentiæ auctario, ut ætate quoque nostrâ Haaga Comitum,
 Ryswicum suis cum statûs Principibus pacificendorum fæ-
 derum, & agendorum coronatos inter vertices consilio-
 rum monopolia videri possint effecta. Nunquam Mardika-
 num portum fundando in tantos obices commercio Lu-
 dovicus XIV. tam pertinaci ausu contendisset tueri ; nisi
 ut, qui gentes ad nutum omnes bellis vel illatis, vel
 ostentatis terruerat, frænum idem eraderet eâ parte Ocea-
 no dominaturus. Hoc denique germine Russiæ hodiernæ
 flos martius creverat, quo Princeps unus Sueciæ, Da-
 niæ, Russiæ, Poloniæ, Orientis, Persidis etiam hodie
 mastyx, terror Gentium & populorum effectus, grandî
 nempe Portûs Archangeli in orbem omnem commer-
 cio. En felicitatem, quia fortem.



§. III.

Patrum familias cura in liberos.



Qui rude pondus erat, deformis & embrio : nè sit
Sanguinis indecoris , cura paterna facit.
Stirpe foret quoties soboles , & digna parente ,
Si quoque cura Patris digna parente foret!

DOCTRINA POLITICA.

DUplex est paterni officii in liberos genitos cura.
Ima est educatio , 2da institutio. Primum ex
his cum Philosopho ferè definiunt omnes. 1.
Lacte nutriendos esse , materno præsertim ; cum,
ut in Ethica suprà dixi , cum lacte virtutes ac vitia suman-
tur à liberis. Philélpho teste , gemini agrestibus nati pa-
rentibus , quorum alter porcino , alter caprino nutritus
est lacte ; ubi adolevère , hic à frondosis montium jugis ,
ille à lutosiis paludibus avelli non potuit. l. 1. c 3.

2dò. Cibus firmioribus tantùm assuesceri convenit , non
tamen pharmacis , nisi ægritudo cogat. Neque facile per-
mittendus cibi alienius horror , nè fames deficientibus
aliis toleranda sit aliquando. 3. Frigori , & calori mode-

rato assuefieri nihil nocet. Valetudo sic roboratur ; & bello , cæterisque Reipublicæ commodis firmatur. 4. Vini usus parcissimus sit ; imò etiam parvulorum nutricibus vini usum prohibet Aristoteles. Quas si matris debilitas nimia , vel ægritudo adhibendas esse cogat , probas moratas , & honestas , præsertim verò continentes , sani corporis , temperantes , & plerumque bono ciborum genere utentes , ad lac melius formandum.

Institutio quarto vel quinto anno ætatis est auspicanda. Rasa enim tabula ætas hæc coloribus quibusvis aptissima est. Chrysostomi tamen , & Quintiliani è mente , ante septennium intensiore curâ ut vacet juvenus , consultum est. Cùm tamen tum quoque loqui , & agere nonnulla necesse sit , suadetur quasi lufitantibus , & aliud agentibus utilia literarum præcepta instillare. Quod præsertim in nobilibus commendandum , quibus per dicta , statuas , lusus , Geographiæ , aut Architecturæ militaris , aut literarum fundamenta suggeri & commodius , & tenaciùs possunt. Experientia certè testis est , quemadmodum ii , quibus graves principio labores dantur incrementum sumere non possunt ; ità qui linguarum , scientiarum , & artium peritiâ nimis maturè instar præcociis fructûs imbuuntur , quia præsumunt , tum , cùm sapere oporteret , contentione perpetuâ fatigatis , & exhaustis quasi potentiarum viribus , ante tempus desipere. Sensim igitur , & crescentibus annis crescere oportet & commoda institutionis.

Horum alia sunt regendis moribus , componendo ad virtutem corpori , formandis artibus , & scientiis ingenio. Universim sapienter monet Aristoteles 7. Pol. 17. omnibus rebus , quibus assuefieri pueri possunt , ab ineunte ætate assuefaciendos. Cùm educatio ipsam sæpe naturam immutet , & tenaciùs semper hæreant animis , quæ rudibus annis percepimus. In moribus formandis vitanda præprimis juveni. 1. Impudentia , seu protervia. 2. Iracundia , & pertinacia. 3. Otium , & delicia. 4. Superbia in vestitu , incessu , loquela , gestu. 5. Intemperantia : præsertim verò 6tò. improborum consortia , & ludia non decentes. Unde & famuli arcendi , exempli , aut
lin.

linguæ non castigatæ. *Verba enim movent animos, omnia lascivia pectus pulsant, & in venas semina mortis agunt.* Imò famulantium confortia penitus prohibenda sunt, quæ plerumque vilia sunt, & vilitatem animis ingenerant.

Curanda porro præ reliquis 1. pietas, & reverentia in Deum. 2. Ingenuitas, & candor pectoris. 3. Modestia in omnibus, & erga omnes libertas. Curiosus, & elatus fastidio, & odio est, non amor. 4. In consortio aliorum facilitatem, & suavitatem non affectatam colere discant. 5. Reverentia Majorum, præsertim sacrarum personarum. 6. Parentum cumprimis exemplum curandum, ne quid in eo spectent, nocere quid possit. Vim enim legis dicta, & facta Parentum in liberis obtinent.

Corpori formando tria sunt. I. Somnus moderatus sit. Tritum illud: *septem horas dormisse sat est, juvenique, senique.* Fas erit juventuti unam, alteramve, rariùs tamen, addere horam. Nisi verum velis id Martialis. l. 13. *dormitis nimium glires, vitulique marini; nil mirum, si vos crassa Minerva premit.* Moderatus somnus humores consumit, nimius auget. 2dò. Labor, non otio solidentur vires. Labor moderatus sit, ætati, & statui competens. Hinc utilis commotio corporis. Aqua stagnare cogitur, si semper consistat. Sparta, & Roma non otio, sed campo Martio vires parabat, & durabat. Juvat moderatum aliquando frigus, subinde calor: venatio, aut vigilia modica; sitis, vel fames aliqua. Levius præsertim exercitium, rerum firmiore ætate exercendarum simulacrum. Hæc valetudini, & Reipublicæ prodesse censet cum Plutarcho, Quintiliano, & Xenophonte Aristoteles. Hodie puerorum corpora & mores, utinam non nimiam indulgentiam, & mollitiæ perdantur. Qui passus nihil in pueritia est, vir in magnis quo pacto durabit?

3tiò. Mollis vestitus, delicatum absit nutrimentum. Sapienter Plato l. 6. de leg. *delicata, & luxuriosa educatio maxima perniciēs est, ut quæ nervos & mentis, & corporis frangit, & ingenia depravat.* Hinc miserio-

fer. Ubi libertas, voluptas, pecunia est, ibi vitiorum omnium sedes est. Experientia testis, moliter educatos, aut infirmos esse corporibus, aut in obediētes parentibus, aut insigniter flagitiosos. Vah insaniam! tam pretiosè eos perdere, quos tanto haberi in pretio natura, & amor Parentum vult. Non indulgentia, sed natura præstantes liberos facit.

Institutio ingenii caput est omnium. Sapienter enim Dio: Majorum sepulchris prohibendos censuit, qui nec doctrinam didicerint, neque artem exercuerint. Nullus ergo in Republica fucus tolerandus est pro communi mel- le quasi reluctans laborare. Artibus proinde formandum ingenium; mechanicis, si sint ingenii hebetioris, conditionis vilioris, corporis validi. Liberalibus applicandi, quibus ingenium feliciter obtigit. Præsertim verò nobilitas. Cui si scientiarum cognitionem adimas, alteram Nobilitatis tessera ademit, ut supra in Politica dixi. Si Aristotelem audiam l. 8. Pol. c. 1. *Inutile quidem est Nobilitati, se totam scientiis immergere*, nisi aliquem peculiaris ardor incitet; cum studia sua publico Nobilitas debeat. Ut tamen & Reipublicæ utiliter serviat, nōsse oportet studia literarum, & gymnasticam: illa ingenio, hæc corpori formando mirum conducunt. Literæ intellectum illustrent: saltatoria, gladiatoria, equestris corpus solidat, quas & Plato probat. Musicam, non eam, quæ vocum, sed quæ soni est, præfert Aristoteles; sed & in hac Nobili ea solum expetenda, quæ mansuetior; litui enim, & tubæ vehementiæ sunt majoris. Scholas publicas etiam pro Nobilibus Aristoteles in Lacedæmoniorum exemplo præ privatis commendat 4. Pol. c. 9. In illis enim æmulatio, & fervor; victi erubescunt, victores exultant, & animantur.

2dò. Omnibus tamen mechanicæ arti addicantur, curanda ut minis est legendi notitia. Vix enim tam infelix invenias ingenium, cui materna diligentia literarum notas instillare non possit. Usas hæc solertiâ refert non nullas Franc. Patricius l. 4. de instit. Reip. dicens *tesseras literarum notis pingebant, vel plumbea numismata elementis imprimebant, puerisque suis ostendebant.*

Illi (ut moris est) talia Matrem efflagitabant, hæc autem literarum nomina, notamque docebat, edicbátque, ut sibi numismata illa vellent, inter multa quærerent, & quæ docuisset, invenirent, nomina, notasque redderent; quâ aviditate pueri commoti faciliè etiam in tenera ætate literas ediscebant. Instar vasculorum igitur, quæ angusti sunt oris, informandi sunt pueri; sensim influendo complebis ad summum; si impetu superfundas, respuunt. Formandi sunt, non obruendi. Memoria præsertim constanti usu, & exercitio: sensim sinè sensu grandem hoc pacto cumulabis acervum.

3^{to}. Severitatis lex habeatur, sed & modus servetur. Lex sit; nam qui parcit virgæ, odit filium. Eccl. 30. sunt enim, qui objurgationes, & laudes respuunt, verba metuunt. Modus servetur, addidi, nam pueri solo metu ducti nihil ex animo faciunt; caveant, dum metuunt facta resciri; si occulta sint omnia, ad ingenium redeunt. Continet eos disciplina liberalis, ratione, & admonitione constans, obturat sævitia. Laudandi ergo subinde, cum rectè egerunt; objurgandi, cum perperam: castigandi moderatè, cum morem gerere nolunt, & pervicaces sunt.

4^{to}. Lasciva scripta, picturæ, spectacula comica moribus noxia cane pejus, & angue removenda. Utilibus contrà & honestis eos fabulis oblectare juvat. 5^{to}. Ingenio vini usus officit; interdicendum ætati parvæ, aut moderatissimè dandum. 6^{to}. Ludus aleæ vetandus. Jacebit secus ingenium. Furti, & mendacii semen hiliudi sunt. Certè inter aleatores, & tesserarios tantum ait Ammianus differre, quantum inter fures, & latrones. Præterquam quòd libido ludi morbus sit: qui contractus à puero, sanari in sene non potest.

Servos quod attinet, Xenophon l. 3. Memorab. Munus, & fundamentum Domini ait, servos obsequentes, morigeros reddere. Reddet Paterfamilias, si exactè Imò. victum, & vestitum naturæ sufficientem, labori, & robori congruum præbeat. 2^{do}. Tametsi non nimis remissè; multò minùs tamen familiariter tractandi sunt unquam v. g. ut cum iis ludat, omnia dissimulet, ex quo inertia,

protervia , contemptus oritur. Amari tamen magis , quam timeri cupiat. Verbo : absit familiaritas , absit despectus. Fidi servi neque nascuntur , neque coguntur , sed benevolentia parantur. Sua proinde det singulis imperia herus , citra tamen austeritatem : præbeat item ea , quæ famulis propria , tum enim maximè studiosos , & laboriosos experietur. Unde compendium maximum Domino.

3^{tiò}. Labore servus non carcat. Castigatio rara sit , nec unquam sine causa , neque sine modo. Medicina hæc malis est. Quod si verò castigetur famulus , cui aut merces , aut victus sufficiens negatur , exulcerat animos. Nomine victus vinum non venit nisi raro dandum ; hoc enim insolentia fomes est famulis. 4^{to}. Optima servorum genera sunt , quæ nec nimis infirma , nec fortia nimis : hæc enim prædientiam , illa metum in omnibus præferunt. Universim exacta det rerum gerendarum imperia , vigil adsit Argus executionis mandatorum Paterfamilias ; neque rationibus dandis liber sit ullus famulantium. Spes enim lucri , & certa impunitas occasionem præbet se ditandi , Dominum expilandi.

5^{to}. Habenda est meritorum ratio , augenda nonnunquam præmia in cibo , veste , mercede. 6^{to}. Numerus famulantium sit pro necessitate. Non multitudo , sed bonitas in servorum delectu spectanda. Plus sane detrimenti sumit familia , quæ improbis , quam quæ nullis omnino utitur servis. Cato servos delegit disciplinae parientes catulorum in morem. In adultis universim neque audacia immodica , neque timor nimius est probandus. Plus tamen , & frequentius illa nocuit Dominis , quam metus. Neque subtiles , & ingeniosos nimium , quia facile protervos : neque habetes nimium , quia incurios , & ignavos , deligendos velim. Subtilitas ingenii vulpes , & harpyas sæpe gignit , ingenio feliciori destitutos natura obsequio destinat , quia imperio Domini veluti Cynosuræ intentos.

QUÆSTIO POLITICA.

Uter hostis perniciosior , qui Rempublicam civibus , an qui literarum studio cives spoliatur ?

PRO EO, QUI REMPUBLICAM CIVIBUS SPOLIAT.

Membra corpori adime , & giganteam humo molem allides. Respublica corpus grande est , civis membra ejusdem. Si Philosophis fides sit ; sumit arbor à radice succum , & ramis tribuit ; at depuratum , quia excoctum magis recipit ab iisdem. Succis proinde ramis omnibus mori plantam usuvenit. En typum Reipublicæ , ac civium ; his nititur , his servatur. Ab hoc fonte robur illius , ab his fibris vigor , & spiritus. Ipso vocis Etymo , quid notet Respublica , vide : Civium est communio. Ablato corde , quid supererit ? nisi ipsam à seipsa velis dividere. Exemplar quondam & decus Rerumpublicarum fortium Sparta , æternitati se transcripsit in Cynegiro atque Leonida. Meritum hoc gloriæ virtus civium genuit Patriæ. At quo pacto stetit tot inter æmulos , tot tamen laureis dives ? mænium vice civis quilibet fuerat. Tolle præsidio mænia , palmam habes , quoties libuerit vestigalem. Sensit Roma , cum post Cannensem cladem domus penè nulla Urbi supererat , quam viduam Quiritum sanguine non luxissent Matres. Sublato Romani sanguinis flore , & Civium lætissimo numero , quid nisi penè urna supererat ? Quòd si tum confestim pro Portis castra fixisset Hannibal , Romanæ vespillo gloriæ in Capitolio triumphasset , Romæque Carthaginem intulisset. Pari sorte nutabat eadem orbis Domina priùs , cum virtus Gallica ejusdem viscera scrutaretur , Romanosque sub jugum mitti posse docuisset , nisi Tarpejam rupem , & Patriam Manlius servasset. Renovata nempe sunt vulnera , quæ quondam sensit Græcia in cæde manipuli ; qui par erat Exercitui , Persidem omnem sub Xerxe in arma ciente in montium faucibus gloriosè sistenti. Mitiùs furit , qui eminus bacchatur ,

& antemuralia impetit. Acriùs semper sævit , & jugulo imminet , qui succum ipsum tollit ac sanguinem. Agit primum , qui literis cives : agit secundum , qui Rempublicam civibus spoliât. Hostis uterque , & Reipublicæ æmulus , sed mansuetior ille , quia remotior : acerbior iste , quia dum intimus : & crudelitate & diuturnitate mali immitior. Vulnus quodlibet eò ferè acerbius , quò diuturnius. Quid porro sentiri possit acriùs , ac quod non nisi annorum impendio , imò & sæculorum fluxu compenses. Rapit calybs horâ unâ myriades , non tamen horâ pariter unâ cives , ut fungos parit natura. At acerbum sit quamvis uno carere munimine , acerbius longè est nominis una ac gloriæ post fata etiam vindice spoliari. Quàm decumanum Patriæ luxit vulnus Latium omne , cùm à Vejentibus die uno Fabios tulit fama peremptos. His enim verum illud Horatii semper : *O & præsidium , & dulce decus meum*. *Præsidium* inquam , ut sinè hoc procellæ cuius pila sit postliminio Patria. *Decus* porro , quo viduata , sit furori cuius ludibrio. Nefas erat quondam amictu vel crine spoliare , quantò magis cive ? Quo enim pacto floreat artes , potentia , opes ? nisi civium affluxu. Sinè his quis fundum excolat , sementem sulcis credat , artes quaslibet provehat ? At esto , jaceant incultæ artes , vivat modò Civis Patriæ , sibi constans , exteris suppar degit , & cristas tollit. Nocet , qui literas adiunt ; sed decus duntaxat tollit , non vitam. Vita bonorum compendium est , & corona , hæc Civis solus est.

PRO EO , QUI LITERIS CIVES.

Vita bonorum compendium & corona est , fateor , si vita sit. At illudne vita dicendum , quod esse solum dicit Philosophus ? Non hæc profecto digna homine vita est , nisi fuerit , quod eundem discernat à brutis. Ratio sola , & excultus literarum studio usus est , quod altiozem brutis constituit. Ut meritò Mytilenæi maris potiti imperio , non aliâ perfidos sub jugum missos pænâ dignos censuerint , atque hæc , ut literarum rudes manerent. Quasi vero pæna morte ipsâ crudelior sit ignorantia. Sapienter judicatum. Sic Cumanos enervavit quondam Aristot.

stodemus. Quis enim non vincat Patriam facilè , quæ consiliis , cultu , virtute , nervo opum caruerit ? caret his omnibus , si caruerit literis. Consilia cupis ? Solones , Perricles , Xenophontes , Themistocles , quanta nomina ! quanta robora ! Non aliter tamen , quàm literis. Mors illis per has sperni docta , quasi mortales non forent. Da finè literis pacem , ruditate & incultis artibus rigentem ; confusionem gignis , qui multitudinem otii amantem , non tam expertem consilii , quàm impotentem imperii. Da contrà infestam belli aleam , temeritas duci periinde , ac militi erit domestica , quia finè providentia ; unde certior ruina. Nervum demum cupis ? fundatur iste commerciis. Sic Ubi ; sapienter neminem suorum commerciis sive addici , qui latii sermonis , quo orbem emetiri posset , gnarus apprimè non fuerit. Et quid eorundem sic provexit fortunas , atque hoc ipsum sapiens de sapientia consilium ? Imò verò quis non vincat Rempublicam , quæ vivens vitâ jam caret ? Non vivit Civis , qui , quid hodiernum , aut crastinum , vixdum novit ; tam futuri incurius , quàm ignarus præteriti ; utrumque solo literarum defectu. Ut meritò Romanus sapiens mortem , & vivi hominis sepulturam , vitam sine literis dixerit. Imò verò Aristoteles docti ab indocto differentiam non aliam statuerit , ac vivi a mortuo. Novi quidem , meliùs nonnullorum sententiâ esse Reipublicæ , tametsi literis non exultæ , quàm civium destitutæ præsidio prorsus non esse. Præsertim quod speciosa quædam videri possit socordia literarum quies. At Arcade hanc vocem digniorem censuit Alphonsus quondam , quàm homine. Nam qui cum Licinio & Domitiano literarum cultum spernit præ civium numero , eò Reipubl. nocivus est magis , quod Ladislai Ungariæ Regis è mente belluarum malit Rempublicam , quàm hominum , etsi paucorum ; ut cum ignorare literas debeat nemo , nisi homine minor. Paucis gaudeat Respublica Civibus , his tamen literarum studio cultis , exulabit in discrimine pusillanimitas , fortitudo propulsabit adversa , constantia retundet assultus. Membra tollit , qui Cives , fateor : at radicem & animam petit , qui literas adimit , ut à quibus vigor pace , ac bello. Divinum lege oraculum :

lum: *Multitudo Sapientum sanitas orbis.* Hinc ea Sapientum semper contentio, non antè vivendi finem ponere, quàm discendi. Imò per has, ut viveret Respublica, pro iis & vitam ponere. Plinium ætænos lustrantem vortices memorat Campania. Archimedem Syracusæ Geometriæ intentum. Aristotelem Peripatus, ne somno quidem indulgentem, nisi pelvi æneâ cum globo suppositâ, cujus lapsu dum somni indiga excitatur à quiete natura, laboris literarii pariter admoneatur. Melius quippe, & potiori quidem sui parte vivit Respublica, si per sapientes, quia sapiens vivat, sibi tutelæ, orbis admirationi. Fabulam credo, jactantiam tamen ferunt nonnulli trium sapientum Matris, Alphonsi Tostati, Alberti Magni, & Petri Lombardi, adeò felicem se dicentis, quòd tantis in natis alieno quamvis toro susceptis perennaret, ut pænitudine sceleris tangi nullo modo posset. Quid igitur æternitati vivens Respublica non patiatur per sapientes, si æternitatem per literas adimi cernat, cum demptis civibus damna solum temporis subeat, sapiente vel unico sæpe affatim compensanda. Denique non magis nocet hostis fruges omnes succidens, atque is, qui incultam finit humum in vepres, ac sentes succrescere,

FINIS.





PROBLEMATUM

E T

DOCTRINÆ

POLITICO-OECONOMICÆ

PARTIS TERTIÆ

INDEX.

Quæstio Unica.

§. I. De Patre familias.	pag.	3
§. II. Mutua Patris, & Matris familias munera, eorundem modi parandi fortunas.		10
§. III. Patrum familias cura in liberos.		19

INDEX

Quæstionum Problematicarum

INDEX.

I. An otiosi, an negotiosi diutius vivant?	pag.	6
II. An commercia, præsertim maritima, Rempubli- cam felicem magis, an fortem reddant?		19
III. Uter hostis perniciosior, qui Rempublicam civi- bus, an qui literarum studio cives spo- liat?		25

O. A. M. D. G.





